

ପ୍ରେରିତ ଶିଷ୍ୟମାନଙ୍କର କାର୍ଯ୍ୟର ବିବରଣୀ ପ୍ରେରିତ ଶିଷ୍ୟତ୍ବାଦ ପାଢ଼ିତ୍ବାଦ ଗତ ପ୍ରେରିତ ବଇ ବିଷୟରେ ଅଣ୍ଟା ଘଟ

ପ୍ରେରିତ ବଇ ଆଦୁତ ମଣ୍ଡଳିତ ଆରାମ୍ ନୁ ବେଲା ଇଦ୍ ଯିରୁଶାଲେମ୍‌ତାଗାଙ୍କ, ଯିହୁଦା, ସମରିଆ ନୁ ବାୟଦେ ବେଲା ପ୍ରତାର ଆଡ଼େ ଇଦ୍ ଜିସୁନ୍ ସ୍ୱର୍ଗତାଗ୍ ଆଦାନ୍ ମୁନେନ୍ ତାମ୍ ଶିଷ୍ୟତ୍ବକିଙ୍କ କେସ୍‌ମାଡ଼ତଡ଼ । ୧:୮ ପ୍ରେରିତ ବଇ ଲୁକନ୍ ତଡ଼ ଲେକା ଆଡ଼େ ବେନକି ଲୁକ ଲେକତାଦ୍ ସୁସମାଚାର ଗାଲା ଲେକିମାଡ଼ତଣ୍ । ଅଣ୍ଟ ଅର୍ଡୁଣ୍ଡ ତାଲୁର ମାଡ଼ତଣ୍ ନୁ ବୁଲ୍ ଇଲ୍‌କେ ଲେକାନଙ୍କ ଗାଟି ଦାନ୍ଦେତଣ୍ । ଅଣ୍ଟ ରେଣ୍ଡିଆସ ସୁସମାଚାର ନୁ ପ୍ରେରିତ ବଇତାଗ୍ ତିଓଫିଲ୍‌କିଙ୍କ ଦର୍ଶା ମାଡ଼ିତଣ୍, ଅଣ୍ଟ ଅର୍ଡୁଣ୍ଡ ଗ୍ରୀକ୍ ନାରୁଣ୍ଡ ମାଡ଼ତଣ୍, ବଇକି ରେଣ୍ଡିଆସ ଗ୍ରୀକ୍ ନୁ ଯିହୁଦୀ ଗୋଷ୍ଠୀ ସେଙ୍ଗେ ମାଡ଼େ ୧:୧ ।

ସମ୍ବାବନା ପ୍ରେରିତ ବଇ ଜିସୁ କ୍ରିଷ୍ଟନ୍ ଜନମ୍‌ରେ ପେକେ ୬୦ ରୁ ୬୪ କ୍ରିଷ୍ଟାବ୍ଦ ଲୋପେ ଲେକାଆସ୍‌ମାଡ଼େ ବାଡେଙ୍କିଡ଼କେ ପାଉଲନ୍ ବନ୍ଦିମୁକ୍ତ ମୁନେଙ୍କ ବଇ ଲେକାନାଦ୍ ପାଡ଼ିୟି ତେରିମାଡ଼େ । ଲୁକ ଆନେତେ ପ୍ରେରିତ ପାଉଲନ୍ ତଡ଼ ଉଡ଼ମାଡ଼ତଣ୍ ନୁ ଇଦ୍ ବଇଦିଙ୍କ ଅନେତକିଆ ଲେକିମାନ୍‌ତଣ୍ ଇଞ୍ଜ କେତାନଙ୍କ ଆଡ଼େ । ପ୍ରେରିତ ବଇ ଲୁକ ସୁସମାଚାରରେ ଅନୁବୁତି ଆଡ଼େ, ଇଦ୍ ଜିସୁନାଦ୍ ସ୍ୱର୍ଗତାକ୍ ଆଦାନାଗାଙ୍କ ଆରାମ୍ ଆଡ଼େ ଲୁକ ଲେକତାଦ୍ ସୁସମାଚାରତାଦ୍ ନୁ ପ୍ରେରିତ ବଇରେ ଲେକ୍‌ରେ ଉଦେଶ୍ୟ ସାମାନ୍ ।

ଅଣ୍ଟ ତିଓଫିଲ୍‌ଙ୍କ ନୁ ପେରସାନ୍ କ୍ରିଷ୍ଟିୟାନ୍ ନାରୁଡ଼କିଙ୍କ ନିଜାମ୍ ଆଦାନଙ୍କ ଆଲ୍‌ସୁତଣ୍ । ଅଡ଼କିଂଙ୍କ ଶିକ୍ଷା ଇଡ଼ତାଦ୍ ବିଷୟ, ଜିସୁ କ୍ରିଷ୍ଟନ୍ ଜୀବନୀ ନୁ ବିସ୍ତାରଲାବ୍ ମାଡ଼ମାନ୍ଦାନ୍ କ୍ରିଷ୍ଟିୟାନ୍ ନାରୁଡ଼ ବିଷୟରେ ବୁଲ୍‌ଇଲ୍‌କେ ଇସାବ୍ ନେଃହିତଣ୍ । ପ୍ରେରିତ ବଇତାଗ୍ ଆଦ୍ୟ ମଣ୍ଡଳି କ୍ରିଷ୍ଟନାଗ୍ ବିଶ୍ୱାସ ନେଃଏତାନ୍ ମାଇଦିଙ୍କ ମାନ୍ ସେଙ୍ଗେ ଉଦାହରନ୍ ଇଡ଼େ । ପ୍ରେରିତତଡ଼ ଉଦାହରଣ୍‌ତାଗାଙ୍କ ମାନାଡ଼,

ପୁନର୍ନାମ ଆଦତେ ଯେ, ବେଲା ପବିତ୍ର ଆତ୍ମାଙ୍କ ନିର୍ଭର ମାଡ଼ି ଖେରେ
ନାରୁଡ଼ାଗ୍ ସୁସମାଚାର କାବୁର ପ୍ରଚାର ମାଡ଼ିତଡ଼ ।

ବଇଡ଼ ଲୋପେ ମାନ୍ଦାନ୍ ମୁକ୍ୟ ବିଷୟ

୧. ପବିତ୍ର ଆତ୍ମା ଡିଗାନାଦ୍ ନୁ ମଣ୍ଡଲି ପେର୍ଯ୍ୟାନାଦ୍ । ୧:୧-୮:୧
୨. ମଣ୍ଡଲି ତାଡ଼ନା ନୁ ସୁସମାଚାର ବିସ୍ତାର । ୮:୨-୧୨:୨୩
୩. ପାଉଲନ୍ ମୁନେଡ଼ ମିଶନାରୀ ଯାତ୍ରା । ୧୨:୨୪-୧୪:୨୮
୪. ପୁଃନେ ବଶ୍ୱାସୀଡ଼, ଦରକାଡ଼, ନୁ ଜିରୁଶାଲମ୍‌ତାଗ୍ ମିଟିଙ୍ଗ୍ । ୧୫:୧-୩୫
୫. ପାଉଲ୍‌ଡେ ରେଣ୍ଡଦାମ୍‌ତାଦ୍ ମିଶନାରୀ ଯାତ୍ରା । ୧୫:୩୬-୧୮:୨୨
୬. ପାଉଲ୍‌ଡେ ମୁଣ୍ଡଦାମ୍‌ଡେ ମିଶନାରୀ ଯାତ୍ରା । ୧୮:୨୩-୨୦:୩୮
୭. ପାଉଲ୍ ଜିରୁଶାଲମ୍‌ତାଗ୍ ବନ୍ଦି ଆଦାନାଦ୍ । ୨୧-୨୬
୮. ପାଉଲନ୍ ରୋମ୍‌ତାଗ୍ ଆଦାନାଦ୍ । ୨୭-୨୮

ପବିତ୍ର ଆତ୍ମାତେ ପ୍ରତିଜ୍ଞା

୧ ✠ପ୍ରିୟ ତିୟଫାଲସ୍, ନାଖାଦ୍ ମୁନେନ୍ ତିଆର୍ ଆଡ଼ତେ ଲୁକ
ବଇତାଗ୍ ଜିସୁ ତାନ୍ ପାଡ଼ନ୍ତି ଆରାମ୍ ମାଡ଼ତାଗାକନ୍ତୁ,

୨ ସ୍ୱର୍ଗତାଗ୍ ଆଦାନ୍ ଯାକ ବେନାସାରେ ପାଡ଼ନ୍ତି ମାଡ଼ିମାଡ଼ତଣ୍ଡ ନୁ
ଶିକ୍ଷା ଇସ୍ ମାଡ଼ତଣ୍ଡ, ଆଖିରେ ବିଷୟ ଲେକିମାଡ଼ତାନ୍ । ସ୍ୱର୍ଗତାଗ୍
ଆଦାନ୍ ମୁନେଙ୍କ ବେନଡ଼କ୍ ଅଣ୍ଡ ନିଜେଡ଼ ପ୍ରେରିତ ଶିଷ୍ୟ ଇଞ୍ଜି
ଏଞ୍ଜି ମାଡ଼ତଣ୍ଡ, ଅଡ଼କିଂଙ୍କ ଅଣ୍ଡ ପବିତ୍ର ଆତ୍ମାତେ ଶକ୍ତିତେ ଆଦେଶ୍
ଇସ୍‌ମାଡ଼ତଣ୍ଡ ।

୩ ଆସୁଚେ ଅଣ୍ଡ ଜିଝୁନ୍ ମାଡ଼ତଣ୍ଡ, ଇଦ୍ ପ୍ରମାନ୍ ମାଡ଼ାଙ୍କ ନୁ
ଶିଷ୍ୟତାଦ୍ ଏକା ଦୁର୍ ମାଡ଼ାଙ୍କ ଅଣ୍ଡ ତାନାଦ୍ ଡଲ୍‌ଡେ ପେରକେ
ଚାଲିଶ୍ ଦିନ୍ ଏଞ୍ଜୁନା ନାର୍ଗେଦାମ୍ ଅଡ଼କିଂଙ୍କ ଦର୍ଶନ୍ ଇସ୍ ମାଡ଼ତଣ୍ଡ
। ଅଡ଼ ଜିସୁଙ୍କ ଉଡ଼ିମାଡ଼ତଡ଼ ନୁ ଜିସୁ ଅଡ଼କିଂଙ୍କ ଇଶ୍ୱରତାଦ୍ ରାଜ୍ୟ
ବିଷୟତେ କେସ୍‌ମାଡ଼ତଣ୍ଡ ।

୪ ✠ଯିରୁଶାଲେମ୍ ଅଡ଼ ଅଣ୍ଡୟାଗେ ତିୟାଙ୍କ ଗୁଡ଼ତେ ଖେଲେ ଜିସୁ
ଅଡ଼କିଂଙ୍କ ଇଦ୍ ଗର୍ ହିଡ଼ତଣ୍ଡ, “ଜିରୁଶାଲମ୍ ଝିଡ଼ସ୍‌ମାଟ୍ । ସ୍ୱର୍ଗତେ

ବାବାଲ୍ ମିକିଂଙ୍କ ବାଆଁରେ ହିନ୍ଦୁତ୍ବ ଇଞ୍ଜ ପ୍ରତିଜ୍ଞା ମାଡ଼ତ୍ବ ନୁ ବେନ୍ ଦାନ ବିଷୟରେ ନାନ୍ ମିକିଂଙ୍କ କେସ୍ ମାଡ଼ତାନ୍, ଆଦ ପାଏମ୍ ଆଦାନ ଯାକ କେପାଟ୍ ।

୫୫ ଯୋହନ୍ ହେରତାଗ୍ ବାପ୍ତିସ୍ମ ହିନ୍ଦୁତ୍ବ, ବାତେଙ୍କ ଇଡ଼କେ ସୁଦୁର୍ ଦିନାଡ଼ ଲୋପେ ମିଡ଼ ପବିତ୍ର ଆମ୍ବାତଡ଼ ବାପ୍ତିସ୍ମ ଆଦତିଡ଼ ।”

ଜିସୁ ସ୍ବର୍ଗତାଗ୍ ଆଡ଼ତ୍ବ

୬ ଅନ୍ଦିନେ ପ୍ରେରିତ ଶିଷ୍ୟଡ଼ ଅଣ୍ଡୟାଗେ ମାନ୍ଦାନ୍‌କେଲେ ଜିସୁଙ୍କ କେଡ଼ତ୍ବ, “ପ୍ରବୁ, ନିମ୍ ଇଞ୍ଜେ ଇସ୍ରାଏଲ୍‌ଡ଼କିଙ୍କ ଅଡ଼ାଦ ରାଜ୍ୟ ମାଲ୍‌ପି ଇଦ୍‌ତିନ୍ ?”

୭ ଜିସୁ କେଡ଼ତ୍ବ, “ଡାରିକ୍ ନୁ ସମୟତିଙ୍କ ନା ବାବାଲ୍ ତାନ୍ ଅଦିକାର୍ ଗଟ୍‌ରେ ମାଡ଼ିମିନ୍ଦେଣ୍ । ଇସ୍ରାୟାରେ ବେସୁର୍ ଗଟେମ୍ ଆଦତେ, ମିଡ଼ ପୁନ୍ଦାଙ୍କ ଦରକାର ଇଲେ ।

୮ ୫୫ ବାତେଙ୍କ ଇଡ଼କେ ମିଲ ପରର ପବିତ୍ର ଆମ୍ବା ଡିଗ୍‌କେ, ମିଡ଼ ଗକ୍ତିଶାଲୀ ଆଦତିଡ଼ ନୁ ଜିସୁ ପୁରା ଯିରୁଶାଲେମ୍ ଯିହୁଦା ନୁ ଗମିରୋମ୍ ନୁ ପୃତିବିତାଗ୍ ଶେଷସୀମା ଏଞ୍ଜୁନା ନା ସେଙ୍ଗେ ମିଡ଼ ସାକ୍ଷି ଆଦତିଡ଼ ।”

୯ ୫୫ ଇଦ୍ କେଡ଼ତେ ପେରକେ ଜିସୁଙ୍କ ସ୍ବର୍ଗତାଗ୍ ମାୟିଆଡ଼ତାଦ୍ ଅଡ଼ ଉଡ଼ତଡ଼ ନୁ ଖେରଡ଼ ମାଦ୍ ଲୋପେ ଅଣ୍ଡ ଅଡ଼ାଞ୍ଜୁ କଣ୍ଡାନ୍ ମୁନେକନ୍ଦ୍ ମାୟିଆଡ଼ତଣ୍ ।

୧୦ ଅଣ୍ଡ ପରର ଆଡ଼ତେ ପେରକେ ମିକା ଅଡ଼ ଅଣ୍ଡୟ କଣ୍ଡେତେ ସ୍ବର୍ଗତାଗ୍ ଉଡ଼ିମାଡ଼ତଡ଼ । ପାଣ୍ଡି ଚକାସିଲେ କେରତେ ଇରଞ୍ଜୁଡ଼ ନାରୁଡ଼ ହଟାଡ଼ ଅଡ଼ ଗାରରେ ଖାସ୍ ନିଡ଼ତଡ଼ ।

୧୧ ନୁ କେଡ଼ତଡ଼, “ହୋ ଗାଲିଲୀୟଡ଼ି, ବାତେଙ୍କ ଇଗେ ନିସ୍ ମୟଲ୍‌ତାଗ୍ ଉଡ଼ିମିନ୍ଦେଡ଼ି ? ହି ଜିସୁ ମିୟାଗାଙ୍କ ସ୍ବର୍ଗତାଗ୍ ଆଡ଼ତ୍ବ । ବାତେଙ୍କ ଇଡ଼କେ ଅଣ୍ଡ ବେଦରକମ୍ ସ୍ବର୍ଗତା ଆଦାନାଦ୍ ଉଡ଼ତିଡ଼, ଚିକ୍ ଆଦେରକମ୍ ଅଣ୍ଡ ମେଣ୍ଡେ ମାଲ୍‌ସ୍ ଖାଦତଣ୍ ।”

ଯିହୁଦାନ୍ ପଡ଼ିୟେ ପୁରା ମାଡ଼ତଡ଼

୫ ୧:୫ ମାଡ଼ିତ 3:୧୧; ମାର୍କ ୧:୮; ଲୁକ 3:୧୭; ଯୋହନ୍ ୧:33. ୫ ୧:୮ ମାଡ଼ିତ ୨୮:୧୯; ମାର୍କ ୧୭:୧୫; ଲୁକ ୨୪:୪୭, ୪୮. ୫ ୧:୯ ମାର୍କ ୧୭:୧୯; ଲୁକ ୨୪:୫୦, ୫୧.

୧୨ ଯିରୁଶାଲେମ୍‌ରେ ପେକେ ପ୍ରେରିତ ଶିଷ୍ୟତ୍, ଜୀବ ମେଟେତାଗାଙ୍କ ଜିରୁଶାଲମ୍ ମାଲ୍‌ସ୍ ଆଦତତ୍ । ଜୀବ ମେଟେ ସହରକନ୍‌ସ୍ ଅଣ୍ଡୟ କିଲମିଟର୍ ଦୁରାମ୍ ମାଡତେ ।

୧୩ ☆ଯାକୁବ୍ ଆଞ୍ଜ୍ ଅଡ୍ ବେଗେ ମାଡତତ୍, ତାନ୍ ପରଡ୍ ବାକ୍‌ଡେତାଗ୍ ଅସ୍‌ତତ୍ । ଆଦ୍ ପ୍ରେରିତ ଶିଷ୍ୟତ୍ ଆଦୁତତ୍ ପିତର୍, ଯୋହନ୍, ରଙ୍ଗୁମ୍, ଆନ୍ଦ୍ରିୟ, ଫିଲିପ୍, ତୋମା, ବର୍ତ୍ତଲମି, ମାତିଉ, ଆଲ୍‌ଫିନ୍ ମାର୍ ଜାକୁବ୍‌ରେ ଦେଶ୍‌ତିଙ୍କ୍‌ପ୍ରେମ ମାଡାନ୍ ଶିମୋନ୍ ନୁ ରଙ୍ଗୁମନ୍ ମାର୍ ଯିହୁଦା ।

୧୪ ଅଡ୍ ନାଗେଦାମ୍ ଝେରଡ୍‌ମାନ୍ଦେ ଆସ୍ ପ୍ରାର୍ଥନା ମାଡାନ୍ ସେଙ୍ଗେ ଅଣ୍ଡୟାଗେ ଆସମାଡତତ୍ ନୁ ଅଡତତ୍ ଜିସୁନ୍ ଯାୟ ମରୀୟମ୍ ନୁ ବାଗାଡ୍ ନାଟାଙ୍କ୍ ନୁ ଜିସୁନ୍ ବିଶ୍ୱାସୀ ତାମୁଣ୍ଡକିଡ୍‌ମିକା କାୟଲମାଡତତ୍ ।

୧୫ ଆଦେ ବେସ୍‌କେ ଦିନାନ୍ ଲୋପେ ସାରେ ଶହେ କୁଡିଏ ଜାନ୍ ବିଶ୍ୱାସୀ ତାମୁଣ୍ଡ ଅଣ୍ଡୟ ମିଟିଙ୍ଗ୍‌ତାଗ୍ ପିତର୍ ପେଦେର୍‌ତଣ୍ଡ ନିସ୍‌ମିକା କେଡତଣ୍ଡ;

୧୬ “ଦାଦାଲଡ୍ ନୁ ଏଲ୍‌ୟାସ୍, ବେନ୍ ଇସ୍‌ବରିୟ ଯିହୁଦା ଜିସୁଙ୍କ୍ ପସ୍‌ପିଦାନ୍ ମାଇଦିଙ୍କ୍ ଶତୁଡ୍ ସେଙ୍ଗେ ହାର୍ ତଅସ୍ ମାଡତଣ୍ଡ, ଅନ୍ ବିଷୟରେ ଦାଉଡ୍ ପବିତ୍ର ଆମ୍‌ତଡ୍‌ଚାଲେମ୍ ଆସ୍ ବବିଷ୍ୟତ୍ ଗଟ୍ କେଞ୍ଜ୍‌ସି ମାଡତଣ୍ଡ । ଦର୍ମଶାସ୍ତ୍ରତାଗ୍ କେଡତାଦ୍ ଆଦ୍ ଗଟ୍ ସାରେ ଆଦାନାଦ୍ ନିଜାମ୍ ମାଡତେ ।

୧୭ ବାତେଙ୍କ୍‌ଇଡ୍‌କେ ଯିହୁଦାଲ୍ ମା ଦଲ୍‌ତାଗ୍ ମେମ୍ବର୍ ମାଡତଣ୍ଡ ନୁ ମା ତଡ୍ ପାଡ୍‌ୟିଦାଗ୍ କାଇଲାନ୍ ସେଙ୍ଗେ ହେଞ୍ଜିମାନ୍ଦାନ୍ ଆସ୍ ମାଡତଣ୍ଡ ।”

୧୮ ☆ଅନାଦ୍ କାରାପ୍ ପାଡ୍‌ୟି ତଡ୍ ଯିହୁଦା ଦର୍‌ସ୍‌ମାନ୍ଦାନ୍ ଡାବ୍‌କିନେ ଝେରଡ୍‌ରୁମ୍ ଆସିମାଡତଣ୍ଡ ନୁ ଆଦ୍ ରୁମ୍‌ତାଗ୍ ରାଲି ଅଣ୍ଡ ତଲ୍‌ତଣ୍ଡ । ଅନାଦ୍ ତଙ୍ଗେ ପାର୍କ୍ ଆସ୍ ପଅକ୍ ପେୟ୍‌ତା ।

୧୯ ଯିରୁଶାଲେମ୍‌ତାଗ୍ ମାନ୍ଦାନ୍ ନାରୁଡ୍ ଇଦ୍‌ସାରେ ପୁଞ୍ଜିମିକା ଅଡାଦ୍ ଗଟ୍‌ରେ ଆଦ୍ ବୁମ୍‌ରେ ପେଦେର୍ “ଆକେଲ୍‌ଦାମା,” ଇଡ୍‌କେ “ନେଡୁର୍ ରୁମ୍,” ଇଞ୍ଜ୍ ହିଡତଡ୍ ।

୨୦ “ଇଦ୍ ବିଷୟ ଗୀତ ସଂହିତାତାଗ୍ ଲେକା ଆସଂମିନ୍ଦେ, ଅନାଦ୍ ଲନ୍ ଜନଶୂନ୍ୟ ଆସି ଆଗେ ବେନ ମାନ୍ମାକିଣ୍ଡ ମେଣ୍ଡେ ଲେକ୍ତାଦ୍ ମିନ୍ଦେ ମେଣ୍ଡେଅର୍ତୁଣ୍ଡ ଅନ୍ ପଡ଼ୟେତାଗ୍ ମାନିଣ୍ଡ ।”

୨୧ ☆“ଆଦିଙ୍କ ପ୍ରବୁ ଜିସୁନ୍ ପୁନରୁତ୍ଥାନତେ ସାକ୍ଷି ଆଦାନ୍ ମାଉଦିଙ୍କ ମେଣ୍ଡେଅର୍ତୁଣ୍ଡ ମା ତଡ଼୍ କାୟଲାନ୍ ଦରକାର ।

୨୨ ଜିସୁ ଯୋହନ୍ ତାଗାଙ୍କ୍ ଏରଦିକ୍ୟା ଗ୍ରହନ୍ ମାଡ଼ତେ ସମୟତାଗାଙ୍କ୍ ସ୍ୱର୍ଗତାଗ୍ ପୁନରୁତ୍ଥାନ ଆଦାନ୍ ଯାକ ସାରେଦାମ୍ ପ୍ରବୁ ଜିସୁ ମା ତଡ଼୍ ଆଦାଞ୍ଜାଦା ମାଡ଼ାନ୍ ଖେଲେ, ବେନ୍ ନାରୁଡ଼୍ ମାନ୍ ଦଲ୍ତାଗ୍ ମାଡ଼ତଡ଼୍, ଅଡ଼୍ ଲୋପେଙ୍କ୍ ଅରୁଡ଼୍ଙ୍କ ସାକ୍ଷି ମାଡ଼ାଙ୍କ୍ ଆଦତେ ।”

୨୩ ଅଡ଼୍ ଇରୁଝୁଡ଼ାଦ୍ ପେଦେର୍ ହେଞ୍ଚିତଡ଼୍; ଯୋଷେଫ୍ ବେନଙ୍କ୍ ବର୍ଗବା ବା ଯୁସୁସ ଇଞ୍ଜି କେତିତଡ଼୍ ନୁ ମଥୀୟସ୍;

୨୪ ମେଣ୍ଡେ ପ୍ରାର୍ଥନା ମାଡ଼ତଡ଼୍, “ପ୍ରବୁ ନିମ୍ ସାରେତଡ଼ାଦ୍ ହୃଦୟ ପୁଡ଼ି । ଇଡ଼୍ ଇରୁଝୁଡ଼୍ ଲୋପେଙ୍କ୍ ନି ତଡ଼୍ ବେନ ମନନିତ ମାକିଙ୍କ୍ କେଲ୍ । ଅନ୍ ପାଡ଼ିୟିତାଗ୍ ନି ତଡ଼୍ ଏଞ୍ଜିମାନ୍ଦାନ୍ ଇଡ଼୍ ଇରୁଝୁଡ଼୍ ଲୋପେଙ୍କ୍ ବେନ

୨୫ ଇଣ୍ଡ ନାରୁଣ୍ଡ ଯିହୁଦାନ୍ ପଡ଼ୟେତାଗ୍ ପ୍ରେରିତ ଶିଷ୍ୟନ୍ ପାଡ଼ିୟି ମାଡ଼ିତନ୍ ।”

୨୬ ତାନ୍ପେକେ ଇରୁଝୁଡ଼୍ ଲୋପେଙ୍କ୍ ଅରୁଡ଼୍ଙ୍କ ହେଞ୍ଚାନ୍ ସେଙ୍ଗେ ଗୁଲିବାଣ୍ଡ ଆଡ଼ତେ । ଗୁଲିବାଣ୍ଡତାଗ୍ ମଥୀୟସ୍ ମନନିତ ଆସ୍ ଏଗାର୍ ଜାନ୍ ପ୍ରେରିତ ଶିଷ୍ୟଡ଼୍ ଦଲ୍ତାଗ୍ କାୟଲତଣ୍ ।

୨

ପବିତ୍ର ଆତ୍ମା ଖାଦାନାଦ୍

୧ ପେଣ୍ଡିକଣ୍ଡ୍ ପାଣ୍ଡୁନ୍ ଦିନ୍* ସାରେ କ୍ରିଷ୍ଟ ବିଶ୍ୱାସୀଡ଼୍, ଖେରଡ଼୍, ପଡ଼ୟେତାଗ୍ ଗୁଡ଼ିମାଡ଼ତଡ଼୍ ।

୨ ହଟାଡ଼୍ ସ୍ୱର୍ଗତାଗାଙ୍କ୍ ଗାଟି ଖାଦାନ୍ ବେଡ଼୍ୟାଦ୍ ଗାଲ୍ ଲେଙ୍ଗ୍ ଲେକାମ୍ ଖେରଡ଼୍ ଲେଙ୍ଗ୍ ଖାଡ଼ତେ ନୁ ଅଡ଼୍ ବେନ୍ ଲୋନ୍

☆ ୧:୨୧ ମାତିର ୩:୧୭; ମାର୍କ ୧:୯; ଲୁକ ୩:୨୧; ମାର୍କ ୧୬:୧୯; ଲୁକ ୨୪:୫୧.

* ୨:୧

ପେଣ୍ଡିକଣ୍ଡ୍ ପାଣ୍ଡୁନ୍ ଦିନ୍ ନିସାର୍ ପାଣ୍ଡୁନ୍ତେ ପରାଗ୍ ଦିନେଡ଼୍ ପେକେଡ଼୍ ଦିନାମ୍ତିଙ୍କ୍ ପେଣ୍ଡିକଣ୍ଡ୍ ଦିନ୍ କେତିତଡ଼୍.

କୁଦିମାତ୍ତତ୍, ଆଦ୍ ଲୋନ୍ ସାରେ ଆଦ୍ ଲେଙ୍ଗ୍ତେ ବର୍ତ୍ତ୍ ଆତ୍ତେ

୩ ତାନ୍ପେକେ ଅଡ୍ ଉଡ୍ତତ୍, ବେସ୍ କିସ୍ ଖାଞ୍ଜେର୍ ଲାଟିଆସ୍ ଆଗେ ମାନ୍ଦାନ୍ ସାରେତଡ୍ କିଙ୍ଗ୍ ଇଟ୍ତେ ।

୪ ଆଗାଙ୍ଗ୍ ଅଡ୍ ସାରେତଡ୍ ପବିତ୍ର ଆମ୍ବାତେ ବର୍ତ୍ତ୍ ଆଦ୍ତଡ୍ ନୁ ଆତ୍ମା ଅଡ୍ କିଙ୍ଗ୍ ବେଦ୍ ପୁରୁଙ୍ଗ୍ କେତାଙ୍ଗ୍ ଶକ୍ତି ହିତ୍ତେ, ଆଦ୍ ରକମ୍ ଅଡ୍ ବେନ୍ବେନା ଗଟ୍ତଡ୍ ତିରିୟାଙ୍ଗ୍ ପସ୍ତଡ୍ ।

୫ ପୃତିବିତେ ଖେରଖେର ସ୍ପର୍ଶତାଗାଙ୍ଗ୍ ଖାସ୍ ମାନ୍ଦାନ୍ ଇହୁଦୀ ବନ୍ଧାଲଡ୍ ଆସୁଟେ ଯିରୁଶାଲେମ୍ ଦେଶ୍ତାଗ୍ ମାତ୍ତଡ୍ ।

୬ ବେସୁର୍ ଅଡ୍ ଇଦ୍ ଲେଙ୍ଗ୍ କେଞ୍ଜ୍ତଡ୍, ନାରଗେ ନାରୁଡ୍ ଆଗେ ଗୁଡ୍ତଡ୍ । ବିଶ୍ୱାସୀ ନାରୁଡ୍ ଆଗେ ମାନ୍ଦାନ୍ ସାରେତଡ୍ ଖାଦ୍ ବାଷାଡ୍ ଗଟ୍ କେତାନାଦ୍ କେଞ୍ଜ୍ ଅଡ୍ ସାରେତଡ୍ କାବା ଆତ୍ତଡ୍ ।

୭ କାବା ଆସ୍ ନୁ ଦାଦରେଲି ଅଡ୍ କେଡ୍ତଡ୍, “ଇଦ୍ ରକମ୍ ଗଟ୍ ତିରିୟାନଡ୍ ଇଡ୍ ବାତେଏ ଗାଲିଲୀୟ ଆୟୁୟଡ୍ ?

୮ ଆଲେକେ ମାମ୍ମେ ସାରେତମ୍ ବେଲା ଅଡ୍ କିଙ୍ଗ୍ ମା ନିଜର୍ ନିଜର୍ ଜନମ୍ ଆତ୍ତେ ଗଟ୍ କେତାନାଦ୍ କେଞ୍ଜ୍ତମ୍ ?

୯ ମାନାଡ୍ ପାର୍ଥୀୟ, ମାଦୀୟ ନୁ ଏଲାମୀୟ, ମେଣ୍ଡେ ମେସପଟାମିୟା, ଯିହୁଦା ଦେଶ୍ ନୁ କାପ୍ପାକିଆ, ପତ୍ର ନୁ ଏସିୟା,

୧୦ ଫୁଗିୟା ନୁ ପଂଫୁଲିୟା, ମିସର୍ ନୁ କୁରିନୀ ଗାରେଡ୍ ଲିବିୟା ଜାଗେଡ୍ ନାରୁଡ୍ ମେଣ୍ଡେ ରୋମ୍ ତାଗାଙ୍ଗ୍ ଖାତ୍ତେ,

୧୧ ଇହୁଦୀ ନୁ ଇହୁଦୀ ଦର୍ମ ଗ୍ରହନ୍ ମାଡିମାନ୍ଦାନ୍ ଅବିଶ୍ୱାସୀ ନାରୁଡ୍, ମେଣ୍ଡେ ମା ଲୋପେଙ୍ଗ୍ ବେସ୍ କୁଡ୍ କ୍ରୀତୀୟ ନୁ ଆରବୀୟ ନାରୁଡ୍ । ମିକା ଇଶ୍ୱର୍ ବେନ୍ ମହଡ୍ ବିଷୟ ସାରେ ମାତ୍ତଡ୍, ଆସୁସାରେ ମାମ୍ମେ ସାରେତମ୍ ଅଡ୍ ଆଗାଙ୍ଗ୍ ମା ନିଜେଡ୍ ନିଜେଡ୍ ଗଟ୍ତେ କେଞ୍ଜ୍ତମ୍ ।”

୧୨ କାବା ନୁ ଦାନ୍ଦେ ଆସ୍ ଅଡ୍ ତାମ୍ତାମ୍ ଲୋପେ ପାତ୍ରା ମାତ୍ତଡ୍, “ଇଦିନ୍ ଅର୍ତ୍ତ ବାଆତେ ?”

୧୩ ଇଡ୍ କେ ବାଗାଡ୍ ନାରୁଡ୍ ବିଶ୍ୱାସିଡ୍ ପରିହାସ୍ ମାଡି କେଡ୍ତଡ୍, “ଇହି ନାରୁଡ୍ ମାଡ୍ ଖାରିଡ୍ ଆତ୍ତଡ୍ ।”

ପିତର୍ତେ ପ୍ରଚାର

୧୪ ତାନ୍‌ପେକେ ବାଗାଡ଼ ଏଗାର ଜାନ୍ ପ୍ରେରତ ଶିଷ୍ୟତ୍‌ତତ୍‌ପିତର ନିର୍ଗମିକା ଗାଟି ଲେଙ୍ଗଦେ କେଡ଼ତଣ୍ଡ, ହୋ ଇହୁଦୀ ଦାଦାଲଡ଼ି ନୁ ଏଲ୍‌ୟାସିନଡ଼ି ମେଣ୍ଡେ ଯିରୁଶାଲେମ୍‌ତାର ବାଦକାନ୍ ନାରୁଡ଼, ନା ଗଟି କେଞ୍ଜାର୍, ନାନ୍ ଇଦିନ୍ ଅର୍ତ୍ତ ବୁଜାମାଡ଼ି କେତିତାନ୍ ।

୧୫ ମିଡ଼୍ ବେଲା ହେର୍କା ମାଡ଼ୁଡ଼ି, ଇଡ଼୍ ଆଦରକମ୍ ମାତାଲ୍ ଆୟ୍‌ୟଡ଼, ବାତେଙ୍ଗଇଡ଼କେ ଦିନାମ୍ ଇଞ୍ଜେ ନାର୍‌କକ୍ ନଅ ଗାଣ୍ଟା ଆଡ଼ତେ ।

୧୬ ଇଡ଼କେ ଯୋୟେଲ୍ ବାବବାଦୀ ବେନ୍ ଗର୍ନା ବିଷୟ କେଡ଼ତଣ୍ଡ, ଇଦ୍ ଆଦ୍ ଗର୍ନା,

୧୭ “ଇଶ୍‌ବର କେତିତଣ୍ଡ, ‘ତେରାନ୍ ଦିନାତେ ଇଞ୍ଜୁ ସାରେ ଗଟେମ୍ ଆଦତେ, ନାନ୍‌ନେ ସାରେତଡ଼ାର୍ ନାଝାଦ୍ ମେନ୍‌ଲୁଡ଼ିଙ୍ଗ୍ ଆମ୍ବା ବର୍ତ୍ତ ମାଡ଼ିତାନ୍ । ମିଇ ମାରକ୍ ନୁ ମାୟାସ୍, ନାଝାଦ୍ ସୁସମାରାର କେତିତା । ମିଞ୍ଜଡ଼୍ ଲେୟଡ଼୍ ଦିବ୍ୟ ଦର୍ଶନ୍ ଦରକିଡ଼୍ ନୁ ବୟସ୍, ନାରୁଡ଼୍ ସାପ୍ଲା ଉଡ଼ିତଡ଼୍ ।

୧୮ ଆ, ନା’ ଦାସ ନୁ ଦାସୀଡ଼୍ ଲୋପେ ନାନ୍ ନାଝାଦ୍ ଆମ୍ବା ହସ୍ତିତାନ୍, ଅଡ଼୍ ନାଝାଦ୍ ସୁସମାରାର ପ୍ରଚାର ମାଡ଼ିତଡ଼୍ ।

୧୯ ନାନ୍ ସ୍‌ବର୍ଗତାର୍ ନାରଗେ ଆଦବୁଡ଼୍ ପାଡ଼୍‌ୟି; ମେଣ୍ଡେ ପୃତିବିତାର୍ ନାରଗେ ଟିଏନ୍‌ନେ ତଅତିତାନ୍ । ଆଗେ ନେତୁର୍, କିସ୍ ନୁ ଗାଟି ଉମ୍‌ମେ ବର୍ତ୍ତ ଆଦତେ ।

୨୦ ପ୍ରବୁନାଦ୍ ମହାନ୍ ନୁ ଗୌରବ୍ ଦିନାମ୍ ଏଞ୍ଜୁଦାନ୍ ମୁନେଙ୍ଗ୍ ପଡ଼୍‌ଦ୍ ଇକାଡ଼୍ ତଅନ୍‌ଦିଡ଼୍ ନୁ ନେଲ୍‌ଞ୍ଜ୍ ନେତୁର୍ ଲେକାମ୍ ଏର୍ରେ ରଙ୍ଗ୍ ଆଦତେ ।

୨୧ ଆସୁଟେ ବେନଆଇ ପ୍ରବୁନ୍ ପେଦେର୍‌ତେ ପ୍ରାର୍ତ୍ତନା ମାଡ଼ିତନ୍, ଅଣ୍ଡ୍ ପରିତ୍ରାଣ୍ ପାଏମ୍ ଆଦତଣ୍ଡ ।”

୨୨ “ହୋ ଇସ୍ରାଏଲ୍‌ୟ ନାରୁଡ଼ି, ଇଞ୍ଜୁ ସାରେ ଗଟି କେଞ୍ଜାର୍, ନାଜରିତିୟ ଜିସୁ ନାରଗେ ଶକ୍ତିଡ଼୍ ପାଡ଼୍‌ୟି, ଆଶର୍ଯ୍ୟ ପାଡ଼୍‌ୟି ନୁ ଟିଏନ୍‌ନେ ତଡ଼୍ ମିଇ ଗାରରେ ଇଶ୍‌ବର ରଅତେ ନାରୁଣ୍ଡ୍ ଇଞ୍ଜ୍ ପ୍ରମାନିଡ଼୍ ଆଡ଼ତଣ୍ଡ, ଅନ୍ ତଡ଼୍ ଇଶ୍‌ବର ଜେ ମିଇ ଲୋପେ ଇଞ୍ଜୁସାରେ ପାଡ଼୍‌ୟି ମାଡ଼ିମିନ୍‌ଦେଣ୍ଡ୍, ଇଦ୍ ମିଡ଼୍ ନିଜେ ନିଜେ ପୁଡ଼ିତଡ଼୍ ।

୨୩ ☆ ଇଶ୍ବର ଅନାଦ୍ ଜୋଜନା ଲେକାନ୍ ଜିସୁଙ୍କ ମିଛ କାୟତାଗ ପସ୍ପିଦାନଙ୍କ ଟିକ୍ ମାଡ଼ିମାଡ଼ତଣ୍ଡ ମେଣ୍ଡେ ମିଡ଼ ଅଂକିଙ୍କ ପାପି ନାରୁଡ଼, ତଡ଼ କୁଗତାଗ୍ ତାର୍ସ୍ବି ହାଞ୍ଜକି ମାଡ଼ତିଡ଼ ।

୨୪ ☆ ଇଡ଼କେ ଇଶ୍ବର ଅଂକିଙ୍କ ଡଳ୍‌ତାଗାଙ୍କ ମୁକ୍ତି ମାଡ଼ି ପୁନର୍ଜିବିତ୍ ମାଡ଼ତଣ୍ଡ, ବାତେଙ୍କଇଡ଼କେ ଅଣ୍ଡ ଜେ ଡଲିମାଡ଼ତଣ୍ଡ ଆଦ୍ ସମ୍ବଦ୍ ଆୟ୍‌ୟ ।

୨୫ ଦାଉଦ୍ ଅନ୍ ବିଷୟତେ କେଡୁତଣ୍ଡ, ‘ନାନ୍ ସାରେଦାମ୍ ପ୍ରବୁଙ୍କ ନା’ ମୁନ୍‌ନେ ଉଡ଼ତାନ୍, ବାତେଙ୍କ ଇକ୍‌କେ ନାନ୍‌ନେ ବେଲା ଦାୟେ ଆୟ୍‌ନ୍, ଆଦିଙ୍କ ଅଣ୍ଡ ନା ତିୟେପାକ୍ ମିୟେଣ୍ଡ ।

୨୬ ଆଦିଙ୍କ ନା ହୁଦୟ କୁସ୍ ଆଡ଼ତେ ନୁ ନା ମକତାଗାଙ୍କ ଖେଡ଼କେଡ଼ ଗଟି ପେୟତା । ମେଣ୍ଡେ ନାଞ୍ଜାଦ୍ ମେନ୍‌ଲୁ ଡଲାନାଦ୍ ଆଡ଼କେ ମିକା ନିଜାମ୍ ଆଗେ ମାଡ଼ି ବଞ୍ଚେମ୍ ଆଦତେ ।

୨୭ ବାତେଙ୍କ ଇଡ଼କେ ନିମ୍ ନାକିଂଙ୍କ ଡଳ୍‌ତଡ଼ାଦ୍ ଜଗଡ଼ ଝିଡ଼ସ୍‌ଝିନ୍, ନିମ୍ ନି ବିଶ୍ବସ୍ତ ସେବକିଙ୍କ ପାତାଲ୍ ଲୋପେ ନଷ୍ଟ ଆଦାଙ୍କ ହିଞ୍ଜିନ୍ ।

୨୮ ନିମ୍ ନାକିଂଙ୍କ ଜିଞ୍ଜୁଣ୍ଡ ଆର୍ ତହଃସ୍ ମିୟେନି ନୁ ନିଞ୍ଜାଦ୍ ଉପସ୍ଥିତି ନାକିଂଙ୍କ ଖେଡ଼କ୍ ମାଡ଼ିଡ଼ ।”

୨୯ “ଆ ଇସ୍ରାଏଲୀୟ ଦାଦାଲଡ଼ ନୁ ଏଲାସ୍ଥିଡ଼, ବୁଜାମାଡ଼ି ନାନ୍‌ନେ ମିକିଂଙ୍କ ମା ଆନିଦାଦିଡ଼ ବଂଶତଣ୍ଡ ଦାଉଦ୍ ରାଜାନ୍ ବିଷୟତେ ସୁବୁର୍ କେଡ଼ତେ ପାର୍‌ଦତାନ୍ କି । ଅଣ୍ଡ ଡଳ୍‌ତଣ୍ଡ ନୁ ସମାଦି ପାଏମ୍‌ଆଡ଼ତଣ୍ଡ, ମେଣ୍ଡେ ତାମାଦ୍ ସମାଦି ନେଣ୍ଡ ଯାକ ଇଗେ ମାନ୍‌ଲୋପେ ମିୟେ ।

୩୦ ଅଣ୍ଡ ଖେରଣ୍ଡ ବାବବାଦୀ ମାଡ଼ତଣ୍ଡ, ଆଦିଙ୍କ ଇଶ୍ବର ଅଂକିଙ୍କ ପ୍ରାମାଣ୍ ମାଡ଼ତାଦ୍ ଅଣ୍ଡ ପୁଞ୍ଜମାଡ଼ତଣ୍ଡ । ଦାଉଦ୍ ବଂଶତଡ଼ ଲୋପେଙ୍କ୍ ଅର୍‌ତୁଙ୍କ ରାଜାଲ୍ ସିଂହାସନ୍ ମାଡ଼ିତନ୍ ଇଞ୍ଜ ଇଶ୍ବର ପ୍ରାମାଣ୍ ମାଡ଼ିମାଡ଼ତଣ୍ଡ ।

୩୧ ଇଶ୍ବର ବବିଷ୍ୟତ୍‌ତେ ବାଆତେ ମାଡ଼ାଙ୍କ୍ ଆଦୁତନ୍, ଦାଉଦ୍ ଆଦ୍ ପୁଞ୍ଜ, ମସୀହନ୍ ପୁନରୁତାନ୍ ବିଷୟତେ କେଡ଼ତଣ୍ଡ; ‘ଅଂକିଙ୍କ ଡଳ୍‌ତଡ଼ାଦ୍ ଜଗଡ଼ତାଗ୍ ଝିଡ଼ସ୍‌ଝିଡ଼ । ଅନାଦ୍ ମେନ୍‌ଲୁ ପାତାଲ୍ ଲୋପେ ନଷ୍ଟ ଆୟ୍‌ୟ ।’

☆ ୨:୨୩ ମାତିଡ଼ ୨୭:୩୫; ମାର୍କ ୧୫:୨୪; ଲୁକ ୨୩:୩୩; ଯୋହନ୍ ୧୯:୧୮. ମାତିଡ଼ ୨୮:୫,୬; ମାର୍କ ୧୭:୨; ଲୁକ ୨୪:୫.

☆ ୨:୨୪

୩୨ ଇଶ୍ବର ଜିସୁଙ୍କ ଡଲ୍‌ତାଗାଙ୍କ ପୁନରୁତ୍ଥାନ ମାଡ଼ତଣ୍ଡ ନୁ ମାନାଡ଼, ସାରେତଡ଼ ଇଦିନାଦ୍ ସାକ୍ଷି ଆଡ଼ତାଡ଼ ।

୩୩ ଜିସୁ ତାମ୍ ବାବାନ୍ ତିନ୍ଦେପାକ୍ ତେଦିମିନ୍ଦେଣ୍ଡ ନୁ ବାବାନ୍ ପ୍ରତିଜ୍ଞା ଲେକାମ୍ ଅନାଗାଙ୍କ ପବିତ୍ର ଆତ୍ମା ପାଏମ୍‌ଆଡ଼ତଣ୍ଡ । ଇଞ୍ଜେ ମିଡ଼, ବାଆତେ ଉଡ଼ୁଡ଼ିଡ଼ ନୁ କେଞ୍ଜୁଡ଼ିଡ଼, ଆଦ୍ ଇଶ୍ବରତାଦ୍ ଦାନ । ଆଦ୍ ଅଣ୍ ମା ପରର ତସିସ୍ ମିନ୍ଦେଣ୍ଡ ।

୩୪ ଦାଉଦ୍ ନିଜେ ସ୍ବର୍ଗତାଗ୍ ଆନଣ୍ଡ, ବାତେଙ୍କିତ୍ତକେ ଅଣ୍ କେସମାଡ଼ତଣ୍ଡ, ‘ପ୍ରବୁ ନା ପ୍ରବୁଙ୍କ କେଡ଼ତଣ୍ଡ,

୩୫ ନାନ୍ ନି ଶତ୍ରୁତ୍ତକ୍ ନିଝାଦ୍ କୁଡୁଲ୍ ଡେକେଡ଼ ମଦଲ୍ ମାଡ଼ଝେ ଯାକ, ନା ତିନ୍ଦେପାକ୍ କୁଦିମାନ୍ ।’ ”

୩୬ “ହଁ ଇସ୍ରାଏଲ୍‌ଡି, ସାରେତଡ଼ ନିଶ୍ଚୟ ପୁନୁର୍ ଯେ, ବେନ୍ ଜିସୁଙ୍କ ମିଡ଼, କ୍ରୀଷ୍ଟାଗ୍ ଆଞ୍ଜକିଡ଼, ଇଶ୍ବର ଅଂକିଙ୍କ ପ୍ରବୁ ନୁ ମସୀହ ରେଣ୍ଡ ପେଦେର୍ ଇଡ଼ତଣ୍ଡ !”

୩୭ ବେସୁର୍ ନାରୁଡ଼ ଇଦ୍ କେଞ୍ଜୁଡ଼ିଡ଼, ଅଡ଼ ଗାଟି ହୃଦୟତେ ଦାନ୍ଦେ ଆଡ଼ତଡ଼ ନୁ ପିତର୍ ନୁ ବାଗାଡ଼ ପ୍ରେରତ ଶିଷ୍ୟତ୍ତକ୍ କେଡ଼ତଡ଼, “ଦାଦାଲଡ଼ ମାନାଡ଼ ବାଆତେ ମାଡ଼ିକାଡ଼ ?”

୩୮ ପିତର୍ ଅଡ଼କିଂଙ୍କ କେଡ଼ତଣ୍ଡ, “ମିଡ଼ ହେର୍ଜା ମାଡ଼ି ସାରେତଡ଼ି ପାପତାଗାଙ୍କ ମାଲ୍‌ମୁର୍ ନୁ ପାପ୍ କେମା ସେଙ୍ଗେ ଜିସୁ କ୍ରିଷ୍ଟନ୍ ପେଦେର୍‌ତେ ଏର୍ଦିକ୍ଷା ଆୟ୍‌ମୁର୍; ଆଲେକେ ମିଡ଼ ଇଶ୍ବରତେ ଉପହାର୍, ପବିତ୍ର ଆମ୍ ପାଏମ୍‌ଆଡ଼ତଣ୍ଡ ।

୩୯ ବାତେଙ୍କିତ୍ତକେ ଇଶ୍ବରତେ ପ୍ରତିଜ୍ଞା ମିଲ୍ ସେଙ୍ଗେ, ମିଲ୍ ପିଲାନ୍ ସେଙ୍ଗେ ନୁ ଜେକେ ମାନ୍ଦାନଡ଼ ବେନଡ଼କ୍ ପ୍ରବୁ ଇଶ୍ବର କାର୍‌ଙ୍କତଣ୍ଡ, ଅଡ଼ ସାରେତଡ଼ ସେଙ୍ଗେ ମାଡ଼ତଣ୍ଡ ।”

୪୦ ପିତର୍ ଅଡ଼କିଂଙ୍କ ଅନୁରଦ୍ ମାଡ଼ାନାଦ୍ ନୁ ନାରଗେ ଲେକାଡ଼ ସାକ୍ଷ୍ୟ ଇସ୍ କେଡ଼ତାନ, “ଇ କାରାପ୍ ନାରୁଡ଼ ସେଙ୍ଗେ ଖାସମିନ୍ଦେନ୍ ଶାସ୍ତିତାଗାଙ୍କ ନିଜେ ନିଜେତିଙ୍କ ରକ୍ଷା ମାଡ଼ାଡ଼ ।”

୪୧ ଅଡ଼ ଲୋପେଙ୍କ ନାରଗେ ନାରୁଡ଼ ଅନ୍ ଗର୍ତ୍ତେ ବିଶ୍ବାସ୍ ମାଡ଼ି ଏର୍ଦିକ୍ଷା ହଡ଼ତଡ଼ । ଆଦ୍‌ନାଣ୍ ମାଡ଼ର୍ ମୁଣ୍ଡ ହଜାର୍ ନାରୁଡ଼ ଶିଷ୍ୟତ୍ତକ୍ ଦଲ୍‌ତାଗ୍ କାୟ୍‌ଲ୍‌ତଡ଼ ।

୪୭ ଅତଃ ପ୍ରେରିତ ଶିଷ୍ୟତାଦ୍ ଶିକ୍ଷାତାଗ୍, ସହବାଗିତାଗ୍, ରୂଟି ଉଦ୍ଧୃତାନାଗ୍ ନୁ ପ୍ରାର୍ଥନା ମାଡାନାଗ୍ ଅଣ୍ଡୟମନ୍ ଆସ୍ ମାଡତଡ୍ ।

ବିଶ୍ୱାସୀତାଦ୍ ନିତ୍ତଦିନାତ୍ ଜିହ୍ୱଣ୍

୪୩ ପ୍ରେରିତ ଶିଷ୍ୟତ୍ ନାରଗେ ଆଦବୁତ୍ ନୁ ଆଶର୍ଯ୍ୟ ପାଡିୟି ମାଡତଡ୍ ନୁ ସାରେତଡ୍ ଆଗାଙ୍କ୍ କାବା ଆସ୍ ଝେରତଡ୍ ।

୪୪ ☆ବିଶ୍ୱାସୀତ୍ ସାରେତଡ୍ ତଡ୍ ସାଙ୍ଗ୍ ଆଡତଡ୍ ନୁ ଅଣ୍ଡୟାଗେ କାୟଲି ଅଡାଦ୍ ସାରେ ସମ୍ପତିତିଙ୍କ୍ ତୁହୁସ୍ତଡ୍ ।

୪୫ ଅତଃ ନିଜେ ନିଜେତ୍ ସମ୍ପତିତିଙ୍କ୍ ଝାମି, ପାଏମ୍ ଆଡତେ ତାବକିଙ୍କ୍ ସାରେତଡାଦ୍ ଦରକାଡ୍ ଲେକାମ୍ ସାରେତଡ୍ କିଙ୍କ୍ ତୁହୁସ୍ତଡ୍ ।

୪୬ ଅତଃ ସାରେଦିନେ ଉପବାସ୍ ମନ୍ଦିରତାଗ୍ ଝେରତ୍, ଦଲ୍ ଆସ୍ ଗୁଡମାଡତଡ୍ ନୁ ଝେଡକେତେ ନୁ ସରଲ୍ ହୃଦୟତେ,

୪୭ ଅନୁଗ୍ରହ ପାଏମ୍ ଆଡତେ ନାରୁଡ୍ ଇଶ୍ୱରତିଙ୍କ୍ ପ୍ରସଂଶା ମାଡି ଲକ୍ ଲକ୍ ରୂଟି ଉଦ୍ଧୃସ୍ ତିଞ୍ଜମାଡତଡ୍ । ଅତଃ ସାରେତଡ୍ ବିଶ୍ୱାସୀ ଆଡତଡ୍ ନୁ ନିତ୍ତଦିନ୍ ପରିତ୍ରାଣ୍ ପାଏମ୍ ଆଡତେ ନାରୁଡକିଙ୍କ୍ ପ୍ରବୁ ଅଡାଦ୍ ଦଲ୍ଲତାଗ୍ କାଲ୍ପତଣ୍ ।

୩

ଝେରଣ୍ କୁଟାଲ୍ ସାୟେ ଆଡତଣ୍

୧ ଅଣ୍ଡୟଦିନ୍ ପିତର୍ ନୁ ଯୋହନ୍ ପ୍ରାର୍ଥନା ସମୟତେ ପାୟାଲ୍ ମୁଣ୍ ଗାଣ୍ଡାଡ୍ ଝେଲେ ପ୍ରାର୍ଥନା ମାଡାନ୍ ମନ୍ଦିରତାଗ୍ ଆଞ୍ଜମାଡତଡ୍ ।

୨ ଆସୁଟେ ଆଗେ “ସୁନ୍ଦର୍,” ପେଦେରତାଦ୍ ମାର୍ତାଗ୍ ଝେରଣ୍ ନାରୁଣ୍ ମାଡତଣ୍, ଅଣ୍ ଜନମ୍ କନ୍ସ୍ କୁଟାଲ୍ । ମନ୍ଦିରତାଗ୍ ଆଞ୍ଜମାୟାନ୍ ନାରୁଡାଗାଙ୍କ୍ ବିକ୍ୟା ତାଲକାନ୍ ମାଇଦିଙ୍କ୍ ସାରେଦିନ୍ ଅଣ୍ ମାର୍ ଗାରରେ କାଞ୍ଜୀ ଆଞ୍ଜମାଡତଣ୍ ।

୩ ପିତର୍ ନୁ ଯୋହନ୍ତିଙ୍କ୍ ମନ୍ଦିର୍ ଲୋପେ ଆଦାନାଦ୍ ଉଡି, ଅଣ୍ ଅଡକିଙ୍କ୍ ଅନୁରଦ୍ ମାଡି କେଡତଣ୍ ।

୪ ଅତଃ ଯୋହନ୍ତିଙ୍କ୍ ଅଣ୍ଡୟ କଣ୍ଡେତେ ଉଡତଡ୍ ନୁ ପିତର୍ କେଡତଣ୍, “ମାୟାକ୍ ଉଡେ !”

୫ ଆସୁଟେ ଅଣ୍ଟି ଅଡ଼ିଆଗାଙ୍କ ବାତେଆୟି ପାହେମ୍ ଆଡ଼ତାଙ୍କ ଆଗେମାଡ଼ି ଅଡ଼ାକ୍ ଉଡ଼ି ମାଡ଼ତଣ୍ଟ ।

୬ ଇଡ଼କେ ପିତର୍ କେଡ଼ତଣ୍ଟ, “ନାୟାଗ୍ ସୁନା ଡାବ୍‌କ୍ ଇଲା, ମାଡ଼ମ୍ ବାଆତେ ମିୟେ, ନାନ୍ ନିକିଂଙ୍କ ଇଦୁତାନ୍; ନାଜରିତିୟ ଜିସୁ କ୍ରିଷ୍ଟନ୍ ପେଦେର୍‌ତେ ନାନ୍ ନିକିଂଙ୍କ ଗର୍ ଇଦୁତାନ୍ ତେଦ୍‌ଦେ ନୁ ତାଆକେ !”

୭ ତାନ୍‌ପେକେ ଅଣ୍ଟି ଅନାଦ୍ ତିୟେ କାଜଦିଙ୍କ ପଇସ୍ ତେହେଡ଼ତଣ୍ଟ । ଆସୁଟେ ସାଙ୍ଗେ ସାଙ୍ଗେ ଅନ୍ ତେକା ନୁ ତେକ୍‌ଗାଟି ଶକ୍ତି ଆଡ଼ତା ।

୮ ମେଣ୍ଟେ ଅଣ୍ଟି ତୁଲି ତେଦ୍‌ତଣ୍ଟ, ମେଣ୍ଟେ ତାଆକାଙ୍କ ପସ୍‌ପତଣ୍ଟ । ତାନ୍‌ପେକେ ଅଣ୍ଟି ତାଆକି ତାଆକି, ତୁଲି ତୁଲି ମେଣ୍ଟେ ଇଶ୍‌ବର୍‌ତିଙ୍କ ପ୍ରସଂଶା ମାଡ଼ି ମାଡ଼ି ଅଡ଼ି ତଡ଼ି ମନ୍ଦିରତାଗ୍ ଆଡ଼ତଣ୍ଟ ।

୯ ଆଗେତ ନାରୁଡ଼ି ସାରେତଡ଼ି ଅଂକିଙ୍କ ତାଆକାନାଦ୍ ନୁ ଇଶ୍‌ବର୍‌ତିଙ୍କ ପ୍ରସଂଶା ମାଡ଼ାନାଦ୍ ଉଡ଼ିତଡ଼ି;

୧୦ ଅଂକିଙ୍କ ମନ୍ଦିରତେ ସୁନ୍ଦର୍ ମାର୍ ଗାରରେ କୁଦିମାୟାନ୍ ବିକାରୀ ଇଞ୍ଜ ପୁଡ଼ତଡ଼ି ନୁ ଅନ୍ ସେଙ୍ଗେ ବାଆତେ ଗଟେମ୍ ଆଡ଼ତେ, ସାରେ ଉଡ଼ି ଅଡ଼ି ବାକ୍‌ୱା ନୁ କାବା ଆଡ଼ତଡ଼ି ।

ମନ୍ଦିରତାଗ୍ ପିତର୍‌ତେ ପ୍ରଚାର

୧୧ ଆ ନାରୁଣ୍ଟି ପିତର୍ ନୁ ଯୋହନ୍‌ତିଙ୍କ ପୟସ୍‌ମାୟାନ୍ ଖେଲେ ନାରୁଡ଼ି ସାରେତଡ଼ି ଶଲୋମନ୍‌ତେ ମଣ୍ଡପ୍‌ତାଗ୍ ଉଡ଼ି କାବା ଆସ୍ ଅଡ଼ି ଗାରରେ ମିରି ଖାଡ଼ତଡ଼ି ।

୧୨ ପିତର୍ ଆଦ୍ ଉଡ଼ି ନାରୁଡ଼ିକିଂଙ୍କ ଉତ୍ତର ହିଡ଼ତଣ୍ଟ, ହୋ ଇସ୍ରାଏଲୀୟ ନାରୁଡ଼ି, ବାତେଙ୍କ ମିଡ଼ି କାବା ଆଦୁତିଡ଼ି ନୁ ମାକିଂଙ୍କ ଖେରଡ଼ି କଣ୍ଟେତେ ଉଡ଼ିଡ଼ିଡ଼ି? ମିଡ଼ି ବାଡ଼ ଆଲ୍‌ସୁତିଡ଼ି ମାମ୍ ମାଝାଦ୍ ନିଜର୍ ବକ୍ତି ନୁ ଶକ୍ତି ତଡ଼ି ଇଣ୍ଟି ନାରୁଙ୍କ ତାଆକାନ୍ ଶକ୍ତି ଇଡ଼ତମ୍ ?

୧୩ ଅବ୍ରାହାମ୍, ଇସହାକ୍ ନୁ ଯାକୁବ୍‌ତେ ଇଶ୍‌ବର୍, ମାନ୍ ଆନିଦାଦିଡ଼ିତେ ଇଶ୍‌ବର୍, ତାମ୍ ଦାସ ଜିସୁଙ୍କ ସ୍ୱର୍ଗୀୟ ଗୌରବ୍ ମାଡ଼ତଣ୍ଟ । ଇଡ଼କେ ମିଡ଼ି ଅଂକିଙ୍କ ପେଦାନ୍ କାଜଦେ ସମର୍‌ପନ୍ ମାଡ଼ତିଡ଼ି । ଇଦ୍ ଲେକାମ୍ ପିଲାତ ଅଂକିଙ୍କ ମୁକ୍ତି ମାଡ଼ାଙ୍କ ବିଚାର୍ ମାଡ଼ିମାଡ଼ିକେ ମିକା, ଅଂକିଙ୍କ ପିଲାତନ୍ ମୁନେ ମନା ମାଡ଼ତିଡ଼ି ।

୧୪ ☆ ଅଣ୍ଟା ଖେରଣ ପବିତ୍ର ନୁ ଦାମ୍ବିକ ନାରୁଣ୍ଡ, ଇଡକେ ମିଡ୍, ଅଂକିଙ୍କ ମନା ମାଡ଼ିତିଡ୍, ନୁ ଅନ୍ ବଦଲ୍‌ରେ ମିଡ୍, ଖେରଣ୍ଡ ନାରୁଙ୍କ ଆଖିକାନଙ୍କ ମୁକ୍ତ ମାଡ଼ାନ୍ ସେଙ୍ଗେ ପୀଲାତଙ୍କ କେଡ଼ିଡ୍ ।

୧୫ ବେନ ଜିଝୁଣ୍ଡ ହାର ତଅତିଡଣ୍ଡ, ମିଡ୍ ଅଂକିଙ୍କ ଆଖିକିଡ୍, ଇଡକେ ଇଶ୍ବର ଅଂକିଙ୍କ ଡଲ୍‌ତାଗାଙ୍କ ମେଣ୍ଡେଜିଖେ ମାଡ଼ତଣ୍ଡ ନୁ ମାମ୍‌ମେ ଅଦୁତମ୍ ଇଦିନାଦ୍ ସାଣ୍ଡି ।

୧୬ ଅନ୍ ପେଦେର୍‌ରେ ଶକ୍ତି କେ ଇଣ୍ଡ କୁଟାଙ୍କ ସୁସ୍ଥ ମାଡ଼ତେ । ଆଦ୍ ମିଡ୍ ନିଜେ ଉଡି ନିଜାମ୍ ଇଞ୍ଜ ପୁଡ଼ିଡ୍, ଆଦ୍ ମାଡ଼ମ୍ ଅନ୍ ପେଦେର୍‌ରେ ବିଶ୍ବାସ ମାଡ଼ତାଙ୍କ ସମ୍ବଦ୍ ଆଡ଼ତେ । ଜିସୁନାଗ୍ ବିଶ୍ବାସ ମାଡ଼ତାଙ୍କ ଅଣ୍ଡ ଜେ ସୁସ୍ଥ ଆଡ଼ତଣ୍ଡ, ଇଦ୍ ମିଡ୍ ଉଡ଼ିଡ୍ ।

୧୭ “ଆଦିଙ୍କ ଏୟ ଇସ୍ରାଏଲୀୟ ଦାଦାଲଡ୍ ନୁ ଏଲୀୟା, ମିଡ୍ ନୁ ମିଇ ନେତାଲଡ୍ ଜିସୁନ୍ ସେଙ୍ଗେ ବାଆତେ ମାଡ଼ିଡ୍, ଆଦ୍ ପୁନ୍‌ଖେକଟ ମାଡ଼ିଡ୍, ଇଦ୍ ନାନ୍ ପୁଡ଼ତାନ୍ ।

୧୮ ନାର୍‌ଗେ ଦିନାଡ୍ ମୁନେଙ୍କ ସାରେ ବାବବାଦୀଡ୍ ପାୟୁରତାଗାଙ୍କ ଇଶ୍ବର ଗୋଷ୍ଠନା ମାଡ଼ିମାଡ଼ତଣ୍ଡ ଯେ, କ୍ରିଷ୍ଟଙ୍କ ଦୁଃକାମ୍ କଷ୍ଟ ମାଡ଼ଖେୟିଡ୍ । ଇଦ୍ ରକମ୍ ଅଣ୍ଡ ଆଦିଙ୍କ ସାରେ ମାଡ଼ତଣ୍ଡ ।

୧୯ ହେର୍‌କା ମାଡ଼ି ଇଶ୍ବରରେ ଗାରରେ ମାଲ୍‌ୟ ଖାଡ଼ାଡ୍ । ଆସୁଟେ ଅଣ୍ଡ ମିୟାଦ୍ ପାପ୍ କ୍ଷମା ମାଡ଼ିଡନ୍ ।

୨୦ ଆଦିଙ୍କ ପ୍ରବୁନାଗାଙ୍କ ମିଡ୍ ପବିତ୍ର ଆମ୍‌ନ୍ ଶକ୍ତି ପାଏମ୍ ଆଦିଡ୍, ଇଶ୍ବର ମିଇ ମାୟଦିଙ୍କ ମୁନେନ୍ ଏଞ୍ଜ୍‌ରେ ମସାହ ଜିସୁଙ୍କ ମେଣ୍ଡନ୍‌ଦାମ୍ ରହତିଡଣ୍ଡ ।

୨୧ ମୁନେଡ୍ କାଲାମ୍‌ରେ ପବିତ୍ର ବାବବାଦୀଡ୍ ତଡ୍, ଇଶ୍ବରରେ ଗଷ୍ଠନା ଲେକାମ୍ ସାରେ ବିଷୟ ପୁନେ ଆଦ୍‌ଦାନ୍ ଯାକ ଅଣ୍ଡ ସ୍ବର୍ଗତାଗ୍ ମାନ୍‌ତଣ୍ଡ ।

୨୨ ଇଦ୍ ବିଷୟରେ ମଶାଲ୍ କେଡ଼ତଣ୍ଡ, ‘ପ୍ରବୁ ଇଶ୍ବର ମିଇ ବକେଡ୍ ନା ରକମ୍ ଖେରଣ୍ଡ ବାବବାଦୀଙ୍କ ରହତିଡଣ୍ଡ । ଅଣ୍ଡ ମିଇ ନିଜେଡ୍ ବିଶ୍ବାସୀ ଲୋପେଙ୍କ ଖେରଣ୍ଡ । ଦାଦାଲ୍ ମିକିଙ୍କ ବାଡ୍ କେଡ଼ିଡଣ୍ଡ, ଆଦ୍ ସାରେ ବିଷୟ ମିଡ୍ ପାଲନ୍ ମାଡ଼ ଖେୟିଡ୍ ।

☆ ୩:୧୪ ମାଡ଼ିଡ୍ ୨୭:୧୫-୨୩; ମାର୍କ ୧୫:୭-୧୪; ଲୁକ ୨୩:୧୩-୨୩; ଯୋହନ୍ ୧୯:୧୨-୧୫.

^{୭୩} ବେନଆଇ ଆ ବାବବାଦୀନ୍ ବାକ୍ୟ ପାଲନ୍ ମାଡନ୍, ଅଂକିଙ୍କ୍ ଇଶ୍ବରତେ ନାରୁଡାଗାଙ୍କ୍ ଝେରେ ମାଡି ଦଂସ ମାଡିତଡ୍ ।

^{୭୪} ଇଞ୍ଜେ ବାଡ଼ ଗଟେମ୍ ଆଦୁଡ଼ ଆଦ୍ ବିଷୟତେ ଶାମୁୟେଲ୍ ନୁ ଅଣ୍ଟ ପେରକେ ବେସର୍ ବାବବାଦୀଡ଼ ଗଟ୍ କେଡ଼ତଡ଼, ଅଡ଼୍ ସାରେତଡ଼, ମିକା ଇଦ୍ ଜୁଗ୍ ବିଷୟତେ ପ୍ରଚାର ମାଡ଼ତଡ଼ ।

^{୭୫} ବାବବାଦୀଡ଼ ପାୟୁରଡାଗାଙ୍କ୍ ଇଶ୍ବର ବେନସାରେ ପ୍ରତିଜ୍ଞା ମାଡ଼ତଡ଼, ଆଦ୍ ମିଇ ସେଙ୍ଗେ ଟିକ୍, ମେଣ୍ଟେ ଇଶ୍ବର ମିଇ ଆନିଦାଦିଡ଼, ତଡ଼ ବେନ ରୁଲ୍ଲି ତିଆର୍ ମାଡ଼ତଡ଼, ମିଡ଼ ଆଗେଡ଼ ବାଗୀଦାର୍ । ଇଶ୍ବର ଅବ୍ରାହାମ୍‌ତିଙ୍କ୍ କେସମାଡ଼ତଡ଼, 'ମିଇ ବଂଶତଡ଼, ତଡ଼ ନାନନେ ପୃତିବିତାଗ୍ ସାରେ ନାରୁଡ଼କିଙ୍କ୍ ଆଶର୍ ବାଦ୍ ମାଡ଼ିତାନ୍ ।'

^{୭୬} ଆଦିଙ୍କ୍ ଇଶ୍ବର ପ୍ରତମେ ମିଇ ସେଙ୍ଗେ ତାନ୍ ଦାସତ୍ବ ତଲ୍‌ତାଗାଙ୍କ୍ ତେସ୍ ରହତଡ଼, ବେଲାକି ଅଣ୍ଟ ମିୟାଦ୍ ସାରେ ନାରୁଙ୍କ୍ ନିଜେଡ଼ ନିଜେଡ଼ କାରାପ୍ ହାରତାଗାଙ୍କ୍ ମାଲ୍‌ପି ଆଶର୍ ବାଦ୍ ମାଡ଼ିତନ୍ ।”

୪

ଇହୁଦୀ ମିଟିଙ୍କ୍‌ତାଗ୍ ପିତର୍ ନୁ ଯୋହନ୍

^୧ ପିତର୍ ନୁ ଯୋହନ୍ ନାରୁଡ଼କିଙ୍କ୍ ଇଦରକମ୍ ଶିକ୍ଷା ଇଦାନ୍‌ଝେଲେ ମନ୍ଦିରତେ ବେସକ୍‌ତୁଡ଼ ଜାଜକୀଡ଼, ମନ୍ଦିର ପ୍ରହରିଡ଼ତେ ସେନାପତି ନୁ ସାଦୁକୀଡ଼ ଝାସ୍ ହେସ୍ତତଡ଼ ।

^୨ ଅଡ଼୍ ବିଜାର୍ ଆଡ଼ତଡ଼, ବାତେଙ୍କ୍‌ଇଡ଼କେ ଜିସୁ ତଲ୍‌ତାଗାଙ୍କ୍ ପୁନରୁତାନ୍ ଆଡ଼ତନ୍ ଇଞ୍ଜ ଇରସ୍ତୁଡ଼, ପ୍ରେରିତ ଶିଷ୍ୟଡ଼, ଶିକ୍ଷା ହସମାଡ଼ତଡ଼ ନୁ ତଲ୍‌ତେନଡ଼, ମେଣ୍ଟେଅନ୍‌ଦାମ୍ ଜିଝେ ଆଦତଡ଼, ଇଞ୍ଜ ପ୍ରାମାନ୍ ମାଡ଼ମାଡ଼ତଡ଼ ।

^୩ ଆଦିଙ୍କ୍ ଅଡ଼ ଇରସ୍ତୁଡ଼, ପ୍ରେରିତ ଶିଷ୍ୟଡ଼କ୍ ଗିରାପ୍ ମାଡ଼ତଡ଼, ନୁ ମେଣ୍ଟନଦିନ୍ ଯାକ ଅଡ଼କ୍ ଜେଲ୍‌ତାଗ୍ ନେହେତଡ଼, ବାତେଙ୍କ୍‌ଇଡ଼କେ ଆସୁଟେ ମୁଲ୍‌ପୁର୍ ଆସ୍‌ମାଡ଼ତେ ।

^୪ ଇଡ଼କେ ଅଡ଼ଝାଦ୍ ଶିକ୍ଷା କେଞ୍ଜିମାନ୍‌ଦାନ୍ ନାରଗେ ନାରୁଡ଼, ବିଶ୍ବାସ ମାଡ଼ତଡ଼, ନୁ ଅଡ଼ଝାଦ୍ ସଂକ୍ୟା ନାଗେ ଅସ୍ ମାଡ଼ମ୍ ପାଞ୍ଚ ହଜାର୍ ଆଡ଼ତେ ।

୫ ମେଣ୍ଡନ୍‌ଦିନେ ଯିହୁଦି ନେତାଲଡ଼, ବୟସ୍କା ନାରୁଡ଼, ନୁ ଦର୍ମଗୁରୁଡ଼, ଯିରୁଶାଲେମ୍‌ତାଗ୍ ଅଣ୍ଟାୟାଗେ ଗୁଡ଼ତଡ଼ ।

୬ ଆଗେ ଅଡ଼, ବେଡ଼୍‌ୟେ ଜାଜକ୍ ହାନାନ, କାୟାପା, ଯୋହନ୍, ଆଲେକ୍‌ଜାଣ୍ଡାର ନୁ ବେଡ଼୍‌ୟେ ଜାଜକ୍ ପରିବାରତେ ମେଣ୍ଡେବାଗାତଡ଼କିଙ୍କ୍ କାଲ୍‌ଲଡ଼ ।

୭ ଅଡ଼ ପ୍ରେରତ ଶିଷ୍ୟଡ଼କ୍ ମୁନେ ତାସ୍ ପ୍ରଶ୍ନ ମାଡ଼ତଡ଼, “ମିଡ଼, ଇଦ୍ ସାରେ ବେଲା ମାଡ଼ଡ଼ିଡ଼? ବେନନ୍ ଶକ୍ତିତେ ନୁ ବେନନ୍ ପେଦେରତେ ଇଦ୍ ମାଡ଼ଡ଼ିଡ଼?”

୮ ଆସୁଗେ ପିତର୍ ପବିତ୍ର ଆଡ଼ମାତେ ପୁଣ୍ଡି ଆସ୍ ଅଡ଼କିଙ୍କ୍ କେଡ଼ତଣ୍ଡ, “ଏୟ ନାରୁଡ଼ତେ ନେତାଲଡ଼, ନୁ ବୟସ୍କା ନାରୁଡ଼ି;

୯ ନେଣ୍ଡି ଯଦି ମାକିଙ୍କ୍ ଇ କୁଟାନ୍ ଲେକେଡ଼ ଆଡ଼ତେ ପାଡ଼ିୟି ବିଷୟତେ ପାତ୍ରାମାଡ଼ିତଡ଼, ଜେ, ଇଣ୍ଡି ନାରୁଣ୍ଡି ବେଲା ଅସ୍ ସୁସ୍ଥ ଆଡ଼ତଣ୍ଡ,

୧୦ ଆଦିଙ୍କ୍ ମିଡ଼, ନୁ ଇସ୍ରାଏଲ୍‌ତେ ସାରେତଡ଼, ପୁନ୍ ଖେୟୁଡ଼ିଡ଼ ଜେ, ମିଲ୍ ମୁନେ ନିସ୍ ମାନ୍‌ନ୍ ଇ ନାରୁଣ୍ଡି ମାଡ଼ମ୍ ନାଜରିତ୍‌ୟ ଜିସୁ କ୍ରିଷ୍ଟନ୍ ପେଦେରତେ ଶକ୍ତିତଡ଼, ସାରେ ସୁସ୍ଥ ଆଡ଼ତଣ୍ଡ । ବେନଙ୍କ୍ ମିଡ଼, କୁଟାଗାନ୍ ଆଞ୍ଜକଡ଼ିଡ଼, ମେଣ୍ଡେ ଇଶ୍ବର ଅଂକିଙ୍କ୍ ଡଲ୍‌ତାଗାଙ୍କ୍ ମେଣ୍ଡନ୍‌ଦାମ୍ ଜିହୁନ୍ ମାଡ଼ତଣ୍ଡ ।

୧୧ ଜିସୁ ଆଦୁତନ୍ ଖେରଣ୍ଡି ବେନଙ୍କ୍ ଦର୍ମଶାସ୍ତ୍ର କେଡ଼ିଡ଼, ‘ବେନ୍ କାଲ୍‌ଦିଙ୍କ୍ ଲକ୍ ତିଆରମାଡ଼ାନଡ଼, ପାସ୍କାଡ଼ିଡ଼, ଆଦ୍ କାଲ୍ ସାରେଡ଼ିଙ୍କ୍ ଲେକେଡ଼ ଆଡ଼ତେ ।’

୧୨ ମାଡ଼ମ୍ ଅନ୍ ତଡ଼, ପରିତ୍ରାନ୍ ସମ୍ବଦ୍ ଆଦତେ, ବାତେଙ୍କ୍‌ଇଡ଼କେ ଇଦ୍ ସ୍ବର୍ଗତାଗ୍ ମାନ୍‌ନ୍ ମେଣ୍ଡେଅନ୍ ପେଦେରତଡ଼, ନାରୁଡ଼କିଙ୍କ୍ ମୁକ୍ତି ଦରକ ।”

୧୩ ପିତର୍ ନୁ ଯୋହନ୍ ଅଶିକିଡ଼ ନୁ ସାଦାରନ୍ ନାରୁଡ଼, ମାଡ଼ତଡ଼, ଇଞ୍ଜି ବେଡ଼ିୟିମିଟିଙ୍କ୍‌ତେ ସଦସ୍ୟଡ଼, ପୁଞ୍ଜମାଡ଼ତଡ଼ । ଆଦିଙ୍କ୍ ଇରଞ୍ଜୁଡ଼ାଦ୍ ସାହାସ୍ ଉଡ଼ି ଅଡ଼ କାବା ଆଡ଼ତଡ଼, ମେଣ୍ଡେ ଅଡ଼, ଇରଞ୍ଜୁଡ଼, ଜିସୁନ୍ ସାଙ୍ଗ୍ ମାଡ଼ତଡ଼, ଇଞ୍ଜି ଅଡ଼, ପୁଡ଼ତଡ଼ ।

୧୪ ଇଡ଼କେ ଅଡ଼, ବିରଦ୍ ମାଡ଼ି ବାଆତେ କେତାଙ୍କ୍ ପାରଞ୍ଜଡ଼, ବାତେଙ୍କ୍ ଇଡ଼କେ ସୁସ୍ଥ ଆସ୍‌ମାନ୍‌ନ୍ ନାରୁଙ୍କ୍ ପିତର୍ ନୁ ଯୋହନ୍ ତଡ଼,

ନିଶ୍ଚୟ ମାନ୍ୟତା ଦିଅନ୍ତୁ ।

୧୫ ଆଦିଙ୍କୁ ନେତାମାନଙ୍କୁ ନାମରେ କିଛି ମିଳିତାଗାରୀଙ୍କୁ ବାନ୍ଧିଦେ
ପେସ୍‌ପିସ୍ ଅଡ଼ ବିଷୟରେ ତାମ୍ଭାମ୍ଭ ଲୋପେ ଡିରକ୍ଷାଡିରକ୍ଷି
ଆଡ଼ତଡ଼ ।

୧୬ ଅଡ଼ କେଡ଼ତଡ଼, “ମାମ୍ଭ ଇଡ଼ ସେଙ୍ଗେ ବାଆଡେ ମାଡ଼ିତାଡ଼,
? ଯିରୁଶାଲେମ୍‌ତାଗ୍ ସାରେତଡ଼ ଇଡ଼ ମାଡ଼ତେ ଆଶର୍ଯ୍ୟ ପାଡ଼ି
ବିଷୟରେ ପୁଡ଼ତଡ଼ । ମାମ୍ଭ ଇଡ଼ ଅସ୍ମୀକାର୍ ମାଡ଼ାନଙ୍କୁ ପାର୍ଡ଼ମ୍ ।

୧୭ ବାଡେଙ୍କୁ ଇଡ଼କେ ଇଡ଼ ଗର୍ ବେଲା ନାରୁଡ଼ ଲୋପେ ମେଣ୍ଡେ
ଅଦିକ୍ ପ୍ରଚାର ଆୟମାକି, ଇଡ଼ିନ୍ ସେଙ୍ଗେ ଜିସୁନ୍ ପେଦେରଡେ
ମେଣ୍ଡେ ବେନଡ଼ିକିଙ୍କୁ ବାଆଡେ କେଲ୍‌ମାକିଡ଼ ଇଞ୍ଜି ଅଡ଼ିକିଙ୍କୁ ସତର୍କ
ମାଡ଼ିକାଡ଼ ।”

୧୮ ଆଦିଙ୍କୁ ଅଡ଼ ଅଡ଼ିକିଙ୍କୁ କାରକ୍ଷି ଜିସୁନ୍ ପେଦେରଡେ ମେଣ୍ଡେ
ବାଆଡେ କେଲ୍‌ମାକିଡ଼ ବା ଶିକ୍ଷା ହିମାକିଡ଼ ଇଞ୍ଜି ଗର୍ ହିଡ଼ତଡ଼ ।

୧୯ ବାଡେଙ୍କୁ ଇଡ଼କେ ପିତର ନୁ ଯୋହନ୍ ଅଡ଼ିକିଙ୍କୁ ଉତର ହିଡ଼ତଡ଼,
“ମିୟାଡ଼ ଗର୍ କେଞ୍ଜିତମ୍ ନା ଇଶ୍ବରଡେ ଗର୍ କେଞ୍ଜିତମ୍, ବେନ୍
ବିଷୟ ଇଶ୍ବରଡେ କଣ୍ଡେତେ ସାୟେ, ଆଡ଼ ମିଡ଼ିନିଜେ ନିଜେ ଲୋପେ
ବିଚାର ମାଡ଼ାଡ଼ ।

୨୦ ବାଡେଙ୍କୁ ଇଡ଼କେ ମାମ୍ଭେ ବାଆଡେ ଉଡ଼ତମ୍ ନୁ କେଞ୍ଜିତମ୍,
ଆଡ଼ ବିଷୟ କେଲ୍‌କେ ମାନ୍ୟତା ପାର୍ଡ଼ମ୍ ।”

୨୧ ଇଡ଼କେ ମହାସବା ଅଡ଼ିକିଙ୍କୁ ମେଣ୍ଡେ ଅଦିକ୍ ସତର୍କ ମାଡ଼ି
ଝିଡ଼ିତଡ଼େ । ଅଡ଼ିକିଙ୍କୁ ଦଣ୍ଡ ହିମାନ୍ୟ ଦରକାର ଆୟମ୍ ଇଞ୍ଜି
ଅଡ଼ ପୁଡ଼ତଡ଼, ବାଡେଙ୍କୁ ଇଡ଼କେ ବାଆଡେ ଗଡେମ୍ ଆଡ଼ତେ
ଆଦିନ୍ ସେଙ୍ଗେ ନାରୁଡ଼ ସାରେତଡ଼ ଇଶ୍ବରଡିଙ୍କୁ ଦନ୍ୟବାଡ଼ ହିମାଙ୍କୁ
ପସ୍‌ପଡ଼ତଡ଼ ।

୨୨ ବେନ୍ ନାରୁଣ୍ଡ ଇଡ଼ ଆଶର୍ଯ୍ୟ ପାଡ଼ିନ୍ ତଡ଼ ସୁସ୍ଥ ଆଡ଼ତଣ୍ଡ, ଅନ୍ୟା
ବନ୍ଧସ୍ ଚାଲିଶ୍ ହେଣ୍ଡିକ୍ ପରର ଆସ୍‌ମାଡ଼ତେ ।

ବିଶ୍ବାସୀଡ଼ ସାହାସ୍ ସେଙ୍ଗେ ପ୍ରାର୍ଥନା ମାଡ଼ତଡ଼

୨୩ ପିତର ନୁ ଜହନ୍ ମୁକ୍ତି ଆଡ଼ତେ ସାଙ୍ଗେ ସାଙ୍ଗେ ତାମ୍ଭ ଦଲ୍‌ତାଗ୍
ମାଲ୍‌ସ୍ ଆଡ଼ତଡ଼ ମେଣ୍ଡେ ମୁକ୍ତ ଜାଜକ୍ ନୁ ବନ୍ଧସ୍ ନାରୁଡ଼ ବାଡେନ୍
କେସ୍‌ମାଡ଼ତଡ଼, ଆଡ଼ ଅଡ଼ିକିଙ୍କୁ କେଡ଼ତଡ଼ ।

୨୪ ବିଶ୍ୱାସିତ୍, ସାରେଗର୍ କେଞ୍ଜିତେ ପେରକେ ସାରେତଡ୍, ଅଣ୍ଡୟାଗେ ଆସ୍ ଇଶ୍ୱରତେ ଗାରରେ ଇଦରକମ୍ ପ୍ରାର୍ଥନା ମାଡ୍ତଡ୍, “ହଁ ପ୍ରବୁ, ନିମ୍ ସ୍ୱର୍ଗ, ପୃତିବିତାଗ୍, ସମୁଦ୍ର ନୁ ଆସ୍ତୁ ସାରେ ଲୋପେ ମାନ୍ଦାନ୍ ସାରେବିଷୟ ତିଆର ମାଡ୍ତଡ୍ ।

୨୫ ପବିତ୍ର ଆମ୍ ତଡ୍, ନିମ୍ ଆନିଦାଦୀ ଦାଉଦ୍, ନିଝଣ୍ଡ ଦାସନ୍, ପାୟୁର ଇସ୍ ଇଦ୍ ଗର୍ କେସ୍ମାଡ୍ତି; ‘ଅଣଇହୁଦୀ ନାରୁଡ୍ ବାତେଙ୍କ୍ କାଡାମ୍ ଆଦତଡ୍, ମେଣ୍ଟେ ନାରୁଡ୍ ବାତେଙ୍କ୍ କାରାପ୍ ଚିନ୍ତେ ମାଡ୍ତଡ୍ ?

୨୬ ପ୍ରବୁନ୍ ବିରୁଦ୍ତେ ନୁ ତାନ୍ ମସୀହାନ୍ ବିରୁଦ୍ତେ ପୃତିବିତାଗ୍ ରାଜାଲଡ୍ ନିଜେତିଙ୍କ୍ ତିଆର ମାଡ୍ତଡ୍, ମେଣ୍ଟେ ଶାସନ୍ମାଡାନଡ୍, ଅଣ୍ଡୟାଗେ ଆଦତଡ୍ ।’

୨୭ ☆ନିଜାମ୍ ହେରଦ୍ ନୁ ପନ୍ତାୟ ପିଲାତ ଇଦ୍ ନାର୍ତାଗ୍ ଅଣଇହୁଦୀ ନୁ ଇସ୍ରାଏଲ୍ ନାରୁଡ୍ ତଡ୍ କାଲି ନିଝଣ୍ଡ ପବିତ୍ର ଦାସ, ବେନଙ୍କ୍ ମିଡ୍, ମସୀହା ଇଞ୍ଜି ଏଞ୍ଜିମିନ୍ଦେଡ୍, ଅଣ୍ଡ ଜିସୁନ୍ ବିରୁଦ୍ତେ ଷଡ୍ଜନ୍ମ ମାଡ୍ତଡ୍ ।

୨୮ ମିୟାଦ୍ ଶକ୍ତି ନୁ ଇଚ୍ଛା ଲେକାମ୍ ବାଆତେ ଗଟେମ୍ ଆଡ୍ତେ ଇଞ୍ଜି ମିଡ୍ ତିଆର ମାଡ୍ତମାଡ୍ତଡ୍, ଅଡ୍ ଅଣ୍ଡୟାଗେ ଆସ୍ ଆସ୍ତୁସାରେ ମାଡାଙ୍କ୍ ପସ୍ପଡ୍ତଡ୍ ।

୨୯ ପ୍ରବୁ, ଅଡ୍ ମାକିଂଙ୍କ୍ ବେନ୍ ଦମକ୍ ହିଡ୍ତଡ୍, ନିମ୍ନେ ଆଦ୍ ବିଷୟ ସେଙ୍ଗେ ମନଯୋଗ୍ ମାଡ୍ତେ ନୁ ସାହାସ୍ ମାଡ୍ତି ନିୟାଦ୍ ସୁସମାଚାର୍ ପ୍ରଚାର ମାଡାଙ୍କ୍, ନିଝଡ୍ ଇ ଦାସଡ୍କିଂଙ୍କ୍ ସାହାସ୍ ହିମ୍ ।

୩୦ ନିଝଣ୍ଡ ପବିତ୍ର ଦାସ ଜିସୁନ୍ ପେଦେରତେ ସୁସ୍ତ ମାଡାନ୍ ସେଙ୍ଗେ ନୁ ଆଦ୍ବୁଡ୍ ନୁ ଆଶର୍ଯ୍ୟ ପାଡ୍ଡି ସାଦନା ମାଡାନ୍ ମାଇଦିଙ୍କ୍ ନିୟାଦ୍ କାୟି ହାଆମ୍ ।”

୩୧ ଅଡ୍ ପ୍ରାର୍ଥନା ମାଡାନ୍ ଝେଲେ ବେନ୍ ପଡ୍ଡେତାଗ୍ ଅଣ୍ଡୟାଗେ ଆସ୍ମାଡ୍ତଡ୍, ଆଦ୍ ପଡ୍ଡି ଲେଙ୍ଗ୍ଦେ ବର୍ତ୍ତ୍ ଆଡ୍ତେ । ମେଣ୍ଟେ ସାରେତଡ୍ ପବିତ୍ର ଆଡ୍ମା ତଡ୍ ପୁରା ଆସ୍ ସାହାସ୍ ତଡ୍ ଇଶ୍ୱରତେ ବାକ୍ୟ କେତାଙ୍କ୍ ପସ୍ପଡ୍ତଡ୍ ।

ବଶ୍ୱାସୀଡ୍ ତାମ୍ତାମ୍ଲୋପେ ସମ୍ପତିତିଙ୍କ୍ ସାମାନ୍ ତୁସ୍ତଡ୍,

☆ ୪:୨୭ ଲୁକ ୨୩:୭-୧୧; ମାଡିତ ୨୭:୧,୨; ମାର୍କ ୧୫:୧; ଲୁକ ୨୩:୧; ଯୋହନ୍ ୧୮:୨୮,୨୯.

୩୨ ☆ ବିଶ୍ୱାସୀତ୍, ଖେରତ୍, ମାନ ନୁ ଖେରତ୍ ହୃଦୟ ତେ ମାତ୍ତତ୍,
। ବେନତ୍, ତାମ୍ ସମ୍ପତ୍ତିତିଙ୍କ ନିଜେତ୍ ସମ୍ପତ୍ତି ଇଞ୍ଜ ଦାବୀ ମାତ୍ତତ୍,
ସାରେତତ୍ତ୍ୱାଦ୍ ସମ୍ପତ୍ତିତିଙ୍କ ଅତ୍, ସାମାନ ତୁହୁସ୍ତତ୍ ।

୩୩ ବେତ୍ତ୍ୱାଦ୍ ଶକ୍ତି ତତ୍, ପ୍ରେରିତ ଶିଷ୍ୟତ୍, ପ୍ରବୁ ଜିସୁନ୍ ପୁନରୁତାନ
ବିଷୟତେ ସାକ୍ଷ୍ୟ ହିତ୍ତତ୍, ନୁ ଇଶ୍ବର ଅତ୍, ପରର ନାଟ୍ରେ ଅନୁଗ୍ରହ
ମାତ୍ତତ୍ ।

୩୪ ଅତ୍ତାଦ୍ ମାନ୍ଦେତାଗ୍ ବେନ ନାରୁଣ୍ଡ ଅବାବ୍ ଇଲ୍ଲଖେମାତ୍ତତ୍
। ବେନତ୍ତାସ୍ତୁ ଖାୟା ନୁ ଲନ୍ ମାତ୍ତତା, ଅଣ୍ଡ ଆସ୍ତୁସାରେ ଖାମି ତାବ୍‌କ୍
ତାସ୍,

୩୫ ଅତ୍, ପ୍ରେରିତ ଶିଷ୍ୟତ୍‌ଙ୍କ ହିସମାତ୍ତତ୍, ମେଣ୍ଡେ ଆସ୍ତୁ ତାବ୍‌କ୍
ଅତ୍, ଲୋପେ ସାରେତତ୍ତ୍ୱାଦ୍ ଦରକାର୍ ଲୋକାମ୍ ତୁହୁସ୍ତତ୍ତ୍ୱାଦ୍
।

୩୬ ସାକ୍ଷପ୍ରସ୍ ଜାଗେତାଗ୍ ଜନମ୍ ଆସ୍‌ମାନ୍ ଲେବୀୟ ବଂଶତ୍
ଯୋଷେଫ୍, ବେନଙ୍କ ପ୍ରେରିତ ଶିଷ୍ୟତ୍, ବର୍ଣ୍ଣବା ଇଞ୍ଜ ପେଦେର୍
ଇସ୍‌ମାତ୍ତତ୍, ବର୍ଣ୍ଣବା ଇତ୍‌କେ ସାର୍‌ଦେତ୍ ମାର୍,

୩୭ ଅନାଦ୍ ଅଣ୍ଡୟ ଖାୟେ ମାତ୍ତତେ, ଅଣ୍ଡ ଆଦ୍ ଖାମିମିକା ତାବ୍‌କ୍
ତାସ୍ ପ୍ରେରିତଶିଷ୍ୟତ୍‌ଙ୍କ ହିତ୍ତତ୍ ।

୫

ହନନୀୟ ନୁ ଶଫୀରା

୧ ହନନୀୟ ପେଦେର୍‌ତେ ଖେରଣ୍ଡ ନାରୁଣ୍ଡ ନୁ ତାନ ମୁତ୍ତେ
ଶଫୀରା ତାମ୍‌ଜାଦ୍ ବେସ୍‌କେ ଖାୟା ଖାମ୍‌ତତ୍ ।

୨ ଇତ୍‌କେ ମୁତେନ୍ ରାଜି ଲୋକାମ୍ ଅଣ୍ଡ ବେସର୍ ତାବ୍‌କ୍ ତାମ୍
ନିଜେତ୍ ସେଙ୍ଗେ ନେହେତଣ୍ଡ ନୁ ମେଣ୍ଡେ ବାଗାତ୍ ସାରେ ତାବ୍‌କ୍ ତାସ୍
ପ୍ରେରିତ ଶିଷ୍ୟତ୍‌ଙ୍କ ହିତ୍ତତ୍ ।

୩ ପିତର୍ ଅଂକିଙ୍କ କେତ୍‌ତଣ୍ଡ, “ହନନୀୟ, ନିମ୍ ବାତେଙ୍କ ଶୟତାନ
ହୃଦୟତେ ଖାମିମିକା ଦରକି ମାନ୍ଦାନ୍ ତାବ୍‌କ୍ ନିଜେତ୍ ମାକ୍‌ଦିଙ୍କ
ବେସର୍ ନେହେସ୍ ପବିତ୍ର ଆତ୍‌ମାନ୍ ଗାରରେ ମିର୍ କେତ୍‌ତିନ୍ ?

୪ ଖାମାନ୍ ମୁନେଙ୍କ ଆଦ୍ ନିୟାଦ୍ ମାତ୍ତତେ, ଖାମ୍‌ତେ ପେର୍‌କେ
ମିକା ଆଦ୍ ଅଦିକାର୍ ନିୟାଦ୍ ମାତ୍ତତେ । ବାତେଙ୍କ ନିମ୍ ଇଦ୍ ରକମ୍

ପାତ୍ରୁ ଯି ମାଡ଼ାଙ୍କ ହୃଦୟତାଗ୍ ଚିନ୍ତେ ମାଡ଼ିତ ? ନିମ୍ ନାରୁଡ଼କିଙ୍କ୍ ମିର୍ କେଲ୍‌ଝିନ୍, ବାତେଙ୍କ୍ ଇଡ଼କେ ଇଶ୍‌ବରତିଙ୍କ୍ ନିମ୍ ମିର୍ କେଡ଼ତିନ୍ ।”

୫ ହନନୀୟ ଇଦ୍ ଗର୍ କେଜ୍‌ଜାନ୍ ସାଙ୍ଗେ ସାଙ୍ଗେ ନେଲ୍ ଗୁବ୍‌ରାଲି ଡଲ୍‌ଡଣ୍, ମେଣ୍ଟେ ବେନଡ଼ ଇଦ୍ ଗର୍ କେଜ୍‌ଡ଼, ଅଡ଼ ସାରେ ଗାଟି ଝେରଡ଼ ।

୬ ଲେୟଡ଼ ତେଦିଝାସ୍ ଅକିଙ୍କ୍ ସିଲେଡ଼, ଉଡ଼ଡ଼, ନୁ ବାୟିଦେ ଆସ୍ ସମାଦି ହିଡ଼ଡ଼ ।

୭ ପ୍ରାୟ ମୁଣ୍ ଗାଣ୍ ପେରକେ ତାନ୍ ମୁଡ଼ତେ ଖାଡ଼ତେ, ଇଡ଼କେ ବାଆଡେ ଗଟେମ୍ ଆଡ଼ତେ, ଆଦ୍ ବିଷୟ ପୁନଝେ ମାଡ଼ତେ ।

୮ ପିତର୍ ଆଦିଙ୍କ୍ ପାତ୍ରା ମାଡ଼ଡ଼, “ନାକିଙ୍କ୍ କେଲ୍‌ମ୍, ନିମ୍ ନୁ ନିଜ୍ ମୁଦ୍‌ପାଲ୍ ବେନ୍ ଖାୟା ଖାମ୍‌ଡ଼ିଡ଼, ଇଦ୍ ବାଆଡେ ଆଦିନାଦ୍ ସାରେ ମୁଲ୍ୟ ?” ଆଦ୍ କେଡ଼ତେ, “ହଁ, ଆସରେ ।”

୯ ପିତର୍ ଆଦିଙ୍କ୍ କେଡ଼ଡ଼, “ପ୍ରବୁନ୍ ଆମ୍‌ଙ୍କ୍ ପରିକ୍ଷା ମାଡ଼ାଙ୍କ୍ ନିମ୍ ନୁ ନି ମୁଦ୍‌ପାଲ୍ ବାତେଙ୍କ୍ ଆଲ୍‌ସ୍‌ଡ଼ିଡ଼ ? ବେନଡ଼ ନି ମୁଦ୍‌ପାଙ୍କ୍ ସମାଦି ହିଡ଼ଡ଼, ଅଡ଼ ଇଜ୍‌ଜେ ମାର୍ ବକେଡ଼ ହେଝୁଡ଼ଡ଼, ଅଡ଼ ନିକିଙ୍କ୍ ମିକା କାଞ୍ଜୀ ବାୟିଦେ ଆଦ୍‌ଡ଼ ।”

୧୦ କେଡ଼ତେ ସାଙ୍ଗେ ସାଙ୍ଗେ ଆଦ୍ ଅନ୍ ତେକେଡ଼ ମଦଲ୍ ରାଲି ଡଲ୍‌ଡେ । ଲେୟଡ଼ ଲୋପେ ଖାସ୍ ଆଦିଙ୍କ୍ ଡଲ୍‌ମାନ୍‌ନାଦ୍ ଉଡ଼ି କାଞ୍ଜୀ ବାୟିଦେ ଆଡ଼ଡ଼ । ନୁ ତାନ୍ ମୁଦ୍‌ପାନ୍ ସମାଦି ଗାରରେ ତାଙ୍କ୍ ସମାଦି ହିଡ଼ଡ଼ ।

୧୧ ଆଗାଙ୍କ୍ ମଣ୍ଡଲିଡେ ସାରେଡ଼ ନାରୁଡ଼, ନୁ ବେନଡ଼ ଇଝୁ ଗଟି କେଜ୍‌ଡ଼, ସାରେଡ଼ ଗାଟି ଝେରଡ଼ ।

ଅଦବୁଡ଼ ନୁ ଆଶର୍ଯ୍ୟ ପାତ୍ରୁ

୧୨ ପ୍ରେରିତ ଶିଷ୍ୟଡ଼, ତଡ଼ ନାରୁଡ଼, ଲୋପେ ନାର୍‌ଗେ ଆଦବୁଡ଼ ନୁ ଆଶର୍ଯ୍ୟ ପାତ୍ରୁ ଆସମାଡ଼ତେ । ସାରେଡ଼, ବିଶ୍ୱାସୀଡ଼, ଶିଳୋମନ୍‌ଡେ ମଣ୍ଡପତାଗ୍ ଅଣ୍ଡୟାଗେ ଆସମାଡ଼ଡ଼ ।

୧୩ ଦଲ୍‌ଦେ ବାୟିଦେ ମାନ୍‌ନାନ୍ ନାରୁଡ଼କିନ୍ ଲୋପେକ୍ ବେନ ଅଡ଼ଡ଼, କାଜଲାନଙ୍କ୍ ସାହାସ୍ ମାଡ଼ଝେମାଡ଼ଡ଼, ମିକା ନାରୁଡ଼, ଅଡ଼ାଦ୍ ପ୍ରସଂଗା ମାଡ଼ି କେସମାଡ଼ଡ଼ ।

୧୪ ମେଣ୍ଡେ ନାରଗେ ମାନେୟ ନୁ ନାଗା ବିଶ୍ୱାସ ମାଡ଼ି ପ୍ରବୁନ୍ ତଡ଼, କାଜଲାନ ମାଇଦିଙ୍କ ମାନ୍ଦେତାଗ୍ ଖାଡ଼ତଡ଼ ।

୧୫ ପ୍ରେରିତ ଶିଷ୍ୟତାଦ୍ ପାଡ଼ୟି ନିଡ଼ଦିନ୍ ନଗେ ଆଡ଼ତେ, ପିତର୍ ଖାଦାନ୍‌ଝେଲେ ଅନାଦ୍ ନିଡ଼କେ ବେଲାକି ରୋଗାଡ଼, ଲୋପେଙ୍କ୍ ବେନଡ଼, ବେନଡ଼, ପରର ରାଲିଡ଼, ଇଦିନ୍ ସେଙ୍ଗେ ନାରୁଡ଼ ଅଡ଼କିଂଙ୍କ୍ ଦୁଆତାଗ୍ କାଞ୍ଜିଆସ୍, କେଡିନାଗ୍ ନୁ କାଟୁଲକିନାଗ୍ ଖାଟିସ ମାଡ଼ତଡ଼,

୧୬ ଯିରୁଶାଲେମତେ ସାରେପାକ୍ ଟାଞ୍ଜୁନକିନାଗାଙ୍କ୍ ନାରୁଡ଼, ମିକା ରୋଗିଡ଼କ୍ ନୁ ବୁଡ଼ ପୟତେନଡ଼କ୍ ତାସମାଡ଼ତଡ଼, ମେଣ୍ଡେ ଅଡ଼, ସାରେତଡ଼, ସୁସ୍ଥ ଆଡ଼ତଡ଼ ।

ପ୍ରେରିତଡ଼କ୍ ତାଡ଼ନା ମାଡ଼ତଡ଼

୧୭ ତାନପେକେ ମହାଜାଜକ୍ ନୁ ତାମ୍ ସାଙ୍ଗଡ଼, ସାରେତଡ଼, ମେଣ୍ଡେ ସାଦୁକାଡ଼, ମାନ୍ଦେ, ପ୍ରେରିତ ଶିଷ୍ୟଡ଼କ୍ ଗାଟି ଇର୍ଷା ମାଡ଼ତଡ଼, ଆଦିଙ୍କ୍ ଅଡ଼, ଦଣ୍ଡ ହିଦାନ୍ ମାଇଦିଙ୍କ୍ ତିଆର୍ ମାଡ଼ତଡ଼ ।

୧୮ ଅଡ଼, ପ୍ରେରିତଡ଼କ୍ ଗିରାପ୍ ମାଡ଼ତଡ଼ ନୁ ଜଇଲଦାଗ୍ ତୁର୍ତଡ଼ ।

୧୯ ଇଡ଼କେ ପ୍ରବୁନାଦ୍ ଅଣ୍ଡୟ ଦୂଡ଼, ନାରକେଡ଼ ଝେଲେ ଜଇଲତେ ମାର୍ ସାରେ ତେର୍ସିଡ଼ତେ ନୁ ପ୍ରେରିତଡ଼କ୍ ପେସ୍‌ପିଇ ତାସ୍, କେଡ଼ତେ,

୨୦ “ଆନୁର୍, ମନ୍ଦିରତାଗ୍ ନିଗ୍ ଇଦ୍ ପୁନାଦ୍ ଜିଝୁଣ୍ ବିଷୟତେ ଗଟି ନାରୁଡ଼କିଂଙ୍କ୍ କେଲାଟ୍ ।”

୨୧ ଇଦ୍ କେଞ୍ଜି ପ୍ରେରିତଡ଼ ନାରକା ମନ୍ଦିରତାଗ୍ ହସି ଶିକ୍ଷା ହିଦାଙ୍କ୍ ପସ୍‌ପଡ଼ତଡ଼ । ଆଗେ ବେଡ଼ୟେ ଜାଜକ୍ ନୁ ତାମ୍ ସାଙ୍ଗଡ଼, ବୟସ୍, ଇହୁଦୀଡ଼, ବାଡ଼ୟେମିଟିଙ୍ ଅର୍ତ୍ତ ଇସ୍ରାଏଲ୍‌ତେ ସାରେ ବୟସ୍, ନାରିଡ଼, ଗୁଡ଼ି ମିଟିଙ୍ ମାତାନଙ୍କ୍ କାରଙ୍ଗୁତଡ଼, ତାନପେକେ ପ୍ରେରିତଡ଼କିଂଙ୍କ୍ ତାତାନ୍ ସେଙ୍ଗେ ଜଇଲତାଗ୍ କାବୁର୍ ହିଡ଼ତଡ଼ ।

୨୨ ଇଡ଼କେ କର୍ମଚାରୀଡ଼, ଆଞ୍ଜି ଜଇଲତାଗ୍ ଅଡ଼, ଦର୍କ୍‌ଝାଙ୍କ୍ ମାଲ୍‌ସ୍ ଝାସ୍ ବେଡ଼ୟେସବାତିଙ୍କ୍ କେଡ଼ତଡ଼,

୨୩ “ମାମ୍‌ମେ ଜଇଲତାଗ୍ ଏଝୁସ୍ ଉଡ଼ତମ୍, ଜଇଲ୍ ସାରେ ବନ୍ଦ୍ ମାଡ଼ତେ, ମେଣ୍ଡେ ମାର୍‌ତାଗ୍ କେପାନଡ଼, ନିଗ୍‌ମାଡ଼ତଡ଼, ଇଡ଼କେ ମାର୍ ଟେଣ୍ଡି ଉଡ଼ତାଙ୍କ୍ ଲୋପେ ବେନ ଇଲାଡ଼ !”

୨୪ ଇସ୍ରାଏଲରେ ଗଟି କେଞ୍ଜି ମୁକ୍ୟ ଜାଜକ ନୁ ମନ୍ଦିରରେ ସେନାପତି, ପ୍ରେରିତତ୍ ସେଙ୍ଗେ ବାତେଏ ଗଟେମ୍ ଆଦତେ ଇଞ୍ଜ ହାଲ୍ଲସି କାବା ଆଦିତତ୍ ।

୨୫ ଆସୁଟେ ଖେରଣ୍ଡ ନାରୁଣ୍ଡ ଖାସ୍ ଅଡ଼କିଂଙ୍କ କେଡ଼ତଣ୍ଡ, “କେଞ୍ଜାଟ୍ ! ବେନଡ଼କିଂଙ୍କ ମିଡ଼ ଜଇଲ୍‌ତାର୍ ଖାଟିମାଡ଼ତିଡ଼ ଅଡ଼ ମନ୍ଦିରତାର୍ ନାରୁଡ଼କିଂଙ୍କ ଶିକ୍ଷା ଇଦୁତଡ଼ !”

୨୬ ଆସୁଟେ ସେନାପତି କାମ୍‌ମାଡ଼ାନଡ଼, ତଡ଼ ଆଞ୍ଜ ଅଡ଼କ୍ ମେଣ୍ଡେଅନ୍‌ଦାମ୍ ମାଲ୍‌ପି ତାଡ଼ତଣ୍ଡ, ଅଡ଼ ବାଡ଼ବା ଶାଡ଼ଝାମଡ଼ତ୍ ମାଡ଼ଡ଼, ବାତେଙ୍କଇଡ଼କେ କାଲେ ନାରୁଡ଼, ତାମ୍ ପର୍ର କାଲ୍‌କ୍ ଏସିତଡ଼ ଇଦ୍ ଖେର୍ ଅଡ଼କ୍ ମାଡ଼ତେ ।

୨୭ ଅଡ଼ ପ୍ରେରିତଡ଼କ୍ ତାସ୍ ମହାସବାଡ଼ ମୁନ୍‌ନେ ନିଶ୍ଚିତଡ଼ । ଆଗାଙ୍କ ବେଡ଼୍‌ୟଣ୍ଡ ଜାଜକ୍ ଅଡ଼କିଂଙ୍କ ପ୍ରଶ୍ନ ପାତ୍ରା ମାଡ଼ତଣ୍ଡ ।

୨୮ ☆ “ଅଣ୍ଡ କେଡ଼ତଣ୍ଡ, ମାମ୍‌ମେ ମିକିଂଙ୍କ ଇଦ୍ ପେଦେରରେ ଶିକ୍ଷା ହିଦାଙ୍କ୍ ସାରେ ମନା ମାଡ଼ିମାଡ଼ତମ୍, ଇଡ଼କେ ଉଡ଼ାଟ୍ ମିଡ଼ ବାତେ ମାଡ଼ତିଡ଼ ! ମିଡ଼ ମିୟାଦ୍ ଶିକ୍ଷା ଯିରୁଶାଲେମ୍ ସାରେଏକାମ୍ ପ୍ରଚାର ମାଡ଼ି ଆଦ୍ ନାରୁଣ୍ଡତେ ଦଂସ ଆଦାନାଦ୍ ମା ପର୍ର ଦାୟା ମାଡ଼ାଙ୍କ୍ ତାଏମ୍ ଆଦୁତିଡ଼ !”

୨୯ ପିତର୍ ନୁ ପ୍ରେରିତ ଶିଷ୍ୟଡ଼ ଉଉର୍ ହିଡ଼ତଡ଼, “ମାମ୍ ଇଶ୍ବରରେ ଗଟ୍ କେଞ୍ଜିତମ୍ ମାଡ଼ମ୍ ନାରୁଡ଼କିଂଙ୍କ ଆୟ୍‌ୟ ।

୩୦ ବେନ୍ ଜିସୁଙ୍କ ମିଡ଼ କୁଶତାର୍ ଖେ୪ସ୍ ଆଞ୍ଜି ମାଡ଼ତିଡ଼, ମାନ୍ ଆନିଦାଦାଡ଼ ଇଶ୍ବର ଅଂକିଂଙ୍କ ତଲ୍‌ତାଗାଙ୍କ୍ ତେଏସ୍ ମିନ୍ଦେଣ୍ଡ ।

୩୧ ଇସ୍ରାଏଲ୍‌ରେ ନାରୁଡ଼କିଂଙ୍କ ଅନୁତାପ୍ ମାଡ଼ି ପାପ୍ କେମା ଇଦାନ୍ ସୁଯୋଗ୍ ଇଦାଙ୍କ୍ ଇଶ୍ବର ଅଂକିଂଙ୍କ ତିନ୍ଦେପାକେଡ଼ ନେତା ନୁ ତ୍ରାଶକର୍ତ୍ତାଲ୍ ଲେକାମ୍ ତେଇସ୍ ମିନ୍ଦେଣ୍ଡ ।

୩୨ ମାନାଡ଼ ଇଦ୍ ସାରେ ବିଷୟତାଦ୍ ସାକ୍ଷି, ମେଣ୍ଡେ ବେନ୍ ପବିତ୍ର ଆମ୍ବାଙ୍କ୍ ଇଶ୍ବର ତାନ୍ ଗଟି ପାଲନ୍ ମାଡ଼ାନଡ଼କ୍ ହିଡ଼ତଣ୍ଡ, ଅଣ୍ଡ ମିକା ସାକ୍ଷି ।”

୩୩ ବେଡ଼ିୟମିଟିଙ୍କରେ ସଦସ୍ୟଡ଼ ଇଦ୍ ଗଟ୍ କେଞ୍ଜି ଗାଟି କାଡ଼ାମ୍ ଆଦତଡ଼, ମେଣ୍ଡେ ଅଡ଼ ଶିଷ୍ୟଡ଼କିଂଙ୍କ ଆଞ୍ଜକାଂଙ୍କ୍ ତାଏମ୍ ଆଡ଼ତଡ଼ ।

୩୪ ବାତେଙ୍କ ଇଡ଼କେ ଗମଲୀୟେଲ୍ ପେଦେରତଣ୍ଡ ଝେରଣ୍ଡ ପାରୁଣୀ, ଅଣ୍ଡ ଝେରଣ୍ଡ ନିୟମ୍ ଗୁରୁ ନୁ ସାରେତଡ଼କିଙ୍କ ସାୟେଡ଼ ନାରୁଡ଼, ମାଡ଼ତଣ୍ଡ, ଅଣ୍ଡ ବେଡ଼ିୟେ ମିଟିଙ୍କଡ଼ାଗ୍ ନିଶ୍ ପ୍ରେରିତଡ଼କିଙ୍କ ବେସ୍‌କେ ଦିନାମ୍‌ତେ ସେଙ୍ଗେ ବାଇଦେ ଆଡ଼ତାଙ୍କ୍ ଗର୍ ହିଡ଼ତଣ୍ଡ,

୩୫ ବେଡ଼ିୟେମିଟିଙ୍କ୍‌ତେ ବାଡ଼ିୟେ ନାରୁଡ଼କିଙ୍କ୍ ଅଣ୍ଡ କେଡ଼ତଣ୍ଡ, “ଏୟ ଇସ୍ରାଏଲୀୟ ନାରୁଡ଼ି, ମିଡ଼ ଇଡ଼କିଙ୍କ୍ ବାଆତେ ମାଡ଼ାଙ୍କ୍ ଆଦୁଡ଼ିଡ଼, ଆଦ ବିଷୟତେ ସାବଦାନ ଆୟମୁଟ୍ ।

୩୬ ମିଡ଼ ଏକା ମାଡ଼ାଟ୍, ବେସ୍‌କେ ଦିନାମ୍ ମୁନେଙ୍କ୍ ଯିଉଦା ନିଜେ ଝେରଣ୍ଡ ବେଡ଼ିୟେ ଯାଜକ୍ ଇଞ୍ଜି କେଡ଼ତଣ୍ଡ ନୁ ମାଡ଼ମ୍ ଚାରୁଣ୍ଡ ନାରୁଡ଼ ଅନ୍‌ତଡ଼ ବିଶ୍ୱାସ୍‌ତେ କାଇଲ୍‌ତଡ଼; ଇଡ଼କେ ଅଣ୍ଡ ଡଲ୍‌ତଣ୍ଡ, ଅନ୍ ପେରକେ ମାନ୍ଦାନଡ଼ ଚିନ୍‌ବିନ୍ ଆଦତଡ଼ ନୁ ଅନାଦ ଦଲ୍ ଦଂସ ପାଏମ୍‌ଆଡ଼ତେ ।

୩୭ ତାନ୍‌ପେକେ ଜନଗନନା ସମୟତେ ଗାଲିଲୀୟ ଯିହୁଦା ପେଦେରତଣ୍ଡ ମେଣ୍ଡେ ଝେରଣ୍ଡ ଝାଡ଼ତଣ୍ଡ, ଅଣ୍ଡ ମିକା ନାରୁଗେ ନାରୁଡ଼କିଙ୍କ୍ ଆକର୍ଷନ ମାଡ଼ତଣ୍ଡ । ବାତେଙ୍କ ଇଡ଼କେ ଅଣ୍ଡ ମିକା ଡଲ୍‌ତଣ୍ଡ ମେଣ୍ଡେ ଅନ୍ ବିଶ୍ୱାସ୍ ମାଡ଼ି ପେକେମାନ୍ଦାନଡ଼ ଚିନ୍‌ବିନ୍ ଆଦତଡ଼ ।

୩୮ ଆଦିଙ୍କ୍ ନାନେ ମିକିଙ୍କ୍ କେଡୁତାନ୍, ମିଡ଼ ଇହି ନାରୁଡ଼କିଙ୍କ୍ ବାଆତେ ମାଡ଼କର୍ ଅଡ଼କିଙ୍କ୍ ଝିଡ଼ସିମୁଟ୍, ବାତେଙ୍କ ଇଡ଼କେ ଇଦ୍ ଜୋଜନା ବା ଇଦ୍ ପାଡ଼ିୟେ ଯଦି ନାରୁଡ଼ାଗାଙ୍କ୍ ଆଡ଼ତେ, ଆଲେକେ ଆଦ ଦଂସ ପାଏମ୍‌ଆଡ଼ତେ;

୩୯ ଇଡ଼କେ ଆଦ ଯଦି ଇଶ୍ୱରତାଗାଙ୍କ୍ ଆସ୍‌ମାନ୍‌ତେ ଇଞ୍ଜି ବିଶ୍ୱାସ୍, ଆଲେକେ ମିଡ଼ ଅଡ଼କିଙ୍କ୍ ଦଂସ ମାଡ଼ାନଙ୍କ୍ କଷ୍ଟ ଆଦତେ, କାଲେ ମିଡ଼ ଇଶ୍ୱରତେ ବିରୁଦ୍‌ତେ ଯୁଦ୍ ମାଡ଼ଡୁଡ଼ ଇଞ୍ଜି ତଅନ୍‌ଦିଡ଼ ।” ବେଡ଼ିୟେମିଟିଙ୍କ୍ ଗମଲିଏଡ଼ ପରାମର୍ଶ ଗ୍ରହନ୍ ମାଡ଼ତେ ।

୪୦ ଅଡ଼ ପ୍ରେରିତ ଶିଷ୍ୟଡ଼ ଲୋପେ କାରଙ୍ଗି, ଅଡ଼କିଙ୍କ୍ କଡ଼ାତେ ରେହେତଡ଼ ନୁ ଜିସୁନ୍ ପେଦେରତେ ବାଆତେ ଗଟି କେଲ୍‌ମା ଇଞ୍ଜି ଗର୍ ଇସ୍ ଝିଡ଼ସିଡ଼ତଡ଼ ।

୪୧ ପ୍ରେରିତ ଶିଷ୍ୟଡ଼ ପେଦେରତେ ବେଡ଼ିୟେମିଟିଙ୍କ୍‌ତାଗାଙ୍କ୍ ପେଇସ୍ ଆଦତଡ଼, ବାତେଙ୍କ ଇଡ଼କେ ଇଶ୍ୱରତେ କଣ୍ଡେତେ ଅଡ଼,

ଜିସୁନ୍ ସେଙ୍ଗେ ଅପମାନିତ ଆଦାନଙ୍କ ଯୋଗ୍ୟ ଆସ୍ମାତ୍ତତ୍ ।

୪୭ ମେଣ୍ଡେ ଅଡ୍ ସାରେଦିନେ ମନ୍ଦିରତାର୍ ନୁ ନାରୁଡ୍ତେ ଲଅକିନାର୍ ଶିକ୍ଷା ହିଡ୍ତଡ୍ ନୁ ମସୀହ ଜିସୁନ୍ ବିଷୟତେ ସୁସମାଚାର ପ୍ରଚାର ମାଡ୍ତଡ୍ ।



ସାତ ଜାନ୍ ସାହାଯ୍ୟମାଡାନଡ୍

୧ ବେସକେ ଦିନାମ୍ ପେରକେ ଶିଷ୍ୟତାଦ୍ ସଂକ୍ୟା ନାଗେ ଆଦାନ୍‌ଖେଲେ ଗ୍ରୀକ୍ ଗର୍ କେଡ୍‌ତାନ୍ ଇହୁଦୀଡ୍ ନୁ ଏବ୍ରିୟ ନାରୁଡ୍ କପାମ୍ ଆଦତଡ୍ । ନିତିଦିନେଡ୍ ପାଡ୍‌ୟି ତାବକ୍ ତୁସାନ୍‌ଖେଲେ ତାମ୍ ରାଣ୍ଡିକିଙ୍କ୍ ଗମାଡ୍ ମାଡ୍‌ତୁଡ୍ ଇଞ୍ଜ ଗ୍ରୀକ୍ ଗର୍ କେଡ୍‌ତାନ୍ ଇହୁଦୀଡ୍ ଆପତି ମାଡ୍‌ତଡ୍ ।

୨ ଆଦିଙ୍କ୍ ବାରଜାନ୍ ପ୍ରେରିତ ଶିଷ୍ୟ ସାରେ ବିଶ୍ୱାସୀ ମାନ୍ଦେତିଙ୍କ୍ ଅଣ୍ଡୟାଗେ କାର୍‌ଜି କେଡ୍‌ତଡ୍, “ନିଡ୍‌ଦିନ୍ ଦରକାର୍ ଜିନିଷ୍ କାର୍‌ବାର୍‌ତେ ସେଙ୍ଗେ ଇଶ୍‌ବରତେ ବାକ୍ୟ ପ୍ରଚାର ସେବା ମାଡାନାର୍ ଗମାଡ୍ ମାଡାନାଦ୍ ମାନ୍ ମାଇଦିଙ୍କ୍ ଟିକ୍ ଆୟ୍‌ୟ ।

୩ ଆଦିଙ୍କ୍ ହୋ ଦାଦାଲଡ୍ ନୁ ଏଲାୟ୍, ମିଇ ଲୋପେଙ୍କ୍ ପବିତ୍ର ଆମ୍ବା ନୁ ବୁଦ୍‌ତେ ବର୍ତ୍ ଆସ୍ମାନ୍ ସାତ ଜାନ୍‌ତିଙ୍କ୍ ଏଞ୍ଜାର୍ । ମାନାଡ୍ ଅଡ୍‌କିଙ୍କ୍ ଇଦ୍ ସାରେ ବିଷୟତେ ଦାୟିତ ହିଡ୍‌ତାଡ୍ ।

୪ ଆଲେଇକେ ପ୍ରାର୍ତ୍ତନା ନୁ ପ୍ରଚାର ପାଡ୍‌ୟି ମାନାଡ୍ ସାରେ ଦିନାମ୍ ଇଦେପାର୍‌ଦତାଡ୍ ।”

୫ ସାରେ ଗଣ୍ଡିତଡ୍ ପ୍ରେରିତ ଶିଷ୍ୟଡ୍ ପ୍ରସ୍ତାବତାର୍ ରାଜି ଆଦତଡ୍ ମେଣ୍ଡେ ଇଦ୍ ପାଡ୍‌ୟି ସେଙ୍ଗେ ଅଡ୍ ବିଶ୍ୱାସ୍ ନୁ ପବିତ୍ର ଆମ୍ବାତେ ପୁର୍ନ ଆସ୍ମାନ୍ ସ୍ଥିଫାନ୍ ପେଦେରତଣ୍ଡ୍ ଝେରଣ୍ଡ୍ ନାରୁଙ୍କ୍, ମେଣ୍ଡେ ଫିଲିପ୍‌ପ, ପ୍ରକର୍, ନୀକୋନର୍, ତୀମୋନ୍, ପାର୍ମନା ନୁ ମୁନେ ଆଣ୍ଡିୟୋକତେ ଇହୁଦି ଦର୍ମ ଗ୍ରହନ୍ ମାଡ୍‌ତେ ଅବିଶ୍ୱାସୀ ନିକୋଲାୟଙ୍କ୍ ଏଞ୍ଜିତଡ୍ ।

୬ ଅଡ୍‌କିଙ୍କ୍ ପ୍ରେରିତଡ୍ ମୁନ୍‌ନେ ତାଡ୍‌ତଡ୍, ମେଣ୍ଡେ ଅଡ୍ ପର କାଇଝାଟି ପ୍ରାର୍ତ୍ତନା ମାଡ୍‌ତଡ୍ ।

୭ ଇଦ୍ ରକମ୍ ଇଶ୍ବରତେ ବାକ୍ୟ ପ୍ରଚାର ଆଡ଼ତେ ।
ଯିରୁଶାଲେମ୍‌ତାଗ୍ ଶିଷ୍ୟତାଦ୍ ସଂକ୍ୟା ଅଦିକ୍ ଆଡ଼ତେ; ନାରଗେ
ଜାଜକୀଡ଼୍‌ମିକା କ୍ରିଷ୍ଟଙ୍କ ବିଶ୍ବାସ ଆଡ଼ତଡ଼୍ ।

ସ୍ତ୍ରୀପାନ ଗିରାପ ଆଡ଼ତଣ୍ଡ

୮ ଇଶ୍ବରତାଗାଙ୍କ ନାରଗେ ଅନୁଗ୍ରହ ନୁ ଶକ୍ତି ପାଏମ୍‌ଆଡ଼ତେ
ସ୍ତ୍ରୀପାନ, ନାରୁଡ଼୍ ଲୋପେ ନାରଗେ ଆଦବୁଡ଼୍ ନୁ ଆଶର୍ଯ୍ୟ ପାଡ଼୍‌ୟି
ମାଡ଼ତଣ୍ଡ ।

୯ କିନ୍ତୁ କ୍ଲୁରିନୀୟ ନୁ ଆଲେକ୍‌ଜାଣ୍ଡ୍ରିୟାଙ୍କ କାଇଦି ଜଇଲ୍ ତାଗାଙ୍କ
ମୁକ୍ତି ଆସ୍‌ମାନ୍‌ଇନ୍ ଇହୁଦିତ୍‌କ୍ ଆସ୍ ତିଆର୍ ଆସ୍ ମାନ୍‌ଇନ୍ ଉପାସନା
ଲୋକ୍ ବେସ୍‌ତୁଡ଼୍ ସ୍ତ୍ରୀପାନତିଙ୍କ ବିରୁଦ୍ ମାଡ଼ତଡ଼୍ । ଅଡ଼୍ ନୁ ସିଲିଷୀଆ
ଏସିଆ ଦେଶ୍‌ତେ ବାଗାଡ଼୍ ଇହୁଦୀଡ଼୍ ସ୍ତ୍ରୀପାନ ତଡ଼୍ ଯୁକ୍ତି ମାଡ଼ାନଙ୍କ
ପସ୍ତତଡ଼୍ ।

୧୦ ବାତେଙ୍କ ଇଡ଼କେ ପବିତ୍ର ଆମ୍ବା ସ୍ତ୍ରୀପାନତିଙ୍କ ଇଦ୍ ରକମ୍
ମାଡ଼ାନାଦ୍ ଶକ୍ତି ବୁଦ୍ ହିଡ଼ତେ ଯେ, ବେନବା ଅନ୍ ଗର୍ଡ଼ିଙ୍କ ବିରୁଦ୍
ମାଡ଼ାଙ୍କ ପାର୍‌ସଡ଼୍ ।

୧୧ ଆସ୍‌ବର୍, “ଅଣ୍ ମୋଶାଲ୍ ବିରୁଦ୍‌ତେ ଇଶ୍ବରତେ ବିରୁଦ୍‌ତେ ଗଟି
କେତାନାଦ୍ ମାମ୍ କେଞ୍ଜିତମ୍,” ଇଦ୍ ମିର୍ ସାକ୍ଷି ଇଦାନ୍ ମାଇଦିଙ୍କ
ବେସ୍‌ତଡ଼୍‌କିଙ୍କ ଲାଞ୍ଜ ଇସ୍ ମିର୍‌କେତାଙ୍କ କେଡ଼ତଡ଼୍ ।

୧୨ ଇଦ୍ ରକମ୍ ଅଡ଼୍ ନାରୁଡ଼୍‌କିଂଙ୍କ, ଦର୍ମ୍ ନେତାଲଡ଼୍‌କ୍ ନୁ
ଦର୍ମ୍‌ଗୁରୁଡ଼୍‌କ୍ କପାମ୍ ମାଡ଼ି ଅଂକିଙ୍କ ଚିଟିରମନ୍ ମାଡ଼ତଡ଼୍ ନୁ
ସ୍ତ୍ରୀପାନତିଙ୍କ ବେଡ଼୍‌ୟେ ମିଟିଙ୍କିତାଗ୍ ପୟସ୍ ଆଡ଼ତଡ଼୍ ।

୧୩ ତାନପେକେ ଅଡ଼୍ ଅନ୍ ବିରୁଦ୍‌ତେ ମିର୍ ସାକ୍ଷି ହିଦାନ୍ ସେଙ୍ଗେ
ବେସ୍‌ତୁଡ଼୍ ନାରୁଡ଼୍‌କିଂଙ୍କ ଲୋପେ ତାଡ଼ତଡ଼୍ । ଅଡ଼୍ କେଡ଼ତଡ଼୍,
“ଇଣ୍ ନାରୁଡ଼୍ ସାରେଦାମ୍ ମାନ୍ ପବିତ୍ର ମନ୍ଦିର୍ ନୁ ମୋଶାନ୍ ନିୟମ୍
ବିରୁଦ୍‌ତେ ଗଟି କେଡ଼ତଣ୍ଡ ।

୧୪ ନାଜରିତିୟ ଜିସୁ ମନ୍ଦିର୍‌ତିଙ୍କ ଉହ୍‌ଡ଼ିତଣ୍ଡ ନୁ ମୋଶାଲ୍
ପାଏମ୍‌ଆଡ଼ତେ ସାରେ ନିତିନିୟମ୍ ବଦଲ୍ ମାଡ଼ିତନ୍ ଇଞ୍ଜ ଇଣ୍
ନାରୁଡ଼୍‌କେସ୍‌ମାନ୍‌ନାଦ୍ ମାମ୍ କେଞ୍ଜିତମ୍ !”

୧୫ ଆସୁଟେ ବେଡ଼ିୟେ ମିଟିଲ୍‌ତାର କୁଦିମାନ୍‌ସାନ୍ ସାରେତଡ଼ ଅନାକ୍ ଅଣ୍ଟୟ୍ କଣ୍ଢେତେ ଉଡ଼ତଡ଼ ଯେ ଅନ୍ ମକମ୍ ସ୍ୱର୍ଗ ଦୂତତେ ମକମ୍ ଇନା ତଅନ୍‌ଦମାଡ଼ତେ ।



ସ୍ତ୍ରୀପାନତେ ପ୍ରଚାର

୧ ବେଡ଼ିୟି ଜାଜକ୍ ସ୍ତ୍ରୀପାନତିଙ୍କ ପାରାମାଡ଼ତଣ୍ଡ, “ଇଦ୍ ବାଡ଼ ନିଜାମ୍ ?”

୨ ସ୍ତ୍ରୀପାନ ଉତର୍ ହିଡ଼ତଣ୍ଡ, “ହଁ ଦାଦାଲଡ଼ ନୁ ବାବାଲଡ଼, କେଞ୍ଜାର୍ ! ମାନ୍ ଆନିଦାଦି ଅବ୍ରାହାମ୍ ହାରାନତାର୍ ମାନ୍‌ସାନ୍ ମୁନେଙ୍କ୍ ଗୌରବମୟ ଇଶ୍ୱର୍ ମେସପଟାନିୟାତାର୍ ଦର୍ଶନ୍ ଇସ୍,

୩ ମେଣ୍ଡ ଅଂକିଙ୍କ୍ କେଡ଼ତଣ୍ଡ, ନି ପରିବାର୍ ନୁ ଦେଶ୍ ଓଡ଼ିସି ନାନ୍ ବେନ୍ ଦେଶ୍ ହିଦ୍‌ତାନ୍, ଆଗେ ଅନ୍ ।

୪ ଆଦିଙ୍କ୍ ଅଣ୍ଟ ତାନ୍ ଦେଶ୍ କ୍ଲିତିଅନ୍ ଓଡ଼ିସି ହାରାନତାର୍ ମାନ୍‌ସାନ୍‌ଙ୍କ୍ ଆଡ଼ତଣ୍ଡ । ଅବ୍ରାହାମ୍‌ତେ ବାବାଲ୍ ଡଲ୍‌ତେ ପେର୍‌କେ ଇଶ୍ୱର୍ ଅଂକିଙ୍କ୍ ଆଦ୍ ଦେଶ୍‌ତାର୍ ତାଡ଼ତଣ୍ଡ, ବେନ୍ ଦେଶ୍‌ତାର୍ ମିଡ଼ ଇଞ୍ଜେ ମାନ୍‌ସୁ ଡିଡ଼ ।”

୫ ଇଶ୍ୱର୍ ଆସୁଟେ ଅବ୍ରାହାମ୍‌ତିଙ୍କ୍ ଇଦ୍ ଦେଶ୍‌ତେ ବାତେମିକା ଇଞ୍ଜଣ୍ଡ, ଇଦ୍ ରକମ୍ କି ଅଣ୍ଟୟ୍ ପାଦାମ୍ ବୁମ୍ ମିକା ଇଞ୍ଜଣ୍ଡ । ବାତେଙ୍କ୍ ଇଡ଼କେ ଇଶ୍ୱର୍ ପ୍ରତିଜ୍ଞା ମାଡ଼ିମାଡ଼ତଣ୍ଡ, ଅବ୍ରାହାମ୍‌ତିଙ୍କ୍ ଇଦ୍ ଦେଶ୍ ହିଡ଼ତଣ୍ଡ ନୁ ଇଦ୍ ଅନ୍‌ଝାଦ୍ ନୁ ତାନ୍ ବଂଶଦର୍‌ତେ ନିଜେତାଦ୍ ଆଦତେ । ଇଶ୍ୱର୍ ଆଦ୍ ପ୍ରତିଜ୍ଞା ମାଡ଼ାନ୍‌ଝେଲେ ଅବ୍ରାହାମ୍‌ତିଙ୍କ୍ ପିଲା ଇଲ୍‌ଝେକଟ ମାଡ଼ତ ।

୬ ଆସୁଟେ ଇଶ୍ୱର୍ ଅଂକିଙ୍କ୍ ଇଦ୍ ଗର୍ କେଡ଼ତଣ୍ଡ; “ନି ବଂଶଦର୍ କ୍ରୀତଦାସ ଲେକାମ୍ ବେନ୍ ଦେଶ୍‌ତାର୍ ମାଡ଼ତଡ଼ ନୁ ଚାରିଶହ୍ ହେଣ୍ଡକ୍ ଯାକ ଗାଟିପିଲା ଦରକିଡ଼ ।”

୭ ମେଣ୍ଡେ ଇଶ୍ୱର୍ କେଡ଼ତଣ୍ଡ, “ଅଡ଼ ବେନ୍ ଜାତିତେ ଦାସ ଆଦତଡ଼, ମାମମେ ଅଡ଼ାଦ୍ ବିଚାର୍ ମାଡ଼ିତମ୍; ତାନ୍‌ପେକେ ଅଡ଼ ଦେଶ୍‌ତାଗାଙ୍କ୍ ପେଇସ୍ ଝାସ୍ ଇଦ୍ ପଡ଼ିୟେତାର୍ ମାଝାଦ୍ ଉପାସନା ମାଡ଼ିତଡ଼ ।”

୮ ତାନ୍‌ପେକେ ଇଶ୍ୱର୍ ଅବ୍ରାହାମ୍‌ତିଙ୍କ୍ ସୁନ୍‌ତବିଦି ହିଡ଼ତଣ୍ଡ, ମେଣ୍ଡେ ଅବ୍ରାହାମ୍ ଆଦ୍ ଲେକାମ୍ ଇସ୍‌ହାକ୍‌ତିଙ୍କ୍ ଜନମ୍ ମାଡ଼ି ଆର୍ ଦିନେତେ

ଅଂକିଙ୍କ ସୁନ୍ଦର ମାତୃତଣ୍ଡ; ଇସହାକ ଯାକୁବ, ମେଣ୍ଡେ ଯାକୁବ
ବାରଜାନ୍ ମୁନେଡ଼ ଆନିଦାଦିଡ଼କ୍ ଜନମ୍ ଇସ୍ ଆଦ୍ ରକମ୍ ନିୟମ୍
ମାତୃତଣ୍ଡ ।

୯ “ଜାକୁବତେ ମାରକ୍ ଅଡ଼୍ ତାମୁଣ୍ଡ ଯୋଷେଫ୍ତିଙ୍କ ଇର୍ଷାମାଡ଼ି
କ୍ରୀତଦାସ ଲେକାମ୍ ମିସର୍ ଦେଶ୍ ଆଦାନ୍ ସେଙ୍ଗେ ଅଂକିଙ୍କ୍ ଖାମ୍ତଡ଼;
ବାତେଙ୍କ୍ ଇଡ଼କେ ଇଶ୍ବର ଅନ୍ ତଡ଼୍ ମାତୃତଣ୍ଡ,

୧୦ ଅନାଦ୍ ସାରେ କଷ୍ଟତାଗାଙ୍କ୍ ଅଂକିଙ୍କ୍ ଉଦ୍ଧାର୍ ମାତୃତଣ୍ଡ ନୁ
ମିସର୍ତେ ରାଜାଲ୍ ଫାରୋନ୍ ମୁନ୍ନେ ଅଂକିଙ୍କ୍ ଅନୁଗ୍ରହ ମାଡ଼ି
ସାୟେଡ଼ ବୁଦ୍ ନୁ ଜ୍ଞାନ୍ ହିଡ଼ତଣ୍ଡ; ଆଗାଙ୍କ୍ ଫାରୋ ଅଂକିଙ୍କ୍ ମିସର୍ ନୁ
ତାନାଦ୍ ସାରେ ଲୋକିନ୍ ଶାସନ୍ କର୍ତ୍ତାଲ୍ ଲେକାମ୍ ନିୟୁକ୍ତ ମାତୃତଣ୍ଡ
।

୧୧ ତାନ୍ପେକେ ମିସର୍ ଦେଶ୍ ଏକାମ୍ ନୁ କିନାନ୍ତାଗ୍ ଦୁବିକ୍ୟ
ଆଡ଼ତାଙ୍କ୍ ନାରୁଡ଼୍ ଗାଟି କଷ୍ଟ ଦରକ୍ତେ । ମେଣ୍ଡେ ମାନ୍
ଆନିଦାଦିଡ଼କ୍ କାଦି ଦରକ ।

୧୨ ବାତେଙ୍କ୍ ଇଡ଼କେ ମିସର୍ତାଗ୍ କାଦି ମିନ୍ଦେ ଇଞ୍ଜ କେଞ୍ଜି, ଯାକୁବ୍
ତାନ୍ ମାରକିଡ଼କ୍ ନୁ ମାନ୍ ଆନିଦାଦିଡ଼କ୍ ମୁନ୍ନେନ୍ ଦାମ୍ ରହତଣ୍ଡ ।

୧୩ ରେଣ୍ଡଦାମ୍ ଆଡ଼ତେ ଝେଲେ ଯୋଷେଫ୍ ତାମ୍ ଦାଦାଲଡ଼୍
ପରିଚୟ ହିଡ଼ତଣ୍ଡ, ମେଣ୍ଡେ ଫାରୋ ଜସେଫ୍ତେ ପରିବାର୍
ବିଷୟତେ ପୁଡ଼ତଣ୍ଡ ।

୧୪ ତାନ୍ପେକେ ଯୋଷେଫ୍ ତାମ୍ ବାବାଲ୍ ଯାକୁବ୍ ନୁ ତାମ୍
ପରିବାର୍ତେ ସାରେ ସତୁରିଏଇଙ୍ଗ୍ ଜାନ୍ତିଙ୍କ୍ ମିସର୍ ଖାଦାନଙ୍କ୍
କେଡ଼ତଣ୍ଡ ।

୧୫ ଯାକୁବ୍ ମିସର୍ ଦେଶ୍ତାଗ୍ ଆଡ଼ତଣ୍ଡ, ଆଗେ ଅଣ୍ଡ୍ ନୁ ତାମ୍
ମାରକିଡ଼ାଦ୍ ତଲ୍ଲନାଦ୍ ଆଡ଼ତେ ।

୧୬ ଅଡ଼ାଦ୍ ମଡ଼ତିଙ୍କ୍ ଶିକିମ୍ତାଗ୍ ଆଡ଼ତଡ଼୍ ନୁ ଅବ୍ରାହାମ୍ ହାମୋର୍
ନାରୁନାଗାଙ୍କ୍ ରୁପା ତାବ୍ ଇସ୍ ଆସିମାୟାନ୍ କବରତାଗ୍ ଅଡ଼କିଙ୍କ୍
ସମାଦି ହିଡ଼ତଡ଼୍ ।”

୧୭ “ବାତେଙ୍କ୍ ଇଡ଼କେ ଇଶ୍ବର ଅବ୍ରାହାମ୍ତେ ଗାର୍ରେ ବେନ୍ ପ୍ରତିଜ୍ଞା
ମାଡ଼ିମାତୃତଣ୍ଡ, ଆଦ୍ ପ୍ରତିଜ୍ଞା ସାରେ ପୁରା ଆଦାନ୍ ଦିନାମ୍ ହେଞ୍ଜୁତାଙ୍କ୍,
ମା ନାରୁଡ଼୍ ନାର୍ଗେ ମିସର୍ ଆଦାଙ୍କ୍ ପସ୍ପତଡ଼ତଡ଼୍ ।

୧୮ ପେକେ ଯୋଷେଫ୍‌ତେ ବିଷୟ ପୁନଃଜେନଣ୍ଡ ଖେରଣ୍ଡ ରାଜାଲ୍ ମିସର୍ ଦେଶ୍‌ତିଲ୍ ଶାସନ୍ ମାଡ଼ତଣ୍ଡ ।

୧୯ ଅଣ୍ଡ ମାନ୍ ଆନିଦାଦିଡ଼ ସେଙ୍ଗେ ନିଷ୍ଠୁରୁ ନୁ ଗଲକ୍ ବ୍ୟବହାର୍ ମାଡ଼ତଣ୍ଡ, ଅଡ଼ାଝୁ ପୁନେ ଜନମ୍ ଆଡ଼ତେ ପିଲାକିଲ୍ ହାଞ୍ଜକାନ୍ ସେଙ୍ଗେ ଅଡ଼କିଂଲ୍ ବାୟିଦେ ନେହେତାନଲ୍ ଗର୍ କେଡ଼ତଣ୍ଡ ।

୨୦ ଆଦ୍ ସମୟତେ ମୋଶାଲ୍ ଜନମ୍ ଆଡ଼ତଣ୍ଡ, ଅଣ୍ଡ ଗାଟି ସୁନ୍ଦର୍ ମାଡ଼ତଣ୍ଡ । ଇଶ୍ବର ମୁଣ୍ଡ ନେଲ୍‌ଞ୍ଜିକ୍ ତାମ୍ ଲୋନ୍ ବାଦକ୍‌ତଣ୍ଡ,

୨୧ ମେଣ୍ଡେ ବେସୁର୍ ଅଂକିଲ୍ ବାୟିଦେ ରହସିଡ଼ତଡ଼, ଫାରୋନ୍ ମାୟାଡ଼ ଅଂକିଲ୍ ନିଜେଡ଼ ମାର୍ ଲେକାମ୍ ପଡ଼ପଡ଼େ ।

୨୨ ମୋଶାଲ୍ ମିଶରତେ ସାରେ ବିଦ୍ୟାତାଗ୍ ଶିକିଡ଼ ଆସ୍, ଅନ୍‌ଝାଦ୍ ଗର୍ ନୁ ପାଡ଼ିୟିଦାଗ୍ ମହାନ୍ ବ୍ୟକ୍ତି ଲେକାମ୍ ପରିଚିତ ଆଡ଼ତଣ୍ଡ ।”

୨୩ “ବେସୁର୍ ମୋଶାନ୍ ବୟସ୍ ଚାଲିଶ୍ ହେଣ୍ଡକ୍ ଆଡ଼ତେ, ଅଣ୍ଡ ତାନ୍ ଇସ୍ରାଏଲ୍ ବିଶ୍ବାସୀଡ଼ ଦାଦାଲ୍‌ଡ଼ ବେଦ୍‌ପୁରୁଲ୍ ବ୍ୟବହାର୍ ମାଡ଼ତୁଡ଼, ଆଦ୍ ପୁନ୍‌ମାନ୍ ମାଜଦିଲ୍ ଇଚ୍ଛା ମାଡ଼ତଣ୍ଡ ।

୨୪ ଅଡ଼ ଲୋପେଲ୍ ଅଡ଼ତୁଲ୍, ଖେରଣ୍ଡ ମିଶରତେ କାରାପ୍ ବ୍ୟବହାର୍ ମାଡ଼ାନାଦ୍ ଉଡ଼ି, ମୋଶାଲ୍ ଅଂକିଲ୍ ରକ୍ଷା ମାଡ଼ାନ୍ ସେଙ୍ଗେ ମିସରୀୟ ନାରୁଲ୍ ପ୍ରତିଶଦ୍ ଆସ୍ ଅଂକିଲ୍ ହାଞ୍ଜକତଣ୍ଡ ।

୨୫ ଅନ୍ ତଡ଼ ଇଶ୍ବର ଜେ ତାମ୍ ନାରୁଡ଼କିଂଲ୍ ମୁକ୍ତି ମାଡ଼ତୁଣ୍ଡ, ଇଦ୍ ଆ ବିଶ୍ବାସୀଡ଼ ଦାଦାଲ୍‌ଡ଼ ବୁଜେମ୍‌ଆଡ଼ତଡ଼ ଇଞ୍ଜି ଅଣ୍ଡ ହାଲ୍‌ସି ମାଡ଼ତଣ୍ଡ, ବାତେଲ୍ ଇଡ଼କେ ଅଡ଼ ବୁଜେମ୍ ଆୟ୍‌ୟଡ଼ ।

୨୬ ମେଣ୍ଡୁନଦିନେ ଅଣ୍ଡ ଇରଝୁଡ଼ ଇସ୍ରାଏଲୀୟ ଦାଦାଲ୍‌ଡ଼ ଗଲକ୍ ଆଦାନାଦ୍ ଉଡ଼ତଣ୍ଡ ନୁ ଅଡ଼କିଂଲ୍ ଶାନ୍ତି ମାଡ଼ାନଲ୍ କେଡ଼ତନ୍ । ଅଣ୍ଡ କେଡ଼ତଣ୍ଡ, ‘କେଞ୍ଜାର୍, ମିଡ଼ ଇରଝୁଡ଼ ତ ଇସ୍ରାଏଲୀୟ ନାରୁଡ଼ି । ବାତେଲ୍ ଇଦ୍ ରକମ୍ ପ୍ରତିଶଦ୍ ମାଡ଼ତୁଡ଼ି?’

୨୭ ବାତେଲ୍ ଇକ୍ତେ ବେନ୍ ନାରୁଡ଼ ମେଣ୍ଡୁଅଡ଼ତିଲ୍ କାରାପ୍ ବ୍ୟବହାର୍ ମାଡ଼ମାଡ଼ତଣ୍ଡ, ଅଣ୍ଡ ମୋଶାଲ୍ ତୁସ୍ କେଡ଼ତଣ୍ଡ, ‘ମା ପରୁର ନିକିଂଲ୍ ବେନ ଶାସନ୍ କର୍ତ୍ତାଲ୍ ନୁ ବିଚାରପତି ମାଡ଼ତଣ୍ଡ ?

୨୮ ନିନେ ବେଲା ମିଶରତେ ନାରୁଲ୍ ହାଞ୍ଜକତି, ନାକିଂଲ୍ ବାତେ ଆଦେରକମ୍ ହାଞ୍ଜକାଲ୍ ଇଚ୍ଛା ମାଡ଼ତୁ ?

୨୯ ମୋଶାଲ୍ ଇଦ୍ କେଞ୍ଜି ମିସର୍ ଦେଶ୍ ମିରତଣ୍ଡ ନୁ ମିଦିୟୋନ୍

ଦେଶତାଗ୍ ମାତୃତଣ୍ଡ । ଆଗେ ଅନାସ୍ତ୍ର ଇରସ୍ତୁତ୍, ମାରକ୍ ଜନମ୍ ଆତୃତତ୍ ।”

୩୦ “ଚାଲିଶ୍ ହେଣ୍ଡକ୍ ଆତୃତେ ପେରକେ ସାନୟ ମେଟେଡ୍ ଗାରେ ଉସ୍ମ ନେଲ୍‌ତାଗ୍ ନିଡ୍‌ତାନ୍ ପଦ୍‌ଲେଡ୍ ତାଗ୍ ନିଡ୍‌ତାନାଦ୍ କିସ୍ ଲୋପେ ଇଶ୍‌ବରତେ ଖେରଡ୍ ଦୂଡ୍ ମୋଶାଲ୍ ଦର୍ଶନ୍ ଇଡ୍‌ତେ ।

୩୧ ମୋଶାଲ୍ ଆଦ୍ ଦୃଶ୍ୟ ଉଡ୍‌ କାବା ଆତୃତଣ୍ଡ, ମେଣ୍ଡେକେନ୍ ସାୟେ ଉଡ୍‌ନାକ୍ ବକେଡ୍ ଆଦାନ୍ ଖେଲେ ଅଣ୍ଡ ପ୍ରବୁନାଦ୍ ବାକ୍ୟ କେଞ୍ଜିତଣ୍ଡ,

୩୨ “ନାନ୍ ମିଇ ଆନିଦାଦି ଅବ୍ରାହାମ୍, ଇସ୍‌ହାକ୍ ନୁ ଯାକୁବ୍‌ତେ ଇଶ୍‌ବର ।” ମୋଶାଲ୍ ଖେରେସ୍ ଖାଡ୍‌କ୍‌ତଣ୍ଡ ମେଣ୍ଡେ ଉଡ୍‌ନାକ୍ ସାହାସ୍ ମାତୃତଣ୍ଡ ।”

୩୩ ତାନ୍‌ପେକେ ପ୍ରବୁ ଅଂକିଲ୍ କେଡ୍‌ତଣ୍ଡ, “ନିୟାସ୍ତୁ ହେରପୁକ୍ ଟେଣ୍ଡେ, ବାତେଲ୍ ଇକ୍‌ ନିମ୍ ବେଗେ ନିଡ୍‌ଡିନ୍, ଆଦ୍ ବୁମ୍ ପବିତ୍ର ପଡ୍‌ୟେ ।

୩୪ ମିସରତାଗ୍ ନାନ୍ ନାଞ୍ଜଡ୍ ନାରୁଡ୍‌କ୍ କଷ୍ଟ ପାଏମ୍‌ଆଦାନାଦ୍ ଉଡ୍‌ତାନ୍ । ନାନ୍ ଅଡ୍‌ବ୍ କେୟାନାଦ୍ କେଞ୍ଜିତାନ୍ ମେଣ୍ଡେ ଅଡ୍‌କିଂଲ୍ ଉଦ୍‌ବାର ମାଡ୍‌ନାକ୍ ମଦଲ୍ ଖାଡ୍‌ତାନ୍ । ଇଞ୍ଜେ ଖାଡ୍‌ତେ, ନାନ୍ ନିକିଂଲ୍ ମିସର ଦେଶ୍ ରହଡିତାନ୍ ।”

୩୫ “ବେନ୍ ମୋଶାଲ୍ ଇସ୍ରାଏଲୀୟଡ୍ ପରିହାସ୍ ମାଡିମାତୃତତ୍ ଅଂକିଲ୍ ଅଡ୍ ପାରାମାତୃତତ୍, ‘ମା ପରର ନିକିଂଲ୍ ବେନ ଶାସନ୍ କର୍ତ୍ତାଲ୍ ନୁ ବିଚାରପତି ମାତୃତଣ୍ଡ ?’ ବାତେଲ୍ ଇକ୍‌ ଇଶ୍‌ବର ଅଂକିଲ୍ ନିଡ୍‌ତାନାଦ୍ ପଦ୍‌ଲେଡ୍ ବକେଡ୍ ଦର୍ଶନ୍ ଇସ୍ରାୟାନ୍ ଦୂତନ୍ ସାହାୟତେ ନାରୁଡ୍‌କିଂଲ୍ ଶାସନ୍ ମାଡ୍‌ନାକ୍ ନୁ ଅଡ୍‌କିଂଲ୍ ଉଦ୍‌ବାର ମାଡ୍‌ନାକ୍ ରହଡିତଣ୍ଡ ।”

୩୬ ଅଣ୍ଡ ମିସର ଦେଶ୍‌ତାଗ୍ ନୁ ଏରେରଲ୍ ସାଞ୍ଜଡେତାଗ୍ ନାରଗେ ଅଦ୍‌ବୁଡ୍ ନୁ ଆଶର୍ଯ୍ୟ ପାଡ୍‌ୟି ତଅସ୍ ନାରୁଡ୍‌କିଂଲ୍ ମିସରତାଗାଲ୍ ବାୟିଦେ ପେସ୍‌ପି ତାଡ୍‌ତଣ୍ଡ, ଚାଲିଶ୍ ହେଣ୍ଡକ୍ ଯାକ ମରୁବୁମ୍‌ତାଗ୍ ଅଡ୍‌କିଂଲ୍ ହାର ତଅତଣ୍ଡ ।

୩୭ ମୋଶାଲ୍ ନିଜେ ଇସ୍ରାଏଲ୍‌ତେ ବାବବାଦୀ ନାରୁଡ୍‌କିଂଲ୍ କେସ୍‌ମାତୃତଣ୍ଡ, “ଇଶ୍‌ବର ନାକିଂଲ୍ ବେଲା ରହଡିତଣ୍ଡ, ଆଦେ ରକମ୍

ମିଛ ବକେତ୍ ଝେରଣ୍ଡ ଦାଦାଲତ୍ ରହତିତଣ୍ଡ, ଅଣ୍ଡ ମିଛ ନାରୁଡ୍, ଲୋପେଙ୍କ୍ ଝେରଣ୍ଡ ତାମୁସ୍ ଆଦତନ୍ ।”

୩୮ ଆଦନାଣ୍ଡ ଆ ମୋଶାଲ୍ ଉସ୍ମ ନେଲ୍ତାଗ୍ ଗୁଡ଼ିମାନ୍ଦାନ୍ ଇସ୍ରାଏଲୀୟ ନାରୁଡ୍ ତଡ୍ ମାଡ୍ତଣ୍ଡ, ଅଣ୍ଡ ସାନୟ୍ ମେଟେତାଗ୍ ମାନ୍ ଆନିଦାଦିଡ୍ ତଡ୍ ନୁ ଅନ୍ତଡ୍ ଗର୍ ତିରୟମାନ୍ଦାନ୍ ଦୂତ ମାଡ୍ତଣ୍ଡ ନୁ ମା ଗାରରେ ତୁହୁସାନ୍ ମାଇଦିଙ୍କ୍ ଅଣ୍ଡ ଇଶ୍ବରତାଗାଙ୍କ୍ ଜିଝେଡ୍ ବାକ୍ୟ ଗ୍ରହନ୍ ମାଡ୍ତଣ୍ଡ ।

୩୯ “ବାତେଙ୍କ୍ ଇଡ୍‌କେ ମାଝଡ୍ ଆନିଦାଦିଡ୍ ଅନ୍ ଗଟି କେଞ୍ଜଡ୍ ଅଡ୍ ଅକିଙ୍କ୍ ପାସ୍ମି ମିସର୍ତାଗ୍ ମାଲ୍‌ସ୍ ଆଦାନଙ୍କ୍ ଇଛା ମାଡ୍ତଣ୍ଡ ।

୪୦ ଆଦିଙ୍କ୍ ଅଡ୍ ହାରୋଣ୍‌ତିଙ୍କ୍ କେଡ୍‌ତଡ୍, ‘ବେସକ୍ ଦେୟାକ ପୁଡ୍‌ଲମ୍ ତିଆର୍ ମାଡିମ୍ । ମାକିଂଙ୍କ୍ ମିସର୍ ଦେଶ୍‌ତାଗାଙ୍କ୍ ପେସ୍‌ପି ତାଡ୍‌ତେ ମୋଶାଲ୍ ବେକେ ଆଡ୍‌ତଣ୍ଡ, ଆଦ୍ ମାମ୍‌ମେ ପୁନମ୍ ।’

୪୧ ଆସୁଟେ ଆଗେ ଅଡ୍ ଅଣ୍ଡୟ୍ ଗଡ୍‌ପିଲେ ପୁଡ୍‌ଲମ୍ ତିଆର୍ ମାଡ୍‌ତଡ୍ ନୁ ତାନ୍ ଲେକାମ୍‌ତେ ପୁଜେ ମାଡ୍‌ତଡ୍ । ମେଣ୍ଡେ ନିଜେ ତିଆର୍ ମାଡ୍‌ତେ ପୁଡ୍‌ଲମ୍‌ତେ ସମ୍ମାନ୍ ସେଙ୍ଗେ ଅଣ୍ଡୟ୍ ବଜି ମାଡ୍‌ତଡ୍ ।

୪୨ ଆଦିଙ୍କ୍ ଇଶ୍ବର ଅଡ୍ ସେଙ୍ଗେ କପାମ୍ ଆଡ୍‌ତଣ୍ଡ ନୁ ଅଡ୍‌କିଂଙ୍କ୍ ସ୍ବର୍ଗତାଗ୍ ମାନ୍ଦାନ୍ ଉକାକିଙ୍କ୍ ଉପାସନା ମାଡ୍‌ତାନଙ୍କ୍ ଝିଡ୍‌ସିଡ୍‌ତଣ୍ଡ । ଇଦ୍ ବିଷୟ୍‌ତେ ବାବବାଦୀଡାଦ୍ ବଇତାଗ୍ ଲେକାମିନ୍ଦେ, ‘ହୋ ଇସ୍ରାଏଲ୍ ବଂଶତଡ୍ ! ଉସ୍ମ ନେଲ୍‌ତାଗ୍ ଚାଲିଶ୍ ହେଣ୍ଡକ୍ ଯାକ ମିଡ୍‌ନା’ ସେଙ୍ଗେ ପଶୁ ବଲି ନୁ ହୋମବଲି ହିଝକର୍ ମାଡ୍‌ତିଡ୍ ।

୪୩ ବାତେଙ୍କ୍ ଇଡ୍‌କେ ମିଡ୍ ପୁଜା ମାଡ୍‌ତାନଙ୍କ୍ ବେନ୍ ପୁଡ୍‌ଲକିଙ୍କ୍ ତିଆର୍ ମାଡିମାଡ୍‌ତିଡ୍, ଆଦ୍ ମାଲିକ୍‌ତେ ତମ୍ ନୁ ଉକାମ୍ ଦେୟାମ୍ ରମ୍ମା ପୁଡ୍‌ଲକିଙ୍କ୍ କାଞ୍ଜୀ ହଡ୍‌ତିଡ୍ । ଆଦିଙ୍କ୍ ନାନ୍ ମିକିଂଙ୍କ୍ ବାବିଲୋନ୍ ଦେଶ୍‌ତେ ମେଣ୍ଡନ୍‌ପାକ୍ ରହତିତାନ୍ ।”

୪୪ ଉସ୍ମ ନେଲ୍‌ତାଗ୍ ମାନ୍ ଆନିଦାଦିଡ୍ ତଡ୍ ଇଶ୍ବରତେ ପବିତ୍ର ତମ୍ ସାକ୍ଷ୍ୟ । ଇଶ୍ବର ମୋଶାଲ୍ ବେଲା ତିଆର୍ ମାଡାଙ୍କ୍ କେସ୍‌ମାଡ୍‌ତଣ୍ଡ ନୁ ମୋଶାଙ୍କ୍ ବେଦ୍ ନକ୍‌ସା ତଅସ୍‌ମାଡ୍‌ତଣ୍ଡ, ଇଦ୍ ଆଦେରକମ୍ ତିଆର୍ ଆସ୍ ମାଡ୍‌ତେ ।

୪୫ ପେରକେ ମାନ୍ ଆନିଦାଦିଡ୍ ଅଡ୍ ବାବାଲତାଗାଙ୍କ୍ ଦରକି ମାନ୍ଦାନ୍ ଆଦ୍ ତମ୍‌ଡିଙ୍କ୍ ଜିହୋଶୁୟନ୍ ତଡ୍ କାଞ୍ଜୀ ମୁନ୍‌ନେ ଆଦ୍‌ତଡ୍,

ନୁ ଇଶ୍ବର ତଲିମାନ୍ ବାଗାଡ଼ ଅଣାଯିବୁଦିତ୍ତାଦ୍ ଦେଶ୍ ଅଦିକାର୍
ମାଡ଼ତଡ଼ । ଦାଉଦନ୍ ଦିନାମ୍ ଯାକ ଆଦ୍ ଆଗେ ମାଡ଼ତେ ।

୪୭ ଅଣ୍ ଇଶ୍ବରତେ ଅନୁଗ୍ରହ ନାରୁଣ୍ ହାସ୍ ମାଡ଼ତଣ୍, ଅଣ୍
ପରମେଶ୍ବରତିଙ୍କ୍ ଯାକୁବ୍ ଇଶ୍ବରତେ ମାଲଦିଙ୍କ୍ ଅଣ୍ଯୟ ମନ୍ଦିର୍ ତିଆର୍
ମାଡ଼ାନଙ୍କ୍ ଗର୍ ମାଡ଼ତଣ୍ ।

୪୮ ଇଡ଼କେ ପେରକେ ଆ ମନ୍ଦିର୍ ଶଲୋମନ୍ ତିଆର୍ ମାଡ଼ତଣ୍ ।

୪୮ “ଆଗେକ୍ବା ସାରେତିଙ୍କ୍ ବେତ୍ରେ ଇଶ୍ବର ନାରୁଡ଼ ମାଡ଼ତେ
ଲୋକିନାଗ୍ ମାନଣ୍ । ଇଦ୍ ବିଷୟ୍ ବାବବାଦୀଡ଼ ଲେକିମିଦେଡ଼;

୪୯ ‘ପ୍ରବୁ କେଡ଼ତଣ୍, ସ୍ବର୍ଗ ନା’ ସିଂହାସନ୍ ନୁ ପୂତିବି ନାଝାଦ୍
ଡେକେଡ଼ କୁଡୁଲ୍ । ମିଡ଼ ନା ମାଲଦିଙ୍କ୍ ବେସଡ଼ ଲୋନ୍ ତିଆର୍
ମାଡ଼ିତିଡ଼ ? ନାନ୍ ରହମାନ୍ ସେଙ୍ଗେ ପଡ଼ରେ ବେଗେ ?

୫୦ ଇଝୁ ସାରେ ବିଷୟ୍ ବାଡ଼ ନାନ୍ ନିଜେ ତିଆର୍ ମାଡ଼ନ୍ ?”

୫୧ ସ୍ତ୍ରିଫାନ୍ ମେଣ୍ଟେ କେଡ଼ତଣ୍, “ମିଡ଼ ବେସର୍ ଜିଦ୍ତଡ଼ି ! ମିଝାଦ୍
ହୁଦୟ୍ ବେସର୍ ଅସୁନ୍ନତ, ଇଶ୍ବରତେ ବାକ୍ୟ ସେଙ୍ଗେ ମିଡ଼ ବେସର୍
ବାୟିରାଲଡ଼ି ! ମିଡ଼ ଟିକ୍ ମିଝଡ଼ ଆନିଦାଦିଡ଼ ଲେକାମ୍, ମିଡ଼
ସାରେଦାମ୍ ପବିତ୍ର ଆମ୍ବାତିଙ୍କ୍ ବିରୋଦ୍ ମାଡ଼ିତିଡ଼ ।

୫୨ ବାବବାଦୀଡ଼ ଲୋପେଙ୍କ୍ ବେନଙ୍କ୍ ମିଝଡ଼ ଆନିଦାଦିଡ଼ ତାଡ଼ନା
ମାଡ଼ଖେ ମାଡ଼ତଡ଼ କି ? ବେନଡ଼ ଆଦ୍ ଦାମ୍ କ୍ ନାରୁଣ୍ ଝାଦାନ୍
ବିଷୟ୍ ମୁନେଙ୍କ୍ କେସ୍ମାଡ଼ତଡ଼, ଅଡ଼କିଙ୍କ୍ ଅଡ଼ ହାଝକ୍ତଡ଼; ଇଞ୍ଜେ
ମିଡ଼ ଅକିଙ୍କ୍ ଶତ୍ରୁଡ଼ କାୟିଦେ ସମର୍ପନ୍ ମାଡ଼ି ହାଝକ୍ତଡ଼ ।

୫୩ ମିଡ଼ ଦୂତଡ଼ ହିଡ଼ତାଦ୍ ଇଶ୍ବରତେ ନିତିନିୟମ୍ ସାରେ
ପାଏମ୍ ଆଡ଼ତିଡ଼, ଆଗେକ୍ବା ଆଦିଙ୍କ୍ ମୋଶାନ୍ ନିୟମ୍ ପାଲନ୍
ମାଡ଼ଝିଡ଼ ।”

ସ୍ତ୍ରିଫାନ୍ତିଙ୍କ୍ କାଲକିନ୍ତଡ଼ ରେହ୍ସ୍ ଆଝକ୍ତଡ଼,

୫୪ ବେଡ଼ିୟମିଟିଙ୍କ୍ତେ ସଦସ୍ୟଡ଼ ସ୍ତ୍ରିଫାନ୍ତେ ବାଷନ୍ କେଞ୍ଜି ଗାତି
କପାମ୍ ଆଡ଼ତଡ଼, ମେଣ୍ଟେ ଅଡ଼ ଅନ୍ ସେଙ୍ଗେ ପାଲକ୍ କରକ୍ତଡ଼ ।

୫୫ ବାତେଙ୍କ୍ ଇଡ଼କେ ସ୍ତ୍ରିଫାନ୍ ପବିତ୍ର ଆମ୍ବାତେ ଗୌରବମୟ୍
ଆସ୍ ସ୍ବର୍ଗତା ଉଡ଼ତଣ୍ ନୁ ଇଶ୍ବରତେ ମହିମା ନୁ ଜିସୁଙ୍କ୍ ତିନ୍ଦେପାକ୍
ନିଶ୍ମାନ୍ଦାନାଦ୍ ଉଡ଼ତଣ୍ ।

୫୭ ଅଣ୍ଟ କେତତଣ୍ଟ, “ଉଡ଼ାଟ୍, ନାନ୍ ସ୍ୱର୍ଗତିଙ୍କ କୁଲ୍ମା ଆଡ଼ତାଦ୍ ନୁ ନାରୁଣ୍ଟ ପିଲେ ଇଶ୍ୱରତେ ତିନ୍ଦେପାକ୍ ନିଶ୍ୱାସାନାଦ୍ ଉଡ଼ତୁନ୍ ।”

୫୮ ଗାଟି ଲେଙ୍ଗଦେ ମିଟିଙ୍ଗ୍ତେ ବେଡ଼୍‌ରେ ନାରୁଡ଼୍, ଇଦ୍ ଗର୍ କେଞ୍ଜମ୍ ଇଞ୍ଜ କେଞ୍ଜିଙ୍କ କାୟିକିନତଡ଼୍ ବନ୍ଦ୍ ମାଡ଼ତଡ଼୍ । ତାନ୍‌ପେକେ ଅଡ଼୍ ଅଣ୍ଟୟିତଡ଼୍ ଅନ୍ ବକେଡ଼୍ ଖାଡ଼ତଡ଼୍ ।

୫୯ ସହରତେ ବାୟିଦେ ଅଂକିଙ୍କ ଲାଗି ଅସ୍, ଅନ୍ ପର୍ କାଲ୍‌କ୍ ହେସି ହାଞ୍ଜକତଡ଼୍ । ମିର୍ ସାକ୍ଷୀଡ଼୍ ଶାଉଲ୍ ପେଦେରତଣ୍ଟ ଖେରଣ୍ଟ ଲେୟଣ୍ଟେ ତେକେଡ଼୍ ବକେଡ଼୍ ଅଡ଼ାଞ୍ଜୁ ସାରେ ତକା ଓଡ଼ିସି ଆଞ୍ଜିମାଡ଼ତଡ଼୍ ।

୬୦ ଅଡ଼୍ ସ୍ତ୍ରୀପାନ୍‌ତେ ପର୍ କାଲ୍‌କ୍ ହେସାନ୍ ଖେଲେ ଅଣ୍ଟ ପ୍ରବୁଙ୍କ ପ୍ରାର୍ଥନା ମାଡ଼ି କେତତଣ୍ଟ, “ପ୍ରବୁ ଜିସୁ, ନାଞ୍ଜାଦ୍ ଆମ୍‌ଡ଼ିଙ୍କ ଗ୍ରହନ୍ ମାଡ଼େ ।”

୬୦ ଅଣ୍ଟ ମର୍‌ମିଣ୍ଟା ଉଞ୍ଜୁସ୍ ଗାଟି ଲେଙ୍ଗଦେ କେତତଣ୍ଟ, “ପ୍ରବୁ ! ଇଡ଼୍ ବିରୁଦ୍‌ତେ ଇଦ୍ ପାପ୍ ଏକା ମାଡ଼ମାର୍ ।” ଇଦ୍ କେସ୍ ଅଣ୍ଟ ଡଲ୍‌ତଣ୍ଟ ।

୮

୧ ଶାଉଲ୍ ସ୍ତ୍ରୀପାନ୍‌ତେ ଡଲ୍‌ନାଦିଙ୍କ ସମର୍ଥନ୍ ମାଡ଼ତନ୍ ।

ମଣ୍ଡଲିତେ ପର୍‌ର ଶାଉଲ୍‌ତେ ଅତ୍ୟାଚାର୍

ଆଦ୍ ଦିନେକନ୍ତୁ ଯିରୁଶାଲେମ୍‌ତେ ମଣ୍ଡଲି ସେଙ୍ଗେ ଡାଡ଼ନା ଆରାମ୍ ଆଡ଼ତେ । ପ୍ରେରିତ ଶିଷ୍ୟଡ଼୍‌କ୍ ଓଡ଼ିସି ମେଣ୍ଟେ ସାରେତଡ଼୍ ବିଶ୍ୱାସୀଡ଼୍, ଯିହୁଦା ନୁ ଶମିରୋମ୍ ଦେଶ୍‌ତେ ପଡ଼ିୟେତାଗ୍ ଖେକ୍‌ଖେକ୍ ଆଡ଼ତଡ଼୍ ।

୨ ବେସକ୍‌ତୁଡ଼୍ ଇଶ୍ୱରତେ ବକ୍ତନଡ଼୍, ଗାଟି ଲେଙ୍ଗଦେ କେୟିମିକା ସ୍ତ୍ରୀପାନ୍‌ତେ ମଡ଼ତିଙ୍କ ସମାଦି ହିଡ଼ତଡ଼୍ ।

୩ ✧ବାତେଙ୍କ୍ ଇକେ ଶାଉଲ୍ ମଣ୍ଡଲିତିଙ୍କ୍ ଦଂସ ମାଡ଼ାନଙ୍କ୍ ଆଲ୍‌ସି ମାଡ଼ତଣ୍ଟ, ଲକ୍ ଲକ୍ ଆଞ୍ଜି କ୍ରିଷ୍ଟ ବିଶ୍ୱାସୀ ମାନେୟ୍ ନାଟାଙ୍କ୍ ସାରେତଡ଼୍‌କିଙ୍କ୍ ଲାଗିତାସ୍ ଜଇଲ୍‌ତାଗ୍ ଡୁରତଡ଼୍ ।

ଶମିରୋଶତାଗ୍ ସୁସମାଚାର୍ ପ୍ରଚାର୍ ମାଡ଼ତଡ଼୍

୪ ଖେକ୍ ଖେକ୍ ଆଡ଼ତେ ବିଶ୍ୱାସିଡ଼୍ ସାରେଏକାମ୍ ଆଞ୍ଜି ସୁସମାଚାର୍ ପ୍ରଚାର୍ ମାଡ଼ତଡ଼୍ ।

✧ ୮:୩ ପ୍ରେରିତ ୨୨:୪,୫; ୨୭:୯-୧୧.

୫ ଶମିରୋମ୍ ମୁକ୍ୟ ନାରତାଗ୍ ଆଞ୍ଜ ଫିଲିପ୍ସ, ଆଗେତ୍ ନାରୁଡ଼କିଂଙ୍କ ମସୀହାନାଦ୍ ସୁସମାଚାର ପ୍ରଚାର ମାଡ଼ତଣ୍ଡ ।

୬ ଫିଲିପ୍ସ ଗଟି କେଞ୍ଜି ନୁ ଅନ୍‌ଝାଦ୍ ଆଶର୍ଯ୍ୟ ପାଡ଼ନ୍ତି ଉଡ଼ି ନାରୁଡ଼ମେଣ୍ଡେ ଅଦିକ୍ ଗଟି କେଞ୍ଜାଙ୍କ ଇଚ୍ଛା ମାଡ଼ତଣ୍ଡ ।

୭ ନାରଗେ ନାରୁଡ଼ାଗାଙ୍କ ବୁଡ଼କ୍ କିଡ଼କି କିଡ଼କି ପେଇସ୍ ଆଡ଼ତା, ନାରଗେ ପକ୍ୟାଗାଡ଼ ରଗି ନୁ କୁଟାଲଡ଼ ସୁସ୍ଥ ଆଡ଼ତଣ୍ଡ ।

୮ ଇଦିନ୍ ସେଙ୍ଗେ ଆଦ୍ ନଗରତେ ନାରୁଡ଼ ଗାଟି ଖେଡ଼କ୍‌ତଣ୍ଡ ।

୯ ଶିମୋନ୍ ପେଦେରତଣ୍ଡ ଖେରଣ୍ଡ ନାରୁଡ଼ ଅନ୍‌ଝାଦ୍ ମନ୍ତ୍ର ବିଦ୍ୟାତଣ୍ଡ ଆଦ୍ ଦେଶ୍‌ତେ ନାରୁଡ଼କିଂଙ୍କ ଆଶର୍ଯ୍ୟ ମାଡ଼ି ନେହେସ୍ ମାଡ଼ତଣ୍ଡ । ଅଣ୍ଡ ନିଜେତିଙ୍କ ଖେରଣ୍ଡ ବେଡ଼ୟେ ନାରୁଡ଼ ଇଞ୍ଜ କେସ୍ ସମରୀୟାତେ ସାରେ ନାରୁଡ଼କିନ୍ ଲୋପେଙ୍କ ବାଡ଼ୟଣ୍ଡ ଆସ୍ ମାଡ଼ତଣ୍ଡ ।

୧୦ ଅଣ୍ଡ ନିଜତିଙ୍କ ଅରୁଡ଼ଣ୍ଡ ବାଡ଼ୟଣ୍ଡ ଇଞ୍ଜ କେସ୍ ସମାଜ୍‌ତେ ସାରେ ନାରୁଡ଼ ଲୋପେଙ୍କ ବାଡ଼ୟଣ୍ଡ ଆସ୍‌ମାଡ଼ତଣ୍ଡ । ଅଡ଼ କେସ୍‌ମାଡ଼ତଣ୍ଡ, “ଅଣ୍ଡ ‘ମହାଶକ୍ତି’ ପେଦେରତଣ୍ଡ ଇଶ୍ବରତେ ଅଣ୍ଡୟ ଶକ୍ତି ।”

୧୧ ଆଦ୍ ମନ୍ତ୍ର ବିଦ୍ୟାତଣ୍ଡ ନାରଗେ ଦିନ୍ ଯାକ ଶମିରୋଶ ନାରୁଡ଼କିଂଙ୍କ ତାନ୍ ଶିଷ୍ୟ ମାଡ଼ି ନେହେସ୍ ମାଡ଼ତଣ୍ଡ ।

୧୨ ବାତେଙ୍କ ଇଡ଼କେ ଫିଲିପ୍ସ ପେଦେର ଇଶ୍ବରତେ ରାଜ୍ୟ ନୁ ଜିସୁ କ୍ରିଷ୍ଟନ୍ ବିଷୟତେ ସୁସମାଚାର କେଞ୍ଜି, ଅନ୍ ସେଙ୍ଗେ ନାରୁଡ଼ାଦ୍ ବିଶ୍ବାସ୍ ଜନମ୍ ଆଡ଼ତେ ନୁ ଆଦ୍ ଜାଗେଡ଼ ସାରେ ନାଟା ନୁ ମାନେୟ୍ ଏରଦିକ୍ୟା ଗ୍ରହନ୍ ମାଡ଼ତଣ୍ଡ ।

୧୩ ଶିମୋନ୍ ନିଜେ ଆଦ୍ ଗଟିଙ୍କ ବିଶ୍ବାସ୍ ମାଡ଼ତଣ୍ଡ । ଫିଲିପ୍ସ ତଡ଼୍‌ମାଡ଼ିମାନ୍ ଆଦ୍‌ବୁଡ଼ ନୁ ଆଶର୍ଯ୍ୟ ପାଡ଼ନ୍ତି ଉଡ଼ି ଅଣ୍ଡ ଏରଦିକ୍ଷା ଗ୍ରହନ୍ ମାଡ଼ି ଫିଲିପ୍ସ ତଡ଼୍‌ମାଡ଼ତଣ୍ଡ ।

୧୪ ସମରୀୟାତେ ନାରୁଡ଼ ଇଶ୍ବରତେ ଗଟ୍ ଗ୍ରହନ୍ ମାଡ଼ତଣ୍ଡ ଇଞ୍ଜ ଯିରୁଶାଲେମ୍‌ତାଗ୍ ମାନ୍ଦାନ୍ ପ୍ରେରିତ ଶିଷ୍ୟଡ଼ କେଞ୍ଜି, ପିତର୍ ନୁ ଯୋହନ୍‌ତିଙ୍କ ଅଡ଼ ଗାରରେ ରହତଣ୍ଡ ।

୧୫ ଅଡ଼ ଆଗେ ଏଞ୍ଜୁଡ଼ତେ ପେରକେ ଶମିରୋନୀୟ ବିଶ୍ବାସୀଡ଼ ବେଲା ପବିତ୍ର ଆମ୍ବା ଦରକିଡ଼, ଆଦିନ୍ ସେଙ୍ଗେ ପ୍ରାର୍ଥନା ମାଡ଼ତଣ୍ଡ ।

୧୭ ବାତେଙ୍କ ଇଡ଼କେ ଆସୁର୍ ଯାକ ଅଡ଼, ଲୋପେଙ୍କ ବେନ ପରର ପବିତ୍ର ଆମ୍ବା ଡିଗ୍‌ଖେ ମାଡ଼ତେ । ଅଡ଼, ମାତର୍ ଜିସୁ ପ୍ରବୁନ୍ ପେଦେର୍‌ତେ ଏର୍‌ଦିକ୍‌ଶା ଗ୍ରହନ୍ ମାଡ଼ି ମାଡ଼ତଡ଼ ।

୧୮ ପିତର୍ ନୁ ଯୋହନ୍ ଅଡ଼, ପରର କାୟି ଖାଟ୍‌ତେ ସାଙ୍ଗେ ସାଙ୍ଗେ ଅଡ଼, ପବିତ୍ର ଆମ୍ବା ପାଏମ୍‌ଆଡ଼ତଡ଼ ।

୧୯ ଶିମୋନ୍ ଉଡ଼ତଣ୍ଟ ଯେ, ପ୍ରେରିତ ଶିଷ୍ୟଡ଼, ବିଶ୍ୱାସୀଡ଼, ପରର କାୟି ଖାଟ୍‌ତାଙ୍କ ଅଡ଼, ପବିତ୍ର ଆମ୍ବା ପାଏମ୍‌ଆଡ଼ତଡ଼ । ଆଦିଙ୍କ ଅଣ୍ଟ ପିତର୍ ନୁ ଯୋହନ୍‌ଡିଙ୍କ ଡାବ୍‌କ୍ ଇସ୍ କେଡ଼ତଣ୍ଟ,

୨୦ “ନାନ୍ ବାଗାଡ଼ ନାରୁଡ଼, ପରର କାୟି ଖାଟ୍‌କେ, ଅଡ଼, ବେଲାକି ପବିତ୍ର ଆମ୍ବା ଦରକିଡ଼, ଆଦିଙ୍କ ନାକିଙ୍କ ଇଦ୍ ଅଦିକାର୍ ହିମ୍ ।”

୨୧ ବାତେଙ୍କ ଇଡ଼କେ ପିତର୍ ଅଙ୍କିଙ୍କ କେଡ଼ତଣ୍ଟ, “ନି ତଡ଼, ନିୟାଞ୍ଜୁ ଡାବ୍‌କ୍ ଗାଲା ଦସଂ ହାୟି, ବାତେଙ୍କ ଇଡ଼କେ ଡାବ୍‌କ୍ ତଡ଼, ନିମ୍ ଇଶ୍ୱରତେ ଦାନ ହାସାନଙ୍କ ହାଲ୍‌ସୁତି !

୨୨ ମାଝାଦ୍ ପଡ଼୍‌ୟେତାଗ୍ ନିଝାଦ୍ ବାଡ଼ମିକା ବାଗ୍ ଇଲ୍‌ଲେ । ବାତେଙ୍କ ଇଡ଼କେ ଇଶ୍ୱରତେ କଣ୍ଡେତେ ନିଝାଦ୍ ହୁଦୟ୍ ସାୟେ ଆୟ୍‌ୟ ।

୨୩ ଆଦିଙ୍କ ନିଝାଦ୍ ହୁଦୟ୍ ତାଦ୍ ଇଦ୍ କାରାପ୍ ଚିନ୍ତେ ସେଙ୍ଗେ ହେର୍‌କେ ମାଡ଼ାଟ୍, ଇଦ୍ ରକମ୍ ଚିନ୍ତେ ମାଡ଼ିମାନ୍‌ନାଙ୍କ ପ୍ରବୁ ବେଲା କ୍ଷମା ମାଡ଼ିତନ୍, ଆଦିନ୍ ମାଈଦିଙ୍କ ପ୍ରବୁଙ୍କ ପ୍ରାର୍ଥନା ମାଡ଼େ ।

୨୪ ବାତେଙ୍କ ଇଡ଼କେ ଉଡ଼ତୁନ୍ ଯେ ନିଝାଦ୍ ହୁଦୟ୍ ଇର୍ଷାତଡ଼, ବର୍ତ୍ତ୍ ଆଡ଼ତେ, ନିମ୍ କାରାପ୍ ପାଡ଼୍‌ୟି ତଡ଼, ବନ୍ଦନତାଗ୍ ବନ୍ଦି ହାସ୍‌ମିନ୍‌ନେନି ।”

୨୫ ଶିମୋନ୍ ଅଡ଼କିଙ୍କ କେଡ଼ତଣ୍ଟ, “ମିଡ଼, ବାଡ଼ କେଡ଼ୁଡ଼ିଡ଼, ଆଦ୍ ବେଲାକି ନା ପରର ଖାଡ଼ମାକି, ଇଦିନ୍ ସେଙ୍ଗେ ଦୟାମାଡ଼ି ପ୍ରବୁଙ୍କ ପ୍ରାର୍ଥନା ମାଡ଼ାଟ୍ ।”

୨୬ ସାକ୍ଷ୍ୟ ଇସ୍ ନୁ ପ୍ରବୁନ୍ ସୁସମାଚାର କେଡ଼ତାନ୍ ପିତର୍ ନୁ ଯୋହନ୍ ଯିରୁଗାଲେମ୍‌ତାକ୍ ମାଲ୍‌ସ୍ ଆଦ୍‌ତଡ଼ । ମାଲ୍‌ସ୍ ଖାଦାନ୍ ଝେଲେ ହାରଦାଗ୍ ଅଡ଼, ଶମିରୋଣ ଦେଶ୍‌ତେ ନାର୍‌ଗେ ନାଆକି ନାଗ୍ ସୁସମାଚାର କେଡ଼ତନ୍ ।

ଫିଲିପ୍‌ପ ନୁ ଇଥ୍‌ଓପିଆତେ କର୍ମଚାରୀ

୨୭ ପ୍ରବୁନ୍ ଖେରଣ୍ଡ ଦୂତ ଫିଲିପ୍ପତିଙ୍କ କେତେତଣ୍ଡ, “ତିଆର୍ ଆସ୍ ମାନୁର୍, ତିନ୍ଦେପାକ୍ ଯିରୁଶାଲେମ୍ କନ୍ୟ ଗାଜାତାକ୍ ଆଡ଼ତେ ଆଦ୍ ହାର୍ ଆନୁର୍ ।” ଇଞ୍ଜେ ଆଦ୍ ହାର୍ଦାଗ୍ ବେନଗାଲ୍ ଆଦ୍ଦା ଖାଦା ମାଡ଼ଣ୍ । ଆଦ୍ ପଡ଼ୟେତାଗ୍ ବେନ ଇଲ୍ଲୁଖେମାଡ଼ତଣ୍ । ଇଞ୍ଜେ ଆ ଆର୍ ବେନ ଅନ୍ନନ୍ତ୍ ବା ବ୍ୟବହାର୍ ମାଡ଼ତ୍ ।

୨୮ ଫିଲିପ୍ପ ତିଆର୍ ଆଡ଼ତଣ୍ । ଆସୁଟେ ଇଥ୍ଓପିଆଡ଼ ରାଜ୍ୟତେ କାଣ୍ଡକି ରାଶାନ୍ ରାଜତିଙ୍କ ଶାସନ୍ ମାଡ଼ନଣ୍ ମାନ୍ଦାନ୍ ଇଥ୍ଓପିଆତେ ଖେରଣ୍ଡ ଖାଞ୍ଜାଲ୍ କର୍ମଚାରୀ ତାନ୍ ଲୋନ୍ ମାଲ୍ସ ମାଡ଼ତଣ୍ । ଅଣ୍ ଇଶ୍ବରତିଙ୍କ ପୁଜା ମାଡ଼ାନ୍ ସେଙ୍ଗେ ଯିରୁଶାଲେମ୍ ଆଞ୍ଜ ମାଡ଼ତଣ୍ ।

୨୯ ଅଣ୍ ଆଦ୍ ରଡ଼ତାଗ୍ କୁଦି ଲୋନ୍ ମାଲ୍ସ ମାଡ଼ତଣ୍ । ଆଦ୍ ରଡ଼ତାଗ୍ ମାଲ୍ଦାନ ଖେଲେ ଯିଶାଉୟ ବାବବାଦୀ ବଇ ଗାଟି ଲେଙ୍ଗଦେ କାର୍ସ ମାଡ଼ତଣ୍ ।

୩୦ ପବିତ୍ର ଆମ୍ବା ଫିଲିପ୍ପଙ୍କ କେତେତେ, “ଆଦ୍ ରଡ଼ତେ ବକେଡ଼ ଅନ୍ ନୁ ଆଦିନ୍ ଗାରରେ ମାନ୍ ।”

୩୧ ଫିଲିପ୍ପ ମିରି ମିରି ଆଡ଼ତଣ୍ ନୁ ଆ କର୍ମଚାରୀ ଯିଶାଉୟ ବାବବାଦୀନ୍ ବଇ ଗାଟି ଲେଙ୍ଗଦେ କାର୍ସ ମାନ୍ଦାନାଦ୍ କେଞ୍ଜତଣ୍ । ଅଣ୍ ଅକିଙ୍କ ପାତ୍ରାମାଡ଼ତଣ୍, “ନିମ୍ ବାଡ଼ କାର୍ତୁତି, ଆଦ୍ ବୁଜେମ୍ ଆଦୁତି କି ?”

୩୨ କର୍ମଚାରୀ ଉତ୍ତର ହିଡ଼ତଣ୍, “ବେନ ଅନୁରଦ୍ ମାଡ଼ାନାଦ୍ ଖେରଣ୍ଡ ବୁଜାମାଡ଼ିଝ କଟ ମାକ୍, ନାନ୍ ବେଲା ବୁଜେମ୍ ଆଦ୍ତାନ୍ ?” ତାନ୍ତଡ଼ତ୍ ରଡ଼ତାଗ୍ କୁଦାନ୍ ମାଇଦିଙ୍କ ଅଣ୍ ଫିଲିପ୍ପତିଙ୍କ କାର୍ଜତଣ୍ ।

୩୩ ଅଣ୍ ଦର୍ମଶାସ୍ତ୍ରତାଦ୍ ଇଦ୍ ବିଷୟ କାର୍ସ ମାଡ଼ତଣ୍; “ହାଞ୍ଜକାନ୍ ମାଇଦିଙ୍କ ଆଦାନ୍ ମେଣ୍ ଲେକାମ୍, କେଲ୍ କୟ୍ଦାନ୍ ଖେଲେ କଟମାନ୍ଦାନ୍ ମେଏଣ୍ଟେ ଲେକାମ୍, ଅଣ୍ ଅଣ୍ଟୟ୍ ପଦ୍ବା ଗଟ୍ ତିରୟଣ୍ ।

୩୪ ଅଣ୍ ଅପମାନିତ ଆଡ଼ତଣ୍ ନୁ ନ୍ୟାୟତାଗାଙ୍କ ବଞ୍ଚେମ୍ ଆଡ଼ତଣ୍ । ତାମ୍ ବଂଶତଡ଼ ବିଷୟତେ ବେନ ବାଆତେ କେତାଙ୍କ ପାର୍ଝଡ଼, ବାତେଙ୍କ ଇଡ଼କେ ପୃତିବିତାଗ୍ ଅଡ଼ାଦ୍ ଜିଝୁଣ୍ ତେରି ଆଡ଼ତେ ।”

୩୫ ଖାଞ୍ଜାଲ୍ କର୍ମଚାରୀ ଫିଲିପ୍ପତିଙ୍କ ପାତ୍ରାମାଡ଼ତଣ୍, “ବାବବାଦୀ ବେନ ବିଷୟତେ ପ୍ରାର୍ଥନା ମାଡ଼ତୁଣ୍, ନାକିଂଙ୍କ କେଲାଟ୍ । ତାନ୍

ନିଜେତ୍ ବିଷୟତେ ନା ମେଣ୍ଡେ ଖେରଣ୍ଡ ବିଷୟତେ ?”

୩୫ ଫିଲିପ୍ସ ଦର୍ମଶାସ୍ତ୍ରତେ ଇଦ୍ ବାକ୍ୟତାଗାଙ୍କ ଆରାମ୍ ମାଡ଼ି ଜିସୁନ୍ ବିଷୟତେ କେତ୍ତାଦ୍ ସାରେ ସୁସମାଚାର୍ ଅଂକିଙ୍କ କେତ୍ତତ୍ତ୍ ।

୩୬ ଅଡ଼୍ ହାର୍ଦ୍ଦାଗ୍ ଆଦାନ୍ ଖେଲେ ଅଣ୍ଡୟ୍ ଏରଞ୍ଜେତାଗ୍ ଏଞ୍ଜୁତ୍ତଡ଼୍ । ଖାଞ୍ଜାଲ୍ କର୍ମଚାରୀ କେତ୍ତତ୍ତ୍ ।

୩୭ “ଇଗେ ଏର୍ ମିନ୍ଦା, ଇଞ୍ଜେ ନାକିଂଙ୍କ୍ ଏର୍ଦିନ୍ଦା ଆଦାନଙ୍କ୍ ବାଡ଼୍ ଅସୁବିଦା ମିନ୍ଦ କି ?”*

୩୮ ଖାଞ୍ଜାଲ୍ କର୍ମଚାରୀ ରଡ଼ତିଙ୍କ୍ ନିଲ୍ସ୍ତାନଙ୍କ୍ ଗର୍ ହିଡ଼ତ୍ତ୍ । ଫିଲିପ୍ସ ନୁ କର୍ମଚାରୀ ଏର୍ଦେ ଲୋପେ ଆଡ଼ତଡ଼୍ ନୁ ଫିଲିପ୍ସ ଅଂକିଙ୍କ୍ ଏର୍ଦିନ୍ଦା ହିଡ଼ତ୍ତ୍ ।

୩୯ ଅଡ଼୍ ଏରତାଗାଙ୍କ୍ ତେଦି ଖାଡ଼ତେ ପେରକେ ପ୍ରବୁନ୍ ପବିତ୍ର ଆମ୍ ଫିଲିପ୍ସଙ୍କ୍ ମାପିଡ଼ତେ । କର୍ମଚାରୀ ମେଣ୍ଡେ ଅଂକିଙ୍କ୍ ଉଡ଼ାଙ୍କ୍ ପାର୍ଞଣ୍ଡ, ବାତେଙ୍କ୍ ଇଡ଼କେ କୁସି ଆସ୍ ତାନ୍ ହାର୍ ଆଡ଼ତ୍ତ୍ ।

୪୦ ବେସ୍କେ ଦିନାଡ଼୍ ପେରକେ ଫିଲିପ୍ସ ଉଡ଼ତ୍ତ୍ ଜେ ଅଣ୍ଡ୍ ଅସଦୋଦତାଗ୍ ଏଞ୍ଜୁତ୍ତଡ଼୍ । ଆଗାଙ୍କ୍ ଅଣ୍ଡ୍ କାଇସରିଆତାଗ୍ ଆଡ଼ତ୍ତ୍ ନୁ ହାର୍ଦ୍ଦାଗ୍ ମାନ୍ଦାନ୍ ଗାଉନ୍କିନାଗ୍ ସୁସମାଚାର୍ ପ୍ରଚାର୍ ମାଡ଼ତ୍ତ୍ ।



ଶାଉଲ୍ ମନ୍ ବଦଲ୍ମାମାଡ଼ତ୍ତ୍

(ପ୍ରେରିତ ୨୨:୬-୧୬; ୨୬:୧୨-୧୮)

୧ ଇଦ୍ ସମୟତେ ଶାଉଲ୍ ପ୍ରବୁନ୍ ଶିଷ୍ୟତ୍ତ୍ଙ୍କିଙ୍କ୍ ଆଞ୍ଜକିତାନ୍ ଇଞ୍ଜେ ଦମକ୍ ଇସମାଡ଼ତ୍ତ୍ । ମେଣ୍ଡେ ଅଣ୍ଡ୍ ମହା ଯାଜକ୍ତେ ଗାର୍ରେ ଆଡ଼ତ୍ତ୍ ।

୨ ଦାମାସ୍କସ୍ତେ ଉପାସନା ଲଅକିନାଗ୍ ପ୍ରବୁନ୍ ଆର୍ଦିଙ୍କ୍ ଖାସମାନ୍ଦାନ୍ ନାରୁଡ଼୍ ବନ୍ଦିମାଡ଼ି ଯିରୁଶାଲେମତାଗ୍ ତାତାନ୍ ମାଇଦିଙ୍କ୍ ବେଡ଼ିୟି ଯାଜକ୍କନ୍ଦ୍ ଆନୁମତି ଚିଟି ତାଲ୍କତ୍ତ୍ ।

୩ ଶାଉଲ୍ ଦାମାସ୍କସ୍ ଟାଞ୍ଜୁନ୍ ଗାର୍ରେ ଏଞ୍ଜୁଦାନ୍ ଖେଲେ ହଟାଡ଼୍ ସ୍ୱର୍ଗତାଗାଙ୍କ୍ ଅଣ୍ଡୟ୍ ଖେସ୍ ଅନ୍ ସାରେପାକ୍ ଖେସ୍ ଆଡ଼ତେ ।

* ୮:୩୭ ଫିଲିପ୍ସ ଅଂକିଙ୍କ୍ କେତ୍ତତ୍ତ୍, ନିମେ ଅଂକିଙ୍କ୍ ବାଡ଼ିସ୍ତ ଇମ୍ ଯଦି ନିମେ ଇଞ୍ଜୁସାରେ ବିଶ୍ୱାସ୍ ମାଡ଼ୁନ୍ ।

୪ ଅଣ୍ଟ ବୁମ୍‌ଦାଗ ରାୟତଣ୍ଟ ନୁ ଅଣ୍ଟୟଗର୍ କେଞ୍ଜତଣ୍ଟ, “ଗାଉଲ୍ ! ନିମ୍ ବାତେଙ୍କ ନାକିଂଙ୍କ ଗାଟିତିପାଲ୍ ମାଡ଼ୁତି ?”

୫ ଅଣ୍ଟ କେଡ଼ତଣ୍ଟ, “ପ୍ରବୁ ନିମ୍ ବେନ ?” ମେଣ୍ଟନ୍‌ନ୍‌ମାମ୍ ଆଦେ ଗର୍ କେଞ୍ଜତଣ୍ଟ, “ନିମ୍ ବେନଙ୍କ ଗାଟିତିପାଲ୍ ମାଡ଼ୁତିନ୍, ନାନ୍ ଅଣ୍ଟେ ଜିସୁ ।

୬ ତେଦଦେ ଟାସ୍ତନ୍‌ତାଗ୍ ଅନ୍, ବାଡ଼ ମାଡ଼ାନଙ୍କ ଆଦତେ, ଆଗେ ନିକିଂଙ୍କ କେସିଦତଡ଼ ।”

୭ ବେନଡ଼୍ କି ଶାଉଲ୍‌ତେ ତଡ଼ ଆଞ୍ଜ ମାଡ଼ତଡ଼ ଅନ୍ ସାଙ୍ଗଡ଼ ଉଡ଼ି ବାକୁଝାହାସ୍ ନିଡ଼ତଡ଼; ଅଡ଼ ଆଦେ ଗର୍ କେଞ୍ଜତଡ଼, ଇଡ଼କେ ବେନଙ୍କ ଉଡ଼ାଙ୍କ ପାର୍‌ଝଡ଼ ।

୮ ଶାଉଲ୍ ବୁମ୍ ତାଗାଙ୍କ ତେଦି ଉଡ଼ତଣ୍ଟ, ଇଡ଼କେ ଅଂକିଙ୍କ ବାଆତେ ତଅନ୍‌ଦ । ଆଦିଙ୍କ ଅଡ଼ କାୟଦିଙ୍କ ପୟସ୍ ଦାମାସକସ୍ ଏଞ୍ଜୁନା ଆର୍ ତଅସିଡ଼ତଡ଼ ।

୯ ମୁଣ୍ଟ ଦିନା ଯାକ ଅଣ୍ଟ ଉଡ଼ାଙ୍କ ପାର୍‌ଝଣ୍ଟ ନୁ ଆଦ ଦିନାମ୍ ତିନ୍‌ଦାନ୍ ଉନ୍‌ଦାନ୍ ମାଡ଼ଣ୍ଟ ।

୧୦ ଦାମାସକସ୍ ହନନୀୟ ପେଦେରତଣ୍ଟ ଝେରଣ୍ଟ କ୍ରିଷ୍ଟ ବିସ୍ବାଗି ଶିଷ୍ୟ ମାଡ଼ତଣ୍ଟ । ଅଣ୍ଟ ଝେରଡ଼ ଦର୍ଶନ୍ ଉଡ଼ତଣ୍ଟ, ପ୍ରବୁ ଅଂକିଙ୍କ କେଡ଼ତଣ୍ଟ, “ହନନୀୟ !” ଅଣ୍ଟ ଉଉର୍ ହିଡ଼ତଣ୍ଟ, “ହୋ ପ୍ରବୁ କେଲ୍‌ମ୍ ।”

୧୧ ପ୍ରବୁ କେଡ଼ତଣ୍ଟ, “ସାୟେ ଆୟ୍‌ମୁର୍ । ‘ତିନାଙ୍କ’ ପେଦେରତେ ରର୍ ପୟସ୍ ଯିହୁଦାନ୍ ଲନ୍ ଆନ୍‌ର୍ । ଆଗେ ତାଷ୍ ସ୍ କନ୍‌ସ୍ ଖାଡ଼ତେ ଝେରଣ୍ଟ ଶାଉଲ୍ ପେଦେରତଣ୍ଟ ନାରୁଙ୍କ ମେହେକାର୍ । ଅଣ୍ଟ ପ୍ରାର୍ତନା ମାଡ଼ତୁଣ୍ଟ ।

୧୨ ହନନୀୟ ପେଦେରତଣ୍ଟ ଝେରଣ୍ଟ ନାରୁଣ୍ଟ ଖାସ୍ ଅନ୍ ପରର କାୟ ଖାଟତଣ୍ଟ, ଅଣ୍ଟ ମେଣ୍ଟେ ବେଲା ଉଡ଼ ପାର୍‌ଦତଣ୍ଟ ଇଞ୍ଜ ଦର୍ଶନ୍ ଉଡ଼ତଣ୍ଟ ।”

୧୩ ହନନୀୟ କେଡ଼ତଣ୍ଟ, “ପ୍ରବୁ, ଇଣ୍ଟ ପବିତ୍ର ନାରୁଣ୍ଟ ଯିରୁଶାଲେମ୍‌ତାଗ୍ ନି ନାରୁଡ଼ ସେଙ୍ଗେ ବେନ୍‌ସାରେ କାରାପ୍ ପାଡ଼୍‌ୟି ମାଡ଼ତଣ୍ଟ, ଆଦ ବିଷୟତେ ନାର୍‌ଗେ ନାରୁଡ଼ ନାକିଂଙ୍କ କେଡ଼ତଡ଼ ।

୧୪ ମେଣ୍ଟେ ଅଣ୍ଟ ମୁକ୍ୟ ଯାଜକ୍‌ତାଗାଙ୍କ ଅଦିକାର୍ ଚିଟି ଆସ୍, ଦାମାସକସ୍ ପେଦେରତାଗ୍ ନିକିଂଙ୍କ ଉପବାସ୍ ମାଡ଼ାନଡ଼କିଙ୍କ ପୟସ୍ ଆଦାନ୍ ସେଙ୍ଗେ ଖାଡ଼ତଣ୍ଟ ।”

୧୫ ପ୍ରଭୁ ଅଂକିଙ୍କ କେତେତଣୁ, “ଅନ୍, ଇସ୍ରାଏଲ ନାରୁଡ଼ୁ ନୁ ଅଣଇହୁଦୀ ନୁ ରାଜାଲତ୍ ମୁନେନେ, ନା ପେଦେର୍ କେତାନଙ୍କ ନୁ ନାଝାଦ୍ ସେବା ମାଡ଼ାନଙ୍କ ନାନ୍ ଅଂକିଙ୍କ ହେଞ୍ଜତାନ୍ ।

୧୬ ନା ପେଦେର୍ ସେଙ୍ଗେ ଅଣ୍ଟ ବେନ୍ ସାରେ କଷ୍ଟ ପାଏମ୍ ଆଦତନ୍, ନାନ୍ ନିଜେ ଅଂକିଙ୍କ କେତିତାନ୍ ।”

୧୭ ହନନୀୟ ଆଡ଼ତଣ୍ଟ, ଶାଉଲ ମାନ୍ଦାନ୍ ଲନ୍ ହସିମିକା ଅନ୍ ପରର କାୟ୍ ଝାଡ଼ତଣ୍ଟ । ଅଣ୍ଟ କେତେତଣ୍ଟ, “ବିଶ୍ୱାସୀ ଦାଦାଲ୍ ଶାଉଲ୍, ଇଗେ ଝାଦାନ୍ ମୁନେଙ୍କ ନାକିଙ୍କ ପ୍ରଭୁ ଜିସୁ ନାକିଙ୍କ ଦର୍ଶନ୍ ହିଡ଼ତଣ୍ଟ, ଅଣ୍ଟ ନାକିଙ୍କ ରହଡ଼ତଣ୍ଟ, ବେଲାକି ନିମ୍ ମେଣ୍ଟେ ଦୃଷ୍ଟି ପାଏମ୍ ଆଦତି ନୁ ପବିତ୍ର ଆମ୍ବାତଡ଼୍ ବର୍ତ୍ତ୍ ଆଦତିଡ଼୍ ।”

୧୮ ଆସୁଟେ ସାଙ୍ଗେ ସାଙ୍ଗେ ଶାଉଲ୍‌ତେ କଣ୍ଟାଗାଙ୍କ କିକେ ଉୟକା ଲେକାମ୍ ବାଡ଼ ରାୟ୍‌ତେ ନୁ ଅଣ୍ଟ ମେଣ୍ଟନ୍‌ଦାମ୍ ଉଡ଼ାନଙ୍କ ପାରଡ଼ତଣ୍ଟ । ଅଣ୍ଟ ତେଦି ଏର୍ଦିକ୍ଷା ଗ୍ରହନ୍ ମାଡ଼ତଣ୍ଟ,

୧୯ ନୁ ଦାମାସକସ୍‌ତିଙ୍କ ତିନ୍ଦାନ୍ ଉନ୍ଦାନ୍ ମାଡ଼ନାଦ୍ ଶକ୍ତି ଦରକ୍‌ତେ । ଶାଉଲ୍ କ୍ରିଷ୍ଟ ବିଶ୍ୱାସି ଶିଷ୍ୟତ୍ ତ ବେସ୍‌କ୍ ଦିନା ମାଡ଼ତଣ୍ଟ ।

ଦାମାସକସ୍‌ତାଗ୍ ଶାଉଲ୍‌ତେ ପ୍ରଚାର

୨୦ ଅଣ୍ଟ ସିଦା ଉପାସନା ଲୋକିନାଗ୍ ଆଞ୍ଜ୍ ଜିସୁ ଇଶ୍ୱରତେ ମାର୍, ଇଦ୍ ଗର୍ ପ୍ରଚାର ମାଡ଼ାଙ୍କ ପସ୍‌ପତଣ୍ଟ ।

୨୧ ବେନଡ଼୍ ଅନ୍ ଗଟି କେଞ୍ଜତଡ଼୍, ଅଡ଼୍ ଦାଦରିଲି ପାତ୍ରାମାଡ଼ତଡ଼୍, “ଯିରୁଶାଲେମ୍‌ତାଗ୍ ଜିସୁନ୍ ପେଦେର୍‌ତେ ଉପବାସ୍ ମାଡ଼ାନଡ଼ିଙ୍କ ବେନ ହାଝକ ମାଡ଼ତଣ୍ଟ, ଇଣ୍ଟ ଅଣ୍ଟ ଆୟନ୍ କି ? ଅଡ଼ିକିଙ୍କ ମୁକ୍ୟ ଯାଜକ୍‌ତେ ବକେଡ଼ ପୟସ୍ ଆଦାନଙ୍କ ଅଣ୍ଟ ଇଗେ ଦାମାସକତା ଝାସ୍ ମାନଣ୍ଟ ?”

୨୨ ବାତେଙ୍କ ଇଡ଼କେ ଶାଉଲ୍‌ତେ ପ୍ରଚାର ଗାଟି ଶକ୍ତି ମାଡ଼ତେ, ଜିସୁ ହୋ ମସୀହା, ଇଦ୍ ବିଷୟତେ ଅନାଦ୍ ପ୍ରମାନ୍ ଗାଟି ଯୁକ୍ତି ମାଡ଼ତେ ଜେ ଦାମାସକସ୍‌ତାଗ୍ ବାସେ ମାଡ଼ାନଡ଼ି ଇହୁଦୀଡ଼୍, ଅନାଦ୍ ବେନ୍ ଗର୍‌ତେ ମିକା ଉତ୍ତର୍ ହିଦାଙ୍କ ପାର୍‌ଝଡ଼୍ ।

୨୩ ☆ନାରଗେ ଦିନ୍ ଆଡ଼ତେ ପେର୍‌କେ ଇହୁଦୀଡ଼୍ ଅଣ୍ଟୟାଗେ ଆସ୍ ଶାଉଲ୍‌ତିଙ୍କ ହାଝକାଙ୍କ ସେଙ୍ଗେ ହାଲ୍‌ସତଡ଼୍,

୨୪ ଶାଉଲ୍‌ତିଙ୍କ ଆଞ୍ଜୁକାନଙ୍କ ନାବକେତ୍ ପାୟାଲ୍ । ଅତ୍ ନାବ୍ ମାର୍ ସାରେତାଗ୍ କେପିମାତ୍‌ତତ୍ ।

୨୫ ବାତେଙ୍କ ଇଡ୍‌କେ ଅଣ୍ ଦିନ୍ ନାକେତ୍ ଖେଲେ ଶାଉଲ୍‌ତେ ଶିଷ୍ୟତ୍ ଅଂକିଙ୍କ ଖେରତ୍ ଜୁଡିତାଗ୍ ଖାଟି ପାତେରିତ୍ କୁଲାମାନ୍ଦାନ୍ ଜରକାତାଲାନ୍ ମଦଲ୍ ରାପିତ୍‌ତତ୍ ।

ଯିରୁଶାଲେମ୍‌ତାଗ୍ ଶାଉଲ୍

୨୬ ଶାଉଲ୍ ଯିରୁଶାଲେମ୍‌ତାଗ୍ ଆଞ୍ଜୁ ତାମ୍ ଶିଷ୍ୟତ୍ ତତ୍ କାଲ୍ଲାନଙ୍କ ଆଲ୍‌ସି ମାତ୍‌ତଣ୍ । ବାତେଙ୍କ ଇଡ୍‌କେ ଅଣ୍ ଖେରଣ୍ ଶିଷ୍ୟ ଇଞ୍ଜ ଅତ୍ ବିଲ୍‌କୁଲ୍ ବିଶ୍ବାସ୍ ମାତ୍‌ତତ୍ । ସାରେତତ୍ ଅଂକିଙ୍କ ଖେରତତ୍ ।

୨୭ ବାତେଙ୍କ ଇଡ୍‌କେ ପେରକେ ବର୍ଣ୍ଣବା ଅଂକିଙ୍କ ପ୍ରେରିତ ଶିଷ୍ୟତାଗ୍ ଆସ୍ ଦାମାସ୍କସ୍ ହାରଦାଗ୍ ଶାଉଲ୍ ବେଲା ପ୍ରବୁନ୍ ଦର୍ଶନ୍ ପାଏମ୍ ଆତ୍‌ତଣ୍ ନୁ ପ୍ରବୁ ବେଲା ଅଂକିଙ୍କ ଗଟି ତିରିୟି ମାତ୍‌ତଣ୍, ଇଦ୍ ସାରେ ବିଷୟ ଅତ୍‌କିଙ୍କ ବୁଜା ମାତ୍‌ତଣ୍ । ଦାମାସ୍କସ୍‌ତାଗ୍ ଜିସୁନ୍ ପେଦେରତେ ଶାଉଲ୍ ବେଲା ଖେରଖେକନ୍ ପ୍ରଚାର୍ ମାଡିମାତ୍‌ତଣ୍, ଅତ୍‌କିଙ୍କ ସାୟେ ତିଆର୍ ମାଡି କେତ୍‌ତଣ୍ ।

୨୮ ଇଦିନ୍ ପେରକେ ଶାଉଲ୍ ପ୍ରେରିତ ଶିଷ୍ୟତ୍ ତତ୍ ମାତ୍‌ତଣ୍ ନୁ ଯିରୁଶାଲେମ୍‌ତାଗ୍ ସାରେ ଏକାମ୍ ଆଞ୍ଜୁ ସାହାସ୍ ତତ୍ ପ୍ରବୁନ୍ ପେଦେରତେ ପ୍ରଚାର୍ ମାତ୍‌ତଣ୍ ।

୨୯ ଇଦ୍ ସାରେ ବିଷୟତେ ଅଣ୍ ଗ୍ରୀକ୍ ଗଟ୍‌ତତ୍ ଇହୁଦୀତ୍‌ତତ୍ ମିକା ତର୍କବିତର୍କ ମାତ୍‌ତଣ୍, ବାତେଙ୍କ ଇଡ୍‌କେ ଅତ୍ ଅଂକିଙ୍କ ଆଞ୍ଜୁକାନଙ୍କ ଆଲ୍‌ସି ମାତ୍‌ତତ୍ ।

୩୦ ବିଶ୍ବାସୀତ୍ ଦାଦାଲ୍ ଇଦ୍ ଗଟ୍ ପୁଞ୍ଜ ମିକା, ଶାଉଲ୍‌ତିଙ୍କ କାଲ୍‌ସରିଆତାଗ୍ ଆତ୍‌ତତ୍ ନୁ ଆଗାଙ୍କ ଅଂକିଙ୍କ ତାଷ୍‌ସ୍‌ତାଗ୍ ରହସିତ୍‌ତତ୍ ।

୩୧ ଯିହୁଦା, ଗାଲିଲୀ ନୁ ଶମିରୋତାଗ୍ ମାନ୍ଦାନ୍ କ୍ରିଷ୍ଟୀୟ ମଣ୍ଡଲି ଆଦ୍ ସମୟତେ ଶାନ୍ତି ମାତ୍‌ତେ ନୁ ପବିତ୍ର ଆତ୍ମାତ୍ ସାରଦେତତ୍, ଅତ୍‌ଦ ନାରୁତ୍ ସଂଖ୍ୟା ନାଗେ ଆତ୍‌ତେ ନୁ ଅତ୍ ଶକ୍ତିନତ୍ ଆତ୍‌ତତ୍ । କ୍ରିଷ୍ଟ ବିଶ୍ବାସୀତ୍ ପ୍ରବୁଙ୍କ ଖେରସ୍ ମିକା ବାଦକ୍‌ତତ୍ ।

ଲୁଦା ନୁ ଯୋପ୍ପାତାଗ୍ ପିତର୍

୩୭ ପିତର୍ ପିନା ପଡ଼ିଲେ ଉଡ଼ ଉଡ଼ ଅନ୍ଦାମ୍ ଲୁଦାତାଗ୍ ବାସେ ମାଡ଼ମାନ୍ଦାନ୍ ପ୍ରବୁନ୍ ନାରୁଡ଼୍ ପବିତ୍ର ମାଡ଼ାଙ୍କ ଆଡ଼ତଣ୍ ।

୩୮ ଆଗେ ଏନିୟ ପେଦେରତଣ୍ ଝେରଣ୍ ନାରୁଙ୍କ କାଲ୍ଲତଣ୍ । ଅଂକିଙ୍କ ପକ୍ୟାଗାଡ଼ ରୋଗ୍ ହାସ୍ ଆର୍ ହେଣ୍ କାରୁଲ୍ତାଗାଙ୍କ ତେଦାଙ୍କ ପାର୍ଝେ ମାଡ଼ତଣ୍ ।

୩୯ ପିତର୍ ଅଂକିଙ୍କ କେଡ଼ତଣ୍, “ଏନିୟ, ଜିସୁ କ୍ରିଷ୍ଟ ନିକିଂଙ୍କ ସୁସ୍ତ ମାଡ଼ତଣ୍ । ତେଏଦେ ନିୟାଦ୍ କେଡ଼ ତେଏମ୍ ।” ଆସୁଟେ ସାଙ୍ଗେ ସାଙ୍ଗେ ଏନିୟ ତେଦି ନିଡ଼ତଣ୍ ।

୪୦ ଇଦ୍ ଉଡ଼ି ଲୁଦା ନୁ ଶମିରୋଶତାଗ୍ ବାସେ ମାଡ଼ାନ୍ ନାରୁଡ଼୍, ସାରେତଡ଼୍ ପ୍ରବୁନାକ୍ ମନ୍ ମାଲ୍ଲପଡ଼୍ ।

୪୧ ଯୋପାତାଗ୍ ଟାବିଆ ପେଦେରତେ ଝେରଡ଼୍ ବିଶ୍ୱାସୀ ନାଟାଡ଼୍, ବାସେ ମାଡ଼ମାଡ଼ତେ । ଆଦିନାଦ୍ ଗ୍ରୀକ୍ ପେଦେର ଦର୍କାସ୍ ଇଡ଼କେ ଇଦ୍ ଅର୍ଡ଼ “ହରିଶୀ,” ମାଡ଼ତେ । ଆଦ୍ ତାନାଦ୍ ସାରେ ଦିନାମ୍ ସାୟେକାମ୍ ଦାଗ୍ ନୁ ଗରିବ୍ ନାରୁଡ଼୍ ସେବା ମାଡ଼ାନାଗ୍ ହିସମାଡ଼ତେ ।

୪୨ ଆସୁଟେ ରୋଗ୍ ଆସ୍ ଆଦ୍ ଡଲ୍ତେ । ସାଙ୍ଗଡ଼୍ ତାନ୍ ମେନ୍ଦୁଲ୍ଲତିଙ୍କ୍ ଏର୍ ମିସ୍ସି ପରଡ଼ ବାକ୍ଡେତାଗ୍ ପାର୍ପିସ୍ତଡ଼୍ ।

୪୩ ଯୋପ୍ପା ଲୁଦାଡ଼ ବକେଡ଼ ମାଡ଼ତେ । ପିତର୍ ଲୁଦାତାଗ୍ ମିନ୍ଦେଣ୍ ଇଞ୍ଜ କେଞ୍ଜି, ଯୋପାତାଗ୍ ମାନ୍ଦାନ୍ ବିଶ୍ୱାସୀ ଶିଷ୍ୟ ଇର୍ଝୁଡ଼୍, ନାରୁଡ଼୍ ରହଡ଼୍, “ଅନୁରଦ୍ ମାଡ଼ଡୁମ୍ ସିର୍ପାର୍ ମା ବକେଡ଼ ଝାଡ଼େ ।”

୪୪ ପିତର୍ ତିଆର୍ ଆସ୍ ଅଡ଼ତଡ଼୍ ଆଡ଼ତଣ୍ । ଆଗେ ଏଞ୍ଜୁଡ଼ତେ ସାଙ୍ଗେ ସାଙ୍ଗେ ନାରୁଡ଼୍ ଅଂକିଙ୍କ୍ ପରଡ଼ ବାକ୍ଡେତାଗ୍ ଆଡ଼ତଡ଼୍ । ଆଗେ ରାଣ୍ଡିକି କେୟି କେୟି ଦର୍କାସ୍ ମାଡ଼ତେ ସମୟତେ ସିଲେୟ ମାଡ଼ତେ ଚକା ନୁ ସିଲେ ତଅଡ଼ତା ।

୪୫ ପିତର୍ ସାରେତଡ଼୍କିଙ୍କ୍ ବାୟିଦେ ପେସ୍ସିତଣ୍ ନୁ ମର୍ମିଣ୍ଡା ଇସ୍ ପ୍ରାର୍ତନା ମାଡ଼ତଣ୍ । ତାନ୍ ପେରକେ ଅଣ୍ ଦର୍କାସ୍ତେ ଡଲ୍ତେ ମେନ୍ଦୁଲ୍ଲତିଙ୍କ୍ ଉଡ଼ି କେଡ଼ତଣ୍, “ଟାବିଆ, ତେଏଦେ !” ଦର୍କାସ୍ କଣ୍ଡା ତେରଡ଼ଣ୍ ନୁ ପିତର୍ତିଙ୍କ୍ ଉଡ଼ି ତେଦି କୁଡ଼ତଣ୍ ।

୪୧ ପିତର କାୟ ହାଆସ୍ ଆଦିଙ୍କ ତେହେତ୍‌ତଣ୍ଡ । ତାନ୍ ପେରକେ ଗୁଡ଼ିମାନ୍‌ନ୍ ସାରେ ବିଶ୍ୱାସୀ ନୁ ରାଣ୍ଡି ନାଟାକିଙ୍କ କାର୍‌ଜି ଜିଝୁନ୍ ପବିତ୍ରଆମ୍‌ତିଙ୍କ ଅତ୍ କାୟଦେ ହିତ୍‌ତଣ୍ଡ ।

୪୨ ଇଦ୍ ଗର୍ ଯୋପାତେ ସାରେ ପାକ୍ ପୁଡ୍‌ତଡ୍ ନୁ ନାର୍‌ଗେ ନାରୁଡ୍ ପ୍ରବୁଙ୍କ ବିଶ୍ୱାସ୍ ମାଡ୍‌ତଡ୍ ।

୪୩ ପିତର ନାର୍‌ଗେ ଦିନା ଯୋପାତେ ଶିମୋନ୍ ପେଦେରତଣ୍ଡ ଝେରଣ୍ଡ ତଲ୍‌କା ବେପାରିନ୍ ଲୋନ୍ ମାଡ୍‌ତଣ୍ଡ ।

୧୦

ପିତର ନୁ କର୍ଣ୍ଣୀଲିୟ

୧ କାଇସରିଆତଣ୍ଡ କର୍ଣ୍ଣୀଲିୟ “ଇଟାଲୀୟ ବାହିନୀ,” ପେଦେରତେ ରୋମୀୟ ସୈନ୍ୟବାହିନୀତେ ଶତସେନାପତି ମାଡ୍‌ତଣ୍ଡ ।

୨ ଅଣ୍ଡ ଝେରଣ୍ଡ ଦାମ୍‌କ୍ ନାରୁଣ୍ଡ ମାଡ୍‌ତଣ୍ଡ । ଅଣ୍ଡ ନୁ ତାମ୍ ପରିବାରତେ ସାରେତଡ୍ ଇଶ୍ୱରତିଙ୍କ ଉପାସନା ମାଡ୍‌ମାଡ୍‌ତଡ୍ । ଅଣ୍ଡ ଯିହୁଦି ଗରିବ୍ ନାରୁଡ୍‌କିଙ୍କ ନାର୍‌ଗେ ସାହାଯ୍ୟ ମାଡ୍‌ମାଡ୍‌ତଣ୍ଡ ନୁ ସାରେଦାମ୍ ଇଶ୍ୱରତିଙ୍କ ପ୍ରାର୍ଥନା ମାଡ୍‌ମାଡ୍‌ତଣ୍ଡ ।

୩ ଅଣ୍ଡଦିନ୍ ପାୟାଲ୍ ମୁଣ୍ଡ ଗାଣ୍ଟା ସମୟତେ ଅଣ୍ଡ ସାୟ୍ ଅଣ୍ଡୟ୍ ଦର୍ଶନ୍ ଉଡ୍‌ତଣ୍ଡ ଯେ ଇଶ୍ୱରତେ ଦୂଡ୍ ଝାସ୍ ଅଂକିଙ୍କ କାର୍‌ଜୁତଣ୍ଡ, “କର୍ଣ୍ଣୀଲିୟ ।”

୪ ଅଣ୍ଡ ଝେର ସ୍ୱର୍ଗ ଦୂତତାକ୍ ଉଡ଼ି କେଡ୍‌ତଣ୍ଡ, “ପ୍ରବୁ ବାଡ୍ କେଡୁତିନ୍ ?” ଦୂଡ୍ ଉତ୍ତର ହିଡ୍‌ତଣ୍ଡ, “ଇଶ୍ୱର ନିୟାଦ୍ ପ୍ରାର୍ଥନା ନୁ ଦାନ ଉଡ଼ି ସାରଦେ ଆଡ୍‌ତଣ୍ଡ ନୁ ଆଦିଙ୍କ ନିକିଙ୍କ ଉପହାର ହିଦାଙ୍କ ତିଆର୍ ଆଡ୍‌ତଣ୍ଡ ।

୫ ଇଞ୍ଜେ ଶିମୋନ୍ ପିତର ପେଦେରତଣ୍ଡ ଝେରଣ୍ଡ ନାରୁଙ୍କ କାର୍‌ଜି ତାତାନ୍ ମାଲଦିଙ୍କ ଯୋପାତାଗ୍ ନାରୁଡ୍‌କ୍ ରହମୁର୍ ।

୬ ଅଣ୍ଡ ଗଦାଡ୍ ହାଞ୍ଜିନାଗ୍ ବାସେ ମାଡ୍‌ମାନ୍‌ନ୍ ଶିମୋନ୍ ପେଦେରତଣ୍ଡ ଝେରଣ୍ଡ ତଲ୍‌କା ବେପାରିନ୍ ଲନ୍ ମିନ୍‌ହେଣ୍ଡ ।”

୭ ଇଦ୍ କେସ୍ ଦୂଡ୍ ଆଡ୍‌ତଣ୍ଡ । କର୍ଣ୍ଣୀଲିୟ ତାମ୍ ଲୋଡ୍‌ତେ ଇରଝୁଡ୍ ଦାସ ନୁ ଝେରଣ୍ଡ ସୈନିକ୍‌ତିଙ୍କ ପେରକେ ଆଦାନଙ୍କ କାର୍‌ଜୁତଣ୍ଡ ।

୮ ଅଣ୍ଟ ଅଡ଼କିଂଙ୍କ ସାରେ ବିଷୟ କେସ୍ ଯୋପାତାର୍ ରହୁତଣ୍ ।

୯ ମେଣ୍ଟେଅନ୍ଦିନ୍ ପାୟାଲ୍ ଅଡ଼ ଯୋପପାତ୍ ଗାରରେ ଏଞ୍ଜୁଦାନ୍ ଝେଲେ, ପିତର୍ ପ୍ରାର୍ଥନା ମାଡ଼ାନ୍ ସେଙ୍ଗେ ମୁସ୍ ନାଗ୍ ଆଞ୍ଜମାଡ଼ତଣ୍ ।

୧୦ ଅଣ୍ଟ କାରପୟଡ଼ତାଙ୍କ ସୁଦୁର୍ ତିହାନଙ୍କ ହାଲ୍ସତଣ୍ ନୁ କାଦି ତିଆର୍ ଆଡ଼ତେ ସମୟତେ ଅଣ୍ଟ ଅଣ୍ଟୟ୍ ଦର୍ଶନ୍ ଉଡ଼ତଣ୍ ।

୧୧ ଅଣ୍ଟ ଉଡ଼ତଣ୍, ସ୍ୱର୍ଗ କୁଲେମ୍ ଆଡ଼ତେ ନୁ ଅଣ୍ଟୟ୍ ବେଡ଼ୟାଦ୍ ତୁପର୍ ନାଲୁ ମୁଲାନାଗ୍ ଉଜ୍ଜିମିକା ପୃତିବିତାର୍ ପରର ତିଗୁଡ଼ ।

୧୨ ସ୍ୱର୍ଗ ନାରଗେ ରକମ୍ତାଞ୍ ଜାଞ୍ଜାକ୍, ପୃତିବିତାର୍ ବେନ୍ ଜିଞ୍ଜାକ୍ ନେଲ୍ ମେନ୍ଦୁଲ୍ ମସ୍ସି ତାଆକାନାଞ୍ଜୁ ଜିଞ୍ଜାକ୍ ନୁ ଗୁପେଡ଼ ପିଟ୍ଟେ ମିନ୍ଦେ ।

୧୩ ମେଣ୍ଟେ ଅଣ୍ଟ ଅଣ୍ଟୟ୍ ଗର୍ କେଞ୍ଜତଣ୍, “ପିତର୍ ! ତେଏଦେ, ହାଞ୍ଜି ମିକା ତିନ୍ !”

୧୪ ବାତେଙ୍କ ଇଡ଼କେ ପିତର୍ କେଡ଼ତଣ୍, “ଇଲ୍ଲେ ପ୍ରୁ, ନାନ୍ ପାର୍ଡ଼ନ୍ ! ନାନ୍ନେ ବେସୁର୍ ଅଣ୍ଟି ନୁ କାରାପ୍ ମାହାନ୍ ଜିନିଷ୍ ତିନନ୍ ।”

୧୫ ମେଣ୍ଟେ ଅଣ୍ଟ କେଞ୍ଜତଣ୍; “ଇଶ୍ୱର୍ ବେନଙ୍କ ଶୁଚି ମାଡ଼ତଣ୍, ନିମ୍ ଅଂକିଙ୍କ କାରାପ୍ ଇଞ୍ଜ ହାଲ୍ସମା ।”

୧୬ ମୁଣ୍ଡଦାମ୍ ଇଦ୍ ରକମ୍ ଆଡ଼ତେ ପେରକେ, ତୁପର୍ତିଙ୍କ ସ୍ୱର୍ଗତାକ୍ ତେଇସ୍ ଆଡ଼ତଡ଼ ।

୧୭ ପିତର୍ ତାନ୍ ଦର୍ଶନ୍ ଉଡ଼ତେ ଇଡ଼କେ ଆଲ୍ସି କାବା ଆଡ଼ତଣ୍ । ଆସୁଟେ କର୍ଣ୍ଣାଲିୟ୍ ବେନଡ଼କ୍ ରହସ୍ମାଡ଼ତଣ୍, ଅଡ଼ ଶିମୋନ୍ତେ ଲନ୍ ତିଙ୍କ୍ ଦରସ୍ତି ମାର୍ ବକେଡ଼ ନିଶ୍ମାଡ଼ତଡ଼ ।

୧୮ ଅଡ଼ କାଙ୍ଗ୍ ପାତ୍ରାମାଡ଼ତଡ଼, ଶିମୋନ୍ ପିତର୍ ପେଦେରତେ ଇଗେ ଝେରଣ୍ କୁର୍ମାମ୍ ନାରୁଡ଼ ମିନ୍ଦେଣ୍ କି ?

୧୯ ପିତର୍ ଆସୁର୍ ଯାକ ଦର୍ଶନ୍ତାଦ୍ ଅର୍ତ୍ତ ବୁଜେମ୍ ଆଦାଙ୍କ୍ ଆଲ୍ସମାଡ଼ତଣ୍, ଆସୁଟେ ପବିତ୍ର ଆମ୍ କେଡ଼ତେ, “ଉଡ଼େ, ଇଗେ ମୁଞ୍ଜୁଡ଼ ନାରୁଡ଼ ନିକିଂଙ୍କ୍ ମେହେକୁତଡ଼ ।

୨୦ ତିଆର୍ ଆସ୍ ମଦଲ୍ ଅନ୍ ନୁ ଅଡ଼ ତଡ଼ ଆଦାନଙ୍କ୍ ଆଲ୍ସାନାଦ୍ ଇଲେ, ବାତେଙ୍କ ଇଡ଼କେ ନାନ୍ ଅଡ଼କିଂଙ୍କ୍ ରହଡ଼ତାନ୍ ।”

୨୧ ପିତର ମଦଳ ଆଞ୍ଜ ଆ ନାରୁଡ଼ିକିଂଙ୍କ କେଡ଼ତଣ୍ଡ, “ମିଡ଼୍ ବେନଙ୍କ ମେହେକୁତିଡ଼୍, ନାନ ଅଣ୍ଡେ । ମିଡ଼୍ ବାତେଙ୍କ ଝାଡ଼ିଡ଼୍?”

୨୨ ଅଡ଼୍ ଉତ୍ତର ହିଡ଼ତଡ଼୍, “ସେନାପତି କର୍ଣ୍ଣୀଲିୟ ମାକିଂଙ୍କ ରହଡ଼ତଣ୍ଡ । ଅଣ୍ଡ୍ ଝେରଣ୍ଡ୍ ସାୟେଡ଼ ନାରୁଣ୍ଡ୍ । ଅଣ୍ଡ୍ ଇଶ୍ବରତିଙ୍କ ପ୍ରାର୍ଥନା ମାଡ଼ାନଣ୍ଡ୍ ନୁ ଇହୁଦୀ ନାରୁଡ଼୍, ସାରେତଡ଼୍ ଅଂକିଙ୍କ ସନ୍ମାନ ହିଡ଼ତଡ଼୍ । ନିକିଂଙ୍କ ତାମ୍ ନାର କାରଙ୍ଗି ମିକା ନିୟାଦ୍ ଗଟି କେଞ୍ଜାନ ମାଇଦିଙ୍କ ଇଶ୍ବରତେ ଝେରଣ୍ଡ୍ ପବିତ୍ର ଦୂଡ଼ ଅଂକିଙ୍କ ଗଟ୍ ହିଡ଼ତଣ୍ଡ୍ ।”

୨୩ ପିତର ଅଡ଼ିକିଂଙ୍କ ଲୋପେ କାରଙ୍ଗି ଆସ୍ ଆଦ୍ ନାରକେଡ଼ ଆଗେ ମାନ୍ଦାନ ମାଇଦିଙ୍କ ଅନୁରଦ୍ ମାଡ଼ତଣ୍ଡ୍ । ମେଣ୍ଡନ୍ଦିନେ ତିଆର୍ ଆସ୍ ଅଡ଼୍ ତଡ଼୍ ଆଡ଼ତଡ଼୍ । ଯୋପାତାଗ୍ ବେସ୍ତୁଡ଼୍ ବିଶ୍ବାସିଡ଼୍ ଦାଦାଲଡ଼୍ ମିକା ଅଡ଼୍ ତଡ଼୍ ଆଡ଼ତଡ଼୍ ।

୨୪ ପେରନେଟି ଅଡ଼୍ କାଇସରିଆତାଗ୍ ଏଞ୍ଜୁଡ଼ତଡ଼୍ । ଆଗେ କର୍ଣ୍ଣୀଲିୟ ତାନ ସାଙ୍ଗ୍ ନୁ ଲୋଡ଼ତେନଡ଼୍ ତଡ଼୍ ପିତରତିଙ୍କ କେପିମାଡ଼ତଡ଼୍ ।

୨୫ ପିତର ଲୋପେ ଆଦ୍ଦାନ ଝେଲେ କର୍ଣ୍ଣୀଲିୟ ଅଂକିଙ୍କ କାଇଲିମିକା ଡେକେଡ଼ ମଦଳ ରାଲି ପ୍ରଣାମ୍ ମାଡ଼ତଣ୍ଡ୍ ।

୨୬ ଇଡ଼କେ ପିତର ଅଂକିଙ୍କ ତେଇସ୍ କେଡ଼ତଣ୍ଡ୍, “ତେଏଦେ, ନାନ ନିଜେ ଝେରଣ୍ଡ୍ ନାରୁନ୍ ।”

୨୭ ପିତର କର୍ଣ୍ଣୀଲିୟ ତଡ଼୍ ତିରୟ୍ ତିରୟ୍ ଲୋଡ଼ତେ ଲୋପେ ହସ୍ତତଣ୍ଡ୍ ନୁ ଆଗେ ନାରଗେ ନାରୁଡ଼ିକିଂଙ୍କ ଅଣ୍ଡୟାଗେ ଗୁଡ଼ିମାନ୍ଦାନାଦ୍ ଉଡ଼ତଣ୍ଡ୍,

୨୮ ଅଡ଼ିକିଂଙ୍କ କେଡ଼ତଣ୍ଡ୍, “ମିଡ଼୍ ସାୟେ ପୁଞ୍ଜ୍ ମାନୁର୍, ଝେରଣ୍ଡ୍ ଇହୁଦୀ ନାରୁଡ଼୍ ତାନ ବିଶ୍ବାସ୍ ଲେକାମ୍ ଅବିଶ୍ବାସୀ ନାରୁଡ଼୍ ତଡ଼୍ କାଇଲାନଙ୍କ ପାର୍ଝଣ୍ଡ୍ । ଇଡ଼କେ ଇଶ୍ବର ନାକିଂଙ୍କ କେଡ଼ତଣ୍ଡ୍, ବେନଙ୍କ ବା କାରାପ୍ ବା ଅପବିତ୍ର ହେର୍କା ମାଡ଼ାନାଦ୍ ଅଶୁଚି ଆୟ୍ୟ ।

୨୯ ଆଦିଙ୍କ ମିଡ଼୍ ବେସୁର୍ ନାକିଂଙ୍କ କାରଙ୍ଗିଡ଼୍, ନାନ ବାତେମିକା ଆପଡ଼ି ମାଡ଼ଝେ କନ୍ସ୍ ଝାଡ଼ତାନ୍ । ନାନ ପୁନ୍ଦାଙ୍କ ଇଛା ମାଡ଼ତୁନ୍, ମିଡ଼୍ ବାତେଙ୍କ ନାକିଂଙ୍କ କାରଙ୍ଗିଡ଼୍?”

୩୦ କର୍ଣ୍ଣୀଲିୟ କେଡ଼ତଣ୍ଡ୍, “ନାଲୁ ଦିନା ମୁନେଙ୍କ ଇଦ୍ ସମୟତେ

ପାୟାଲ୍ ମୁଣ୍ଡ ଗାଣ୍ଡାଡ଼ ଖେଲେ ନାନ୍ ନା ଲୋନ୍ ପ୍ରାର୍ଥନା
ମାଡ଼ମାଡ଼ତାନ୍ । ହଟାଡ଼ ପାଣ୍ଡି ତକାସିଲେ କେଡ଼ତେନଣ୍ଡ ଖେରଣ୍ଡ
ନାରୁଡ଼୍ ନା ମୁନ୍‌ନେ ନିଡ଼ତଣ୍ଡ; ଅଣ୍ଡ କେଡ଼ତଣ୍ଡ

୩୧ ‘କଣ୍ଡୀଲିୟ ! ଇଶ୍ବର ନିୟାଦ୍ ପ୍ରାର୍ଥନା କେଞ୍ଜିତଣ୍ଡ ନୁ ଗରିବିଡ଼କ୍
ଦାନ୍ ମାଡ଼ାନ୍ ସେବାକାମ୍ ଉଡ଼ତଣ୍ଡ ।

୩୨ ଶିମୋନ୍ ପିତର୍ ପେଦେରତଣ୍ଡ ଖେରଣ୍ଡ ନାରୁଙ୍କ୍ ତାତାନ୍
ସେଙ୍ଗେ ଯୋପାତାଗ୍ ନାରୁଡ଼କ୍ ରହମୁର୍ । ଅଣ୍ଡ ଗଦାଡ଼ତେ ବକେଡ଼
ମାନ୍ଦାନ୍ ତଲ୍‌କା ବେପାରିନ୍ ଲନ୍ କୁଟ୍‌ମାମ୍ ଆସ୍ ମିନ୍ଦେଣ୍ଡ ।’

୩୩ ଆଦିଙ୍କ୍ ସାଙ୍ଗେ ସାଙ୍ଗେ ନାନ୍ ନିକିଂଙ୍କ୍ କାରଙ୍ଗ୍‌ତାନ୍ ନୁ ନିମେ
ଦୟା ମାଡ଼ି ଖାଡ଼ତିନ୍ । ପ୍ରବୁ ନିକିଂଙ୍କ୍ ବାଡ଼ କେତାନଙ୍କ୍ ବୁଦ୍ ହିଡ଼ତଣ୍ଡ,
ଆଦ୍ କେଞ୍ଜାନଙ୍କ୍ ମାମ୍‌ମେ ସାରେତମ୍ ଇଞ୍ଜେ ଇଶ୍ବରତେ ବକେଡ଼
ମିନ୍ଦେମ୍ ।”

ପିତର୍‌ତେ ଗଟ୍

୩୪ ପିତର୍ ଶିକ୍ଷା ହିଦାନଙ୍କ୍ ଆରାମ୍ ମାଡ଼ି କେଡ଼ତଣ୍ଡ, “ଇଞ୍ଜେ ନାନ୍
ନିଜାମ୍ ବୁଜେମ୍ ଆଡ଼ତାନ୍ ଯେ ପ୍ରକୃତତେ ଇଶ୍ବର ସାରେତଡ଼କିଂଙ୍କ୍
ସାମାନ୍ ଉଡ଼ତୁଣ୍ଡ ।

୩୫ ବେନ୍ ନାର୍‌ଦେନଣ୍ଡ ଆୟି ନାରୁଣ୍ଡ ପ୍ରବୁଙ୍କ୍ ପ୍ରାର୍ଥନା ମାଡ଼କେ ନୁ
ଅନ୍ କଣ୍ଡେତେ ସଡ଼ କର୍ମ ମାଡ଼କେ ପ୍ରବୁ ଅଂକିଙ୍କ୍ ଗ୍ରହନ୍ ମାଡ଼ିତନ୍ ।

୩୬ ମିଡ଼୍ ପୁଡ଼ତିଡ଼୍ ଯେ ଇଶ୍ବର ଇସ୍ରାଏଲ୍ ନାରୁଡ଼କ୍ ଗାରେ ବେନ୍
କାବୁର୍ ରହସ୍‌ମାଡ଼ତଣ୍ଡ, ଆଦେ ଜିସୁ ଦ୍ବାରା ଗଷଣା ମାଡ଼ତାଦ୍ ଗାନ୍ତି
ସୁସମାଚାର୍ । ହି ଜିସୁ କ୍ରିଷ୍ଟ ସାରେ ତଡ଼୍ ପ୍ରବୁ ।

୩୭ ଯୋହନ୍ ମନ୍ ପରିବର୍ତ୍ତନ୍ ନୁ ଏର୍ ଦୀକ୍ଷା କାବୁର୍ ପ୍ରଚାର୍
ମାଡ଼ତେ ପେର୍‌କେ, ଗାଲିଲୀତାଗାଙ୍କ୍ ଆରାମ୍ ମାଡ଼ି ସାରେ ଯିହୁଦା
ଦେଶ୍‌ତାଗ୍ ବେନ୍ ଗଟନା ଗଟେମ୍ ଆଡ଼ତେ, ଆଦ୍ ମିଡ଼୍ ପୁଡ଼ତିଡ଼୍ ।

୩୮ ମିଡ଼୍ ନାଜରିତ ଜିସୁନ୍ ବିଷୟତେ ନୁ ଇଶ୍ବର ବେଲା ଅଙ୍କ୍ ଏଣ୍ଡି
ଅନ୍ ପର୍‌ର ପବିତ୍ର ଆମ୍ବା ନୁ ଶକ୍ତି ହିଡ଼ତଣ୍ଡ, ଆଦ୍ ପୁଡ଼ତିଡ଼୍ । ଅଣ୍ଡ
ସାରେ ପାକ୍ ଆଞ୍ଜି ସାୟେଡ଼ ପାଡ଼୍‌ୟି ମାଡ଼ତଣ୍ଡ । ଶୟତାନ୍ ଅଦିନ୍‌ତେ
ମାନ୍ଦାନ୍ ନାରୁଡ଼କ୍ ସୁସ୍ଥ ମାଡ଼ତଣ୍ଡ, ବାତେଙ୍କ୍ ଇଡ଼କେ ଇଶ୍ବର ଅନ୍ ତଡ଼୍
ମାଡ଼ତଣ୍ଡ ।

୩୯ ଯିହୁଦା ଦେଶତାରୁ ନୁ ଯିରୁଶାଲେମ୍ ଦେଶତାରୁ ଅଣ୍ଟ ବେନ ସାରେ ପାଡ଼ିଯି ମାଡ଼ତଣ୍ଟ, ମାମ୍ମେ ଆଖି ସାରେଡ଼ ସାକ୍ଷି । ତାନପେକେ ଅଂକିଙ୍କ ଅଡ଼ କୁଶବିଦ୍ ମାଡ଼ି ହାଞ୍ଜକତଡ଼ ।

୪୦ ଇଡ଼କେ ଇଶ୍ବର ମୁଣ୍ଟ ଦିନା ଲୋପେ ଅଂକିଙ୍କ ଡଲ୍‌ଡାଗାଙ୍କ ମେଣ୍ଟନନ୍ଦାମ୍ ଜିଖେ ମାଡ଼ତଣ୍ଟ । ଅଣ୍ଟ ନାରୁଡ଼ ବକେଡ଼ ପ୍ରକାଶଆସ୍ ତଅନଡ଼ତଣ୍ଟ ।

୪୧ ଅଣ୍ଟ ସାରେଡ଼ଡ଼କିଂଙ୍କ ତନ୍ଦଣ୍ଟ, ଇଶ୍ବର ବେନଙ୍କ ସାକ୍ଷି ଲେକାମ୍ ହେଞ୍ଜତଣ୍ଟ ଅଡ଼କିଂଙ୍କ ତନ୍ଦତଣ୍ଟ । ଇଶ୍ବର ଅଂକିଙ୍କ ମେଣ୍ଟେଜିଖେ ମାଡ଼ତେ ପେରକେ ମାମ୍ମେ ଅନଡ଼ଡ଼ ଡିନ୍ଦାନଡ଼ନ୍ଦାନ ମାଡ଼ତମ୍ ।

୪୨ ନାରୁଡ଼ ଗାରରେ ସୁସମାଚାର ପ୍ରଚାର ମାଇଦିଙ୍କ ନୁ ଇଶ୍ବର ଯେ ଅଂକିଙ୍କ ଜିଖେ ମାନ୍ଦାନଡ଼କିଙ୍କ ନୁ ଡଲ୍‌ଡେ ନାରିଡ଼ ବିଚାର କର୍ତ୍ତାଲ୍ ଲେକାମ୍ ନିୟୁକ୍ତି ମାଡ଼ତଣ୍ଟ, ଇଦ୍ ଗର୍ତାଦ୍ ସାକ୍ଷ୍ୟ କେତାନ ସେଙ୍ଗେ ଅଣ୍ଟ ମାକିଂଙ୍କ ଆଜ୍ଞା ହିଡ଼ତଣ୍ଟ ।

୪୩ ସାରେ ବାବବାଦୀଡ଼ ଅନ୍ ବିଷୟତେ ପ୍ରଚାର ମାଡ଼ି ଇଦ୍ ଗର୍ କେସ୍ ମାଡ଼ତଡ଼, ଯେ ବେନ ଅଂକିଙ୍କ ବିଶ୍ବାସ୍ ମାଡ଼ିତନ୍, ଅନ୍ ପେଦେରଡ଼ତେ ଶକ୍ତିତଡ଼ ଅନାଦ୍ ପାପ୍ କ୍ଷମା ଆଦତେ ।”

ଅଶଇହୁଦୀଡ଼ ପବିତ୍ର ଆମ୍ବା ପାଏମ୍ ଆଡ଼ତଡ଼

୪୪ ପିତର ଶିକ୍ଷା ହିଦାନ୍ ଖେଲେ ବେନଡ଼ ଅନାଦ୍ ଶିକ୍ଷା କେଞ୍ଜ ମାଡ଼ତଡ଼, ଅଡ଼ ସାରେଡ଼ଡ଼ ପରର ପବିତ୍ର ଆମ୍ବା ହସ୍ତେ ।

୪୫ ଅଶଇହୁଦୀଡ଼ ପରର ଗାଲା ଇଶ୍ବର ଅନାଦ୍ ପବିତ୍ର ଆମ୍ବା ଇସ୍ ମାନ୍ଦାନାଦ୍ ଉଡ଼ି ପିତର ତଡ଼ ଖାସ୍ ମାନ୍ଦାନ ଯୋପପାତେ ସୁନ୍ନତଇହୁଦୀ ବିଶ୍ବାସୀଡ଼ କାବା ଆଡ଼ତଡ଼ ।

୪୬ ବାତେଙ୍କ ଇଡ଼କେ ଇହୁଦୀ ବିଶ୍ବାସୀଡ଼ ଅଡ଼କିଂଙ୍କ ଇଶ୍ବରତେ ପ୍ରସଂଶା ମାଡ଼ମାନ୍ଦାନାଦ୍ ନୁ ଖେରେ ଗର୍ତେ ତ୍ରିୟାନାଦ୍ କେଞ୍ଜତଡ଼ । ପିତର କେଡ଼ତଣ୍ଟ,

୪୭ “ମା ଲେକାମ୍ ଇଡ଼ ନାରୁଡ଼ ଗାଲା ପବିତ୍ର ଆମ୍ବା ପାଏମ୍ ଆଡ଼ତଡ଼ । ଏର୍ ଦୀକ୍ଷା ଆଦାନ ସେଙ୍ଗେ ବାଡ଼ ବେନ ବାଦା ଇଦେ ପାର୍ଦତଣ୍ଟ ?”

୪୮ ଆଦିଙ୍କୁ ଅଣ୍ଟା ଅଡ଼କିଂଙ୍କୁ ଜିସୁ କ୍ରିଷ୍ଟ ପେଦେରତେ ଏବଂ ଦୀକ୍ଷା ଆଦାନ ମାଇଦିଙ୍କୁ ଗର୍ କେଡ଼ତଣ୍ଟ । ତାନପେକେ ଅଡ଼ ଅଂକିଙ୍କୁ ମେଣ୍ଟେ ବେସକ୍ ଦିନା ଅଡ଼ ତଡ଼ ମାନ୍ଦାନଙ୍କୁ ଅନୁରଦ୍ ମାଡ଼ତଡ଼ ।

୧୧

ଯିରୁଶାଲେମ୍ ମଣ୍ଡଳିତାଗ୍ ପିତର୍ତେ ଗର୍

୧ ଅଣଇହୁଦୀଡ଼ ଗାଲା ଇଶ୍ବରତେ ଗର୍ ଗ୍ରହନ୍ ମାଡ଼ତଡ଼ ଇଞ୍ଜି ପ୍ରେରିତ ଶିଷ୍ୟଡ଼ ନୁ ଯିହୁଦା ଦେଶତଡ଼ ବାଗାଡ଼ ବିଶ୍ବାସୀଡ଼ ଦାଦାଲ କେଞ୍ଜିତଡ଼ ।

୨ ପିତର୍ ବେସୁର୍ ଯିରୁଶାଲେମ୍ତାଗ୍ ଆଡ଼ତଣ୍ଟ, ଅଣଇହୁଦୀଡ଼ ପାକେଙ୍କୁ ମାନ୍ଦାନ ସୁନ୍ନତ ନାରୁଡ଼ ଅଂକିଙ୍କୁ ହାଲସାନାଦ୍ ନୁ କେଡ଼ତଡ଼,

୩ “ନିମ୍ ଅସୁନ୍ନତ ଅଣଇହୁଦୀଡ଼ ଲୋନ୍ କୁର୍ମାମ୍ ଆଡ଼ତି, ମେଣ୍ଟେ ଅଡ଼ ତଡ଼ ତିଡ଼ତିଡ଼ ।”

୪ ବାତେଙ୍କୁ ଇଡ଼କେ ଆରାମ୍ତାଗାଙ୍କୁ ବାଡ଼ ବାଡ଼ ଗଟେମ୍ ଆଡ଼ତେ, ପିତର୍ ଅଡ଼କିଂଙ୍କୁ ଆଦିନାଦ୍ ସାରେ ଗର୍ କେଡ଼ତଣ୍ଟ ।

୫ “ନାନ ଯୋପା ନାର୍ତାଗ୍ ପ୍ରାର୍ଥନା ମାଡ଼ାନ ଖେଲେ ଅଣ୍ଟୟ୍ ଦର୍ଶନ୍ ଉଡ଼ତାନ । ଅଣ୍ଟୟ୍ ବେଡ଼ୟାଦ୍ ତୁପର୍ ନାଲୁ ମୁଲାନାଗ୍ ଉଞ୍ଜି ସ୍ବର୍ଗତାଗାଙ୍କୁ ମଦଲ୍ ଡିଗାନାଦ୍ ଉଡ଼ତାନ, ଆଦ୍ ନା ବକେଡ଼ ନିଡ଼ତେ ।

୬ ନାନ ସାୟେ ମାଡ଼ି ଲୋପେ ଉଡ଼ତାନ ଆଦିନ୍ ସ୍ବର୍ଗ ନାଲୁ ଡେକାନ ଲୋନ୍ ପଡ଼ପାନ୍ ପିଟ୍ଟେ ନୁ ଗୁପେଡ଼ ପଶ୍ଚ, ପୃତିବିତାଗ୍ ବେନ୍ ନେଲ୍ ମେନ୍ଦୁଲ୍ ମସ୍ସି ତାଆକାନାସ୍ତୁ ଜିଞ୍ଜାକ୍* ନୁ ଗୁପେଡ଼ ପିଟ୍ଟେ ମିୟେ ।

୭ ତାନପେକେ ନାନ ଇଦ୍ ଗର୍ କେଞ୍ଜିତାନ, ‘ପିତର୍ ! ତେଏଦେ, ହାଞ୍ଜିକି ତିନ୍ ।’

୮ ଇଡ଼କେ ନାନ ଉତ୍ତର୍ ହିଡ଼ତାନ, ‘ଇଲ୍ଲେ ପ୍ରବୁ ! ନାନ ପାର୍ଡ଼େନ୍ । ଇଞ୍ଜେକ୍ ଆନା ବାତେଏ କାରାପ୍ ବା ଅଶୁଚି କାଦି ତିନନେ ।’

୯ ସ୍ବର୍ଗତାଗାଙ୍କୁ ମେଣ୍ଟେ ଇଦ୍ ଗର୍ ଖାଡ଼ତେ, “ଇଶ୍ବର୍ ବେନଙ୍କୁ ଶୁଚି ମାଡ଼ତଣ୍ଟ, ନିମ୍ ଆଦିଙ୍କୁ ଅଶୁଚି ହେର୍କା ମାଡ଼ମା ।”

* ୧୧:୬ ବେନ୍ ଜନ୍ତୁ ମେନ୍ଦୁଲ୍ ମସ୍ସି ତାକିତା ତାଡ଼ାସକ୍, ତକେ, ମସଲ୍ ।

୧୦ ମୁଣ୍ଡଦାମ୍ ଇଦରକମ୍ ଆଡ଼ତେ, ମାଡ଼େଇଁତେ ଆସୁ
ସାରେତାଞ୍ଜିଙ୍କ ସ୍ୱର୍ଗତାଗ୍ ତେଇସ୍ ଆଡ଼ତଡ଼ ।

୧୧ ଟିକ୍ ଆସୁଟେ ସିସେରିଆ ତାଗାଙ୍କ ନାୟାକ୍ ରହତେନଡ଼ ମୁଞ୍ଚୁଡ଼,
ନାରୁଡ଼ ନାନ୍ ବେନ୍ ଲନ୍ ମାଡ଼ତାନ୍ ଆଗେ ଏଞ୍ଜୁଡ଼ତଡ଼ ।

୧୨ ବାଡ଼ମିକା ଆଲ୍ଲସାନାଦ୍ ଅଡ଼ ତଡ଼ ଆଦାନଙ୍କ ପବିତ୍ର ଆମ୍ବା
ନାକିଙ୍କ ଗର୍ ହିଡ଼ତଣ୍ । ଯୋପ୍ପାତାଗାଙ୍କ ଆରୁ ଜାନ୍ ବିଶ୍ୱାସୀ ନା
ତଡ଼ ସିସେରିଆତାଗ୍ ଆଡ଼ତଡ଼ ନୁ ମାମ୍ମେ ସାରେତମ୍ କଣ୍ଟୁଲିୟତେ
ଦାଦାଲ୍ ଲୋନ୍ ଏଞ୍ଜୁଡ଼ତମ୍ ।

୧୩ ତାମ୍ ଲୋନ୍ ବେଲା ସ୍ୱର୍ଗ ଦୂତ ଦର୍ଶନ୍ ପାଏମ୍ ଆଡ଼ତଣ୍,
ଆଦ୍ ବିଷୟ ମାକିଙ୍କ କେଡ଼ତଣ୍ । ସ୍ୱର୍ଗ ଦୂତ ଅଂକିଙ୍କ କେଡ଼ତଣ୍,
“ଯୋପାତାଗ୍ ମାନ୍ଦାନ୍ ଶିମୋନ୍ ପିତର୍ ପେଦେର୍ତଣ୍ ଖେରଣ୍
ନାରୁଙ୍କ ତାତାନଙ୍କ ନାରୁଡ଼କ୍ ରହମୁଟ୍ ।

୧୪ ଅଣ୍ଡ ଖାସ୍ ମିକିଙ୍କ ଶିକ୍ଷା ହିଡ଼ତଣ୍ ମେଣ୍ଡେ ମିଡ଼ ନୁ ମିଇ ପରିବାର୍
ପରିତ୍ରାଣ ପାଏମ୍ ଆଦତେ ।

୧୫ ମେଣ୍ଡେ ନାନ୍ ବେସୁଟ୍ ଶିକ୍ଷା ହିଦାନଙ୍କ ପସ୍ତୁରାନ୍, ମୁନ୍ନେନ୍
ପବିତ୍ର ଆମ୍ବା ମା ପରର୍ ବେଲା ଖାସ୍ ମାଡ଼ତେ, ଆଦେ ରକମ୍ ଅଡ଼
ପରର୍ ଖାଡ଼ତେ ।

୧୬ ☆ତାନପେକେ ନାନ୍ ପ୍ରବୁନାଦ୍ ଇଦ୍ ଶିକ୍ଷା ହେର୍କା ମାଡ଼ତାନ୍;
‘ଯୋହନ୍ ଏର୍ଦାଗ୍ ଦୀକ୍ଷା ହିଡ଼ତଣ୍, ଇଡ଼କେ ମିଡ଼ ପବିତ୍ର ଆମ୍ବାତଡ଼
ବାପ୍ତିସ୍ମ ଆଦତିଡ଼ ।’

୧୭ ଇଦ୍ ସ୍ପଷ୍ଟ ଯେ ମାମ୍ମେ ପ୍ରବୁ ଜିସୁ କ୍ରିଷ୍ଟନାଗ୍ ବିଶ୍ୱାସ୍ ମାଡ଼ାନ୍
ତଡ଼ ଇଶ୍ୱର୍ ମାକିଙ୍କ ବେନ୍ ଦାନ୍ ହିଡ଼ତଣ୍, ଅଣ୍ଡହୁଦୀଡ଼କ୍ ମିକା
ଆଦେ ଦାନ୍ ହିଡ଼ତଣ୍; ନାନ୍ ବେନ୍ ଯେ ଇଶ୍ୱର୍ତେ ଇଦ୍ ପାଡ଼ିୟିତିଙ୍କ
ବିରୋଦ୍ ମାଡ଼ିତାନ୍ !”

୧୮ ଅଡ଼ ଇଦ୍ କେଞ୍ଜିତେ ପେର୍କେ ମେଣ୍ଡେ ସମାଲୋଚନା
ମାଡ଼କର୍ ଇଶ୍ୱର୍ତିଙ୍କ ଗୌରବ୍ ମାଡ଼ି କେଡ଼ତଡ଼, “ଆଲୋକେ ଇଶ୍ୱର୍
ଅଣ୍ଡହୁଦୀଡ଼କ୍ ମିକା ଅନୁତାପ୍ ମାଡ଼ାନଙ୍କ ନୁ ଜିଞ୍ଜୁଣ୍ ବାଦକାନ୍
ସେଙ୍ଗେ ସୁଯୋଗ୍ ହିଡ଼ତଣ୍ ।”

ଆଣ୍ଟିୟୋକ୍ତେ ମଣ୍ଡୁଲି

୧୯ ✠ ସ୍ତ୍ରୀମାନଙ୍କେ ତଳତେ ପେରକେ ବେନ ତାଡ଼ନା ଆଡ଼ତେ, ଆଦିନ୍ ମାଇଦିଙ୍କ ବଞ୍ଚାସୀଡ଼ ସାରେଏକାମ୍ ତିନ୍ବିନ୍ ଆଦାନ୍ ଖେଲେ ଅଡ଼ଲୋପେଙ୍କ ବେସକ୍ତୁଡ଼ ମାତର୍ ଇହୁଦୀଡ଼ ଗାର୍ରେ ସମ୍ବାଦ ପ୍ରଚାର ମାଡ଼ତଡ଼ । ଅଡ଼ଲୋପେଙ୍କ ବେସକ୍ତୁଡ଼ ଫିନିସିଆ, ସାଇପ୍ରସ୍ ନୁ ଆନ୍ତିୟକିଆ ହେସ୍ତୁନା ଆଡ଼ତଡ଼ ।

୨୦ ଇଡ଼କେ ସାଇପ୍ରସ୍ ନୁ କୁରିନୀୟତେ ମେଣ୍ଡେ ବେସକ୍ତୁଡ଼, ବିଶ୍ୱାସୀଡ଼ ଆନ୍ତିୟକିଆ ତାଗ୍ ଆଞ୍ଜ ଅଣଇହୁଦୀଡ଼ ଗାର୍ରେ ପ୍ରବୁ ଜିସୁନ୍ ସୁସମାଚାର ଗ୍ରୀକ୍ ଗର୍ତ୍ତେ ପ୍ରଚାର ମାଡ଼ତଡ଼ ।

୨୧ ପ୍ରବୁନ୍ ଶକ୍ତି ଅଡ଼ତଡ଼ ମାଡ଼ତେ ନୁ ନାର୍ଗେ ନାରୁଡ଼ ବିଶ୍ୱାସ୍ ମାଡ଼ି ପ୍ରବୁନାକ୍ ମନ୍ ମାଲ୍ପତଡ଼ ।

୨୨ ବେସ୍ତର୍ ଇଦ୍ ସମ୍ବାଦ୍ ଯିରୁଶାଲେମ୍ ମଣ୍ଡଲିତାଗ୍ ହେସ୍ତୁଡ଼ତେ, ଅଡ଼ବର୍ଣ୍ଣବାଙ୍କ ଆନ୍ତିୟକିଆ ରହଡ଼ତଡ଼ ।

୨୩ ଅଣ୍ଡ ଆଗେ ହେସ୍ତୁସ୍ ଇଶ୍ୱର୍ ଆ ନାରୁଡ଼କିଂଙ୍କ ବେଲା ଅନୁଗ୍ରହ ମାଡ଼ତଣ୍ଡ ଆଦ୍ ଉଡ଼ି ଖେଡ଼କେ ଆଡ଼ତଣ୍ଡ ନୁ ସାରେତଡ଼ତେ ହୁଦୟତାଗ୍ ପ୍ରବୁନ୍ ସେଙ୍ଗେ ବିଶ୍ୱାସ୍ ମାଡ଼ି ଅନୁରଦ୍ ମାଡ଼ାନ୍ ମାଇଦିଙ୍କ ଅଡ଼କିଂଙ୍କ ସାରଦେ ମାଡ଼ତଣ୍ଡ ।

୨୪ ବର୍ଣ୍ଣବା ପବିତ୍ର ଆମ୍ବା ନୁ ବିଶ୍ୱାସ୍ତାଗ୍ ଖେରଣ୍ଡ ସାୟେକାମ୍ଦେ ନାରୁଣ୍ଡ ମାଡ଼ତଣ୍ଡ । ଅନାଦ୍ ପ୍ରଚାର୍ ତଡ଼ ନାର୍ଗେ ନାରୁଡ଼ ପ୍ରବୁନ୍ ଗାର୍ରେ ଖାଡ଼ତଡ଼ ।

୨୫ ତାନ୍ପେର୍କେ ବର୍ଣ୍ଣବା ଶାଉଲ୍ଡିଙ୍କ ମେହେକାନଙ୍କ ତାଷ୍ ସତାଗ୍ ଆଡ଼ତଣ୍ଡ ।

୨୬ ଆଗେ ଅଣ୍ଡ ଅଂକିଙ୍କ ଦରସକି ଆନ୍ତିୟକିଆତାଗ୍ ତାଡ଼ତଣ୍ଡ । ମେଣ୍ଡେ ସାରେ ଅଣ୍ଡୟ ହେଣ୍ଡକ୍ ଯାକ ଇଡ଼ ଇରୁସ୍ତୁଡ଼ ଗାର୍ରେଡ଼ ମଣ୍ଡଲିତାଗ୍ ବିଶ୍ୱାସୀ ଶିଷ୍ୟଡ଼ ତଡ଼ କାଇଲି ନାର୍ଗେ ନାରୁଡ଼କିଂଙ୍କ ଶିକ୍ଷା ହିଡ଼ତଡ଼ । ଆଣ୍ଡିୟୋକ୍ତେ ବିଶ୍ୱାସୀଡ଼କ୍ ନାରୁଡ଼ ମୁନ୍ନେନ୍ କ୍ରିଷ୍ଟିୟାନ୍ ଇଞ୍ଜ କେଡ଼ତଡ଼ ।

୨୭ ଆସୁଟେ ବେସକ୍ତୁଡ଼ ବାବବାଦୀଡ଼ ଯିରୁଶାଲେମ୍ କନ୍ସ ଆନ୍ତିୟକିଆ ଖାଡ଼ତଡ଼ ।

୨୮ ☆ ଅଡ଼, ଲୋପେଙ୍କ ଆଗାବ ପେଦେରତଣ୍ଡ ଖେରଣ୍ଡ ନାରୁଡ଼, ଆମ୍ବାନ୍ ଶକ୍ତିତଡ଼, ଜଗଡ଼ ଏକାମ୍ ଅଣ୍ଡୟ ବେଡ଼ୟାଦ ଦୁଇକ୍ଷ ଆଦତେ ଇଞ୍ଜ ବବିଷ୍ୟ ଗର୍ କେଡ଼ତଣ୍ଡ । ସମ୍ରାଟ୍ କୁଡ଼ିୟସ୍ତେ ଖେଲେ ଇଦ୍ ଆସ୍ମାଡ଼ତେ ।

୨୯ ଶିଷ୍ୟତ୍, ଯିହୁଦାତାଗ୍ ବାସେ ମାଡ଼ମାନ୍ଦାନ୍ ବିଶ୍ୱାସିତ୍, ଦାଦାଲଡ଼, ଗାରରେ ଅଡ଼, ପାରଦାନ୍ ପାଡ଼ୟ ଇସ ସାହାଯ୍ୟ ରହତିତଡ଼, ଇଞ୍ଜ ଟିକ୍ ମାଡ଼ତଡ଼ ।

୩୦ ଅଡ଼, ତାବକ୍ ଗୁଡ଼ପି ମିକା ବର୍ଣ୍ଣବା ନୁ ଶାଉଲ୍‌ତେ କାୟଦେ ମଣ୍ଡଲିତେ ବୟସ୍କା ନାରୁଡ଼, ଗାରରେ ଆସ୍ମ ରହଡ଼ତଡ଼ ।

୧୨

ଗାଟି ତାଡ଼ନା

୧ ଇଦ୍ ସମୟତେ ରାଜାଲ୍ ହେରଦ୍ ମଣ୍ଡଲିତେ ବେସ୍‌କଡ଼ତଡ଼, ସବ୍ୟଡ଼କ୍ ଅତ୍ୟାଚାର ମାଡ଼ତଣ୍ଡ ।

୨ ଅଣ୍ଡ ବିଶ୍ୱାସୀ ଯୋହନତେ ତାମୁଣ୍ଡ ଜାକୁବଙ୍କ ରୁରତଡ଼, ନାରୁଡ଼କିଂଙ୍କ କେସ୍ ଆସ୍ମକତଣ୍ଡ ।

୩ ଇହୁଦୀ ନାରୁଡ଼ ଇଦ୍ ଉଡ଼ି କୁସି ଆଡ଼ତଡ଼, ମେଣ୍ଡେ ଅଣ୍ଡ ପିତରତିଙ୍କ ମିକା ବନ୍ଦି ମାଡ଼ତଣ୍ଡ । ଇଦ୍ ଗଟନା ସୋଡ଼ା ଖାଟ୍‌ଖାଦ୍ ରୋଟି ପାଣ୍ଡୁମ୍ ସମୟତେ ଆସ୍ମାଡ଼ତେ ।

୪ ପିତର ବନ୍ଦି ଆସ୍ମ ଜଇଲ୍‌ତାଗ୍ ଆଡ଼ତଣ୍ଡ ନୁ ନାଲ୍ ଜାନତିଙ୍କ ଆସ୍ମ ତିଆର୍ ଆଡ଼ତେ ନାଲ୍ ମାନ୍ଦେ ସୈନିକ୍ ଅଂକିଙ୍କ କେପିମାଡ଼ତଡ଼ । ନିସ୍ତାର ପାଣ୍ଡୁମ୍‌ତେ ପେରକେ ସାରେତଡ଼, ମୁନ୍‌ନେ ଅନାଦ୍ ବିଚାର ମାଡ଼ାନଙ୍କ ହେରଦନ୍ ଇଚ୍ଛା ମାଡ଼ତେ ।

୫ ପିତର ଜଇଲ୍‌ତାଗ୍ ମାନ୍ଦାନ୍ ଖେଲେ ମଣ୍ଡଲିଡ଼ ନାରୁଡ଼, ଅଣ୍ଡୟ ମନ୍‌ତେ ଅନ୍ ସେଙ୍ଗେ ଇଶ୍ୱରତିଙ୍କ ପ୍ରାର୍ଥନା ମାଡ଼ମାଡ଼ତଡ଼ ।

ଜଇଲ୍‌ତାଗାଙ୍କ ପିତର ମୁକ୍ତି ଆଡ଼ତଣ୍ଡ

୬ ହେରଦ୍ ବେନ୍ ଦିନ୍ ପିତରତିଙ୍କ ବିଚାର ମାଡ଼ାନଙ୍କ ବାୟିଦେ ତାତାନଙ୍କ ହାଲ୍‌ସି ମାଡ଼ତଣ୍ଡ, ତାନ୍ ମୁନେଡ଼ ନାରକେଡ଼ ପିତର ରେଣ୍ଡ

ଇକଲେମ୍‌ତେ ତଅସ୍‌ ଇରଞ୍ଜୁଡ଼୍‌ ସୈନିକିନ୍‌ ନାଡ଼ମେ ପାଟିମାଡ଼ତଣ୍ଡ ।
ନାରଗେ କେପାନଡ଼୍‌ ମାରତାଗ୍‌ ମାଞ୍ଜି ଜଇଲ୍‌ତିଙ୍କ୍‌ କେପି ମାଡ଼ତଡ଼୍‌ ।

୭ ହଟାଡ଼ ପ୍ରବୁନାଦ୍‌ ଖେରଣ୍ଡ ଦୂଡ଼୍‌ ଖାସ୍‌ ନିଡ଼ତଣ୍ଡ ନୁ ଆଦ୍‌ ବାକ୍‌ଡେ
ଖେସ୍‌ ଆଡ଼ତେ । ଦୂଡ଼୍‌ ପିତରତିଙ୍କ୍‌ ହାଟ୍‌ଜାବତିଙ୍କ୍‌ ଉହ୍‌ସ୍‌ ତେଏସ୍‌
କେଡ଼ତଣ୍ଡ, “ସିଟ୍‌ପାଟ୍‌ ତେଏଦେ !” ସାଙ୍ଗେ ସାଙ୍ଗେ ପିତରତିଙ୍କ୍‌
ତଅସ୍‌ମାଡ଼ତେ ଇକଲେମ୍‌ କୁସି ରାୟତେ ।

୮ ତାନପେକେ ଦୂଡ଼୍‌ କେଡ଼ତଣ୍ଡ, “ଟିକିଡ଼୍‌ ତୁଝାଲ୍‌ ଉଡ଼ତେ, ପିତା
ହେରପୁକ୍‌ କେରମ୍‌ ।” ପିତର ଆଲା ମାଡ଼ତଣ୍ଡ ପେରକେ ଦୂଡ଼୍‌
କେଡ଼ତଣ୍ଡ, “ମେନ୍‌ଲୁତାଗ୍‌ ତୁପଟ୍‌ ମୁସି ନା ତଡ଼୍‌ ଖାଡ଼େ ।”

୯ ଦୂଡ଼୍‌ ବାଡ଼ମାଡ଼ମାଡ଼ତଣ୍ଡ ଆଦ୍‌ ନିଜାତାଦ୍‌ କି ଆୟ୍‌ୟ, ପିତର
ପୁନ୍‌ନାଙ୍କ୍‌ ପାରଖଣ୍ଡ । ଅଣ୍ଡ ସାପ୍‌ ଉଡ଼ତଣ୍ଡ ଇଞ୍ଜି ହାଲ୍‌ସତଣ୍ଡ । ମିକା
ପିତର ଜେଲ୍‌ତାଗାଙ୍କ୍‌ ପେଇସ୍‌ ଦୂତନ୍‌ ପେକେପେକେ ଆଡ଼ତଣ୍ଡ ।

୧୦ ଅଡ଼୍‌ କେପାନଡ଼ାଦ୍‌ ରେଣ୍ଡ ପଡ଼ିୟେ ପାର୍‌ ଆଡ଼ତେ ପେରକେ
ନାରତାଗ୍‌ ହସାନାଗ୍‌ ମାନ୍‌ନ୍‌ ଲୁହା ମାର୍‌ ବକେଡ଼ ଆଡ଼ତଡ଼୍‌ । ଅଡ଼୍‌
ସେଙ୍ଗେ ମାର୍‌ ତାନ ମାନ୍‌ତେ କୁଲେମ୍‌ ଆଡ଼ତେ ନୁ ଅଡ଼୍‌ ପେଇସ୍‌
ଆଡ଼ତଡ଼୍‌ । ଅଡ଼୍‌ ହାରଦାଗ୍‌ ଆଦାନ୍‌ ଖେଲେ ହଟାଡ଼ ସ୍‌ର୍ଗ ଦୂତ ଅଂକିଙ୍କ୍‌
ଝିଡ଼ସି ଆଡ଼ତଣ୍ଡ ।

୧୧ ତାନପେକେ ବାଡ଼ ଗଟେମ୍‌ ଆଡ଼ତେ, ପିତର ଆଦ୍‌ ପୁଞ୍ଜି
କେଡ଼ତଣ୍ଡ, “ଇଦ୍‌ ନିଜାମ୍‌ ଇଞ୍ଜି ନାନ୍‌ ପୁନ୍‌ତାନ୍‌ । ହେରଦତାଗାଙ୍କ୍‌ ନୁ
ଇହ୍‌ଦୀଡ଼ାଗାଙ୍କ୍‌ ବାଡ଼ ଗଟେମ୍‌ ଆଦ୍‌ତେ ଇଞ୍ଜି ଆଗେ ମାଡ଼ିମାଡ଼ତଡ଼୍‌,
ଆଗାଙ୍କ୍‌ ନାକିଂଙ୍କ୍‌ ଉଦ୍‌ବାର୍‌ ମାଡ଼ାନଙ୍କ୍‌ ପ୍ରବୁ ସ୍‌ର୍ଗ ଦୂତତିଙ୍କ୍‌ ରହଡ଼ତଣ୍ଡ ।”

୧୨ ନିଜେଡ଼ ପରିସ୍ଥିତି ବିଷୟତେ ହେକେମାଡ଼ି ଅଣ୍ଡ ଯୋହନ୍‌ ନୁ
ମାର୍କିନ୍‌ ଯାୟ୍‌ ମରାୟ୍‌ମ୍‌ତେ ଲନ୍‌ ଆଡ଼ତଣ୍ଡ । ଆଗେ ନାରଗେ ନାରୁଡ଼୍‌
ଅଣ୍ଡୟାଗେ ଗୁଡ଼ି ପ୍ରାର୍ଥନା ମାଡ଼ମାଡ଼ତଡ଼୍‌ ।

୧୩ ପିତର ବାୟିଦେ ମାରତାଗ୍‌ ତାଲ୍‌ସ୍‌ତଣ୍ଡ, ରୋଦା ପେଦେରତେ
ଅଣ୍ଡୟା କ୍ରୀତଦାସୀ କାପାଟ୍‌ ତେରତାନଙ୍କ୍‌ ଖାଡ଼ତେ ।

୧୪ ପିତରତେ ଲେଙ୍ଗ୍‌ ପୁଞ୍ଜି ମିକା ଆଦ୍‌ ଇସର୍‌ ଖେଡ଼କେତେ
ଆଡ଼ତେ ଯେ ମାର୍‌ ତେରଞ୍ଜକଟ୍‌ ପିତର ବାୟିଦେ ନିସ୍‌ ମିନ୍‌ୟେ ଇଞ୍ଜି
କେଡ଼ତେ ।

୧୫ ଅର୍ଥ ଆଦିଙ୍କ କେତେତ, “ନିମ୍ ବାୟେ ଆଡ଼ି ।” ଇଡ଼କେ “ଇଦ୍ ନିଜାମ୍,” ଇଞ୍ଜି ଆଦ୍ କେତେତାଙ୍କ, ଅର୍ଥ ହାଲ୍‌ସ୍‌ତଡ଼, “ଆଲେକେ ଇଦ୍ ଅନାଦ୍ ଦୂତ ।”

୧୬ ପିତର୍ ସେନେମାନ୍ କାପାଟିଙ୍କ ତାଲ୍‌ସ୍‌ମାଡ଼ତଣ୍ଡ । ପେରକେ ଅର୍ଥ କାପାଟ୍ ତେରସ୍ ଅଂକିଙ୍କ ଉଡ଼ି ଦାଦ୍‌ରେଲ୍‌ତଡ଼ ।

୧୭ ଅଣ୍ଡ କାୟ୍ ଉହ୍‌ସ୍ କଟମାନ୍‌ନାଙ୍କ କେତେତଣ୍ଡ ନୁ ପ୍ରବୁ ବେଲା ଅଂକିଙ୍କ ଜଇଲ୍‌ତାଗାଙ୍କ ପେସ୍‌ପି ତାଡ଼ତଣ୍ଡ, ଆଦ୍ ବିଷୟ ଅର୍ଥ ମୁନେନେ କେତେତଣ୍ଡ । ତାନ୍‌ପେକେ ଇଞ୍ଜିଆରେ ଗଟି “ଯାକୁବ୍ ନୁ ବାଗାଡ଼ ସାରେତଡ଼ ବିଶ୍ୱାସୀ ଦାଦାଲ୍‌ଡ଼ କେତାନଙ୍କ ଗର୍ ଇସ୍,” ଅଣ୍ଡ ଆଗାଙ୍କ ମେଣ୍ଡେଅଣ୍ଡ ଆଡ଼ତଣ୍ଡ ।

୧୮ ନାରକା ଆଡ଼ତେ ଝେଲେ ପିତର୍ ବେକେ ଆଡ଼ତଣ୍ଡ ଇଞ୍ଜି କେପାନଡ଼ ଗାବ୍‌ରା ଆଡ଼ତଡ଼ ।

୧୯ ହେରଦ୍ ଅଂକିଙ୍କ ମେହେକାନଙ୍କ ଗର୍ ହିଡ଼ତଣ୍ଡ, ବାତେଙ୍କିଡ଼କେ ଅର୍ଥ ଅଂକିଙ୍କ ଦରସ୍‌ସାଙ୍କ ପାର୍‌ଝଡ଼ । ପେରକେ କେପାନଡ଼ିଙ୍କ ପାତ୍ରାମାଡ଼ି ଅଡ଼ିଙ୍କିଙ୍କ ତଲାନ୍‌ଦଣ୍ଡ ହିଦାନ୍ ସେଙ୍ଗେ ଗର୍ ହିଡ଼ତଣ୍ଡ । ତାନ୍‌ପେକେ ହେରଦ୍ ଯିହୁଦା ପ୍ରଦେଶ୍‌ତାଗାଙ୍କ ଆଞ୍ଜି କାଈସରିଆତାଗ୍ ମାଡ଼ତଣ୍ଡ ।

ହେରଦ୍ ତଲ୍‌ତଣ୍ଡ

୨୦ ଆସୁଟେ ହେରଦ୍ ସୋର ନୁ ସିଦନ୍‌ତେ ନାରୁଡ଼୍‌ତେ ପରର କପାମ୍ ଆସ୍ ମାଡ଼ତଣ୍ଡ । ଆଦିଙ୍କ ଅର୍ଥ ଲୋପେଙ୍କ ଝେରଡ଼ ମାୟେ ଅଂକିଙ୍କ ଉଡ଼ାନଙ୍କ ଆଡ଼ତଡ଼ । ମୁନେନ୍ ଅର୍ଥ ରାଜପ୍ରାସାଦ୍ ଦାୟିତ୍ୱତେ ମାୟାନ୍ ଶ୍ଳାଷ୍ଟସ୍‌ତିଙ୍କ ବୁଜାମାଡ଼ି ଅନାଗାଙ୍କ ସାହାୟ ପାଏମ୍‌ଆଡ଼ତଡ଼ । ତାନ୍‌ପେକେ ଅର୍ଥ ହେରଦ୍‌ତେ ବକେଡ଼ ଆଞ୍ଜି ଶାନ୍ତି ତାଲ୍‌କତଡ଼, ବାତେଙ୍କିଡ଼କେ ହେରଦ୍‌ତେ ରାଜ୍ୟତାଗାଙ୍କ ଅର୍ଥ ଦେଶ୍ କାଦି ଆଞ୍ଜିମାଡ଼ତେ ।

୨୧ ଟିକ୍‌ମାଡ଼ତେ ଦିନେ ହେରଦ୍ ରାଜାଲ୍‌ଡ଼ ଚକାସିଲେ କେରତଣ୍ଡ ନୁ ବିଚାର୍ ଲୋଡ଼ତାଗ୍ କୁଦି ନାରୁଡ଼ିଙ୍କିଙ୍କ ଝେରଡ଼ ବାଷଣ ହିଡ଼ତଣ୍ଡ ।

୨୨ ଅର୍ଥ କିଡ଼କି କେତେତଡ଼, “ଇଦ୍ ବେନ୍ ନାରୁନାଦ୍ ଆୟ୍‌ୟ, ମାତ୍ରମ୍ ଝେରଣ୍ଡ ଇଶ୍‌ବରତେ ଲେଙ୍ଗ୍ !”

୨୩ ଆସୁଟେ ସାଙ୍ଗେ ସାଙ୍ଗେ ପ୍ରବୁନାଦ ଦୂତ ହେରୋଦତିଙ୍କ ରେହେଡ଼ତଣ୍ଡ, ବାତେଙ୍କଇଡ଼କେ ଇଶ୍ବରତିଙ୍କ ବେନ ଗୌରବ ହିଦାନମାଡ଼ତେ ଅଣ୍ଡ ଆଦ ଇଞ୍ଜେମାଡ଼ତଣ୍ଡ । ପୁଡ଼ି ଡଲ୍‌ତେ ପୁରୁଙ୍କ ଅଣ୍ଡ ଡଲ୍‌ତଣ୍ଡ ।

୨୪ ଇଦ୍ ସମୟତେ ଇଶ୍ବରତେ ବାକ୍ୟ ନାଗେ ଆସ୍ ଗାଟି ପ୍ରଚାର ଆଡ଼ତେ ।

୨୫ ବର୍ଣ୍ଣବା ନୁ ଶାଉଲ୍ ଯିରୁଶାଲେମ୍‌ତାଗ୍ ସେବା ପାଡ଼ି ଶେଷମାଡ଼ି ଯୋହନ୍ ଇଡ଼କେ ଓରଫ ମାର୍କଙ୍କ ସାଙ୍ଗେ ଆସ୍ ଯିରୁଶାଲମ୍‌ତାଗାଙ୍କ ମାଲ୍‌ଡ଼ତଣ୍ଡ ।

୧୩

ବର୍ଣ୍ଣବା ନୁ ଶାଉଲ୍ ପ୍ରେରିତ ଶିଷ୍ୟ ଆଡ଼ତଣ୍ଡ

୧ ଆନ୍ତିୟକିଆ ମଣ୍ଡଳିତାଗ୍ ବେସ୍‌କଡ଼ୁଡ଼ ବାବବାଦୀ ନୁ ଶିକ୍ଷାଗୁରୁଡ଼ ମାଡ଼ତଣ୍ଡ । ଅଡ଼ ଲୋପେଙ୍କ ବର୍ଣ୍ଣବା, ଶିମୋନ୍ ବେନଙ୍କ ଗୁଡ଼ି ନାରୁଣ୍ଡ ଇଞ୍ଜ କେତିତଡ଼, ଲୁସିଆତେ କୁରିନୀୟ ନାରଦେନଣ୍ଡ, ମନହେମ୍ ଶାଉଲ୍ ରାଜ୍ୟପାଳ ହେରଦତେ ପରିବାରତାଗ୍ ପେରସ୍‌ତଣ୍ଡ ।

୨ ଅଡ଼ ପ୍ରବୁନାଦ ସେବା ନୁ ଉପାସନା ମାଡ଼ନ୍ ଝେଲେ, ପବିତ୍ର ଆମ୍ବା ଅଡ଼କିଂଙ୍କ କେଡ଼ତଣ୍ଡ, “ନାନ୍ ବେନ ପାଡ଼ି ସେଙ୍ଗେ ବର୍ଣ୍ଣବା ନୁ ଶାଉଲ୍‌ତିଙ୍କ କାରଙ୍ଗ୍‌ତାନ୍, ଆଦିନ୍ ମାଲ୍‌ଦିଙ୍କ ଅଡ଼କିଂଙ୍କ ନା ସେଙ୍ଗେ ଝେରେ ମାଡ଼ାଟ୍ ।”

୩ ଆଗାଙ୍କ ଅଡ଼ ଉପାସନା ନୁ ପ୍ରାର୍ଥନା ମାଡ଼ି ଅଡ଼ ଇରଞ୍ଜୁଡ଼କିଙ୍କ ପର କାୟ୍ ଝାଟି ଅଡ଼କିଂଙ୍କ ପ୍ରଚାର ମାଡ଼ାନଙ୍କ ରହଡ଼ତଣ୍ଡ ।

ସାଇପ୍ରସ୍‌ତାଗ୍ ସେବା ପାଡ଼ି

୪ ଇଦ୍ ରକମ୍ ପବିତ୍ର ଆମ୍ବା ତଡ଼ ପ୍ରେରିତ ଆସ୍ ବର୍ଣ୍ଣବା ନୁ ଶାଉଲ୍ ସେଲ୍ୟୁକିଆତାଗ୍ ଆଡ଼ତଣ୍ଡ ନୁ ଆଗାକନ୍‌ସ୍ ସାଇପ୍ରସ୍ ଏରଜାହାଜ୍ ତଡ଼ କୁପ୍ର ଗପ୍‌ତାଗ୍ ଆଡ଼ତଣ୍ଡ ।

୫ ଅଡ଼ ସାଲାମି ସହରତାଗ୍ ହେଉସ୍ ଇହୁଦୀ ଉପାସନା ଲକିନାଗ୍ ଇଶ୍ବରତେ ଗଟ୍ ପ୍ରଚାର ମାଡ଼ତଣ୍ଡ । ଦାସ ଯୋହନ୍ ମାର୍କ ଅଡ଼ ତଡ଼ ମାଞ୍ଜି ସାହାଯ୍ୟ ମାଡ଼ତଣ୍ଡ ।

୭ ଅତଃ ସାଇପ୍ରସ୍ ଗପ୍ ଖେଇସ୍ ପାଫୋସ୍ତାଗ୍ ଆଦତଡ଼ । ଆଗେ ଅତଃ ବାର ଜିସୁ ପେଦେରତଣ୍ ଖେରଣ୍ ଇହୁଦୀ ଖାତେଙ୍କ୍ କାଇଲ୍ତଡ଼ । ଅଣ୍ ନିଜେତିଙ୍କ୍ ବାବବାଦୀ ଇଞ୍ଜି କେସମାଡ଼ତନ୍ ।

୮ ଅଣ୍ ଆଦ୍ ଗପ୍ତେ ଶାସନ୍ କର୍ତ୍ତାଲ୍ ସର୍ଗ୍ ଯସ୍ ପାଉଲ୍ସନ୍ତେ ସାଙ୍ଗ୍ ମାଡ଼ତଣ୍ । ସର୍ଗ୍ ଯସ୍ ଖେରଣ୍ ବୁଢ଼ିମାନ୍ ନାରୁଡ଼୍ ମାଡ଼ତଣ୍ । ଅଣ୍ ଇଶ୍ବରତେ ଗର୍ କେଞ୍ଜାନଙ୍କ୍ ବର୍ଣ୍ଣବା ନୁ ଶାଉଲ୍ତିଙ୍କ୍ କାର୍ଜାଡ଼ତଣ୍ ।

୯ ଇଡ଼କେ ଖାତେ ଏଲୀମାସ୍ ଇଦ୍ ଅନ୍ଝାଦ୍ ଗ୍ରୀକ୍ ପେଦେର୍ ଅଡ଼କିଙ୍କ୍ ବାଦା ଇଡ଼ତେ, ବାତେଙ୍କ୍ ଇଡ଼କେ ଅଣ୍ ଶାସନ୍ କର୍ତ୍ତାଙ୍କ୍ କ୍ରିଷ୍ଟନାଗ୍ ବିଶ୍ବାସ୍ ମାଡ଼ାନଙ୍କ୍ ହାଲ୍ସଖେ ମାଡ଼ତଣ୍ ।

୧୦ ଇଡ଼କେ ଶାଉଲ୍ ବେନନ୍ ମେଣ୍ଟେଅନ୍ ପେଦେର୍ ପାଉଲ୍ ପବିତ୍ର ଆମ୍ବାତେ ବର୍ତ୍ ଆସ୍ ଖାଡ଼େନାକ୍ କପାମ୍ତେ ଉଡ଼ତଣ୍ ନୁ କେଡ଼ତଣ୍,

୧୦ “ହୋ ଶୟତାନତେ ମାର୍ ! ନିମ୍ ସାରେ ସାୟେଡ଼ ବିଷୟତାଦ୍ ଶତୁଡ଼୍ । ନିମ୍ ସାରେ ଲେକାଡ଼ କାରାପ୍ ବିଦ୍ୟା ପୁଡ଼ି ନୁ ସାରେଦାମ୍ ପ୍ରବୁନ୍ ସଡ଼ତିଙ୍କ୍ ମିର୍ ଇଞ୍ଜି ପ୍ରମାଣ୍ ମାଡ଼ାନଙ୍କ୍ ହାଲ୍ସୁତିନ୍ ।

୧୧ ଇଞ୍ଜି ନିମ୍ ପ୍ରବୁନ୍ କାୟଦେ ଦଣ୍ଡିଡ଼ ଆଦତିନ୍ । ନିମ୍ କାନାଲ୍ ଆସ୍ ସୁଦୁର୍ ସମୟ୍ ଏଞ୍ଜୁନା ଦିନାମ୍ତେ ଖେସ୍ ଉଡ଼ାନଙ୍କ୍ ପାର୍ଡ଼ିନ୍ ।” ଆସୁଟେ ସାଙ୍ଗେ ସାଙ୍ଗେ ଏଲୀମାସ୍ତେ କଣ୍ଡା ଗାଟି ଗୁମାମ୍ତେ ମିଶାନ୍ ଲେକାମ୍ ଏକା ମାଡ଼ତଣ୍ ନୁ ଅଣ୍ ତାନ୍ କାୟ ପୟସ୍ ହାର୍ ତଅତାନ୍ ମାଇଦିଙ୍କ୍ ଅରତୁଙ୍କ୍ ମେହେକ୍ତଣ୍ ।

୧୨ ଇଦ୍ ଗର୍ନା ଉଡ଼ି ଶାସନ୍ କର୍ତ୍ତାଲ୍ ବିଶ୍ବାସ୍ ମାଡ଼ତଣ୍, ବାତେଙ୍କ୍ ଇଡ଼କେ ଅଣ୍ ପ୍ରବୁନାଦ୍ ଶିକ୍ଷା କେଞ୍ଜି କାବା ଆସ୍ମାଡ଼ତଣ୍ ।

ପିସିଦିଆତେ ଅନ୍ଥୁୟୋକ୍ତାଗ୍ ସେବାପାଡ଼ନ୍ତି

୧୩ ପାଉଲ୍ ନୁ ତାମ୍ ତଡ଼ଦେନଡ଼୍ ପାଫୋସ୍ ପେଦେର୍ତେ ଜାଗେତାଗାଙ୍କ୍ ଏରଦାଗ୍ ଆଞ୍ଜି ପଂପୁଲିୟାତେ ପର୍ଗା ପେଦେର୍ତେ ଅଣ୍ଟୟ ନାରତାଗ୍ ହେଞ୍ଜୁଡ଼ତଡ଼୍ । ଯୋହନ୍ ମାର୍କ୍ ଅଡ଼କିଙ୍କ୍ ଇଗେ ଓଡ଼ସି ଯିରୁଶାଲେମ୍ ମାଲ୍ସ୍ ଆଡ଼ତଣ୍ ।

୧୪ ଅଡ଼ ପର୍ଗାତାଗାଙ୍କ ଆଞ୍ଜ ପିସିଦିଆଡେ ଅନ୍ଥୟୋକ୍ତାଗ ହେଞ୍ଜୁତତଡ଼ନ୍ନୁ ବିଶ୍ରାମଦିନେ ଦିନ୍ ଉପାସନା ଲଡ଼ତାଗ ଆଞ୍ଜ କୁଦତଡ଼ ।

୧୫ ମୋଶାନ୍ ନିୟମ୍ ନୁ ବାବବାଦୀଡ଼ାଦ୍ ଲେକ୍ତାଦ୍ କାରତେ ପେରକେ, ଉପାସନା ଲୋଡ଼ତେ କର୍ତ୍ତାଲଡ଼ ଅଡ଼କିଂଙ୍କ ଇଦ୍ ଗର୍ କେସ୍ ରହତତଡ଼, “ଦାଦାଲଡ଼, ଯଦି ନାରୁଡ଼କିଂଙ୍କ ସାରଦେ ମାଡ଼ତେ ଲେକାମ୍ ମିୟାଦ୍ ବାଡ଼ ଗର୍ ମିୟେ, ଆଲେକେ କେଲାର୍ ।”

୧୬ ପାଉଲ୍ ନିସ୍ ନାରୁଡ଼କିଂଙ୍କ କଟମାନ୍ଦାନଙ୍କ କାୟ୍ ଉହୁସ୍ କେଡ଼ତଣ୍ଡ, “ଇଗେ ମାନ୍ଦାନଡ଼ ଇସ୍ରାଏଲୀୟ ଦାଦାଲଡ଼ି ନୁ ଇଶ୍ବରତିଙ୍କ ପ୍ରାର୍ଥନା ମାଡ଼ମାନ୍ଦାନ୍ ଅଣଇହୁଦୀଡ଼, ନା ଗର୍ କେଞ୍ଜାର୍ !

୧୭ ଇସ୍ରାଏଲ୍ ଜାତିଡ଼ ଇଶ୍ବର ମାନ୍ ଆନିଦାଦିଡ଼କ୍ ଏଞ୍ଜିତଣ୍ଡ ନୁ ମିସର୍ତାଗ୍ ଅଡ଼ ବେନ୍ ଦେଶ୍ ଲେକାମ୍ ବାସେମାଡ଼ାନ୍ ଝେଲେ ଅଣ୍ଡୟ୍ ବେଡ଼ୟାଦ୍ ଜାତି ମାଡ଼ତଣ୍ଡ । ଇଶ୍ବର ତାନ୍ ଶକ୍ତିତଡ଼ ଅଡ଼କିଂଙ୍କ ମିସର୍ତାଗାଙ୍କ ପେସ୍ପିଇ ତାଡ଼ତଣ୍ଡ,

୧୮ ତାଲିଶ୍ ହେଣ୍ଡକ୍ ଯାକ ଉଚ୍ଚକନେଲ୍ତାଗ୍ ଅଡ଼ାଦ୍ ଅତ୍ୟାଚାର୍ ସାରେ ସହ୍ୟ ମାଡ଼ତଣ୍ଡ ।

୧୯ ଅଣ୍ଡ କିନାନ୍ତାଗ୍ ସାଡ଼ଟାନ୍ ଗଣ୍ଡିତିଙ୍କ ଦସଂ ମାଡ଼ି ତାନ୍ ହେଞ୍ଜୁତେ ଗଣ୍ଡିତିଙ୍କ ଆଦ୍ ଦେଶ୍ ହିଡ଼ତଣ୍ଡ ।

୨୦ ସାରେ ନାଲୁଝାନ୍ଦା ପାଟାଗ୍ ହେଣ୍ଡକ୍ ଲୋପେ ଇଞ୍ଜୁସାରେ ଗଟନା ଗଟେମ୍ ଆଡ଼ତେ । ଇଦିନ୍ ପେରକେ ଶାମୁୟେଲ୍ ବାବବାଦୀନ୍ ଦିନାମ୍ ଏଞ୍ଜୁନା ଇଶ୍ବର ଅଡ଼ ପରର ବିଚାର୍ କର୍ତ୍ତାଲଡ଼କ୍ ହେଞ୍ଜୁତଣ୍ଡ ।

୨୧ ବେସୁର୍ ଅଡ଼ ଝେରଣ୍ଡ ରାଜାଙ୍କ ମେହେକ୍ତଡ଼, ଇଶ୍ବର ଅଡ଼ ପରର ତାଲିଶ୍ ହେଣ୍ଡକ୍ ଯାକ ଶାସନ୍ ମାଡ଼ାନଙ୍କ ବେଞ୍ଜାମିନ୍ ବଂଶତଣ୍ଡ କୀଶତେ ମାର୍ ଶାଉଲ୍ତିଙ୍କ ନିୟୁକ୍ତି ମାଡ଼ତଣ୍ଡ ।

୨୨ ତାନ୍ପେର୍କେ ଇଶ୍ବର ଅଂକିଙ୍କ ପଦ୍ ଡିଡ଼ସ୍ତି ଦାଉଦଙ୍କ୍ ତାମ୍ ରାଜାଲ୍ ମାଡ଼ତଣ୍ଡ । ଇଶ୍ବର ଅନ୍ ବିଷୟ୍ ସାକ୍ଷ୍ୟ କେସ୍ମାଡ଼ତଣ୍ଡ, ‘ନାନ୍ ବେସଡ଼ ନାରୁଡ଼କିଂଙ୍କ ବଲ୍ଲପାଏମ୍ ଆଦତାନ୍, ଯେଶୀତେ ମାର୍ ଦାଉଦ୍ ଆଦେପୁରୁଙ୍କ୍ ଝେରଣ୍ଡ ନାରୁଣ୍ଡ; ଅଣ୍ଡ ନା ଇଞ୍ଜା ଲେକାମ୍ ପାଡ଼ୟି ମାଡ଼ିତନ୍ ।’

୨୩ ଇଣ୍ଡ ଦାଉଦ୍ତେ ବଂଶତଣ୍ଡ ଜିସୁଙ୍କ୍ ଇଶ୍ବର ତାନ୍ ପ୍ରତିଞ୍ଜା ଲେକାମ୍

ଇସ୍ରାଏଲ୍ ଜାତିତ୍ୱ ଗ୍ରାଣକର୍ତ୍ତାଙ୍କୁ ମାଡ଼ତଣ୍ଡ ।

୨୪ ☆ଜିସୁ ତାନ୍ ପାଡ଼ୁଥି ଆରାମ୍ ମାଡ଼ାନ୍ ମୁନେଙ୍କୁ ଯୋହନ୍ ଇସ୍ରାଏଲ୍‌ରେ ସାରେ ନାରୁଡ଼େତେ ଗାରରେ ପ୍ରଚାର ମାଡ଼ି କେତତଣ୍ଡ, ଅଡ଼ ପାପ୍‌ତାଗାଙ୍କ ଅନୁତାପ୍ ମାଡ଼ି ଏର୍ଦିକ୍ଷା ଆଦାନଙ୍କୁ ଖେୟତିଡ଼ ।

୨୫ ☆ମେଣ୍ଡେ ଯୋହନ୍ ଅନାଦ୍ ସେବା ପାଡ଼ୁଥି ତେରସ୍ତାନ୍ ମୁନେଙ୍କୁ ନାରୁଡ଼କିଙ୍କୁ ପାତ୍ରାମାଡ଼ତଣ୍ଡ, ‘ନା ବିଷୟରେ ମିଡ଼ ବାଡ଼ ହାଲ୍‌ସୁତିଡ଼ ? ମିଡ଼ ବେନଙ୍କୁ କେପ୍‌ତିଡ଼, ନାନ୍ ଅଣ୍ଡ ଆୟନ୍ । ବାତେଙ୍କୁଇଡ଼କେ କେଞ୍ଜାଟ୍ ! ନା ପେରକେ ବେନ ଖାଡୁତଣ୍ଡ, ନାନ୍ ଅନାଦ୍ ତେକେଡ଼ ହେରପୁକ୍ ଲେଏତାନଙ୍କୁ ମିକା ଯୋଗ୍ୟ ଆୟନ୍ ।’”

୨୬ “ଅବ୍ରାହାମ୍ ବଂଶତଡ଼ ହୋ ଇସ୍ରାଏଲୀୟ ଦାଦାଲଡ଼, ନୁ ଇଶ୍ବରତିଙ୍କ ପ୍ରାର୍ଥନା ମାଡ଼ାନଡ଼ି ଅଣଇହୁଦୀ ନାରୁଡ଼ି, ମାକିଂକେ ଇଦ୍ ମୁକ୍ତିରେ କାବୁର୍ ଇସ୍ ମିନ୍ଦେଡ଼ ।

୨୭ ଇଡ଼କେ ଅଣ୍ଡ ଯେ ବିଚାର କର୍ତ୍ତାଲ୍, ଯିରୁଶାଲେମ୍ ଆଦିବାସୀ ନୁ ଅଡ଼ ନେତାଲଡ଼ ଆଦ୍ ପୁନ୍‌ଖେ ମାଡ଼ତଡ଼ । ଅଡ଼ ସାରେ ବିଶ୍ବାମ୍‌ବାରଦାଗ୍ କାର୍ତ୍ତାନ୍ ବାବବାଦୀଡ଼ାଦ୍ ଗଟ୍‌ରେ ଅର୍ଡ଼ ବୁଜେମ୍ ଆୟ୍‌ଖେ ମାଡ଼ତଡ଼ । ଇଡ଼କେ ଜିସୁଙ୍କୁ ଦକ୍ଷି ମାଡ଼ି ଅଡ଼ ବାବବାଦୀଡ଼ାଦ୍ ଗଟ୍‌ତିଙ୍କୁ ସଫଳ୍ ମାଡ଼ତଡ଼ ।

୨୮ ☆ଡ଼ଲାନଦଣ୍ଡତାଦ୍ ବାଆତେ କାରନ୍ ଦରକ୍‌ଖେ ମାଡ଼କେ ଗାଲା ଅଂକିଙ୍କୁ ତଲାନଦଣ୍ଡ ହିଦାନ୍ ସେକେ ପିଲାତଙ୍କୁ କେଡ଼ତଡ଼ ।

୨୯ ☆ଅନ୍ ବିଷୟରେ ଦର୍ମଶାସ୍ତ୍ରତାଗ୍ ବେନସାରେ ବିଷୟ ଲେକାମିନ୍ଦେ, ଆଦ୍ ଲେକାମ୍ ସାରେ ପାଡ଼ୁଥି ମାଡ଼ତେ ପେରକେ ଅଡ଼ ଅଂକିଙ୍କୁ କ୍ରୀଷ୍ଟାଗାଙ୍କୁ ତିପିତାସ୍ ଅଣ୍ଡୟ ସମାଦିତାଗ୍ ଖାଟଡ଼ ।

୩୦ ଇଡ଼କେ ଇଶ୍ବର ଅଂକିଙ୍କୁ ତଲ୍‌ତାଗାଙ୍କୁ ତେଏତଣ୍ଡ,

୩୧ ☆ନାର୍‌ଗେ ଦିନା ଯାକ ଅନ୍‌ତଡ଼ ଗାଲିଲୀତାଗାଙ୍କୁ ଯିରୁଶାଲେମ୍ ଆଦାଖାଦା ମାଡ଼ମାନ୍‌ନ୍ ନାରୁଡ଼କିଙ୍କୁ ଅଣ୍ଡ ତଅନ୍‌ଦତଣ୍ଡ । ଇଞ୍ଜେ ଅଡ଼ ଇସ୍ରାଏଲ୍ ନାରୁଡ଼ ଗାରରେ ସାକ୍ଷି ଆଦତଡ଼ ।

☆ ୧୩:୨୪ ମାର୍କ ୧:୪; ଲୁକ ୩:୩. ☆ ୧୩:୨୫ ଯୋହନ୍ ୧:୨୦; ମାଡ଼ିଡ଼ ୩:୧୧; ମାର୍କ ୧:୭; ଲୁକ ୩:୧୭; ଯୋହନ୍ ୧:୨୭. ☆ ୧୩:୨୮ ମାଡ଼ିଡ଼ ୨୭:୨୨,୨୩; ମାର୍କ ୧୫:୧୩,୧୪; ଲୁକ ୨୩:୨୧-୨୩; ଯୋହନ୍ ୧୯:୧୫. ☆ ୧୩:୨୯ ମାଡ଼ିଡ଼ ୨୭:୫୭-୬୧; ମାର୍କ ୧୫:୪୨-୪୭; ଲୁକ ୨୩:୫୦-୫୭; ଯୋହନ୍ ୧୯:୩୮-୪୨. ☆ ୧୩:୩୧ ପ୍ରେରିତ ୧:୩.

୩୨ ମାମ୍ମାମେ ଇଗେ ମିକିଙ୍କ ଇଦ୍ ସୁସମାଚାର କେତାଙ୍କ ଝାଡ଼ତମ୍ ।
ଇଶ୍ବର ମାନ୍ ଆନିଦାଦୀଡ଼କ୍ ବେନ୍ ପ୍ରତିଜ୍ଞା ମାଡ଼ିମାଡ଼ତଣ୍, ଅଣ୍ ଆଦ୍
ମାଡ଼ତଣ୍ ।

୩୩ ଅଡ଼ାଦ୍ ବଂଶ ମାନ୍ ସେଙ୍ଗେ ଜିସୁଙ୍କ ପୁନର୍ଜିବିତ୍ ମାଡ଼ାନ୍ ତଡ଼,
ଅଣ୍ ଆଦ୍ ସାରେ ମାଡ଼ତଣ୍ । ଗୀତସଂହିତାତେ ଦ୍ବିତିୟ ଗୀତତାର୍ ଇଦ୍
ଗଟିଙ୍କ ଉଡ଼ି ଲେକାମିନ୍ଦେ; ‘ନିମ୍ ନା ମାର୍, ନେଣ୍ ନାନ୍ ନି ବାବାଲ୍
ଆଡ଼ତାନ୍,’

୩୪ ଅଂକିଙ୍କ ସମାଦିତାର୍ କାଡ଼ୟାନଙ୍କ ଝିଡ଼ସଣ୍, ଡଲ୍ତାଗାଙ୍କ
ତେଏତାନ୍ ସେଙ୍ଗେ ଇଶ୍ବର ଇଦ୍ ଗଟ୍ କେସ୍ମାଡ଼ତଣ୍; ‘ଦାଉଦଙ୍କ
ଇସମାୟାନ୍ ପ୍ରତିଜ୍ଞା ଲେକେମ୍ ନାନ୍ ବିଶ୍ବାସୀଡ଼କିଙ୍କ ପବିତ୍ର ଆମ୍ବା ନୁ
ନିଜାମ୍ ଆଗର୍ ବାଦ୍ ମାଡ଼ିତାନ୍ ।’

୩୫ ଶାସ୍ତ୍ରତାର୍ ମେଣ୍ଡେଅନ୍ ପଡ଼ୟିତାର୍ ଲେକାମିନ୍ଦେ, ‘ନିମ୍ ନି
ବିଶ୍ବସ୍ତ ସେବକ୍ତିଙ୍କ ସମାଦିତାର୍ କାଡ଼ୟି ଆଦାନଙ୍କ ଝିଡ଼ସମା ।’

୩୬ ଦାଉଦ୍ ତାନ୍ ଶାସନ୍ ମାଡ଼ାନ୍ ଝେଲେ ଇଶ୍ବରତେ ଉଦେଶ୍ୟ
ପୁରା ମାଡ଼ତେ ପେରକେ ଡଲ୍ତଣ୍ ନୁ ଆନିଦାଦିଡ଼ ତଡ଼ ସମାଦି
ପାଏମ୍ ଆଡ଼ତଣ୍ । ଅନ୍ ମେନ୍ଦୁଲ୍ ସମାଦିତାର୍ କାଡ଼ୟି ଆଡ଼ତେ ।

୩୭ ଇଡ଼କେ ଇଶ୍ବର ବେନଙ୍କ ଡଲ୍ତାଗାଙ୍କ ତେଏତଣ୍, ଅଣ୍ ନଷ୍ଟ
ଆୟ୍ୟଣ୍ ।

୩୮ ମୋଶାଲ୍ ହୋ ଦାଦାଲଡ଼ କେଞ୍ଜାର୍, ମାତର୍ ପ୍ରବୁ ଜିସୁନ୍ ତଡ଼,
ମି ବକେଡ଼ ପାପ୍ କ୍ଷମା ଗଟ୍ ପ୍ରଚାର୍ ଆଡ଼ତେ ।

୩୯ ମୋଶାନ୍ ନିୟମ୍ତଡ଼ ପାପ୍ କ୍ଷମା ପାଏମ୍ ଆୟ୍ୟେନଡ଼,
ସାରେତଡ଼ ଆ ଜିସୁଙ୍କ ବିଶ୍ବାସ୍ ମାଡ଼କେନେ ପରିତ୍ରାଣ୍ ଦରକିଡ଼, ଇଦ୍
ମିଡ଼ ବୁଜେମ୍ ଆଦାନ୍ ଦରକାର୍ ।

୪୦ ଆଦିଙ୍କ ସାବ୍ଦାନ୍ ଆସ୍ ମାନୁର୍, ବାତେଙ୍କିଡ଼କେ
ବାବଦାଦୀଡ଼ାଦ୍ ଶାସ୍ତ୍ରତାର୍ ବାଡ଼ କେଡ଼ତଡ଼, ଆଦ୍ ମିଇ ପର୍ର
ବେଲା ଝାଡ଼ମାକି,

୪୧ ‘ହୋ ବଲୁଡ଼୍ ନାରୁଡ଼ି ! ମିଡ଼୍ କଲ୍ବଲ୍ ଆସ୍ ଡଲ୍ଲାର୍,
ବାତେଙ୍କିଡ଼କେ ନାନ୍ ନେଣ୍ ବେନ୍ ପାଡ଼ୟି ମାଡ଼ତୁାନ୍, ବେନ ମିକିଙ୍କ
ବୁଜାମାଡ଼ି କେଡ଼କେ ମିକା ମିଡ଼୍ ବିଶ୍ବାସୀ ଆୟ୍ୟିଡ଼୍ ।’”

୪୨ ପାଉଲ୍ ନୁ ବର୍ଣ୍ଣବା ଉପାସନା ଲଡ଼ତାଗାଙ୍କ ପେଇସ୍ ଝାଡ଼ତେ
ଝେଲେ, ମେଣ୍ଡେଅନ୍ ବିଶ୍ବାମ୍ଦିନ୍ ଦିନ୍ ମାଲ୍ସ୍ ଝାସ୍ ଇଝୁ ସାରେ ଶିକ୍ଷା

ବିଷୟ ମେଣ୍ଟେ ଅଦିକ୍ ବୁଜାମାଡ଼ାନଙ୍କ ଅଡ଼କିଂଙ୍କ ଅନୁରଦ୍ ମାଡ଼ତଣ୍ଟ ।

୪୩ ନାରୁଡ଼ ଉପାସନା ଲନ୍ ମିଟିଙ୍ଗ୍ ଓଡ଼ିସି ଆଡ଼ତେ ପେରକେ ନାରଗେ ଇହୁଦୀ ନୁ ଅବିଶ୍ୱାସୀଡ଼ ଶାଉଲ୍ ନୁ ବର୍ଣ୍ଣବାନ୍ ପେକେପେକେ ଆଡ଼ତଡ଼, ପ୍ରେରିତଶିଷ୍ୟଡ଼ ଅଡ଼ତଡ଼ ତିରୁୟ୍ ଇଶ୍ୱରତେ ଅନୁଗ୍ରହତଡ଼, ବାଦ୍‌କାନଙ୍କ ଅଡ଼କିଂଙ୍କ ଖେଡ଼କେ ମାଡ଼ତଡ଼ ।

୪୪ ମେଣ୍ଟେଅନ୍ ବିଶ୍ୱାମ୍‌ଦିନ୍ ଦିନ୍ ଟାଞ୍ଜୁନ୍‌ତେ ସାରେତଡ଼ ପ୍ରବୁନାଦ୍ ଗର୍ କେଜ୍ଜାନ୍ ମାଇଦିଙ୍କ୍ ଖାଡ଼ତଡ଼ ।

୪୫ ନାରୁଡ଼ ଗହଳିତିଙ୍କ୍ ଉଡ଼ି ଇହୁଦୀଡ଼ ଇର୍ଷା ମାଡ଼ତଡ଼ ନୁ ପାଉଲ୍‌ତେ ଗର୍ଡିଙ୍କ୍ ଅତ୍ୟାଚାର ମାଡ଼ି ଅଡ଼କିଂଙ୍କ୍ ଅପମାନିତ ମାଡ଼ତଡ଼ ।

୪୬ ଇଡ଼କେ ପାଉଲ୍ ନୁ ବର୍ଣ୍ଣବା ସାହାସ୍ ତଡ଼ କେଡ଼ତଡ଼, ମିଲ୍ ବକେଡ଼ ମୁନେନ୍ ଇଶ୍ୱରତେ ଗର୍ ପ୍ରଚାର ଆଦାନ୍ ମାଡ଼ତେ । ବାତେଙ୍କ୍‌ଇଡ଼କେ ମିଡ଼ ଅନନ୍ତ ଜିଞ୍ଜୁଣ୍ ପାଏମ୍ ଆଦାନଙ୍କ୍ ନିଜେତିଙ୍କ୍ ଅଯୋଗ୍ୟ ବିଚାର ଇଦିଙ୍କ୍ ମନା ମାଡ଼ତାଙ୍କ୍, ମାମ୍‌ମେ ମିକିଂଙ୍କ୍ ଓଡ଼ିସି ଅଣଇହୁଦୀଡ଼ ବକେଡ଼ ଆଦତାଡ଼ ।

୪୭ ବାତେଙ୍କ୍‌ଇଡ଼କେ ପ୍ରବୁ ମାକିଂଙ୍କ୍ ଇଦ୍ ଗର୍ ହିଡ଼ତଣ୍ଟ; “ନାନ୍ ମିକିଂଙ୍କ୍ ଅଣଇହୁଦୀଡ଼ ସେଙ୍ଗେ ଖେସ୍ ଲେକେମ୍ ମାଡ଼ତାନ୍, ବେଲାକି ପୁରା ପୃତିବିତାଗ୍ ପରିତ୍ରାଣ୍ ପାଏମ୍ ଆଦତଡ଼ ।”

୪୮ ଅଣଇହୁଦୀଡ଼ ଇଦ୍ କେଜ୍ଜି ଖେଡ଼କେ ଆଡ଼ତଡ଼ ନୁ ପ୍ରବୁନ୍ ବାକ୍ୟ ସେଙ୍ଗେ ଦନ୍ୟବାଦ୍ ହିଡ଼ତଡ଼ । ବେନଡ଼ ଅନନ୍ତ ଜିଞ୍ଜୁଣ୍ ମାଇଦିଙ୍କ୍ ହେଷ୍ଟିମାଡ଼ତଡ଼, ଅଡ଼ ଆଦ୍ ଗର୍‌ତାଗ୍ ବିଶ୍ୱାସ୍ ମାଡ଼ତଡ଼ ।

୪୯ ଆଦ୍ ପଡ଼ିତାଗ୍ ସାରେତାଗ୍ ପ୍ରବୁନ୍ ଗର୍ ଏକାମ୍ ଆଡ଼ତେ ।

୫୦ ଇଡ଼କେ ଇହୁଦୀଡ଼ ନଗର୍‌ତେ ଉପାସନା ମାଡ଼ାନ୍ ନେତାଲଡ଼କ୍ ନୁ ନାଟାକିଂଙ୍କ୍ ପୁସ୍‌କାମାଡ଼ି ପାଉଲ୍ ନୁ ବର୍ଣ୍ଣବାନ୍ ପରର ତାଡ଼ନା ମାଡ଼ତଡ଼ ନୁ ଆଦ୍ ପଡ଼ିୟେତାଗାଙ୍କ୍ ଅଡ଼କିଂଙ୍କ୍ ପେସ୍‌ସ୍ଥିତଡ଼ ।

୫୧ ✠ଆଗାଙ୍କ୍ ପ୍ରେମିତ ଶିଷ୍ୟଡ଼ ଆ ନାରୁଡ଼କ୍ ବିରୁଦ୍ ମାଡ଼ି ତାମ୍ ତେକେଡ଼ ଦୁମ୍ କାୟସ୍ ଇକନିୟାତାଗ୍ ଆଦତଡ଼ ।

୫୨ ଅନ୍‌ଅୟୋକ୍‌ତେ ବିଶ୍ୱାସୀ ଶିଷ୍ୟ ପବିତ୍ର ଆମ୍‌ାତଡ଼ ପୁରାହାସ୍ ଖେଡ଼କେ ଆଦତଡ଼ ।

୧୪

ଇକନିୟତାଗ୍ ସେବାପାଠ୍ୟ

^୧ ଇକନିୟତାଗ୍ ଆଦ୍ ଗଟନା ମେଣ୍ଡେଅଣ୍ଡଦାମ୍ କେଡ଼ତଡ଼; ପାଉଲ୍ ନୁ ବର୍ଣ୍ଣବା ପ୍ରାର୍ଥନା ଲଡ଼ତାଗ୍ ଆଞ୍ଜ ଇଦରକମ୍ ପ୍ରଚାର ମାଡ଼ତଡ଼, ଯେ ନାରଗେ ଇହୁଦୀ ନୁ ଗ୍ରୀକ୍ ଅଣଇହୁଦୀଡ଼, କ୍ରିଷ୍ଟଙ୍କ ବିଶ୍ୱାସ ମାଡ଼ତଡ଼ ।

^୨ ଇଡ଼କେ ବେନ୍ ଇହୁଦୀ ଅବିଶ୍ୱାସୀଡ଼, ଦାଦାଲଡ଼, ନୁ ଅଣଇହୁଦୀଡ଼କ୍ କାରାପ୍ ଗଟ୍ କେସ୍ ଅଡ଼କିଂଙ୍କ ବିଶ୍ୱାସୀଡ଼, ବିରୁଦ୍ଧତେ କେଡ଼ତଡ଼ ।

^୩ ମିକା ପ୍ରେରିତ ଶିଷ୍ୟଡ଼, ପ୍ରବୁନ୍ ବିଷୟ ସାହାସତଡ଼, ପ୍ରଚାର ମାଡ଼ି ନାରଗେ ଦିନା ଆଗେ ମାଡ଼ତଡ଼ । ଆଦ୍ରୁଡ଼ ପାଠ୍ୟ ନୁ ଆଶର୍ଯ୍ୟ ପାଠ୍ୟ ମାଡ଼ାନ ତଡ଼, ପାଉଲ୍ ନୁ ବର୍ଣ୍ଣବା ପ୍ରମାଣ ମାଡ଼ତଡ଼, ଯେ, ଇଶ୍ୱରତେ ଅନୁଗ୍ରହ ବିଷୟତେ ପ୍ରଚାର ମାଡ଼ତେ ଗଟ୍ ନିଜାମ୍ ।

^୪ ନଗରତେ ନାରୁଡ଼, ରେଣ୍ଡ ମାୟେ ଆଡ଼ତଡ଼ । ଅଡ଼, ଲୋପେଙ୍କ୍ ବେସ୍କଡ଼, ଇହୁଦୀ ନାରୁଡ଼କ୍ ନୁ ମେଣ୍ଡେ ବେସ୍କଡ଼, ପ୍ରେରିତ ଶିଷ୍ୟଡ଼କ୍ ସପଟ୍ ମାଡ଼ତଡ଼ ।

^୫ ଡାନପେକେ ବେସ୍କଡ଼, ଅଣଇହୁଦୀ ନୁ ଇହୁଦୀ ନାରୁଡ଼, ତାମ୍ ନେତାଲଡ଼, ତଡ଼, କାଲି ପ୍ରେରିତ ଶିଷ୍ୟଡ଼କିଂଙ୍କ କାରାପ୍ ବ୍ୟବହାର ମାଡ଼ାନ ସେଙ୍ଗେ ନୁ ଅଡ଼କିଂଙ୍କ କାଲକିନ୍ ତଡ଼, ରେହେସ୍ ଆଞ୍ଜକାଂଙ୍କ ଟିକ୍ ମାଡ଼ତଡ଼ ।

^୬ ପ୍ରେରିତ ଶିଷ୍ୟଡ଼, ଇଦ୍ ବିଷୟ ପୁଞ୍ଜ ଲୁକାନିଆତେ ଲୁସ୍ତା ନୁ ଦର୍ବା ନାର ନୁ ତାମ୍ ସାରେପାକ୍ ମାୟାନ୍ ପଡ଼ିୟେତାଗ୍ ଆଡ଼ତଡ଼,

^୭ ଆଗେ ଅଡ଼, ସୁସମାଚାର ପ୍ରଚାର ମାଡ଼ତଡ଼ ।

ଲୁସ୍ତା ନୁ ଦର୍ବାତାଗ୍ ସେବା ପାଠ୍ୟ

^୮ ଲୁସ୍ତାତାଗ୍ ଝେରଣ୍ଡ ଜନମ୍ତାଗାଙ୍କ କୁଟାଲ୍ ମାଡ଼ତଣ୍ଡ । ଅଣ୍ଡ ବିଲ୍‌କୁଲ୍ ତାକାଙ୍କ ପାରଝେମାଡ଼ତଣ୍ଡ ।

^୯ ଆଗେ କୁଦି ଅଣ୍ଡ ପାଉଲ୍‌ତେ ଶିକ୍ଷା କେଞ୍ଜମାଡ଼ତଣ୍ଡ । ଅନ୍ ମନତାଗ୍ ବିଶ୍ୱାସ୍ ଝାଡ଼ତେ ନୁ ଅଣ୍ଡ ସୁସ୍ଥ ଆଦତନ୍ ଇଞ୍ଜ ପାଉଲ୍ ପୁଡ଼ତଣ୍ଡ । ଆଦିଙ୍କ୍ ଅନାକ୍ ଅଣ୍ଡୟ କଣ୍ଡେତେ ଉଡ଼ତଣ୍ଡ ।

୧୦ ପାଉଲ୍ ଗାଟି ଲେଙ୍କାତଡ଼କେଡ଼ତଣ୍ଡ, “ଡେକେଡିଙ୍କ ଗାଡ଼ସ୍ ମାଡ଼ି ତିନାଙ୍କ ନିଲ୍ମ!” ଆଗାଙ୍କ ଆ ନାରୁଣ୍ଡ ତୁଲିମିକା ସାରେପାକ୍ ତାକାନଙ୍କ ପସ୍ପତଣ୍ଡ ।

୧୧ ଲୁକାନିଆ ତାଗ୍ ମାନ୍ଦାନ୍ ନାରୁଡ଼ ପାଉଲ୍ତାଦ୍ ଇଦ୍ ପାଡ଼ିୟି ଉଡ଼ି କିଡ଼କି କିଡ଼କି କେତାନଙ୍କ ପସ୍ପତଣ୍ଡ, “ଦେୟାକ୍ ନାରୁଡ଼ ରକମ୍ ଆସ୍ ମାୟାଗ୍ ଖାଡ଼ତା ।”

୧୨ ଅଡ଼ ବର୍ଣ୍ଣବାଙ୍କ ଜିଆସ୍ ବା ବାଡ଼ୟେ ଦେୟାମ୍ ବା ବୃହସ୍ପତି ନୁ ପାଉଲ୍ ବେଡ଼ିୟି ବନ୍ଧାଲ୍ ମାନ୍ଦାନ୍ ମାଇଦିଙ୍କ ଅଂକିଙ୍କ ହେରମିସ୍ ବା ଗାଟି ତିରୟାନଣ୍ଡ ଦେୟାମ୍ ବା ବୁଦ୍ ଇଞ୍ଜ କେଡ଼ତଣ୍ଡ ।

୧୩ ଟାଞ୍ଜୁନଡେ ବାୟିଦେ ମାନ୍ଦାନ୍ ଜିଆସ୍ ମନ୍ଦିରଡେ ଜାଜକାଡ଼, ମାର୍ ବକେଡ଼ ବେସକ୍ କନ୍ଦା ନୁ ପୁଙ୍ଗାର୍ ତାଡ଼ତଣ୍ଡ, ବାତେଙ୍କିଡ଼କେ ଅଣ୍ଡ ନୁ ଆଗେ ମାନ୍ଦାନ୍ ଗୁଡ଼ିମାନ୍ଦାନ୍ ନାରୁଡ଼ ପ୍ରେରିତ ଶିଷ୍ୟଡ଼, ଉଦେଶ୍ୟତେ ପୂଜାନ୍ ସେଙ୍ଗେ ଇଚ୍ଛା ମାଡ଼ମାଡ଼ତଣ୍ଡ ।

୧୪ ଅଡ଼ ପ୍ରେରିତ ଶିଷ୍ୟଡ଼ ପାଡ଼ିୟି ମାଡ଼ାନଙ୍କ ଆଞ୍ଜ ମାଡ଼ତଣ୍ଡ, ବର୍ଣ୍ଣବା ନୁ ପାଉଲ୍ ଆଦ୍ କେଞ୍ଜଡେ ସାଙ୍ଗେ ସାଙ୍ଗେ ନିଜେଡ଼ ତକା କୁସ୍ପତଣ୍ଡ, ନାରୁଡ଼ ଲପେ ମିରିଆଞ୍ଜ କିଡ଼କି ମିକା କେଡ଼ତଣ୍ଡ,

୧୫ “ମିଡ଼ ବାତେଙ୍କି ଇଦ୍ ମାଡ଼ଡ଼ିଡ଼ ? ମାମ୍ମେ ମିଇ ଲେକାମ୍ ନାରୁମ୍ । ମିଇ ବକେଡ଼ ସୁସମାଚାର୍ ପ୍ରଚାର୍ ମାଡ଼ାନଙ୍କ ନୁ ଇଞ୍ଜ ଦରକାର୍ ହିଲ୍‌ଖାଦ୍ ବିଷୟଡିଙ୍କ ଓଡ଼ସି, ସ୍ପର୍ଗ, ପୃତିବି ନୁ ତାନ୍ ଲୋପେ ମାନ୍ଦାନ୍ ସାରେ ଜିନିଷଡିଙ୍କ ସୃଷ୍ଟିମାଡ଼ତେ ଜିଞ୍ଜେଡ଼ ଇଶ୍ବରତେ ପାକେ ମିକିଙ୍କ ଆଦାନ୍ ସେଙ୍ଗେ ମାମ୍ମେ ଇଗେ ଖାଡ଼ତମ୍ ।

୧୬ ମୁନେନ୍ ନିଜର୍ ଇଚ୍ଛାତେ ନିଜର୍ ହାରଦାଗ୍ ଆଦାନ୍ ମାଇଦିଙ୍କ ଇଶ୍ବର ନାରୁଡ଼କିଙ୍କ ଦେଶ୍ ତାଗ୍ ଓଡ଼ସି ମାଡ଼ତଣ୍ଡ ।

୧୭ ଇଡ଼କେ ଅନାଦ୍ ସାରେ ସଡ଼କାମ୍ ତଡ଼ ଅଣ୍ଡ ସାରେଦାମ୍ ତାନ୍ ବିଷୟତେ ନିୟମ୍ ହିଡ଼ତଣ୍ଡ; ଅଣ୍ଡ ସ୍ପର୍ଗତାଗାଙ୍କ ଖାରସାମ୍ ନୁ ଟିକ୍ ସମୟତେ ଫସଲ୍ ହିଡ଼ତଣ୍ଡ, କାଦି ଯୋଗାମାଡ଼ିତଣ୍ଡ ନୁ ଶ୍ଵେଡ଼କେତେ ମିୟାଦ୍ ହୁଦୟ ପୁରା ମାଡ଼ିତନ୍ ।”

୧୮ ଇଞ୍ଜୁସାରେ ଗଟି କେସ୍ ପ୍ରେରିତ ଶିଷ୍ୟଡ଼ ଗାଟି ତିପାଲ୍ତେ ବେଲାମେଣ୍ଡେ ବଲି ଇଦାନାଦ୍ ବନ୍ଦ୍ ମାଡ଼ତଣ୍ଡ ।

୧୯ ପିସିଦିଆତେ ଅନ୍ଥୁୟୋକ୍ ନୁ ଇକନିୟାତାଗାଙ୍କ ବେସକ୍‌ଡ଼,

ଇହୁଦୀ ଝାସ୍‌ମାଡ଼ତଡ଼, ଅଡ଼ ନାରୁଡ଼କିଂଙ୍କ ଉସ୍ତା ମାଡ଼ି ପାଉଲ୍‌ଡ଼ିଙ୍କ କାଲ୍‌କିନ୍ ତଡ଼ ରେହେଡ଼ତଡ଼ ନୁ ଅଂକିଙ୍କ ତଲ୍‌ତଣ୍ଡ ଇଞ୍ଜ ହାଲ୍‌ସି ଟାଞ୍ଜୁନତେ ବାୟିଦେ ଇଡ଼ସି ଆଡ଼ତଡ଼ ।

୨୦ ଇଡ଼କେ ଶିଷ୍ୟଡ଼ ଝାସ୍ ତାନ୍ ତିଡ଼ୟିପାକ୍ ଗେରାମାଡ଼ି ନିଡ଼ତେ ପେରକେ ଅଣ୍ଡ ତେଦି ଟାଞ୍ଜୁନତାଗ୍ ମାଲ୍‌ସ୍ ଆଡ଼ତଣ୍ଡ । ମେଣ୍ଡେଅନ୍ ଦିନ୍ ଅଣ୍ଡ ନୁ ବର୍ଣ୍ଣବା ଦର୍ବାତାଗ୍ ଆଡ଼ତଡ଼ ।

ସିରିଆତେ ଅନ୍‌ଥ୍‌ୟୋକ୍‌ତାଗ୍ ମାଲ୍‌ଡ଼ତଡ଼

୨୧ ପାଉଲ୍ ନୁ ବର୍ଣ୍ଣବା ଦର୍ବାତାଗ୍ ସୁସମାଚାର ପ୍ରଚାର ମାଡ଼ି ନାର୍‌ଗେ ଶିଷ୍ୟଡ଼କ୍ ଦରସ୍‌ତଡ଼ । ତାନ୍‌ପେକେ ଅଡ଼ ଲୁସ୍ତା, ଇକନିୟା ନୁ ପିସିଦିଆତେ ଅନ୍‌ଥ୍‌ୟୋକ୍‌ତାଗ୍ ମାଲ୍‌ସ୍‌ଆଡ଼ତଡ଼ ।

୨୨ ଅଡ଼ ବିଶ୍ୱାସୀଡ଼କ୍ ଶିଷ୍ୟ ନିଜେଡ଼ ବିଶ୍ୱାସ୍‌ତାଗ୍ ଲେକେଡ଼ ମାନ୍‌ନାଙ୍କ ଅନୁରଦ୍ ମାଡ଼ତଡ଼ । ଅଡ଼ ଶିକ୍ଷା ଇସ୍ କେଡ଼ତଡ଼, “ଇଶ୍ୱରତେ ରାଜ୍ୟତାଗ୍ ହସାନ୍ ମାଇଦିଙ୍କ ମାକିଂଙ୍କ ଗାଟି ଦୁଃକକଷ୍ଟ ଇସ୍ ଆଦାଙ୍କ ଝେୟିଡ଼ିଡ଼ ।”

୨୩ ସାରେ ମଣ୍ଡଲିନାଗ୍ ଅଡ଼ ଦାୟିଡ଼ ଇସ୍ ମଣ୍ଡଲିତେ ବୟସ୍ତା ନାରୁଡ଼କିଂଙ୍କ ନିୟୁକ୍ତି ମାଡ଼ତଡ଼ ନୁ ବେନ୍ ପ୍ରଭୁନାଗ୍ ଅଡ଼ ବିଶ୍ୱାସ୍ ମାଡ଼ିମାଡ଼ତଡ଼, ପ୍ରାର୍ଥନା ନୁ ଉପବାସ୍ ତଡ଼ ଅଡ଼କିଂଙ୍କ ଆଦ୍ ପ୍ରଭୁନ୍ ଗାରରେ ସର୍ପା ମାଡ଼ତଡ଼ ।

୨୪ ପିସିଦିଆ ଜାଗେ ଇସ୍ ଅଡ଼ ପଂଫୁଲିୟାତାଗ୍ ଝାଡ଼ତଡ଼ ।

୨୫ ଆଗେ ପର୍ଗାତାଗ୍ ପ୍ରଚାର ମାଡ଼ି ଆଡ଼େଲିଆତାଗ୍ ଆଡ଼ତଡ଼ ।

୨୬ ଆଗାଙ୍କ ଅଡ଼ ଏର୍ ହାର୍‌ଦେଆଲା ଆନ୍ତିୟକିଆତାଗ୍ ମାଲ୍‌ସ୍ ଝାଡ଼ତଡ଼ । ଇଡ଼ ଅନ୍‌ଥ୍‌ୟୋକ୍‌ତାଗ୍ ଆସ୍ ମାନ୍‌ନା ପାଡ଼ୟି ସେଙ୍ଗେ ଇଶ୍ୱରତେ ଅନୁଗ୍ରହତଡ଼ ଅଡ଼ ସର୍ପା ଆସ୍‌ମାଡ଼ତଡ଼ ।

୨୭ ଅଡ଼ ଅନ୍‌ଥ୍‌ୟୋକ୍‌ତାଗ୍ ଏଞ୍ଜୁସ୍ ମଣ୍ଡଲିତେ ନାରୁଡ଼କ୍ ଅଣ୍ଡୟାଗେ ମାଡ଼ତଡ଼ । ଇଶ୍ୱର ସେଙ୍ଗେ ଅଡ଼ ବାଡ଼ ମାଡ଼ିମାଡ଼ତଡ଼ ନୁ ଅଣ୍ଡଇହୁଦୀଡ଼, ବିଶ୍ୱାସ୍ ସେଙ୍ଗେ ବେଲା ହାର୍ ତଅସ୍‌ମାଡ଼ତଡ଼, ଆଞ୍ଜିତାରେ ଅଡ଼କିଂଙ୍କ କେଡ଼ତଡ଼ ।

୨୮ ଆଗେ ବିଶ୍ୱାସୀ ଶିଷ୍ୟ ତଡ଼ ଅଡ଼ ନାର୍‌ଗେ ଦିନା ମାଡ଼ତଡ଼ ।

୧୫

ଯିରୁଶାଲେମ୍‌ତାଗ୍ କ୍ରିଷ୍ଟିୟାନ୍ ମିଟିଙ୍ଗ୍

^୧ ଯିହୁଦାତାଗାଙ୍କ ବେସକ୍‌ତୁଡ୍ ଦାଦାଲଡ୍ ଅନ୍‌ଅୟୋକ୍‌ତାଗ୍ ଝାସ୍, ମୋଗାନ୍ ନିୟମ୍ ଲେକାମ୍ ଅଡ୍ ସୁନ୍ନଡ୍ ଆୟିଝକ୍ ପରିତ୍ରାଣ୍ ପାଏମ୍ ଆୟଡ୍ ଇଞ୍ଜ ବିଶ୍ୱାସୀଡ୍‌କ୍ ଶିକ୍ଷା ହିଡ୍‌ତଡ୍ ।

^୨ ଇଦ୍ ବିଷୟତିଙ୍କ୍ ପାଉଲ୍ ନୁ ବର୍ଣ୍ଣବା ଅଡ୍ ତଡ୍ ଗାଟି ଯୁକ୍ତିତର୍କ୍ ମାଡ୍‌ତାଙ୍କ୍ ଇଦ୍ ତିଆର୍ ମାଡ୍‌ତଡ୍ ଯେ, ପାଉଲ୍, ବର୍ଣ୍ଣବା ନୁ ଅନ୍‌ଅୟୋକ୍‌ତେ ମେଣ୍ଡେ ବେସକ୍‌ତୁଡ୍ ନାରୁଡ୍ ଯିରୁଶାଲେମ୍‌ତାଗ୍ ଆଞ୍ଜ ପ୍ରେରିତ ଶିଷ୍ୟ ନୁ ମଣ୍ଡୁଲିତେ ବୟସ୍କା ନେତାଲଡ୍ ତଡ୍ ଇଦ୍ ବିଷୟତେ ପରାମର୍ଶ ମାଡ୍‌ତଡ୍ ।

^୩ ମଣ୍ଡୁଲି ଅଡ୍‌କିଂଙ୍କ୍ ଆଦାନାଦ୍ ସୁବିଦା ମାଡ୍ ରହଡ୍‌ତେ ନୁ ଅଡ୍ ଡିନିସିଆ ନୁ ଶମିରୋ ଇସ୍ ଆଦାନ୍ ଝେଲେ ଅଣଇହୁଦୀଡ୍ ବେଲା ମନ୍ ପରିବର୍ତ୍ତନ୍ ମାଡ୍ ଇଶ୍ୱରତେ ପାକେ ଆଦତଡ୍, ଆଦ୍ ବିଷୟ କେଡ୍‌ତଡ୍; ଇଦ୍ ଗର୍ କେଞ୍ଜି ବିଶ୍ୱାସୀଡ୍ ଦାଦାଲଡ୍ ଗାଟି ଝେଡ୍‌କେ ଆଡ୍‌ତଡ୍ ।

^୪ ଅଡ୍ ଯିରୁଶାଲେମ୍‌ତାଗ୍ ହେଝୁଡ୍‌ତେ ଝେଲେ ମଣ୍ଡୁଲି, ପ୍ରେରିତ ଶିଷ୍ୟ ନୁ ମଣ୍ଡୁଲିତେ ନେତାଲଡ୍ ଅଡ୍‌କିଂଙ୍କ୍ ସ୍ୱାଗଡ୍ ମାଡ୍‌ତଡ୍ । ଇଶ୍ୱର ଅଡ୍ ତଡ୍ ମାଡ୍‌ମାନ୍ ପାଡ୍‌ୟି ବିଷୟତେ ପାଉଲ୍ ନୁ ବର୍ଣ୍ଣବା ଅଡ୍‌କିଂଙ୍କ୍ କେଡ୍‌ତଡ୍ ।

^୫ ଇଡ୍‌କେ ପାରୁଶୀଡ୍ ପାକେଙ୍କ୍ ବେସକ୍‌ତୁଡ୍ ବିଶ୍ୱାସୀଡ୍ ନିଶ୍‌ମିକା କେଡ୍‌ତଡ୍, “ଅଣଇହୁଦୀଡ୍ ସୁନ୍ନଡ୍ ଆଦାନାଦ୍ ତିଆର୍ ନୁ ମୋଗାନ୍ ନିୟମ୍ ପାଲନ୍ ମାଡ୍‌ନଙ୍କ୍ ଅଡ୍‌କିଂଙ୍କ୍ କେତାନ୍ ଦରକାର ।”

^୬ ଇଦ୍ ବିଷୟତିଙ୍କ୍ ମିଟିଙ୍ଗ୍ ମାଡ୍‌ନ ମାଇଦିଙ୍କ୍ ପ୍ରେରିତ ଶିଷ୍ୟଡ୍ ନୁ ମଣ୍ଡୁଲିତେ ବୟସ୍କା ନାରୁଡ୍ ଅଣ୍ଡୟତାଗ୍ ଗୁଡ୍‌ତଡ୍ ।

^୭ ନାର୍ଗେଜେଲ୍ ଆଲୋଚନା ମାଡ୍‌ତେ ପେରକେ ପିତର୍ ନିଶ୍‌ମିକା କେଡ୍‌ତଡ୍, “ଦାଦାଲଡ୍ ନୁ ଏଲାସ୍କି, ମିଡ୍ ପୁଞ୍ଜିମାନୁର୍ ଯେ ନାର୍ଗେ ଦିନା ମୁନେଙ୍କ୍ ଇଶ୍ୱର ଅଣଇହୁଦୀଡ୍ ଗାରରେ ସୁସମାଚାର ପ୍ରଚାର

ମାଡ଼ି ଆଦିନାଗ୍ ଅଡ଼କିଂଙ୍କ ବିଶ୍ୱାସ୍ ମାଡ଼ାନଙ୍କ ମିଛ ଲୋପେଙ୍କ ନାକିଂଙ୍କ ଏଞ୍ଜିମାଡ଼ତଣ୍ଡ ।

୮ ✨ମେଣ୍ଡେ ସାରେତଡ଼ତେ ହୃଦୟ ପୁନ୍ଦାନ୍ ଇଶ୍ୱର୍ ମାକିଂଙ୍କ ବେଲା ପବିତ୍ର ଆମ୍ବାତଡ଼ ସାକ୍ଷ୍ୟ ହିଡ଼ତଣ୍ଡ, ଅଣଇହୁଦୀଡ଼କ୍ ମିକା ଟିକ୍ ଆଦେ ରକମ୍ ଇସ୍ ଅଡ଼କିଂଙ୍କ ଗ୍ରହନ୍ ମାଡ଼ତଣ୍ଡ ।

୯ ଅଡ଼ ନୁ ମା ଲୋପେ ବାଡ଼ମିକା ହାଲ୍‌ସାନାଦ୍ ଇଲେ, ଅଡ଼ ତାମ୍ ହୃଦୟ ଶୁଚି ମାଡ଼ତଡ଼ । ଅଡ଼ାଦ୍ ବିଶ୍ୱାସ୍‌ତେ ସେଙ୍ଗେ ଅଣ୍ଡ ଅଡ଼କିଂଙ୍କ ପାପ୍ କ୍ଷମା ମାଡ଼ତଣ୍ଡ ।

୧୦ ଆଲେକେ ବେନ୍ ବୋଜ୍ କାଞ୍ଜାନାଦ୍ ଦୁଆଡ଼ ମାନ୍ ଆନିଦାଦିଡ଼, ନୁ ମାମ୍‌ମେ ପାର୍‌ଝମ୍, ମିଡ଼ ଇଞ୍ଜେ ଶକ୍ତି ବିଶ୍ୱାସୀ ଶିଷ୍ୟ ଆଚେତାଗ୍ ଆଦ୍ କାଞ୍ଜିସ୍ତିମିକା ବାଡେଙ୍କ ଇଶ୍ୱରତିଙ୍କ ପରିକ୍ଷା ମାଡ଼ାନଙ୍କ ହାଲ୍‌ସୁତିଡ଼ ?

୧୧ ହିଲ୍‌ଲେ, ଇଦ୍ ଟିକ୍ ଆୟ୍‌ୟ । ଅଡ଼ ବେନ୍ ବିଶ୍ୱାସ୍ ମାଡ଼ି ପରିତ୍ରାଣ ପାଏମ୍‌ଆଡ଼ତଡ଼, ମାମ୍‌ମେ ଗାଲା ଟିକ୍ ଆଦେପୁରୁଙ୍କ ବିଶ୍ୱାସ୍ ମାଡ଼ି ପ୍ରବୁ ଜିସୁନ୍ ଅନୁଗ୍ରହତେ ପରିତ୍ରାଣ ପାଏମ୍‌ଆଡ଼ତଡ଼ ।”

୧୨ ପାଉଲ୍ ନୁ ବର୍ଣ୍ଣବାନ୍ ତଡ଼ ଅଣଇହୁଦୀଡ଼, ଲୋପେ ଇଶ୍ୱର୍ ବେନ୍‌ସାରେ ଆଦ୍‌ବୁଡ଼ ନୁ ଆଶର୍ଯ୍ୟ ପାଡ଼ୟି ମାଡ଼ିମାଡ଼ତଣ୍ଡ, ଅଡ଼ଆଗାଙ୍କ ଆଦିନାଦ୍ ଗର୍ କେଞ୍ଜି ମାନ୍ଦେତେ ସାରେତଡ଼ କଟ ମାଡ଼ିତଡ଼ ।

୧୩ ଅଡ଼ କେସ୍ ତେରତେ ପେରକେ ଯାକୁବ୍ କେଡ଼ତଣ୍ଡ, “ହୋ ଦାଦାଲଡ଼ ନୁ ଏଲାସ୍‌କି ନା ଗଟି କେଞ୍ଜାର୍ !

୧୪ ଇଶ୍ୱର୍ ବେଲା ଅନୁଗ୍ରହ ମାଡ଼ି ଅଣଇହୁଦୀଡ଼, ଲୋପେଙ୍କ ବେସ୍‌ହୁଡ଼କ୍ ତାନ୍ ସେଙ୍ଗେ ପେଦେର୍ ହେଞ୍ଜତଣ୍ଡ, ଶିମୋନ୍ ଆଦ୍ ଗର୍ ବୁଜା ମାଡ଼ିତଡ଼ ।

୧୫ ବାବବାଦୀଡ଼ାଦ୍ ଗର୍ ଇଦିଙ୍କ ପୁରାପୁରି ସମର୍ତ୍ତନ୍ ମାଡ଼ତୁ । ଶାସ୍ତ୍ରତାଗ୍ ଲେକାମିନ୍ଦେ;

୧୬ ‘ପ୍ରବୁ କେଡ଼ୁତଣ୍ଡ, ଇଦିନ୍ ପେରକେ ନାନ୍ ମାଲ୍‌ସ୍ ଝାଦ୍‌ତାନ୍ ନୁ ଦାଉଦନ୍ ରାଜ୍ୟତିଙ୍କ ମେଣ୍ଡେଅଣ୍ଡଦାମ୍ ଉଦାର୍ ମାଡ଼ିତାନ୍ । ନାନ୍ ଆଦିନ୍ ଦଂସଆଡ଼ତାଦ୍ ବିଷୟ ମେଣ୍ଡେଅଣ୍ଡଦାମ୍ ତିଆର୍ ମାଡ଼ି ଆଦିଙ୍କ

ମେଣ୍ଡେଅଣ୍ଡଦାମ୍ ତୁଟାଙ୍ଗ ମାଡ଼ିତାନ ।

୧୭ ଜିହ୍ନାନୁନ୍ ଜାତି ନା ବକେଡ଼ ଖାଦତଡ଼, ବେନ୍ ଅଣ୍ଡହୁଦୀଡ଼କ୍ ନାନ୍ ନା ନିଜର୍ ପ୍ରାର୍ଥନାତାଗ୍ କାରଙ୍ଗତାନ, ଅଡ଼ ସାରେତଡ଼ ନା ପେଦେର୍ ନିଜର୍ତଡ଼ ପ୍ରବୁ ଇଞ୍ଜ ସ୍ବାକାର ମାଡ଼ିତଡ଼ ।

୧୮ ପ୍ରବୁ ଇଦ୍ ଗର୍ କେଡ଼ତଣ୍ଡ, ନାରଗେ ଦିନା ମୁନେଡ଼ କାଲାମ୍ତେ ଇଦ୍ ଗର୍ ଅଣ୍ଡ କେସ୍ମାଡ଼ତଣ୍ଡ । ”

୧୯ ଯାକୁଦ୍ ମେଣ୍ଡେ କେସ୍ମାଡ଼ତଣ୍ଡ, ନା ବିଚାରତେ, ବେନ୍ ଅଣ୍ଡହୁଦୀଡ଼ ଇଶ୍ବରତେ ପାକେ ମାଲ୍ଡତଡ଼, ମାମ୍ମେ ଅଡ଼କିଙ୍ଗ୍ ମେଣ୍ଡେ ହଇରାଣ୍ ମାଡ଼ମ୍ ।

୨୦ ଅଡ଼ ବେଲାକି ପୁଡ଼ଲାମ୍ଡିଙ୍ଗ୍ ଇଡ଼କେ କାଦି ତିନମାକିଡ଼, ଯୌନ ପାପତାଗାଙ୍ଗ୍ ପେଇସ୍ ଖାଡ଼ିଡ଼, ପାପେଡ଼ିଙ୍ଗ୍ ପଇସ୍ ଦଂସମାଡ଼ତେ ଜୀଝାକ୍ତେ ହାଞ୍ଜୁଙ୍ଗ୍ ତିନମାକିଡ଼; ଇଦ୍ ସାରେ ବିଷୟ କେସ୍ଇସ୍ ଅଡ଼ ବକେଡ଼ ଅଣ୍ଡୟ ଚିଟି ଲେକିକାଡ଼ ।

୨୧ ବାତେଙ୍ଗ୍ଇଡ଼କେ ନାରଗେ ଦିନାକନ୍ତୁ ବିଶ୍ବାମ୍ଦିନେ ଉପାସନା ଲଅକିନାଗ୍ ମୋଶାନ୍ ନିୟମ୍ କାର୍ତୁତଡ଼, ନୁ ସାରେ ଟାଞ୍ଜୁନକିନାଗ୍ ଅନାଦ୍ ଗର୍ ପ୍ରଚାର ଆଦୁଡ଼ତେ ।

ଅଣ୍ଡହୁଦୀ ବିଶ୍ବାସୀଡ଼ ବକେଡ଼ ଚିଟି

୨୨ ପେର୍କେ ଦାଦାଲ୍ ପ୍ରେରିତ ଶିଷ୍ୟ ନୁ ମଣ୍ଡୁଲିତେ ବେଡ଼ୟେ ନେତାଲଡ଼, ମେଣ୍ଡେ ମଣ୍ଡୁଲିତେ ସାରେତଡ଼, ମାନ୍ଦେତେ ବେସ୍କଡ଼ୁଡ଼ ନାରୁଡ଼କିଙ୍ଗ୍ ଏଞ୍ଚି ପାଉଲ୍ ନୁ ବର୍ଣ୍ଣବାନ୍ ତଡ଼ ଅଡ଼କିଙ୍ଗ୍ ଆନ୍ତିୟକିଆତାଗ୍ ରହଡ଼ତାନଙ୍ଗ୍ ତିଆର୍ ମାଡ଼ତଡ଼ । ବର୍ଣ୍ଣବା ପେଦେର୍ତେ ପରିଚିତ ଯିହୁଦା ନୁ ଶୀଲା ବିଶ୍ବାସୀଡ଼ ଲୋପେଙ୍ଗ୍ ଗାଟି ସମ୍ମାନିତ ମାଡ଼ତଡ଼ ।

୨୩ ବିଶ୍ବାସୀଡ଼ ମଦଲ୍ ଲେକ୍ତାଦ୍ ଚିଟିତିଙ୍ଗ୍ ଇଡ଼ ଇର୍ଝୁଡ଼ କାୟଦେ ରହଡ଼ତଡ଼, “ଆଣ୍ଡିୟୋକ୍, ସିରିଆ ନୁ ସିଲିସିଆତେ ଅଣ୍ଡହୁଦୀଡ଼ ଲୋପେଙ୍ଗ୍ ଖାସ୍ମାନ୍ ଦାଦାଲଡ଼କିଙ୍ଗ୍ ପ୍ରେରିତ ଶିଷ୍ୟଡ଼ ନୁ ମଣ୍ଡୁଲିତେ ବୟସ୍ମା ନେତାଲଡ଼ ନମସ୍କାର ମାଡ଼ୁଡ଼ ।

୨୪ ମାମ୍ମେ କେଞ୍ଜୁତମ୍ ଯେ, ମା ମାନ୍ଦେତେ ବେସ୍କଡ଼ୁଡ଼ ନାରୁଡ଼, ମିଇ ବକେଡ଼ ଆଞ୍ଜ ବାଡ଼ କେଡ଼ତଡ଼, ଆଦିଙ୍ଗ୍ ଅଡ଼ ମିକିଙ୍ଗ୍ ଗାଟିଦାନ୍ଦେ

ମାଡ଼ତଡ଼ । ଇଡ଼କେ ଇଦ୍ ବିଷୟତେ ମାମ୍ମେ ଅଡ଼କିଂଙ୍କ ବାଡ଼ମିକା ନିର୍ଦ୍ଦେଶ ଇଞ୍ଜମ୍ ।

୨୫ ଆଦିଙ୍କ ମାମ୍ମେ ସାରେତମ୍ ଅଣ୍ଡୟ ମନ୍ ହାସ୍ ବେସକ୍ତୁଡ଼, ସମ୍ବାଦକାରୀଡ଼କ୍ ଏଞ୍ଜି ମିଇ ବକେଡ଼ ରହତାନଙ୍କ ତିଆର ମାଡ଼ତମ୍ । ଅଡ଼ ମାନ୍ ସଡ଼ସାହସୀ ପ୍ରିୟ ସାଙ୍ଗ ବର୍ଣ୍ଣବା ନୁ ପାଉଲ୍ ତଡ଼ ଆଦତଡ଼ ।

୨୬ ଇ ପେଦେରତେ ସାଙ୍ଗଡ଼ ପ୍ରବୁ ଜିସୁ କ୍ରିଷ୍ଟନ୍ ସେବା ମାଡ଼ାନଙ୍କ ନିଜେଡ଼ ଜିହ୍ୱଣ୍ଡିଙ୍କ ଉତ୍ସର୍ଗ ମାଡ଼ତଡ଼ ।

୨୭ ମାମ୍ମେ ଯିହୁଦା ନୁ ଶୀଲାଙ୍କ ମିଇ ବକେଡ଼ ରହତୁତମ୍ । ମାମ୍ମେ ବାଡ଼ ଲେକୁତମ୍, ଅଡ଼ ବ୍ୟକ୍ତିଗତଭାବେ ଆଦ୍ ମିକିଂଙ୍କ କେଡ଼ିତଡ଼ ।

୨୮ ବେସକ୍ ଦରକାର ଆଦାନ୍ ନିୟମ୍ ଝିଡ଼ସି ମିଇ ପରର ମେଣ୍ଡେ ବଜ୍ ଝାଟମ୍ ମାକିଂଙ୍କ ପବିତ୍ର ଆମ୍ବା ଇଦ୍ ନିର୍ଦ୍ଦେଶ ହିଡ଼ତଣ୍ଡ ।

୨୯ ଆସୁ ନିୟମ୍ ଆଡ଼ତା, ପୁତ୍‌ଲାମ୍‌ତିଙ୍କ ଇଡ଼ତେ କାଦି ତିନ୍‌ମାଟ୍, ନେତୁର୍ ଉନ୍‌ମାଟ୍, ପାପେତିଙ୍କ ପଇସ୍ ହାଞ୍ଜକତେ ଜୀଞ୍ଜକତେ ହାଞ୍ଜକ୍ ତିନ୍‌ମାଟ୍ ନୁ ଯୌନ ପାପାମ୍‌ତିଙ୍କ ଝିଡ଼ସାଟ୍ । ଇସୁ ସାରେ ପାଡ଼ୟି ଝିଡ଼ସକେ ମିୟାଦ୍ ଲେକେଡ଼ ଆଦତେ । ମାୟାଦ୍ ଇଦ୍ ନମସ୍କାର ଗ୍ରହନ୍ ମାଡ଼ାଟ୍ ।”

୩୦ ବେନ୍ ସମ୍ବାଦକାରୀଡ଼କ୍ ରହସ୍‌ମାଡ଼ତଡ଼, ଅଡ଼ ଅନ୍‌ଅୟୋକ୍‌ତାଗ ଆଞ୍ଜ ବିଶ୍ୱାସୀଡ଼, ସାରେ ମାନ୍ଦେତିଙ୍କ ଅଣ୍ଡୟାଗେ ମାଡ଼ି ଇଦ୍ ଚିଟି ହିଡ଼ତଡ଼ ।

୩୧ ଆଗେ ବିଶ୍ୱାସୀଡ଼ ଚିଠିତାଦ୍ ସାରଦେ ସମ୍ବାଦ କାରସ୍ ଝେଡ଼କେ ଆଡ଼ତଡ଼ ।

୩୨ ଯିହୁଦା ନୁ ଶୀଲା ନିଜେ ବାବବାଦୀ ମାଡ଼ତଡ଼ । ଅଡ଼ ଆଣ୍ଟିୟୋକ୍‌ତେ ବିଶ୍ୱାସୀ ଦାଦାଲଡ଼କ୍ ନାରଗେ ଦିନାମ୍ ଝେଡ଼କା ମାଡ଼ି ଅଡ଼ାଦ୍ ବିଶ୍ୱାସ୍‌ତିଙ୍କ ଦୃଡ଼ ମାଡ଼ତଡ଼ ।

୩୩ ଆଗେ ବେସକେ ଦିନାମ୍ ମାଡ଼ତେ ପେରକେ ବେନଡ଼ ଅଡ଼କିଂଙ୍କ ରହସ୍‌ମାଡ଼ତଡ଼, ଅଡ଼ ବକେଡ଼ ମାଲ୍‌ସ୍ ଆଦାନ୍ ମାଇଦିଙ୍କ ବିଶ୍ୱାସୀଡ଼, ଦାଦାଲଡ଼ ଅଡ଼କିଂଙ୍କ ଶାନ୍ତିତେ ବିଦାୟ ହିଡ଼ତଡ଼ ।

୩୪ ଇଡ଼କେ ଶିଲା ଆଗେ ମାନ୍ଦାନଙ୍କ ସାୟେ ହେର୍କା ମାଡ଼ତଣ୍ଡ ।

୩୫ ପାଉଲ୍ ନୁ ବର୍ଣ୍ଣବା ଅନୁଧ୍ୟୋକ୍ତାର ବେସକେ ଦିନାମ୍ ମାଞ୍ଜି ନାରଗେ ନାରୁଡ୍ ତଡ୍ କାଇଲି ପ୍ରବୁନ୍ ସୁସମାରାର ପ୍ରଚାର ମାଡ୍ତଡ୍, ନୁ ଶିକ୍ଷା ହିଡ୍ତଡ୍ ।

ପାଉଲ୍ ନୁ ବର୍ଣ୍ଣବା ଝେର୍ଆଡ୍ତଡ୍

୩୬ ବେସକେ ଦିନା ପେରକେ ପାଉଲ୍ ବର୍ଣ୍ଣବାଙ୍କ କେଡ୍ତଡ୍, “ଦା, ମାନାଡ୍ ମାଲ୍ସ ଆଦିକାଡ୍, ସାରେ ଟାଞ୍ଜୁନ୍‌କିନାଗ୍ ବିଶ୍ୱାସୀଡ୍ ବେନଡ୍ ପ୍ରବୁନ୍ ବାକ୍ୟ କେଡ୍ତଡ୍, ଅଡ୍‌କିଂ କାଇଲିକାଡ୍, ନୁ ଅଡ୍, ବେଲା ମିନ୍ଦେଡ୍ ଉଡ୍‌କାଡ୍ ।

୩୭ ବର୍ଣ୍ଣବା ଅଡ୍ ତଡ୍ ଯୋହନ୍ ମାର୍କଙ୍କ ମିକା ତାନଡ୍ ଆଦାନଙ୍କ ଇଚ୍ଛା ମାଡ୍‌ମାଡ୍ତଡ୍;

୩୮ ☆ ଇଡ୍‌କେ ପାଉଲ୍ ଅଂକିଙ୍କ ଆଦାନଙ୍କ ଲେକାମ୍ ହେର୍କା ମାଡ୍ତଡ୍; ବାତେଙ୍କଇଡ୍‌କେ ଅଣ୍ଟ ମୁନେଙ୍କଦାମ୍ ପାଡ୍‌ୟିତାର ଆଦାନଝେଲେ ଅଡ୍‌କିଂ ପଂପୁଲିୟାତାର ଓଡ୍‌ସି ଆଞ୍ଜି ମାଡ୍ତଡ୍ ।

୩୯ ଇଡ୍ ବିଷୟତେ ଗାଟି ଯୁକ୍ତିତର୍କ ଆଡ୍‌ତଡ୍, ନୁ ସାଇପ୍ରସ୍ ଅଡ୍, ଝେର୍ଆଡ୍‌ତଡ୍ । ବର୍ଣ୍ଣବା ମାର୍କଙ୍କ ପଇସ୍ କୁପ୍ରତାର ଏର୍ଦାଲା ଝାଡ୍‌ତଡ୍ ।

୪୦ ଇଡ୍‌କେ ପାଉଲ୍ ଶୀଲାଙ୍କ ହେଞ୍ଜଡ୍ ନୁ ବିଶ୍ୱାସୀଡ୍ ତଡ୍, ପ୍ରବୁନାଗ୍ ଅନୁଗ୍ରହ ହାସ୍ ଦବ୍ ଆଡ୍‌ତଡ୍ ।

୪୧ ଅଣ୍ଟ ମଣ୍ଡଲିକିଙ୍କ ତୁଟାଙ୍କ ମାଡ୍‌ସିରିଆ ନୁ ସିଲିଷୀଆ ନାଡ୍‌ମେଙ୍କ ଆଡ୍‌ତଡ୍ ।”

୧୭

ପାଉଲ୍ ନୁ ଶିଲାନ ତଡ୍ ତାମତି ଆଡ୍‌ତଡ୍

୧ ପାଉଲ୍ ଦର୍ବୀ ନୁ ଲୁସ୍ତାତାର ଆଡ୍‌ତଡ୍ । ଆଗେ ତାମତି ପେଦେର୍‌ତଡ୍ ଝେରଣ୍ଟ କ୍ରିଷ୍ଟିୟାନ୍ ବାସେ ମାଡ୍‌ମାଡ୍‌ତଡ୍ । ଅଣ୍ଟ ଝେରଣ୍ଟ କ୍ରିଷ୍ଟି ବିଶ୍ୱାସୀ ଶିଷ୍ୟ ଇହୁଦୀ ନାଟାଡ୍‌ତେ ମାର୍ । ଇଡ୍‌କେ ତାମ୍ ବାବାଙ୍କ ଝେରଣ୍ଟ ଗ୍ରୀକ୍ ନାରୁଣ୍ଟ ମାଡ୍‌ତଡ୍ ।

୨ ଲୁସ୍ତା ନୁ ଇକନିୟାତାର ମାନ୍ଦାନ୍ ବିଶ୍ୱାସୀଡ୍, ଲୋପେଙ୍କ ତାମତିଙ୍କ ଗାଟି ସାୟେତଡ୍ ଇଞ୍ଜ ପୁଞ୍ଜି ମାଡ୍‌ତଡ୍ ।

☆ ୧୫:୩୮ ପ୍ରେରିତ ୧୩:୧୩.

୩ ପାଉଲ୍ ତାନ୍ ତତ୍ ତୀମତିଙ୍କ ଆଦାନଙ୍କ ଇଚ୍ଛା ମାଡ଼ତଣ୍ଡ, ଆଦିଙ୍କ ଅଂକିଙ୍କ ସୁନ୍ଦତ୍ ମାଡ଼ତଣ୍ଡ । ଇଲା ମାଡ଼ାନାଦ୍ କାରନ୍ ଆଡ଼ତେ, ତୀମତିନ୍ ବାବାଲ୍ ଗ୍ରୀକ୍ ନାରୁଣ୍ଡ ମାଡ଼ତଣ୍ଡ ଇଞ୍ଜ ଆଗେ ମାନ୍ଦାନଡ଼, ଇହୁଦୀଡ଼ ପୁଞ୍ଜମାଡ଼ତଡ଼ ।

୪ ନାରଗେ ଟାଞ୍ଜୁନକିନ୍ ଲୋପେଙ୍କ ଇସ୍ ଆଦାନ୍ ଝେଲେ ବିଶ୍ୱାସୀଡ଼କ୍ ଯିରୁଶାଲେମ୍‌ତେ ପ୍ରେରିତ ଶିଷ୍ୟ ନୁ ବାଡ଼ୟେ ନେତାଲଡ଼, ହିଡ଼ତେ ନିତିନିୟମ୍ ସାରେ ବୁଜାମାଡ଼ି, ଆଞ୍ଜିଙ୍କ ପାଲନ୍ ମାଡ଼ାନଙ୍କ କେସମାଡ଼ତଡ଼ ।

୫ ଆଗାଙ୍କ ମଣ୍ଡଲିକି ବିଶ୍ୱାସ୍‌ତେ ଶକ୍ତ ଆଡ଼ତା ନୁ ନିଡ଼ଦିନ୍ ଆଞ୍ଜିନ୍ ସଂଖ୍ୟା ନାଗେ ଆଡ଼ତା ।

ତ୍ରୋୟାତାଗ୍ ପାଉଲ୍‌ତେ ଦର୍ଶନ୍

୬ ପବିତ୍ର ଆମ୍ବା ଅଡ଼କିଂଙ୍କ ଏସିଆ ପ୍ରଦେଶ୍‌ତାଗ୍* ପ୍ରଚାର ମାଡ଼ାନଙ୍କ ଗର୍ ହିଞ୍ଜାଙ୍କ ଅଡ଼ ଫୁଗିୟା ନୁ ଗାଲାତୀୟ ଜାଗେତାଗ୍ ଆଡ଼ତଡ଼ ।

୭ ମିଷୀଆତେ ସୀମାତାଗ୍ ହେଞ୍ଜୁସ୍ ବିଥିନିଆ ପ୍ରଦେଶ୍‌ତାଗ୍ ଆଦାଙ୍କ ପେୟ୍‌ତେ ଝେଲେ ଜିସୁନାଦ୍ ଆମ୍ବା ଅଡ଼କିଂଙ୍କ ଆନୁମତି ହିଞ୍ଜ ।

୮ ଆଦିଙ୍କ ଅଡ଼ ମିଷୀଆତେ ନାଡ଼ମେଙ୍କ ଆଞ୍ଜି ତ୍ରୋୟାତାଗ୍ ଆଡ଼ତଡ଼ ।

୯ ଆଦେନାଣ୍ଡ ନାରକେ ପାଉଲ୍ ଅଣ୍ଡୟ୍ ଦର୍ଶନ୍ ଉଡ଼ତଣ୍ଡ ଯେ, ମାସିଦୋନିଆତେ ଝେରଣ୍ଡ ନାରୁଣ୍ଡ ଅନୁରଦ୍ ମାଡ଼ି କେଡ଼ୁତଣ୍ଡ, “ମାସିଦୋନିଆତାଗ୍ ଝାସ୍ ମାକିଂଙ୍କ ସାହାଯ୍ୟ ମାଡ଼େ !”

୧୦ ପାଉଲ୍ ଇଦ୍ ଦର୍ଶନ୍ ଉଡ଼ତେ ସାଙ୍ଗେ ସାଙ୍ଗେ ମାସିଦୋନିଆତାଗ୍ ଆଦାନଙ୍କ ମାମ୍‌ମେ ତିଆର୍ ଆଡ଼ତମ୍, ବାତେଙ୍କଇଡ଼କେ ମାମ୍‌ମେ ନିଜାମ୍ ପୁଡ଼ତମ୍ ଯେ, ଇଶ୍‌ବର ଆଗେଡ଼ ନାରୁଡ଼ ଲୋପେ ସୁସମାଚାର୍ ପ୍ରଚାର ମାଡ଼ାନଙ୍କ ମାକିଂଙ୍କ କାରୁଙ୍କତଣ୍ଡ ।

ଫିଲିପ୍‌ପୀତାଗ୍ ଲୁଦିଆ ମନ୍ ବାଦ୍‌ଲା ମାଡ଼ତଣ୍ଡ

୧୧ ମାମ୍‌ମେ ଏରଜାହାଜ୍ ତଡ଼ ତ୍ରୋୟାତିଙ୍କ ଷ୍ଟିଡ଼ସି ସାମତ୍ରାକିତାଗ୍ ଆଡ଼ତମ୍ ନୁ ମେଣ୍ଡେଅଣ୍ଡ ଦିନ୍ ନିଆପଲ୍ଲିତାଗ୍ ହେଞ୍ଜୁଡ଼ତମ୍ ।

* ୧୭:୭ ରୋମୀୟ ସାମ୍ରାଜ୍ୟର ସ୍ଥାନ ଗୁଡ଼ିକ ବୁଝାଏ ।

୧୨ ଆଗାଙ୍କ ମାମ୍ମେ ମାସିଦୋନିଆ ଜିଲ୍ଲାରେ ମୁକ୍ୟ ନଗରୀ ଫିଲିପ୍ପୀନାଗ୍ ଆଡ଼ତମ୍ । ଇଦ୍ ନଗରୀ ଅଣ୍ଡୟ ରୋମୀୟ କଲ୍ଲନୀ ମାଡ଼ତେ । ମାମ୍ମେ ନାର୍ଗେ ଦିନା ଆଗେ ମାଡ଼ତମ୍ ।

୧୩ ବିଶ୍ୱାମ୍ବିନେ ନଗରରେ ବାୟିଦେ ମାୟାନ୍ ବେଡେମ୍ ହାସ୍ତିନାଗ୍ ଆଡ଼ତମ୍ । ମାମ୍ମେ ହାଲ୍ଲସି ମାଡ଼ତମ୍, ଆଗେ ଇହୁଦୀଡ଼ ପ୍ରାର୍ଥନା ମାଡ଼ାନ ସେଙ୍ଗେ ଅଣ୍ଡୟ ପଡ଼ୟି ମାନ୍ତେ । ମାମ୍ମେ ମଦଲ୍ କୁଦତମ୍ ନୁ ଆଗେ ଗୁଡ଼ିମାୟାନ୍ ନାଟାକିନ୍ ତଡ଼ଗଟି ତ୍ରିୟତମ୍ ।

୧୪ ଆସିନ୍ ଲୋପେଙ୍କ ତୁୟଟୀରା ଗାସ୍ତୁନରେ ଆପାକଲର୍ ତାଝି ସିଲେ ଖାମ ମାୟାନ୍ ଲୁଦିଆ ପେଦେରେ ଅଣ୍ଡୟ ନାଟାଡ଼ ମାଡ଼ତେ । ଆଦ୍ ଇଶ୍ୱରତିଙ୍କ ଉପାସନା ମାଡ଼ମାଡ଼ତେ ନୁ ପାଉଲ୍ ବାଡ଼ କେସମାଡ଼ତେ, ଆଦ୍ ମନ୍ଇସ୍ କେଞ୍ଜି ଗ୍ରହନ୍ ମାଡ଼ାନ ସେଙ୍ଗେ ପ୍ରବୁ ଆଦିଙ୍କ ହୁଦୟତାଗ୍ ସୁୟୋଗ୍ ହିଡ଼ତଣ୍ ।

୧୫ ଆଦ୍ ନୁ ତାମ୍ ପରିବାରରେ ସାରେତଡ଼ ଏରଦିକ୍ଷା ଆଡ଼ତେ ପେରକେ ମାକିଂଙ୍କ ଅନୁରଦ୍ ମାଡ଼ି କେଡ଼ତଡ଼, “ପ୍ରବୁନାଗ୍ ନିଜାମ୍ ବିଶ୍ୱାସ୍ ମିନ୍ଦେ ଇଞ୍ଜି ଯଦି ଆଲ୍‌ସୁତି, ଆଲେକେ ମା ଲୋନ୍ ଖାସ୍ ମାନୁର୍ ।” ଆଦ୍ ଇଦ୍‌ରକମ୍ ମାକିଂଙ୍କ ତାମ୍ ଲୋନ୍ ଆଦାନଙ୍କ କେଡ଼ତେ ।

ଫିଲିପ୍ପୀ ଜଇଲ୍‌ତାଗ୍ ପାଉଲ୍ ନୁ ଶିଲା

୧୬ ଅଣ୍ଡିନ୍ ମାମ୍ମେ ପ୍ରାର୍ଥନା ପଡ଼ୟେତାଗ୍ ଆଦାନ୍ ଖେଲେ ଅଣ୍ଡୟ କ୍ରୀତଦାସୀ ପିକିଡ଼ିଙ୍କ କାଇଲ୍‌ତମ୍ । ତାନ୍ ଲୋପେ ମାୟାନ୍ ଦେୟାମ୍‌ତଡ଼ ଆଦ୍ ମୁନେଙ୍କତାସ୍ତୁ ଗଟି କେସମାଡ଼ତେ । ଆଦ୍ ନାରୁଡ଼ାଝି ବାଗ୍ୟ କେସ୍, ପ୍ରବୁନ୍ ସେଙ୍ଗେ ନାର୍ଗେ ଡାବ୍‌କ୍ ଗାଡ଼ସ୍ ମାଡ଼ତେ ।

୧୭ ଆଦ୍ ପାଉଲ୍ ନୁ ମା ପେରକେ ପେରକେ ଖାସ୍ କିଡ଼କି କେଡ଼ତେ, “ଇ ନାରୁଡ଼ ସାରେତିଙ୍କ ବାଡ଼ୟଣ୍ ଇଶ୍ୱରରେ ଦାସକାନଡ଼ । ମିଡ଼ ବେଲା ପରିତ୍ରାଣ୍ ପାଏମ୍ ଆଦତିଡ଼, ଆଦ୍ ଗଟ୍ ଅଡ଼ କେଡୁଡ଼ ।”

୧୮ ପିକିଡ଼ ନାର୍ଗେ ଦିନାୟାକ ଇଦ୍‌ରକମ୍ ମାଡ଼ତେ । ପେରକେ ପାଉଲ୍ କାଡ଼ାମ୍‌ହାସ୍ ପେରକେ ମାଲ୍‌ସ୍ ଦେୟାମ୍‌ତିଙ୍କ ଦମକ୍ ଇସ୍ କେଡ଼ତଣ୍, “ଜିସୁ କ୍ରିଷ୍ଟନ୍ ପେଦେରେ ନାନ୍ ଆଦେଶ୍ ଇଦୁତାନ୍, ତାନାଗାଙ୍କ ପେଇସ୍ ଅନ୍,” ଆସୁଟେ ସାଙ୍ଗେ ସାଙ୍ଗେ ଦାୟାମ୍ ଆଦିନାଗାଙ୍କ ପେଇସ୍ ଆଡ଼ତେ ।

୧୯ ବେସୁର୍ ତାନ୍ ପ୍ରବୁନ୍ ନିଜେତ ଡାବକ୍ ଗାଡ଼ସାନ୍ ଆଗେ ହରାମାଡ଼ତଡ଼ ଇଞ୍ଜ ପୁଡ଼ତଡ଼, ପାଉଲ୍ ନୁ ଶୀଲାଙ୍କ ପଇସ୍ ଟାଞ୍ଜୁନ୍ତେ ନାଡ଼ମେ ମାନ୍ଦାନ୍ ଶାସନ୍ କର୍ତ୍ତାନ୍ ମୁନ୍ନେ ତାଡ଼ତଡ଼ ।

୨୦ “ଅଡ଼ ରୋମୀୟ ଶାସନ୍ କର୍ତ୍ତାନ୍ ମୁନ୍ନେ ତାସ୍ କେଡ଼ତଡ଼, ଇ ନାରୁଡ଼ ଇହୁଦୀ, ଅଡ଼ ମାନ୍ ଟାଞ୍ଜୁନ୍ତାଗ୍ ଗୋଲ୍ଲକ୍ ମାଡ଼ତୁଡ଼ ।

୨୧ ଅଡ଼ ମାନ୍ ନିୟମ୍ ବିରୁଦ୍ ରୀତିନୀତି ନାଡ଼ସ୍ପୁଡ଼ତଡ଼ । ମାମ୍ମେ ରୋମ୍ ନାଗରିକ, ଆଦିଙ୍କ ଇଦ୍ ରୀତିନୀତି ଗ୍ରହନ୍ ମାଡ଼ାଙ୍କ ପାର୍ବମ୍ ଆଞ୍ଜିଙ୍କ ମାମ୍ମେ ପାଲନ୍ ମାଡ଼ାଙ୍କ ପାର୍ବମ୍ ।

୨୨ ମାଲିକିଡ଼ ଗର୍ତ୍ତାଗ୍ କାଇଲି ଆଗେ ମାନ୍ଦାନ୍ ନାରୁଡ଼ ପାଉଲ୍ ନୁ ଶିଲାନ୍ ବିରୁଦ୍ତେ ତେଦ୍ତଡ଼ । ପାଉଲ୍ ନୁ ଶିଲାନ୍ ତକା କୁସ୍ପି ଅଡ଼କିଙ୍କ ବେତଡ଼ତଡ଼ ତଡ଼ ରେଏତାଙ୍କ ଶାସନ୍ କର୍ତ୍ତାଗ୍ ଗର୍ ହିଡ଼ତଣ୍ଡ ।

୨୩ ନାରଗେ ଦେବ୍ ତିଡ଼ତେ ପେରକେ ଅଡ଼କିଙ୍କ ଜଇଲ୍ତାଗ୍ ଝାବ୍ତଡ଼ ନୁ ଅଡ଼କିଙ୍କ କୁସ୍ ଝାଟି ଉଡ଼ାନ୍ ସେଙ୍ଗେ ଜଇଲ୍ତରକ୍ଷା ମାଡ଼ାନଙ୍କ ନିର୍ଦ୍ଦେଶ୍ ହିଡ଼ତଣ୍ଡ ।

୨୪ ଇଦ୍ ଗର୍ ପାଏମ୍ ଆସ୍ ଜଇଲ୍ତରକ୍ଷକ୍ ଅଡ଼କିଙ୍କ ଅଣ୍ଡୟ୍ ଲୋପେଡ଼ ବାକ୍ତେତାଗ୍ ଝାବ୍ତଣ୍ଡ, ପୁଃଉତେ ମଟ୍ଟାଗ୍ ଅଡ଼ାଞ୍ଜି ତେକାକିଙ୍କ ତଅସିଡ଼ତଡ଼ ।”

୨୫ ନାଟ୍ନାକେ ପାଉଲ୍ ନୁ ଶୀଲା ପ୍ରାର୍ଥନା ମାଡ଼ମାଡ଼ତଡ଼, ଇଶ୍ବର ଉଦ୍ଦେଶ୍ୟତେ ପାଟା ପାରମାଡ଼ତଡ଼ ନୁ ବାଗାଡ଼ ବନ୍ଦିଡ଼ ଇଦ୍ କେଞ୍ଜି ମାଡ଼ତଡ଼ ।

୨୬ ହଟାଡ଼ ବୁଫିକମ୍ ଆଡ଼ତେ ନୁ ଜଇଲ୍ତେ ମୂଲଦୁଆତିଙ୍କ ଉଃହୁତେ । ସାଙ୍ଗେ ସାଙ୍ଗେ ସାରେ ମାର୍ କୁଲେମ୍ ଆଡ଼ତେ ନୁ ସାରେ ବନ୍ଦି ଆଦତନ୍ ଅଡ଼ାଦ୍ ଇକ୍ଲେମ୍ କୁସି ରାୟତା ।

୨୭ ତାନେରକ୍ଷା ମାଡ଼ାନଣ୍ଡ ଉଞ୍ଜି ତେଏଦ୍ତଣ୍ଡ ନୁ ଜଇଲ୍ତେ ମାର୍ କୁଲେମ୍ ମାନ୍ଦାନାଦ୍ ଉଡ଼ି ହାଲ୍ସତଣ୍ଡ ଯେ ବନ୍ଦିଡ଼ ମିରଡ଼ତଡ଼; ଆଦିଙ୍କ ଅଣ୍ଡ ତାନ୍ ସାକୁ ପେସ୍ପିଇ ଆଞ୍ଜକାନଙ୍କ ତିଆର୍ ଆଡ଼ତଣ୍ଡ ।

୨୮ ଇଡ଼କେ ପାଉଲ୍ ଗାଟି ଲେଙ୍ଗ୍ଦେ କେଡ଼ତଣ୍ଡ, “ନିଜେ ବାଡ଼ କ୍ଷତି ମାଡ଼ମା । ମାମ୍ ସାରେତମ୍ ଇଗେ ମିନ୍ଦେମ୍ !”

୨୯ ତାନେରକ୍ଷା ମାଡ଼ାନଣ୍ଡ ତୁବିତାସ୍ ଉଡ଼ତଣ୍ଡ ନୁ ଲୋପେ ମିରିଝାସ୍ ଝାଡ଼କି ଝାଡ଼କି ପାଉଲ୍ ନୁ ଶୀଲାନ୍ ତେକେଡ଼ ମଦଲ୍ ରାୟତଣ୍ଡ ।

୩୦ ତାନ୍ ପେରକେ ଅଡ଼କିଂଙ୍କ ବାୟିଦେ ଆସ୍ ପାତ୍ରା ମାଡ଼ତଣ୍ଟ,
“ଆଜ୍ଞାଲଡ଼ି ! ପରିତ୍ରାଣ୍ ପାଏମ୍ ଆଦାନଙ୍କ ନାକିଂଙ୍କ ବାଡ଼ ମାଡ଼େ
ଝେୟଡ଼ିଡ଼ ?”

୩୧ ଅଡ଼ ଉତ୍ତର ହିଡ଼ତଡ଼, “ପ୍ରବୁ ଜିସୁନାଗ୍ ବିଶ୍ୱାସ୍ ମାଡ଼କେ ମିଇ
ପରିବାରତେ ସାରେ ତଡ଼କିଂଙ୍କ ପରିତ୍ରାଣ୍ ଦରକିଡ଼ ।”

୩୨ ତାନ୍ପେକେ ଅଡ଼ ଅଂକିଂଙ୍କ ନୁ ତାମ୍ ଲନ୍ ତେତାନଡ଼କିଂଙ୍କ
ସାରେତଡ଼କ୍ ପ୍ରବୁନ୍ ଗର୍ କେଡ଼ତଡ଼ ।

୩୩ ନାରକେଡ଼ ଆଦେ ସାଙ୍ଗେ ସାଙ୍ଗେ ତାନେରକ୍ଷା ମାଡ଼ାନଣ୍ଟ
ଅଡ଼କିଂଙ୍କ ଆସ୍ ଅଡ଼ାସ୍ତୁ ପୁଣ୍ଟକ୍ ସାରେ ନରସିଡ଼ତଣ୍ଟ, ମେଣ୍ଟେ
ପରିବାରତେ ସାରେତଡ଼ ସାଙ୍ଗେ ସାଙ୍ଗେ ଏରଦିକ୍ଷା ଗ୍ରହନ୍ ମାଡ଼ତଡ଼ ।

୩୪ ତାନ୍ପେକେ ଅଣ୍ଟ ପାଉଲ୍ ନୁ ଶିଲାଙ୍କ ତାନ୍ ନିଜେଡ଼ ଲୋନ୍ ଆସ୍
ତିନାନଙ୍କ ହିଡ଼ତଣ୍ଟ । ଇଶ୍ୱରତାଗ୍ ବିଶ୍ୱାସ୍ ମାଡ଼ିମାନ୍ଦାନ୍ ମାଇଦିଂଙ୍କ ଅଣ୍ଟ
ନୁ ତାନ୍ ପରିବାରତେ ସାରେତଡ଼ ଝେଡ଼କ୍ତଡ଼ ।

୩୫ ମେଣ୍ଟେଅନ୍ ଦିନ୍ ନାରକକ୍ ରୋମୀୟ ଶାସନ୍ କର୍ତ୍ତାଲ୍
ସିପାହିଡ଼କ୍ ଇଦ୍ ଗର୍ ଇସ୍ ରହଡ଼ତଣ୍ଟ, “ଆ ନାରୁଡ଼କିଂଙ୍କ ଝିଡ଼ସିମୁର୍
।”

୩୬ ଆଦିଂଙ୍କ ଜଇଲ୍‌ରକ୍ଷକ୍ ପାଉଲ୍‌ଡିଂଙ୍କ କେଡ଼ତଣ୍ଟ, “ଶାସନ୍ କର୍ତ୍ତାଲ୍
ନିକିଂଙ୍କ ନୁ ଶିଲାଙ୍କ ମୁକ୍ତି ମାଡ଼ାନଙ୍କ ଗର୍ ହିଡ଼ତଣ୍ଟ । ଇଞ୍ଜେ ମିଡ଼ ଇଗାଙ୍କ
ଶାନ୍ତିତେ ଆଦପାରୁଡ଼ିଡ଼ ।”

୩୭ ଇଡ଼କେ ପାଉଲ୍ ସିପାହିଡ଼କ୍ କେଡ଼ତଣ୍ଟ, “ବାଡ଼ ଅପରାଦିତାଗ୍
ଦକ୍ଷି ଆୟ୍‌ଝେ ମାଡ଼କେ ଗାଲା ଅଡ଼ ମାକିଂଙ୍କ ରେହେଡ଼ତଡ଼ । ମାମ୍‌ମେ
ରୋମୀୟ ନାଗରିକ, ଇଡ଼କେବା ଅଡ଼ ମାକିଂଙ୍କ ବନ୍ଦି ମାଡ଼ତଡ଼ ।
ଇଞ୍ଜେ ମାକିଂଙ୍କ ମିଞ୍ଜିସ୍ତି ଝିଡ଼ସିଦାଙ୍କ ହାଲ୍‌ସୁତଡ଼ । ମାମ୍‌ମେ ଇଦ୍
ମାଡ଼ାନଙ୍କ ଇଝମ୍ । ରୋମୀୟ ଶାସନ୍ କର୍ତ୍ତାଲ୍ ନିଜେ ଇଗେ ଝାସ୍
ମାକିଂଙ୍କ ମୁକ୍ତି ମାଡ଼ିଝିଣ୍ଟ ।”

୩୮ ସିପାହୀଡ଼ ରୋମୀୟ ଶାସନ୍ କର୍ତ୍ତାଙ୍କ ଇଦ୍ ଗର୍ କେଡ଼ତଡ଼ ।
ପାଉଲ୍ ନୁ ଶିଲା ରୋମୀୟ ନାଗରିକ ଇଞ୍ଜ କେଞ୍ଜି ଅଡ଼ ଝେରଡ଼ତଡ଼ ।

୩୯ ତାନ୍ପେକେ ଅଡ଼ ଗାରରେ କ୍ଷମା ପ୍ରାର୍ତନା ମାଡ଼ତଡ଼ ନୁ ଅଡ଼କିଂଙ୍କ
ଜଇଲ୍‌ତାଗାଙ୍କ ମୁକ୍ତି ମାଡ଼ି ଟାସୁନ୍ ଝିଡ଼ସି ଆଦାନଙ୍କ ଅନୁରଦ୍ ମାଡ଼ି
କେଡ଼ତଣ୍ଟ ।

୪୦ ପାଉଲ୍ ନୁ ଶିଲା କାରାଗାର ଝିଡ଼ି ଲୁଦିଆନ୍ ଲୋନ ଆଡ଼ତଡ଼୍ । ଆଗେ ଅଡ଼୍ ବିଶ୍ୱାସୀଡ଼୍ କାଲ୍ଲତଡ଼୍ ନୁ ଅଡ଼୍ କିଂଙ୍କ୍ ଖେଡ଼୍ କା ମାଡ଼ି ଆଦ୍ ପଡ଼୍ ଯେ ଝିଡ଼୍ ଯତଡ଼୍ ।

୧୭

ଥେସଲନିକୀତାଗ୍ ସେବାପାଡ଼୍ ଯି

୧ ପାଉଲ୍ ନୁ ଶିଲା ଆମ୍ବିପଲି ନୁ ଆପଲ୍ଲେନିଆ ଇସ୍ ଥେସଲନିକୀତାଗ୍ ଝାଡ଼ତଡ଼୍ । ଆଗେ ଅଣ୍ଡ୍ ଇହୁଦୀ ଉପାସନା ମାଡ଼ତେ ।

୨ ପାଉଲ୍ ତାନ୍ ଦର୍ମଶାସ୍ତ୍ର ଲେକାମ୍ ଗୁଡ଼୍ ଯିତାଗ୍ ଆଡ଼ତଡ଼୍ । ଆଗେ ମୁଣ୍ଡ୍ ବିଶ୍ୱାମ୍ବାରତେ ନାରୁଡ଼୍ ତଡ଼୍ ଅଣ୍ଡ୍ ଆଲୋଚନା ମାଡ଼ତଡ଼୍,

୩ ଦର୍ମଶାସ୍ତ୍ର ଉଲ୍ଲେଖ ନୁ ବାକ୍ୟା ମାଡ଼ି ପ୍ରମାଣ୍ ମାଡ଼ତଡ଼୍ ଯେ, ମସୀହ୍ ଦୁକାମ୍ ବୋଗ୍ ଆଦାନାଦ୍ ନୁ ଡଲ୍ ତାଗାଙ୍କ୍ ଡେଏଦାନାଦ୍ ଦରକାର୍ ମାଡ଼ତେ । ପାଉଲ୍ କେଡ଼ତଡ଼୍, “ବେନ୍ ଜିସୁନ୍ ବିଷୟ୍ ନାନନେ ଗଷନା ମାଡ଼ତାନ୍, ଅଣ୍ଡ୍ ଆ ମସିହ୍ ।”

୪ ଅଡ଼୍ ଲୋପେଙ୍କ୍ ବେସ୍ କୁଡ଼୍ ଇଦ୍ ବିଶ୍ୱାସ୍ ପାଉଲ୍ ନୁ ଶିଲା ତଡ଼୍ କାଲ୍ଲତଡ଼୍; ଆଦେପୁରୁଙ୍କ୍ ନାରଗେ ବାଡ଼୍ ଯେ ନାଟାଙ୍କ୍ ନୁ ଇଶ୍ୱରତିଙ୍କ୍ ଉପାସନା ମାଡ଼ାନ୍ ଗ୍ରୀକ୍ ନାରୁଡ଼ାଦ୍ ଅଣ୍ଡ୍ ବେଡ଼୍ ଯାଦ୍ ମାନ୍ଦେ ମିକା ଅଡ଼୍ ତଡ଼୍ କାଲ୍ଲତେ ।

୫ ଇଡ଼୍ କେ ଇହୁଦୀଡ଼୍ ଇର୍ଷା ମାଡ଼ତଡ଼୍ ନୁ ବେସ୍ କୁଡ଼୍ କାରାପ୍ ନାରୁଡ଼୍ କିଂଙ୍କ୍ ଅଣ୍ଡ୍ ଯାଗେ ମାଡ଼ି ସାରେ ଟାଞ୍ଜୁନତାଗ୍ ଗୋଲ୍ଲ୍ ମାଡ଼ତଡ଼୍ । ଅଡ଼୍ ପାଉଲ୍ ନୁ ଶିଲାଙ୍କ୍ ମେହେକି ନାରୁଡ଼୍ ମୁନ୍ନେ ତାତାନ୍ ମାଲ୍ ଦିଙ୍କ୍ ଯେସନ୍ ପେଦେରତଡ଼୍ ଖେରଣ୍ ନାରୁନ୍ ଲନ୍ ତିଙ୍କ୍ ଆଞ୍ଜ୍ ଚିଟିରମନ୍ ମାଡ଼ତଡ଼୍ ।

୬ ଇଡ଼୍ କେ ଆଗେ ପାଉଲ୍ ନୁ ଶିଲା ଦରକ୍ ଝାଙ୍କ୍, ଅଡ଼୍ ଯେସନ୍ ନୁ ମେଣ୍ଡେ ବେସ୍ କୁଡ଼୍ ବିଶ୍ୱାସୀଡ଼୍ ନଗରତେ ଶାସନ୍ କର୍ତ୍ତାନ୍ ବକେଡ଼୍ ପିଡ଼୍ ଲି ଆସ୍ ଗାଟି ଲେଙ୍ଗ୍ ଦେ କେଡ଼ତଡ଼୍, “ଇଡ଼୍ ନାରୁଡ଼୍ ଜଗଡ଼୍ ସାରେକାମ୍ ଗୋଲ୍ଲ୍ ମାଡ଼ତୁଡ଼୍ ! ଇଞ୍ଜେ ଅଡ଼୍ ମାନ୍ ଟାଞ୍ଜୁନତାଗ୍ ଝାଡ଼ତଡ଼୍,

୭ ମେଣ୍ଡେ ଯେସନ୍ ଅଡ଼କିଂଙ୍କ ତାମ୍ ଲୋନ୍ ନେଃଏତଣ୍ । ଜିସୁ ପେଦେବ୍‌ତେ ମେଣ୍ଡେ ଝେରଣ୍ ରାଜାଲ୍ ମିନ୍ଦେଣ୍ ଇଞ୍ଜ କେସ୍ ଅଡ଼ କାଇସର୍ ମହାରାଜା ତେ ସାରେ ନିୟମ୍‌ତିଙ୍କ ବିରୁଦ୍ ମାଡ଼ତୁଡ଼ ।”

୮ ଇଦ୍ ଗର୍ କେସ୍ ଅଡ଼ ନାରୁଡ଼ ନୁ ଶାସନ୍ କର୍ତ୍ତାଲ୍‌ଡ଼ ଲୋପେ ଗାଟି କପାମ୍ ନୁ ଗଲ୍‌କ୍ ମାଡ଼ତଡ଼ ।

୯ ଶାସନ୍ କର୍ତ୍ତାଲ୍‌ଡ଼ ଯେସନ୍ ନୁ ବିଶ୍ୱସୀଡ଼ାଗାଙ୍କ ତାବ୍‌କ୍ ଆସ୍ ଅଡ଼କିଂଙ୍କ ଜାମିନ୍* ମାଡ଼ି ଝିଡ଼ସିଡ଼ତଡ଼ ।

ବେରିଆତାଗ୍ ସେବାପାଡ଼୍‌ସି

୧୦ ନାର୍‌କା ଆଡ଼ତାଙ୍କ ବିଶ୍ୱାସୀଡ଼ ପାଉଲ୍ ନୁ ଶୀଲାଙ୍କ ବେରିଆତାଗ୍ ରହସିଡ଼ତଡ଼ । ଅଡ଼ ଆଗେ ହେଝୁସ୍ ଇହୁଦୀଡ଼ ପ୍ରାର୍ଥନାତାଗ୍ ଆଡ଼ତଡ଼ ।

୧୧ ଥେସଲନିକୀତେ ନାରୁଡ଼ାଗାଙ୍କ ଆଗେଡ଼ ନାରୁଡ଼ ଅଦିକ୍ ଦୟାବାନ୍ ମାଡ଼ତଡ଼ । ଅଡ଼ ଗାଟି ଆଗ୍ରହତଡ଼ ଶିଷ୍ୟତାଦ୍ ଶିକ୍ଷା କେଞ୍ଜିତଡ଼ ନୁ ପାଉଲ୍‌ତାଦ୍ ପାତ୍ରାମାଡ଼ି ଗର୍‌ତେ ସଡ଼ ପୁନ୍ଦାନ୍ ମାଇଦିଙ୍କ୍ ଅଡ଼ ନିତାଲ୍ ଦର୍ମଶାସ୍ତ୍ର କାରତଡ଼ ।

୧୨ ଅଡ଼ ଲୋପେଙ୍କ ନାର୍‌ଗେ ନାରୁଡ଼ ବିଶ୍ୱାସ୍ ମାଡ଼ତଡ଼ । ନାର୍‌ଗେ ଗ୍ରୀକ୍ ନାଟାଙ୍କ ନୁ ଗ୍ରୀକ୍ ନାରୁଡ଼ ବିଶ୍ୱାସ୍‌ତଡ଼ କାଇଲ୍‌ତଡ଼ ।

୧୩ ଇଡ଼କେ ବେସୁର୍ ଥେସଲନିକୀ ଇହୁଦୀଡ଼ କେଞ୍ଜିତଡ଼ ଯେ ବେରିଆତାଗ୍ ମିକା ପାଉଲ୍ ଇଶ୍ୱରତେ ଗର୍ ପ୍ରଚାର ମାଡ଼ତୁଣ୍ଡ, ଅଡ଼ ଆଗେ ଝାସ୍ ଗଲ୍‌କ୍ ମାଡ଼ାନଙ୍କ ନାରୁଡ଼କିଂଙ୍କ କେଡ଼ତଡ଼ ।

୧୪ ସାଙ୍ଗେ ସାଙ୍ଗେ ବିଶ୍ୱାସୀଡ଼ ପାଉଲ୍‌ତିଙ୍କ ଗଦାଡ଼ତେ ହାଞ୍ଚିନାଗ୍ ରହସିଡ଼ତଡ଼; ଇଡ଼କେ ଶୀଲା ନୁ ତୀମତି ଇର୍‌ଝୁଡ଼ ବେରିଆତାଗ୍ ମାଡ଼ତଡ଼ ।

୧୫ ପାଉଲ୍‌ତିଙ୍କ୍ ଅସିସ ମାନ୍ଦାନ୍ ନାରୁଡ଼ ଅନ୍ ତଡ଼ ଆଥେନ୍‌ସ୍ ହେଝୁନା ଆଡ଼ତଡ଼ । ଆଗାଙ୍କ୍ ଅଡ଼ ବେରିଆତାଗ୍ ମାଲ୍‌ସ୍ ଶୀଲା ନୁ ତୀମତିଙ୍କ୍ କେଡ଼ତଡ଼, ଅଡ଼ ସିର୍‌ପାର୍ ପାଉଲ୍‌ତଡ଼ କାଇଲିଡ଼ ଇଞ୍ଜ ପାଉଲ୍ ନିର୍ଦ୍ଦେଶ୍ ହିଡ଼ତଣ୍ ।

ଆଥେନ୍‌ସ୍‌ତାଗ୍ ପାଉଲ୍‌ତେ ସେବାପାଡ଼୍‌ସି

* ୧୭:୯ ମେଣ୍ଡେଅନ୍‌ଦାମ୍ ବୁଲ୍ ପାଡ଼୍‌ସି ମାଡ଼୍‌ମାର୍ ଇଞ୍ଜ ଲେକିମିକା ଇଦାନାଦ୍

୧୭ ଆଥେନସ୍‌ତାର ଶୀଳା ନୁ ତୀମତିଙ୍କ କେପିମାନ୍ଦାନ ଖେଲେ ନଗରୀ ପୁଡ଼ିଲାମ୍ ଦେୟାକ୍ ଆମ୍ଭାତେ ବର୍ତ୍ତ ଆସ୍ ମାନ୍ଦାନାଦ୍ ଉଡ଼ି ପାଉଲ୍ ଗାଟି କପାମ୍ ଆଡ଼ତଣ୍ ।

୧୮ ଆଦିଙ୍କ ଅଣ୍ଟ ସମାଜ୍ ଲୋଡ଼ତାର୍ ଇହୁଦୀଡ଼୍ ତଡ଼୍ ଇଶ୍ବରତିଙ୍କ ଉପାସନା ମାଡ଼ାନ୍ ଅଣ୍ଟଇହୁଦିଡ଼୍ ତଡ଼୍ ଇଦ୍ ବିଷୟତେ ନିତାଲ୍ ଆଲୋଚନା ମାଡ଼ାନଙ୍କ ପସ୍ତତଣ୍ । ସହରତେ ଚକକିନାର୍ ଆଦାଖାଦା ମାଡ଼ମାନ୍ଦାନ ନାରୁଡ଼୍ ତଡ଼୍ ଆଦେ ବିଷୟ ଆଲୋଚନା ମାଡ଼ତଣ୍ ।

୧୯ ବେସକ୍‌ତୁଡ଼୍ “ଏପିକୁରିଅନ୍ ନୁ ଷ୍ଟୋଇକ୍,” ଶିକ୍ଷା ଗୁରୁଡ଼୍‌ତଡ଼୍ ଅନାଦ୍ ଯୁକ୍ତିତର୍କ ଆଡ଼ତେ । ଅଡ଼୍ ଲୋପେଙ୍କ ବେସକ୍‌ତୁଡ଼୍ କେଡ଼୍‌ତଡ଼୍, “ଇଣ୍ଟ ମୁର୍ଜ୍ ବାଡ଼ କେତାନଙ୍କ ଆଲ୍‌ସୁତଣ୍ ?” ବାଗାଡ଼୍ ନାରୁଡ଼୍ କେଡ଼୍‌ତଡ଼୍, “ବିଦେଶୀ ଦେୟାକିଙ୍କ ପ୍ରଚାର ମାଡ଼ାନ୍ ଲେକାମ୍ ହେର୍କା ଆଦୁଡ଼୍‌ତେ ।” ଜିସୁ ନୁ ମେଣ୍ଡିନଦାମ୍ ପୁନରୁତାନ ଆଦାନ ବିଷୟ ସୁସମାଚାର ପ୍ରଚାର ମାଡ଼ମାନ୍ଦାନାଦ୍ କେଞ୍ଜି ଅଡ଼୍ ଇଦ୍ କେଡ଼୍‌ତଡ଼୍ ।

୨୦ ଆଦିଙ୍କ ଅଡ଼୍ ପାଉଲ୍‌ତିଙ୍କ ପଇସ୍ ଆଡ଼ତଡ଼୍ ନୁ ଅଂକିଙ୍କ ଏରୀୟପାଗସ୍ ମିଟିଙ୍କତାର୍ ତାସ୍ କେଡ଼୍‌ତଡ଼୍, “ନିମ୍ ବେନ୍ ପୁନାଦ୍ ଶିକ୍ଷା ବିଷୟତେ କେଡୁଡିନ୍, ଆଦ୍ ବିଷୟ ମାମ୍‌ମେ ପୁନ୍ଦାନଙ୍କ ଇଚ୍ଛା ମାଡ଼ତୁମ୍ ।

୨୧ ନିମ୍ କେସମାନ୍ଦାନ ବେସକେ ଗଟି ମାକିଂଙ୍କ ଆଦ୍‌ବୁଡ଼୍ ମାଡ଼ତୁ । ମାମ୍‌ମେ ଆଦିନ୍ ଇଡ଼କେ ପୁନ୍ଦାନଙ୍କ ଚାଏମ୍ ଅଦୁଡମ୍ ।”

୨୨ ଆଥେନୀୟତେ ନାରୁଡ଼୍ ନୁ ଆଗେ ବାସେ ମାଡ଼ମାନ୍ଦାନ ବିଦେଶୀଡ଼୍ ପୁନାଦ୍ ବିଷୟ କେଞ୍ଜାନଙ୍କ ନୁ କେତାନଙ୍କ ଗାଟି ପସୟ ମାଡ଼ତଡ଼୍ । ଇଗେ ଅଡ଼୍ ନାରଗେ ଜେଲ୍ ମାଡ଼ତଡ଼୍ ।

୨୩ ପାଉଲ୍ ମିଟିଙ୍କତେ ମୁନେନ ନିସ୍ କେଡ଼୍‌ତଣ୍, “ଆଥେନୀୟ ନାରୁଡ଼୍ ମିଡ଼୍ ସାରେତଡ଼୍ ଗାଟି ଦାମ୍‌କ୍ ଇଞ୍ଜ ହାଲ୍‌ସୁତାନ ।

୨୪ ନାନ୍ ମିୟାଦ୍ ନଗରତାର୍ ଉତାନଖେଲେ ମିଝାଦ୍ ପୂଜା ମାଡ଼ାନ ଜାଗେତିଙ୍କ ଉଡ଼୍‌ତାନ । ଅଣ୍ଟୟ ଜଞ୍ଜବେଦିଡ଼୍ ପରର ‘ଅଣ୍ଟୟ ପୁନ୍‌ଝାଦ୍ ଇଶ୍ବରତେ ଉଦ୍‌ଦେଶ୍ୟତେ,’ ଲେକିମାନ୍ଦାନାଦ୍ ଗାଲା ଉଡ଼୍‌ତାନ । ମିଡ଼୍ ପୁନ୍‌ଝେକନ୍‌ସ୍ ବେନଙ୍କ ପୂଜା ମାଡ଼ତୁଡ଼୍, ଇଞ୍ଜେ ଅନାଦ୍ ଗର୍ ମିକିଂଙ୍କ କେଡୁଡାନ ।

୨୪ ☆ ଇଶ୍ବର ଜଗତ୍ ନୁ ଆଗେ ମାନ୍ୟାନ ସାରେ ଜିନିଷ୍ ତିଆର୍ ମାଡ଼ତଣ୍ । ଅଣ୍ ସ୍ବର୍ଗ୍ ନୁ ପୁତିବିତେ ପ୍ରୁ । ନାରୁଡ଼୍ କାୟ୍ଦେ ତିଆର୍ ମାଡ଼ତେ ମନ୍ଦିରତାଗ୍ ଅଣ୍ ବାସେ ମାଡ଼ତଣ୍ ।

୨୫ ମାନାଡ଼୍ ପାଡ଼ୟି ମାଡ଼ି ଅଂକିଙ୍କ୍ ହିଦାନ୍ ଲେକାମ୍ ବାଡ଼ ସୁସ୍ଥ ଆଦାଙ୍କ୍ ଅଣ୍ ଇଚ୍ଛା ମାଡ଼ତଣ୍; ବାଡେଙ୍କ୍ ଇଡ଼କେ ଅଣ୍ ସାରେତଡ଼କିଙ୍କ୍ ଜିହ୍ବୁଣ୍, ନେସ୍ଥାନାଲ୍ଦ୍ ନୁ ସାରେ ଦରକାର୍ ଜିନିଷ୍ ହିଡ଼ତଣ୍ ।

୨୬ ଝେରଣ୍ ନାରୁଣ୍ଡାଗାଙ୍କ୍ ଅଣ୍ ସାରେ ନାରୁଡ଼୍ ଜାଡ଼ତିଙ୍କ୍ ତିଆର୍ ମାଡ଼ତଣ୍ ନୁ ଅନାଦ୍ ନିର୍ଦ୍ଦେଶ୍ତେ ଅଡ଼୍ ପୁତିବିତାଗ୍ ଝେକ୍ ଝେକ୍ ନାରକିନାଗ୍ ବାସେ ମାଡ଼ତୁଡ଼୍ । ବେନ୍ ସମୟ୍ତେ, ବେନ୍ ବେଗେ ବାସେ ମାଡ଼ିତନ୍, ମୁନେଡ଼କେ ଇଶ୍ବର ଆଦ୍ ତିଆର୍ ମାଡ଼ତଣ୍ ।

୨୭ ଅନ୍ଧାଦ୍ ଉଦେଶ୍ୟ ମାଡ଼ତେ, ସାରେତଡ଼୍ ବେଲା ଅଂକିଙ୍କ୍ ମେହେକି ଅଂକିଙ୍କ୍ ଦରସ୍ତିତଡ଼୍ । ଇଡ଼କେବା ଇଶ୍ବର ବେନନାଗାଙ୍କ୍ ଜେକେ ଇଲାଣ୍ ।”

୨୮ ଇଦ୍ ବିଷୟ୍ତେ ବେନ ଝେରଣ୍ କେତୁଡ଼ଣ୍, “ଅନାଗେ ମାନ୍ୟାଦ୍ ଜିହ୍ବୁନତାଦ୍ ବାଦକାନାଦ୍, ଉଡାନାଦ୍ ନୁ ମାନ୍ୟାନାଦ୍ ମିନ୍ଦେ ।” ମିଇ କବିଡାଗାଙ୍କ୍ ବେସ୍କଡ଼ୁଡ଼୍ କେତୁଡ଼ଣ୍, “ମାମ୍ମେ ଗାଲା ଅନ୍ ମାରକ୍ ।”

୨୯ ମାମ୍ମେ ଇଶ୍ବରତେ ମାରକ୍ ଆସ୍ ମାନ୍ୟାନ ମାଇଦିଙ୍କ୍ ନାରୁଡ଼୍ ତିଆର୍ ମାଡ଼ତେ ସୁନା, ରୁପା ବା କାଲ୍ଡତଡ଼୍ ତିଆର୍ ଆଡ଼ତେ ପୁଡ଼ଲାମ୍ ଲେକେମ୍ ଇଶ୍ବରତେ ପୁଡ଼ୁଙ୍କ୍ ହାଲ୍ସାଙ୍କ୍ ପାର୍ଡ଼ାଡ଼୍ ।

୩୦ ନାରୁଡ଼୍ ଇଶ୍ବରତିଙ୍କ୍ ପୁନ୍ଝେ ଝେଲେ ଅଣ୍ ଦଷ୍ ପୟ୍ଝେ ମାଡ଼ତଣ୍, ଇଡ଼କେ ଇଞ୍ଜେ ସାରେତଡ଼୍ ଅନୁତାପ ମାଡ଼ି ଅଡ଼ାଦ୍ ପାପାମ୍ ହାରତାଗାଙ୍କ୍ ମାଲ୍ଦାନ୍ ମାଇଦିଙ୍କ୍ ଗଟ୍ ଇଡୁଡ଼ଣ୍ ।

୩୧ ଅଣ୍ ଅଣ୍ଡୟ୍ ଦିନ୍ ହେସ୍ତଡ଼ଣ୍ । ଆଦ୍ ଦିନ୍ ଅଣ୍ ତାନ୍ ହେସ୍ତେ ନାରୁନ୍ ତଡ଼୍ ସାରେ ଜଗତ୍ ତାଦ୍ ନ୍ୟାୟ୍ ବିଚାର୍ ମାଡ଼ିତନ୍ । ଆ ନାରୁଙ୍କ୍ ପୁନର୍ଦ୍ ବୀଡ଼ ମାଡ଼ାନ୍ ତଡ଼୍ ଅଣ୍ ଇଦ୍ ଗଟ୍ତାଦ୍ ସଡ଼୍ ସାରେତଡ଼କିଙ୍କ୍ କେସ୍ମିନ୍ଦେଣ୍ ।

୩୨ ପାଉଲ୍ଡାଗାଙ୍କ୍ ପୁନରୁତାନ୍ ବିଷୟ୍ କେଞ୍ଜି ଅଡ଼୍ ଲୋପେ ବେସ୍କଡ଼ୁଡ଼୍ ଅଂକିଙ୍କ୍ ପାସ୍ତଡ଼୍, ବାଡେଙ୍କ୍ ଇଡ଼କେ ବାଗାଡ଼୍ ନାରୁଡ଼୍

କେତତତ୍, “ନିୟାଗାଙ୍କ ମାମ୍ମେ ଇଦ୍ ବିଷୟ ମେଣ୍ଡନନ୍ଦାମ୍
କେଞ୍ଜାନଙ୍କ ଇଚ୍ଛା ମାଡ଼ୁମ୍ ।”

୩୩ ଆଦନାଣ୍ ମିଟିଙ୍ଗ୍ ତେରସ୍‌ପି ପାଉଲ୍ ଦବ୍‌ଆଡ଼ତଣ୍ ।

୩୪ ତାୟୋନିସିଆସ୍ ପେଦେରତେ ମିଟିଙ୍ଗ୍‌ତଣ୍ ଝେରଣ୍ ନାରୁଙ୍କ୍,
ଦାମାରୀ ପେଦେରତେ ଅଣ୍ଡୟ ନାଗାଡ଼୍, ନୁ ମେଣ୍ଡେ ବେସ୍‌କ୍‌ତୁଡ଼୍,
ନାରୁଡ଼୍ ବିଶ୍ୱାସ୍ ମାଡ଼ତଡ଼୍, ନୁ ଅନ୍ ତଡ଼୍ କାଇଲ୍‌ତଡ଼୍ ।

୧୮

କରିନ୍ତୁ ଗାଞ୍ଜୁନତାଗ୍ ପାଉଲ୍‌ତେ ସେବାପାଡ଼ୟି

୧ ଇଦିନପେକେ ପାଉଲ୍ ଆଥେନ୍‌ସ୍ ଝିଡ଼ସି କରିନ୍ତାୟତାଗ୍
ଆଡ଼ତଣ୍ ।

୨ ଆଗେ ଅଣ୍ ପନ୍ତସ୍‌ତାଗ୍ ଜନମ୍ ମାଡ଼ିମାନ୍ଦାନ୍ ଆକିଲା
ପେଦେରତଣ୍ ଝେରଣ୍ ଇହୁଦୀଙ୍କ୍ କାଇଲ୍‌ତଣ୍ । ସମ୍ରାଟ୍ କ୍ଲଡିୟସ୍
ସାରେତଡ଼୍ ଇହୁଦୀଡ଼କ୍ ରୋମ୍ ଝିଡ଼ସାନଙ୍କ୍ ଗଟ୍ ହିଡ଼ତାଙ୍କ୍, ଅଣ୍
ବେସ୍‌ଦିନା ମୁନେନ୍ ତାନ୍ ମୁଡ଼ତେ ପ୍ରିସ୍‌ଲିଆନ୍ ତଡ଼୍ ଇତାଲିଆକନ୍‌ସ୍
ଝାସ୍‌ମାଡ଼ତଣ୍ ।

୩ ପାଉଲ୍ ଅଂକିଙ୍କ୍ ଉଡ଼ାନଙ୍କ୍ ଆଞ୍ଜ୍ ଅଡ଼୍ ତଡ଼୍ ବାସେ ମାଡ଼ତଣ୍,
ବାତେଙ୍କ୍‌ଇଡ଼କେ ଅଣ୍ ଗାଲା ଅଡ଼୍ ଲେକାମ୍ ତମ୍‌ୁତିଆର୍ ମାଡ଼ି
ବାଦ୍‌କମାଡ଼ତଣ୍ ।

୪ ଇହୁଦୀ ଇକେ ଗ୍ରୀକ୍ ନାରୁଡ଼ତେ ମନ୍‌ତାଗ୍ ପ୍ରବୁଙ୍କ୍ ବିଶ୍ୱାସ୍ ମାଡ଼ାନ୍
ମାଇଦିଙ୍କ୍ ସାରେ ବିଶ୍ୱାମ୍‌ଦିନ୍ ଅଣ୍ ପ୍ରାର୍ତନା ଲୋଡ଼ତାଗ୍ ଆଲୋଚନା
ମାଡ଼ମାଡ଼ତଣ୍ ।

୫ ଶୀଲା ନୁ ତୀମତି ମାସିଦୋନିଆତାଗାଙ୍କ୍ ମାଲ୍‌ସ୍ ଝାଡ଼ତେ
ପେରକେ ପାଉଲ୍ ଇହୁଦୀଡ଼୍ ଗାର୍‌ରେ ଜିସୁନ୍ ସୁସମାଚାର୍ ପ୍ରଚାର୍
ମାଡ଼ତଣ୍ ନୁ ଜିସୁଙ୍କ୍ ମସୀହ ଇଞ୍ଜ କେଡ଼ତାନ୍ ସେଙ୍ଗେ ସାକ୍ଷ୍ୟ ହିଡ଼ତଣ୍ ।

୬ ଇଡ଼କେ ଅଡ଼୍ ଅଂକିଙ୍କ୍ ଅତ୍ୟାଚାର୍ ମାଡ଼ି ଅଂକିଙ୍କ୍ ନିନ୍ଦେ ମାଡ଼ତାଙ୍କ୍,
ଇଦିନାଦ୍ ପ୍ରତିବାଦ୍ ମାଡ଼ି ଅଣ୍ ନିଜେଡ଼୍ ସକେତାଦ୍ ଦୁମ୍ କାଇସ୍
ଅଡ଼କିଙ୍କ୍ କେଡ଼ତଣ୍, “ଯଦି ମିଡ଼୍ ଦଂସଆଦତିଡ଼୍, ଆଲେକେ ମିଡ଼୍,
ନିଜେ ଦାୟି ଆଦତିଡ଼୍ । ନାନ୍ ଇଦିନ୍ ମାଇଦିଙ୍କ୍ ଦାୟି ଆୟନ୍ । ଇଞ୍ଜେ
ନାନ୍ ଅଣ୍‌ଇହୁଦୀଡ଼୍ ଗାର୍‌ରେ ଆଦତାନ୍ ।”

୭ ଆଦିଙ୍କ ଅଣ୍ଟା ଅଡ଼କିଂଙ୍କ ଓଡ଼ସି ଇଶ୍ବରତିଙ୍କ ଉପାସନା ମାଡ଼ମାନ୍ଦାନ
ତିତସ୍ ଯୁସ୍ତ ପେଦେରତେ ଝେରଣ୍ଟ ଅଣିଇହୁଦୀନ୍ ଲୋନ୍ ଆଡ଼ତଣ୍ଟ ।
ଯୁସ୍ତନ୍ ଲନ୍ ଗୁଡ଼ୟିତେ ବକେଡ଼ ମାଡ଼ତେ ।

୮ ଗୁଡ଼ୟିତେ ବାଡ଼ୟଣ୍ଟ କ୍ରିଷ୍ଟପସ୍ ନୁ ତାମ୍ ପରିବାରତେ ସାରେତଡ଼,
ପ୍ରବୁନାଗ୍ ବିଶ୍ବାସ୍ ମାଡ଼ତଡ଼ ନୁ କରନ୍ତିୟତେ ମେଣ୍ଟେ ନାରଗେ ନାରୁଡ଼,
ପାଉଲ୍ତେ ଶିକ୍ଷା କେଞ୍ଜି ବିଶ୍ବାସ୍ ମାଡ଼ତଡ଼ ନୁ ବାଡ଼ିସ୍ଥ ଆଡ଼ତଡ଼ ।

୯ ଅଣ୍ଟୟ ନାରକେ ପାଉଲ୍ ଅଣ୍ଟୟ ଦର୍ଶନ୍ ଉଡ଼ତଣ୍ଟ, ଦର୍ଶନ୍ତାଗ୍
ପ୍ରବୁ ଅଂକିଙ୍କ କେଡ଼ତଣ୍ଟ, “ଝେର୍ମା, ପ୍ରଚାର ମାଡ଼ମାନ୍, ଆଦିଙ୍କ
ଓଡ଼ସ୍ମା,

୧୦ ବାତେଙ୍କିଇଡ଼କେ ନାନ୍ ନି ତଡ଼୍ ତଡ଼୍ ମିନ୍ଦେନ୍ । ବେନ ନିୟାଦ୍
କ୍ଷତି ମାଡ଼ାଙ୍କ ପାର୍ଝଣ୍ଟ, ବାତେଙ୍କିଇଡ଼କେ ଇଦ୍ ନଗରତାଗ୍ ନାରଗେ
ନାରୁଡ଼ ନାୟାଗ୍ ମିନ୍ଦେଡ଼ ।”

୧୧ ଆଦିଙ୍କ ପାଉଲ୍ ଆଗେ ଇଶ୍ବରତେ ବାକ୍ୟ ବିଷୟତେ ଶିକ୍ଷା ଇସ୍
ଅଣ୍ଟୟ ହେଣ୍ଟ ଆରୁ ନେଲ୍ଝିଙ୍କ ମାଡ଼ତଣ୍ଟ ।

୧୨ ଗାଲିୟୋ ଆକାୟାତେ ରୋମୀୟ ଶାସନ୍ ମାଡ଼ାନଣ୍ଟ ମାନ୍ଦାନ୍
ଝେଲେ, ଇହୁଦୀଡ଼୍ ଅଣ୍ଟୟାଗେ ହାସ୍ ପାଉଲ୍ତିଙ୍କ ପଇସ୍ ବିଚାର
ଲୋଡ଼ତାଗ୍ ଆଡ଼ତଡ଼ ।

୧୩ ଅଡ଼୍ କେଡ଼ତଡ଼, “ଇ ନାରୁଣ୍ଟ ମୋଶାନ୍ ନିୟମ୍ ବିରୁଦ୍ ରାତିତେ
ଇଶ୍ବରତେ ଉପାସନା ମାଡ଼ାନଙ୍କ ନାରୁଡ଼କିଂଙ୍କ କେଡୁତଣ୍ଟ ।”

୧୪ ପାଉଲ୍ ଉତ୍ତର ହିଦାଙ୍କ ତିଆର୍ ଆଡ଼ତେ ଝେଲେ, ଗାଲିୟୋ
ଇହୁଦୀଡ଼୍ କେଡ଼ତଣ୍ଟ, “ଯଦି ଇଗେ ବାଡ଼ ଦଷ୍ ବା ଅପରାଦ୍
ମାନ୍ତେ, ଆଲେକେ ମିକିଂଙ୍କ ବିଶ୍ବାସ୍ ମାଡ଼ି ମିଇ ଗଟି କେଞ୍ଜାନାଦ୍
ନାକିଂଙ୍କ ଯୁକ୍ତିତର୍କ ଆଦତେ ।

୧୫ ଇଡ଼କେ ଇଦ୍ ମାମଲା ମାତର୍ ମିୟାଦ୍ ନିଜେଡ଼ ନିତିନିୟମ୍,
ବାକ୍ୟ ନୁ ପେଦେରତେ ମାଇଦିଙ୍କ ଆସ୍ ମାନ୍ଦାନ୍ ସେଙ୍ଗେ ମିଡ଼୍ ନିଜେ
ଇଦିନାଦ୍ ବିଚାର କର୍ତ୍ତାଲ୍ । ନାନ୍ ମୋଶାନ୍ ନିୟମ୍ ବିଷୟ, ବିଚାର
ମାଡ଼ନ୍ ।”

୧୬ ଇଦ୍ କେସ୍ ଅଣ୍ଟ ଅଡ଼କିଂଙ୍କ ବିଚାର ଲୋଡ଼ତାଗାଙ୍କ ତଲ୍ତଣ୍ଟ ।

୧୭ ଅଡ଼୍ ଉସୁଲ୍ତେ ବାଡ଼ୟଣ୍ଟ ସସ୍ଥାନସତିଙ୍କ ପଇସ୍ ବିଚାର
ଲୋଡ଼ତେ ମୁନ୍ଦେ ଦେବ୍ ରେହେଡ଼ତଡ଼ । ଇଡ଼କେ ଗାଲିୟୋ ଆଦ୍

ବିଷୟଟିଙ୍କ ଦ୍ୟାନ ହିଁଶୁ ।

ପାଉଲ୍ ସିରିୟାତେ ଅନ୍ୟୟୋକ୍ତାକ୍ ମାଲ୍‌ତତ୍ତ୍ୱ

୧୮ ପାଉଲ୍ କରନ୍ତିତାଗ୍ ବିଶ୍ୱାସୀତ୍ ତତ୍ ନାର୍‌ଗେ ଦିନା ବାସେ ମାଡ୍‌ତତ୍ତ୍ୱ । ତାନ୍‌ପେକେ ଅଡ୍‌କିଂଙ୍କ୍ ଓଡ୍‌ସି ପ୍ରିସ୍ତିଲା ନୁ ଆକ୍‌ଲାନ୍ ତତ୍ ସିରିଆତାକ୍ ଏରଦାଗ୍ ଆଡ୍‌ତତ୍ତ୍ୱ । ସେଂକ୍ରିୟାତାଗାଙ୍କ୍ ଏରଦାଲା ଝେୟିଦାନ୍ ମୁନେଙ୍କ୍ ଅନାଦ୍ ଅଣ୍ଡୟ ବ୍ରତ ମାଡ୍‌ତାଙ୍କ୍ ଅଣ୍ଡ୍ ତାନ୍ ତାଲ୍‌ତିଙ୍କ୍ ଟାଙ୍ଗରା ମାଡ୍‌ତତ୍ତ୍ୱ ।

୧୯ ଅଡ୍‌ ଏପିସସ୍‌ତାଗ୍ ହେସ୍ତୁତେ ପେରକେ ପାଉଲ୍ ପ୍ରିସ୍ତିଲା ନୁ ଆକ୍‌ଲାନ୍‌ତିଙ୍କ୍ ବିଦାୟ୍ ହିଡ୍‌ତତ୍ତ୍ୱ । ଅଣ୍ଡ୍ ଆଗେ ପ୍ରାର୍ତ୍ତନା ସବାତାଗ୍ ଆଞ୍ଜ୍ ଇହୁଦୀଡ୍‌ତତ୍ତ୍ୱ ଆଲୋଚନା ମାଡ୍‌ତତ୍ତ୍ୱ ।

୨୦ ନାରୁଡ୍‌ ଅଂକିଙ୍କ୍ ମେଣ୍ଡେ ନାର୍‌ଗେ ଦିନା ମାନ୍‌ନାଙ୍କ୍ କେଡ୍‌ତତ୍ତ୍ୱ, ଇଡ୍‌କେ ଅଣ୍ଡ୍ ରାଜି ଆୟ୍‌ଶ୍ ।

୨୧ ଆଦ୍‌ଦାନ୍ ଝେଲେ ଅଣ୍ଡ୍ ଅଡ୍‌କିଂଙ୍କ୍ କେଡ୍‌ତତ୍ତ୍ୱ, “ଯଦି ଇଶ୍‌ବରତାଦ୍ ଇଚ୍ଛା ମାନ୍‌ତେ, ନାନ୍ ମିଇ ବକେଡ୍ ମାଲ୍‌ସ୍ ଝାଦ୍‌ତାନ୍ ।” ତାନ୍‌ପେକେ ଅଣ୍ଡ୍ ଏରଜାହାଜ୍ ତତ୍ ଏପିସସ୍ ଓଡ୍‌ସି ଦବ୍‌ଆଡ୍‌ତତ୍ତ୍ୱ ।

୨୨ କାଈସରିଆ ହେସ୍ତୁସ୍ ଆଗାଙ୍କ୍ ଅଣ୍ଡ୍ ଯିରୁଶାଲେମ୍ ଆଡ୍‌ତତ୍ତ୍ୱ ନୁ ମଣ୍ଡଲିତିଙ୍କ୍ ନମସ୍କାର୍ ମାଡ୍‌ ଆଗାଙ୍କ୍ ଅନ୍‌ଅୟୋକ୍ ଆଡ୍‌ତତ୍ତ୍ୱ ।

୨୩ ଆଗେ ବେସ୍‌ଦିନା ମାଡ୍‌ତେ ପେରକେ ମେଣ୍ଡେ ତାଆକି ଆଞ୍ଜ୍ ଗାଲାତୀୟ ନୁ ଫୁରିୟା ପଡିୟେଡ୍ ନାଡ୍‌ମେ ଇସ୍ ଆଡ୍‌ତତ୍ତ୍ୱ ନୁ ହାରଦାଗ୍ ବିଶ୍ୱାସୀତ୍‌କ୍ ଅଡାଦ୍ ବିଶ୍ୱାସ୍ ଶିଷ୍ୟ ଗାଡ୍‌ସ୍ ମାନ୍‌ନାଙ୍କ୍ ଉସାହ ମାଡ୍‌ତତ୍ତ୍ୱ ।

ଏପିସସ୍ ନୁ କରନ୍ତିତାଗ୍ ଆପୋଲ୍ଲୋ

୨୪ ଆଦ୍ ସମୟତେ ଆଲେକ୍‌ଜାଣ୍ଡ୍ରିୟାଲ୍‌ତାଗ୍ ଜନମ୍ ଆଡ୍‌ତେ ଆପୋଲ୍ଲୋ ପେଦେରତତ୍ତ୍ୱ ଝେରଣ୍ଡ୍ ଇହୁଦୀ ଏପିସସ୍‌ତାଗ୍ ଝାଡ୍‌ତତ୍ତ୍ୱ । ଅଣ୍ଡ୍ ଝେରଣ୍ଡ୍ ସାୟେଡ୍ ନାରୁଣ୍ଡ୍ ନୁ ଦର୍ମଶାସ୍ତ୍ରତାଗ୍ ଅନାଦ୍ ନାର୍‌ଗେ ବୁଦ୍ ମାଡ୍‌ତେ ।

୨୫ ଅଣ୍ଡ୍ ପ୍ରବୁନ୍ ବିଦ୍ୟା ନୁ ଆମ୍ବା ବିଷୟତେ ଶିକ୍ଷା ପାଏମ୍ ଆସ୍ ମାଡ୍‌ତତ୍ତ୍ୱ ନୁ ଗାଟି ଝେଡ୍‌କେଡ୍‌ଡ୍‌ଜିସୁନ୍ ବିଷୟ ଶିକ୍ଷା ହିସ ମାଡ୍‌ତତ୍ତ୍ୱ ।

ଇଡ଼କେ ଇଦ୍ ବିଷୟରେ ଅଣ୍ଟା ମାତର ଯୋହନରେ ଏରଦିକ୍ଷା ବିଷୟ ପୁଞ୍ଜି ମାଡ଼ିବ ।

^{୨୭} ପ୍ରାର୍ଥନାତାର୍ ଅଣ୍ଟା ସାହାସ୍ ତଡ଼୍ ଶିକ୍ଷା ହିଦାଙ୍କ ପସ୍ତସ୍ତଣ୍ଟ । ଅନାଦ୍ ଶିକ୍ଷା କେଞ୍ଜି ପ୍ରିସ୍ମିଲ୍ ନୁ ଆକ୍ମିଲ୍ ତାମ୍ ଲୋନ୍ ଆଡ଼ତଡ଼୍ ନୁ ଆଗେ ଅଂକିଙ୍କ ଇଶ୍ବରରେ ବିଦ୍ୟା ବିଷୟ ସାୟେ ବୁଜାମାଡ଼ିବ ।

^{୨୭} ତାନପେକେ ଆପୋଲ୍ଲୋ ଆକାୟା ପ୍ରଦେଶ୍ତାର୍ ଆଦାନଙ୍କ ତିଆର୍ ଆଡ଼ତାଙ୍କ୍, ଏପିସସ୍ତେ ବିଶ୍ବାସୀ ଶିଷ୍ୟ ଅଂକିଙ୍କ ସାହାୟ୍ୟ ମାଡ଼ିବ, ନୁ ଅଂକିଙ୍କ ଗ୍ରହନ୍ ମାଡ଼ାନ୍ ମାଇଦିଙ୍କ ଅନୁରଦ୍ ମାଡ଼ି ଆକାୟାରେ ବିଶ୍ବାସୀଡ଼ିକିଙ୍କ ଚିଟି ଲେକ୍ତଣ୍ଟ । ଅଣ୍ଟା ଆଗେ ଏଝୁସ୍ ଇଶ୍ବରରେ ଅନୁଗ୍ରହତଡ଼୍ ବିଶ୍ବାସୀ ଆସ୍ ମାୟାନ୍ ନାରୁଡ଼ିକିଙ୍କ୍ ନାରଗେ ସାହାୟ୍ୟ ମାଡ଼ିବ ।

^{୨୮} ଜିସୁ ଯେ ମସାହ, ଅଣ୍ଟା ସାହାସ୍ତଡ଼୍ ଯୁକ୍ତି ମାଡ଼ି ଦର୍ମଶାସ୍ତ୍ରତାର୍ ଇଦ୍ ପ୍ରମାନ୍ ମାଡ଼ି ବାଷନ୍ ହିଦାନ୍ ଝେଲେ ଅଣ୍ଟା ଇହୁଦୀଡ଼ିକ୍ ହାରାମାଡ଼ିବ ।

୧୯

ଏପିସସ୍ତାର୍ ପାଉଲ୍

^୧ ଆପୋଲ୍ଲୋ କରିନ୍ଥୀୟତାର୍ ମାୟାନ୍ ଝେଲେ, ପାଉଲ୍ ଆଦ୍ ଦେଶ୍ତେ ନାଡ଼ମେଙ୍କ୍ ଆଞ୍ଜି ଏପିସସ୍ତାର୍ ହେଝୁଡ଼ିବ । ଆଗେ ଅଣ୍ଟା ବେସ୍କଡ଼ିବ୍ ଶିଷ୍ୟଡ଼ି କାଇଲି ପାତ୍ରାମାଡ଼ିବ,

^୨ “ମିଡ଼୍ ବିଶ୍ବାସୀ ଆଡ଼ତେ ଝେଲେ ବାଡ଼ ପବିତ୍ର ଆମ୍ବା ପାଏମ୍ ଆସ୍ମାଡ଼ିବ୍?” ଅଡ଼୍ ଉତ୍ତର ହିଡ଼ିବ୍, “ପବିତ୍ର ଆମ୍ବା ଇଞ୍ଜି ବେନ ମିଦେଣ୍ଟ, ଇଦ୍ ଗଟ୍ ମାମ୍ମେ ବେସ୍ପୁଟ୍ କେଞ୍ଜମ୍ ।”

^୩ ପାଉଲ୍ ପାତ୍ରାମାଡ଼ିବ୍, “ଆଲେକେ ମିଡ଼୍ ବେଦ୍‌ରକମ୍ ବାଡ଼ିସ୍ମ ଗ୍ରହନ୍ ମାଡ଼ିବ୍?” ଅଡ଼୍ ଉତ୍ତର ହିଡ଼ିବ୍, “ଯୋହନରେ ବାଡ଼ିସ୍ମ ।”

^୪ ✧ ପାଉଲ୍ କେଡ଼ିବ୍, “ବେନଡ଼୍ ଅନୁତାପ୍ ମାଡ଼ି ପାପ୍‌ତାଗାଙ୍କ୍ ମାଲ୍‌ତଡ଼୍ ଯୋହନରେ ବାଡ଼ିସ୍ମ ଅଡ଼ିକିଙ୍କ୍ ସାୟେ ମାଡ଼ିବେ । ଇଡ଼କେ ଅନ୍ ପେରକେ ବେନ ଖାଦାନାଦ୍ ମାଡ଼ିବେ, ଅନାଗ୍ ଅର୍ତ୍ତାଡ଼ି

✧ ୧୯:୪ ମାଡ଼ିବ୍ 3:୧୧; ମାର୍କ ୧:୪,୭,୮; ଲୁକ 3:୪,୧୭; ଯୋହନ ୧:୨୭,୨୭.

ଜିସୁନାଗ ବିଶ୍ୱାସ୍ ମାଡାନଙ୍କ ଯୋହନ୍ ଇଶ୍ରାଏଲତେ ନାରୁଡ଼କିଂଙ୍କ କେସମାଡ଼ତଣ୍ଡ ।”

^୫ ଇଦ୍ କେଞ୍ଜି ଅଡ଼୍ ପ୍ରବୁ ଜିସୁନ୍ ପେଦେରତେ ବାତିସ୍ଥ ଗ୍ରହନ୍ ମାଡ଼ତଣ୍ଡ ।

^୬ ପାଉଲ୍ ଅଡ଼୍ ପରର କାୟ୍ ଝାଡ଼ତଣ୍ଡ ନୁ ପବିତ୍ର ଆମ୍ବା ଅଡ଼୍ ପରର ଡିଗ୍ତେ । ଅଡ଼୍ ସାରେ ବାଷାତଡ଼୍ ଗର୍ ତିରୟତଡ଼୍ ନୁ ଇଶ୍ୱରତେ ସୁସମାଚାର ପ୍ରଚାର ମାଡ଼ତଣ୍ଡ ।

^୭ ଅଡ଼୍ ବାରଜାନ୍ ମାନେୟ୍ ମାଡ଼ତଣ୍ଡ ।

୮ ତାନ୍ପେକେ ମୁଣ୍ ନେଲ୍ଝ୍ ଯାକ ଯିହୁଦୀଡ଼ାଦ୍ ପ୍ରାର୍ଥନା ଲନ୍ତାଗ୍ ସାହାସ୍ ତଡ଼୍ ଆଲୋଚନା ମାଡ଼ି ଇଶ୍ୱରତେ ରାଜ୍ୟ ବିଷୟତେ ଅଡ଼ାଦ୍ ମନ୍ତାଗ୍ ବିଶ୍ୱାସ୍ ମାଡାନଙ୍କ୍ ଚେଷ୍ଟା ମାଡ଼ତଣ୍ଡ ।

^୯ ଇଡ଼କେ ଅଡ଼୍ ଲୋପେଙ୍କ୍ ବେସ୍‌କ୍‌ତୁଡ଼୍ ଗାଡ଼ସ୍ ମନ୍ତଡ଼୍ ମାଡ଼ତଣ୍ଡ, ଅଡ଼୍ ବିଶ୍ୱାସ୍ ଶିଷ୍ୟ ମାଡ଼ତଣ୍ଡ । ଅଡ଼୍ ମାନ୍ଦେତାଗ୍ ସାରେତଡ଼୍ ମୁନ୍ନେ ପ୍ରବୁନାଦ୍ ଆର ବିଷୟତେ ବିବାଦ୍ ଗର୍ କେଡ଼ତଡ଼୍ । ଆଦିଙ୍କ୍ ପାଉଲ୍ ଅଡ଼୍‌କିଂଙ୍କ୍ ଝିଡ଼ସି ବିଶ୍ୱାସୀଡ଼କ୍ ଆସ୍ ସାରେଦିନେ ଚିରାନସ୍ ବବନତାଗ୍ ମିଟିଙ୍କ୍ ମାଡ଼ତଣ୍ଡ ।

^{୧୦} ରେଣ୍ଡ୍ ହେଣ୍ଡ୍‌କ୍ ଇଦ୍ ଚାଲେମ୍ ଆଡ଼ତେ । ରୋମ୍‌ତେ ଏସିଆ ଦେଶତାଗ୍ ବାସେ ମାଡ଼ମାନ୍ଦାନ୍ ନାର୍‌ଗେ ଇହୁଦୀ ନୁ ଅଶଇହୁଦୀ ପ୍ରବୁନ୍ ବାକ୍ୟ କେଞ୍ଜିତଡ଼୍ ।

ସ୍ଲେବାନ୍ ମାର୍‌କିଡ଼୍

^{୧୧} ଇଶ୍ୱର ପାଉଲ୍ ତଡ଼୍ ବେପଡ଼୍ ମାଡ଼ଝାଦ୍ ଆଶର୍ଯ୍ୟ ପାଡ଼ୟି ମାଡ଼ତଣ୍ଡ ।

^{୧୨} ଇଦ୍ ରକମ୍ କି ପାଉଲ୍ ବେବାହାର ମାଡ଼ମାନ୍ଦାନ୍ ତୁମାଲ୍ ନୁ ଚକା ରୋଗୀଡ଼୍ ବକେଡ଼୍ ଆଡ଼କେ ଅଡ଼୍ ସୁସ୍ଥ ଆସମାଡ଼ତଣ୍ଡ, ନୁ ତାମ୍ ମେନ୍ଦୁଲ୍‌ତାଗାଙ୍କ୍ ଦେୟାକ୍ ପେଇସ୍ ଆଞ୍ଜିମାଡ଼ତା ।

^{୧୩} ବେସ୍‌କ୍‌ତୁଡ଼୍ ଉତାନଡ଼୍ ଇହୁଦୀ ଝାଡେଡ଼୍ ମିକା ପ୍ରବୁ ଜିସୁନ୍ ପେଦେର ପଇସ୍ ଦେୟାକ୍ ଝିରସ୍ତାନଙ୍କ୍ ଆଲ୍‌ସି ମାଡ଼ତଣ୍ଡ । ଅଡ଼୍ ଦେୟାକିଙ୍କ୍ କେସମାଡ଼ତଣ୍ଡ, “ପାଉଲ୍ ପ୍ରଚାର ମାଡାନ ଜିସୁନ୍ ପେଦେରତେ ନାନ୍ ନିକିଂଙ୍କ୍ ଗର୍ ଇଦୁତାନ୍ ।”

^{୧୪} ସ୍ଲେବା ପେଦେରତେ ଇହୁଦୀ ବେଡ଼ିୟି ଯାଜକ୍‌ତେ ସାଡ଼ଜାନ୍ ମାରକ୍ ଇଦ୍‌ରକମ୍ ମାଡାନଙ୍କ୍ ଆଲ୍‌ସି ମାଡ଼ମାଡ଼ତଣ୍ଡ ।

୧୫ ଇଡ଼କେ ଦେୟାକ୍ ଅଡ଼କିଂଙ୍କ କେଡ଼ତା, “ନାନ୍ ଜିସୁଙ୍କ ପୁତ୍ରତାନ୍ ନୁ ପାଉଲ୍‌ତିଙ୍କ ମିକା ପୁତ୍ରତାନ୍; ଇଡ଼କେ ମିଡ଼୍‌ସାରେ ବେନଡ଼ି?”

୧୬ ଦେୟାକ୍ ପୟ୍‌ତେ ନାରୁଣ୍ଡ ଅଡ଼କିଂଙ୍କ ଗାଟି ଶକ୍ତି ଚିଟିରମଣ ମାଡ଼ି କାବା ମାଡ଼ତଣ୍ଡ । ଅଡ଼ାଝୁ ଚକାସିଲେ ଇଙ୍ଗତା, ଅଡ଼୍‌ବାଣ୍ଡାବାଣ୍ଡା ପୁଣ୍ଡକ୍ ଆସ୍ ଅନ୍ ଲଡ଼ତାଗାଙ୍କ ମିରଡ଼ତଡ଼ ।

୧୭ ଏପିସସ୍ ନିବାସୀ ଇହୁଦୀ ନୁ ଅଣଇହୁଦୀଡ଼ ଇଦ୍ ବିଷୟ କେଞ୍ଜି ଝେରଡ଼ତ୍ ନୁ ଆଗେ ପ୍ରବୁ ଜିସୁନ୍ ପେଦେର୍ ମେଣ୍ଡେ ଅଦିକ୍ ସମ୍ମାନ ଆଡ଼ତେ ।

୧୮ ବିଶ୍ୱାସୀତାଗାଙ୍କ ନାରଗେ ମୁଲ୍ ନିଜେଡ଼ ସାରେ କାରାପ୍ ପାଡ଼୍‌ୟି ସ୍ୱୀକାର୍ ମାଡ଼ତଡ଼ ।

୧୯ ଝାଡେ ବିଦ୍ୟା ନାଡ଼ସାନଡ଼ ନାର୍ଗେମୁଲ୍ ତାମ୍‌ଝା ବଇକିଂଙ୍କ ତାସ୍ ନାରୁଡ଼ ମୁନ୍‌ନେ ଗୁଡ଼ପି ପଡ଼ସଡ଼ତଡ଼ । ଅଡ଼ାଝୁ ଆଝ୍ ବଇକିନ୍ ପୁରା ଦାମ୍ ମାଡ଼ିଡେ ପାଟାଗ୍ ହଜାର୍ ରୁପା ତାବକ୍ ।

୨୦ ଇଦ୍‌ରକମ୍ ପ୍ରବୁନ୍ ବାକ୍ୟ ସାରେଏକାମ୍ ଆଡ଼ତେ ନୁ ଗାଟି ଶକ୍ତି ଆଡ଼ତେ ।

ଏପିସସ୍‌ତାଗ୍ ଇଂସା

୨୧ ଇଝୁସାରେ ଗଟନା ଆଡ଼ତେ ପେର୍‌କେ ପାଉଲ୍ ଆମ୍‌ତଡ଼ ମାସିଦୋନିଆ ନୁ ଆକାୟା ନାଡ଼ମେଙ୍କ ଇସ୍ ଯିରୁଶାଲେମ୍ ଆଦାନଙ୍କ ତିଆର୍ ଆଡ଼ତଣ୍ଡ । ଅଣ୍ କେଡ଼ତଣ୍ଡ, “ଆଗେ ଆଡ଼ତେ ପେର୍‌କେ ନାନ୍ ନିଜାମ୍ ରୋମ୍‌ତାଗ୍ ମିକା ଆଦତାନ୍ ।”

୨୨ ଆଦିଙ୍କ ଅଣ୍ ତାନ୍ ଇରଝୁଡ଼ ସେବା ମାଡ଼ାନଡ଼କ୍ ତାମତି ନୁ ଏରାଷ୍ଟ୍ରତିଙ୍କ ମାସିଦୋନିଆତାଗ୍ ରହଡ଼ତଣ୍ଡ, ଇଡ଼କେ ନିଜେ ରୋମ୍‌ତେ ଏସିଆ ଦେଶ୍‌ତାଗ୍ ମେଣ୍ଡେ ବେସ୍‌କେ ଦିନାମ୍ ମାଡ଼ତଣ୍ଡ ।

୨୩ ଇଦିନ୍ ଲୋପେ ପ୍ରବୁ ତଅସ୍ ମାଡ଼ତେ ଆର୍ ବିଷୟ ଆସ୍ ଏପିସସ୍‌ତାଗ୍ ଗାଟି ଗଲ୍‌କ୍ ଆଡ଼ତଡ଼ ।

୨୪ ଦାମିତ୍ରିୟ ପେଦେର୍‌ତଣ୍ଡ ଝେରଣ୍ଡ ରୁପାମାଡ଼ାନଣ୍ଡ ଆର୍ତ୍ତେମୀ ଦେବାନ୍ ମନ୍ଦିରତାଗ୍ ରୁପା ମୁର୍ତ୍ତି ତିଆର୍ ମାଡ଼ମାଡ଼ତଣ୍ଡ, ଇଦ୍ ବ୍ୟବସାୟତାଗାଙ୍କ ଶିଳ୍ପ କାରିଗରିଡ଼ ନାରଗେ ଲାବ୍ ମାଡ଼ମାଡ଼ତଡ଼ ।

୨୫ ଆଦିଙ୍କୁ ଅଣ୍ଟା ଯାରେ ବ୍ୟବସାୟୀତ୍ବକୁ ଅଣ୍ଟାୟାଗେ ମାଡ଼ି କେତୁତଣ୍ଡ, “ଆଜ୍ଞାଲଢ଼ି, ଇଦ୍ ବ୍ୟବସାୟ ମାଜିଂଙ୍କୁ ସାଉକାର ମାଡ଼ତେ ଇଞ୍ଜି ସାରେତଡ଼୍ ପୁଡ଼ତାଡ଼୍ ।

୨୬ ଇଞ୍ଜି ଇଣ୍ଟ ପାଉଲ୍ ବାଡ଼ ମାଡ଼ତୁଣ୍ଡ; ଆଦ୍ ମିଡ଼୍ ନିଜେ ଉଡ଼ତୁଡ଼୍ ନୁ କେଞ୍ଜୁଡ଼ିଡ଼୍ । ଅଣ୍ଟା କେତୁତଣ୍ଡ, ନାରୁଡ଼୍ ତିଆର୍ ମାଡ଼ତେ ଦେୟାକ୍ ସାରେ ବେପଡ଼୍ ଦେୟାକ୍ ଆୟ୍ୟ, ମେଣ୍ଟେ ଅଣ୍ଟା ଇଗେ ଏପିସସ୍ ନୁ ମାଡ଼ମ୍ ସାରେ ଏସିଆ ଦେଶ୍ତାଗ୍ ନାର୍ଗେ ନାରୁଡ଼୍କିଂଙ୍କୁ ଇଦ୍ ବିଷୟ ବୁସା ମାଡ଼ି କେତୁତଣ୍ଡ ।

୨୭ ଆଦିଙ୍କୁ ମାନ୍ ବ୍ୟବସାୟ ବଦନାମ୍ ଆଦାନ୍ ଆଗଙ୍କା ମିନ୍ଦେ । ମାଡ଼ର୍ ଆସର୍ ଆୟ୍ୟ, ବେନ୍ ଦେବୀ ଏସିଆତାଗ୍ ନୁ ସାରେ ଜଗଡ଼୍ ତାଗ୍ ପୂଜା ପାଏମ୍ ଆଡୁଡ଼ତେ, ଆଦ୍ ବିକ୍ୟାଡ଼୍ ଆର୍ଡେମୀ ଦେବୀଡ଼୍ ମନ୍ଦିରତେ ପେଦେର୍ ମେଣ୍ଟେ ମାନ୍ ନୁ ଆର୍ଡେମୀ ଦେବୀଡ଼୍ ସମ୍ମାନ୍ ନଷ୍ଟ ଆଦତେ ।”

୨୮ ନାରୁଡ଼୍ ଇଦ୍ ଗଡ଼୍ କେଞ୍ଜି କପାମ୍ ଆଡ଼ତଡ଼୍ ନୁ ଗାଟି ଲେଙ୍ଗ୍ଦେ କେତୁତଣ୍ଡ, “ଏପିସିୟତେ ଆର୍ଡେମୀ ମହାଦେବୀ ଜୟ୍ !”

୨୯ ଇଦ୍ ଗଲ୍ଲକ୍ ନଗର୍ ଏକାମ୍ ଆଡ଼ତେ । କପାମ୍ ଆଡ଼ତେ ନାରୁଡ଼୍ ପାଉଲ୍ତେ ତଡ଼୍ ଝାଡ଼ତେନଡ଼୍ ମାସିଦୋନିଆତେ ଗାୟ୍ସ୍ ନୁ ଆରିଷ୍ଟାକ୍ସତିଙ୍କୁ ପଇସ୍ ତାମାଦ୍ ରଙ୍ଗ୍ବୁମ୍ତାଗ୍ ଲାଗି ଆଡ଼ତଡ଼୍ ।

୩୦ ପାଉଲ୍ ନିଜେ ନାରୁଡ଼୍କିଂଙ୍କୁ ସାମ୍ନା ମାଡ଼ାନଙ୍କୁ ତିଆର୍ ଆଡ଼ତଣ୍ଡ, ଇଡ଼କେ ବିଶ୍ବାସୀଡ଼୍ ଶିଷ୍ୟ ଇଦ୍ ମାଡ଼ାନଙ୍କୁ ଇଞ୍ଜିଡ଼୍ ।

୩୧ ବେସ୍କ୍ତୁଡ଼୍ କର୍ମଚାରୀ ସାଙ୍ଗଡ଼୍ ପାଉଲ୍ତିଙ୍କୁ ରଙ୍ଗ୍ବୁମ୍ ଲୋପେ ଆନ୍ମାକିନ୍ ଇଞ୍ଜି ଅନୁରଦ୍ ମାଡ଼ି ଅଣ୍ଟୟ୍ କାବୁର୍ ରଅଡ଼ତଡ଼୍ ।

୩୨ ଇଦ୍ ସମୟ୍ ଲୋପେ ପୁରାମାନ୍ଦେ ସାରେତଡ଼୍ କପାମ୍ ଆଡ଼ତଡ଼୍ । ନାରୁଡ଼୍ ମାନ୍ମାନ୍ମା ଆସ୍ ନାର୍ଗେ କିଡ଼କ ମାଡ଼ତଡ଼୍, ଇଡ଼କେ ଅଡ଼୍ ଲୋପେ ନାର୍ଗେ ନାରୁଡ଼୍ ଅଡ଼୍ ଅଣ୍ଟୟାଗେ ଆଡ଼ତେ କାରନ୍ ମିକା ପୁନ୍ତେ ମାଡ଼ତଡ଼୍ ।

୩୩ ନାରୁଡ଼୍ ଲୋପେଙ୍କୁ ବେସ୍କ୍ତୁଡ଼୍ କେତୁତଣ୍ଡ, ଯେ, ଆଲେକ୍ଜାଣ୍ଡର୍ ଇଦିନ୍ ସେଙ୍ଗେ ଦାୟ୍, ବାତେଙ୍କୁଇଡ଼କେ ଇହୁଦୀଡ଼୍ ଅଂକିଙ୍କୁ ମୁନ୍ନେ ନିସ୍ତି ମାଡ଼ତଡ଼୍ । ଆଲେକ୍ଜାଣ୍ଡର୍ କାୟ୍ ତେଇସ୍ ନାରୁଡ଼୍କିଂଙ୍କୁ କଟ୍ ମାନ୍ମାନଙ୍କୁ ଚିନ୍ନେ ହିଡ଼ତଣ୍ଡ ନୁ ବିଶ୍ବାସୀଡ଼୍ ଗାରେ

ବାଷଣ ଇସ ବୁଜାମାଡ଼ାଙ୍କ ଚେଷ୍ଟା ମାଡ଼ତଣ୍ଡ ।

୩୪ ଏପିସିୟ ଅଣ୍ଟ ଝେରଣ୍ଟ ଇହୁଦୀ, ଇଦ ପୁଞ୍ଜ ଅଡ଼ ସାରେତଡ଼, ଅଣ୍ଟୟଦାମ୍ କିଡ଼କ୍ତଡ଼, “ଆର୍ତ୍ତେମୀ ମହାଦେବୀନ୍ ଜୟ !” ରେଣ୍ଟ ଗାଣ୍ଟା ଇଦ୍‌ରକମ୍ ମର୍ ଆଡ଼ତଡ଼ ।

୩୫ ପେରକେ ନଗର୍‌ପାଳ ନାରୁଡ଼କିଂଙ୍କ ଶାନ୍ତି ମାଡ଼ାନଙ୍କ କେଡ଼ତଣ୍ଡ, “ଏପିସିୟତେ ଦାଦାଲଡ଼, ସାରେତଡ଼, ପୁଡ଼ତଡ଼, ଯେ, ଏପିସସ୍ ନଗରୀତାଗ୍ ବେଡ଼ୟାଦ୍ ଦେବୀ ଆର୍ତ୍ତେମୀ ମନ୍ଦିର୍ ନୁ ମୟଲ୍‌ତାଗାଙ୍କ ଦେଗି ଖାସ୍‌ମାନ୍‌ନ୍ ପବିତ୍ର ମୂର୍ତ୍ତିଙ୍କ ସୁରକ୍ଷା ହାସଲିୟେ ।

୩୬ ବେନ ଇଦ୍ ଅସ୍ତୀକାର୍ ମାଡ଼ାଙ୍କ ପାର୍‌ଝଣ୍ଟ । ଆଦିଙ୍କ ମିଡ଼, ସାରେତଡ଼ ଶାନ୍ତି ଆୟମୁର୍ । ବାଡ଼ମିକା ବୁଲ୍ ପାଡ଼ୟି ମାଡ଼ମାର୍ ।

୩୭ ଇ ନାରୁଡ଼ ମନ୍ଦିର୍‌ତାଗାଙ୍କ ବାଡେଏ ତଙ୍ଗଡ଼, କି ମାନ୍ ଦେବୀନ୍ ଅତ୍ୟାଚାର୍ ବାଡ଼ କାରାପ୍ କେଲଡ଼, ଆଗେକ୍‌ବା ମିଡ଼ ଇଡ଼କିଙ୍କ ପଇସ୍ ତାଡ଼ତିଡ଼ ।

୩୮ ଯଦି ଦୀମିତ୍ରିୟ ନୁ ଅନ୍ କାରିଗରୀଡ଼ାଦ୍ ବିରୁଦ୍‌ତେ ବେନନାଦ୍ ବାଡ଼ ଅବିୟଗ୍ ମିୟେ, ଆଦ୍ ବିଚାର୍ ମାଡ଼ାନଙ୍କ ମାନ୍ କର୍ମତାରୀଡ଼, ମିୟେ ନୁ ବିଚାର୍‌ଲୟତାଗ୍ ନିର୍ଦ୍ଦିଷ୍ଟ ଦିନାମ୍ ମିୟେ । ଆଗେ ଆଦ୍ ଅବିୟଗ୍ ତାସ୍ କେଲ୍‌ମୁର୍ ।

୩୯ ଯଦି ଇଦିନାଗାଙ୍କ ମେଣ୍ଟେ ଅଦିକ୍ ହାଲ୍‌ସୁଡ଼ିଡ଼, ଆଲେକେ ନାଗରିକୀଡ଼ ତଡ଼ ଆଇନ୍ ମାଡ଼ତେ ମିଟିଙ୍କ୍‌ତାଗ୍ ଅନାଦ୍ ନିଷ୍ପତ୍ତି ଆୟି ।

୪୦ ନେଣ୍ଟ ବାଡ଼ ଗଟେମ୍ ଆଡ଼ତେ, ଆଗେ ମାନ୍ ବିରୁଦ୍‌ତେ ଇଂସାକାଣ୍ଟ ଆଦାନାଦ୍ ଆଶଙ୍କା ମିୟେ; ମାମ୍‌ମେ ଇଞ୍ଜୁସାରେ ଗଲ୍‌କିନାଦ୍ ବାଡ଼ବା ଟିକ୍ କାରନ୍ ତଅଡ଼ାଙ୍କ ପାର୍‌ଝମ୍ ।”

୪୧ ଇଞ୍ଜୁସାରେ ଗଟି କେସ୍ ଅଣ୍ଟ ନାରୁଡ଼କିଂଙ୍କ ଶାନ୍ତି ମାଡ଼ି ମିଟିଙ୍କ୍ ବନ୍ଦ୍ ମାଡ଼ତଣ୍ଡ ।

୧ ଗଲ୍‌କ୍ ତେରତେ ପେରକେ ପାଉଲ୍ ବିଶ୍ୱାସୀଡ଼ ଶିଷ୍ୟ ଅଣ୍ଟୟାଗେ ମାଡ଼ି ଝେଡ଼କାତାଞ୍ ଗଟି କେଡ଼ତଣ୍ । ଅଡ଼ଆଗାଙ୍କ ବିଦାୟ୍ ଅସ୍ ଅଣ୍ଟ ମାସିଦୋନିଆତାଗ୍ ଆଡ଼ତଣ୍ ।

୨ ଅଣ୍ଟ ସାରେ ପଡ଼୍‌ରେ ଇସ୍ ଆଡ଼ତଣ୍ ନୁ ନାରଗେ ଉପଦେଶ୍ ଇସ୍ ନାରୁଡ଼କିଂଙ୍କ୍ ଝେଡ଼କା ମାଡ଼ତଣ୍ । ପେକେ ଅଣ୍ଟ ଗ୍ରୀସ୍ ଦେଶ୍‌ତାଗ୍ ଏଞ୍ଜୁଡ଼ତଣ୍ ।

୩ ତାନପେକେ ଅଣ୍ଟ ଆଗେ ମୁଣ୍ଟ ନେଲ୍‌ଞ୍ ମାଡ଼ତଣ୍ । ଅଣ୍ଟ ସିରିଆତାଗ୍ ଆଦାନଙ୍କ୍ ତିଆର୍ ଆଡ଼ତେ ଝେଲେ ଇହୁଦୀଡ଼୍ ଅନ୍ ପରର କପାମ୍ ଆଡ଼ତଡ଼୍ ଇଞ୍ କେଞ୍ଜି ମାସିଦୋନିଆତାଲ୍ ମାଲ୍‌ସ୍ ଆଦାନଙ୍କ୍ ତିଆର୍ ଆଡ଼ତଣ୍ ।

୪ ବେରିଆ ନିବାସୀ ପୁରନ୍ ମାର୍ ସୋପାତ୍ର, ଥେସଲନିକୀତେ ଆରିଷ୍ଟାରକ୍‌ସ୍ ନୁ ସେକୁନ୍, ଦର୍ବୀତେ ଗାୟ୍, ଏସିଆ ଦେଶ୍‌ତେ ତୁକିକ ନୁ ତ୍ରଫିମ୍, ମେଣ୍ଟେ ତୀମତି ଅନ୍ ତଡ଼୍ ଆଡ଼ତଡ଼୍ ।

୫ ଅଡ଼ ମୁନେନ୍ ଆଞ୍ଜ୍ ତ୍ରୋୟାତାଗ୍ ମାକିଂଙ୍କ୍ କେପିମାଡ଼ତଡ଼୍ ।

୬ କମୀରଶୂନ୍ୟ ରୋଟି ପାଣ୍ଟୁମୁତେ ପେରକେ ମାମ୍‌ମେ ଫିଲିପ୍‌ପୀ ଟାଞ୍ଜୁନ୍‌ତାଗାଙ୍କ୍ ଏରଦାଲ୍ ଝେଇସ୍ ମିକା ଏଇଙ୍କ୍ ଦିନା ପେରକେ ତ୍ରୋୟାତାଗ୍ ଅଡ଼୍ ତଡ଼୍ କାଈଲ୍‌ତମ୍ ନୁ ଆଗେ ଅଣ୍ଟୟ୍ ଆର୍ ମାଡ଼ତମ୍ ।

ତ୍ରୋୟାତାଗ୍ ପାଉଲ୍‌ତେ ମାଡ଼େଙ୍କ୍ ଆଦାନାଦ୍

୭ ଅଣ୍ଟୟ୍ ସପ୍ରାତେ ମୁନେଡ଼ ଦିନେ ମୁଲ୍‌ପୁର୍ ମାମ୍‌ମେ ସାରେତମ୍ କାଈଲି ତିନ୍ଦାନଙ୍କ୍ ଅଣ୍ଟୟାଗେ ଗୁଡ଼ତମ୍ । ପାଉଲ୍ ନାରୁଡ଼କିଂଙ୍କ୍ ନାର୍‌ନାରକେ ଜାକ ଉପଦେଶ୍ ଇଡ଼ତଣ୍, ବାଡେଙ୍କ୍ ଇଡ଼କେ ମେଣ୍ଟେଅନ୍ ଦିନ୍ ଅଣ୍ଟ ଆଦ୍ ପଡ଼୍‌ରେ ଝିଡ଼ସାନଙ୍କ୍ ଆଞ୍ଜମାଡ଼ତଣ୍ ।

୮ ବେନ୍ ପରଡ଼ ବାକଡେତାଗ୍ ମାମ୍‌ମେ ମିଟିଙ୍କ୍ ମାଡ଼ି ମାଡ଼ତମ୍, ଆଗେ ନାରଗେ କୁପି ନିଡ଼ସ ମାଡ଼ତା ।

୯ ଆଗେ ଇଡ଼ଟିକସ୍ ପେଦେରଡ଼ତଣ୍ ଝେରଣ୍ଟ୍ ଲେୟଣ୍ଟ୍ ଜରକାତାଗ୍ କୁପି ମାଡ଼ତଣ୍, ପାଉଲ୍ ଗଟି କେଡ଼ତାନ୍ ଝେଲେ ଅଂକିଙ୍କ୍ ଉସ୍ମାଡ଼୍ ଝିଡ଼ତେ । ଅଣ୍ଟ ଉସ୍ମାଡ଼ତେ ମୁଣ୍ଟ ମହଲାତାଗାଙ୍କ୍ ମଦଲ୍ ରାୟ୍‌ତଣ୍ । ଅଡ଼୍ ଅଂକିଙ୍କ୍ ତେଏତାନ୍ ଝେଲେ ଅଣ୍ଟ ଡଲିମାଡ଼ତଣ୍ ।

୧୦ ଇଡ଼କେ ପାଉଲ୍ ମଦଲ୍ ଡିଗି ଅଂକିଙ୍କ୍ ଗାଡ଼ମ୍ଭରୁଙ୍ଗି କେଡ଼ତଣ୍ଡ, “ଦାନ୍ଦେ ଆୟମାଟ୍ । ଅଣ୍ଡ ଜିଝୁଣ୍ଡ ମିନ୍ଦେଣ୍ଡ ।”

୧୧ ତାନପେକେ ଅଣ୍ଡ ପରର ମାଲ୍ସ ଆଞ୍ଜ ରୁଟି ଉହ୍ସୁ ତିଡ଼ତଣ୍ଡ ନୁ ପଡ଼ନ୍ ପେୟନା ଯାକ ଅଡ଼୍ ତଡ଼୍ ନାରଗେ ଗଟି ତିରୁୟି ଆଗାଙ୍କ୍ ଆଡ଼ତଣ୍ଡ ।

୧୨ ନାରୁଡ଼୍ ପିଲାନ ଜିଝେ ମାୟାନାଦ୍ ଉଡ଼ି ତାମ୍ ଲୋନ୍ ଆଡ଼ତଡ଼୍, ନୁ ନାରଗେ ଖେଡ଼କା ପାଏମ୍ ଆଡ଼ତଡ଼୍ ।

ତ୍ରୋୟାତାଗାଙ୍କ୍ ମିଲୀଟସ୍ ଆଡ଼ତଡ଼୍

୧୩ ମାମ୍ମେ ମୁନେନ୍ ଏର୍ ଜାହାଜ୍ତାଗ୍ ତାରି ଆସୋସ୍ତାଗ୍ ଆଡ଼ତମ୍ । ଆଗାଙ୍କ୍ ମାମ୍ମେ ପାଉଲ୍ତିଙ୍କ୍ ଏର୍ଜାହାଜ୍ତାଗ୍ ତାରୁଣ୍ଡି ଆଦାନାଦ୍ ମାଡ଼ତେ, ବାତେଙ୍କ୍ଇଡ଼କେ ଅଣ୍ଡ ବୁମ୍ତାଗା ଆଞ୍ଜ ଆଗେ ହେଝୁଡ଼ତାନ୍ ଇଞ୍ଜ କେସ୍ମାଡ଼ତଣ୍ଡ ।

୧୪ ଅଣ୍ଡ ବେସ୍ପୁର୍ ମାକିଂଙ୍କ୍ ଆସୋସ୍ତାଗ୍ କାଇଲ୍ତଣ୍ଡ, ମାମ୍ମେ ଅଂକିଙ୍କ୍ ଏର୍ଜାହାଜ୍ତାଗ୍ ତାରୁଣ୍ଡି ମିଡିଲିନୀତାଗ୍ ଆଡ଼ତମ୍ ।

୧୫ ଆଗାଙ୍କ୍ ଆଞ୍ଜ ମେଣ୍ଡୁନ୍ଦିନେ ସାମୋସ୍ତାଗ୍ ହେଝୁଡ଼ତମ୍ । ମେଣ୍ଡୁନ୍ଦିନେ ମାମ୍ମେ କିଆସ୍ତାଗ୍ ହେଝୁଡ଼ତମ୍, ତାନ୍ ମେଣ୍ଡୁନ୍ଦିନେ ମିଲୀଟସ୍ତାଗ୍ ହେଝୁଡ଼ତମ୍ ।

୧୬ ରୋମ୍ତେ ଏସିଆ ପ୍ରଦେଶ୍ତାଗ୍ ମେଣ୍ଡେ ନାରଗେ ଦିନା ମାନକର୍ ଏପିସ୍ସ ହାଞ୍ଜ ହାଞ୍ଜ ଏର୍ଜାହାଜ୍ ତାଲୀମାଡ଼ାଙ୍କ୍ ପାଉଲ୍ ମାନ୍ ମାଡ଼ତଣ୍ଡ । ଯଦି ସମ୍ବର୍ ଆଦତେ, ପେଣ୍ଟିକ୍ଷ୍ ଦିନାତେ ଯିରୁଶାଲେମ୍ ହେଝୁଦାନଙ୍କ୍ ଅଣ୍ଡ ଦାନ୍ଦେ ଆସମାଡ଼ତଣ୍ଡ ।

ଏପିସିୟ ମଣ୍ଡଲିତଡ଼୍ ନେତାଲଡ଼୍ ପାଉଲ୍ ବିଦାୟ ବାଷଣ୍ଡ ହିଡ଼ତଣ୍ଡ

୧୭ ଏପିସ୍ସ ମଣ୍ଡଲିତେ ବୟସ୍ସା ନେତାଲଡ଼୍ ମିଲୀଟସ୍ ତଡ଼୍, କାଇଲାନଙ୍କ୍ ପାଉଲ୍ କାରୁଙ୍ଗ୍ତଣ୍ଡ ।

୧୮ ଅଡ଼୍ ଝାସ୍ ହେଝୁଡ଼ତାଙ୍କ୍ ପାଉଲ୍ କେଡ଼ତଣ୍ଡ, “ରୋମ୍ତେ ଏସିଆ ପ୍ରଦେଶ୍ତାଗ୍ ହେଝୁଡ଼ତେ ଦିନାକନ୍ତ ନାନ୍ ବେଲା ମିଇ ତଡ଼୍ ନାରଗେ ଦିନାମ୍ ମିନ୍ଦେନ୍ ମିଡ଼୍ ପୁଡ଼ତିଡ଼୍ ।

୧୯ ଇହୁଦୀଡ଼ ଜୋଜନା ସେଙ୍ଗେ ନାନ୍ ବେନ୍‌ସାରେ ଦୁଃକକଷ୍ଟ ପାଏନ୍ ଆଡ଼ତାନ୍, ଆଦିନ୍ ଲୋପେ ନାନ୍ ପ୍ରବୁନ୍ ଦାସତେ ଲେକାମ୍ କାଣ୍ଡେଡ଼ି ରାପି ନମ୍ରତଡ଼ ନାଝାଦ୍ ପାଡ଼ୟି ମାଡ଼ତାନ୍ ।

୨୦ ମିଡ଼ ପୁଡ଼ତିଡ଼ ଯେ, ନାନ୍ ନାରୁଡ଼ ବକେଡ଼ ପ୍ରଚାର ମାଡ଼ାନ୍ ଝେଲେ ନୁ ମିଇ ଲୋନ୍ ଉପଦେଶ୍ ହିଦାନ୍ ସମୟତେ ମିୟାଦ୍ ଉପକାର୍ ଆଦାନ୍ ରକମ୍ ବାଡ଼ ବିଷୟ କେତାନଙ୍କ୍ ସିଗ୍ ଆୟ୍‌ଝେ ମାଡ଼ତାନ୍ ।

୨୧ ଇହୁଦୀ ନୁ ଅଣଇହୁଦୀଡ଼ ସାରେତଡ଼କିଂଙ୍କ୍ ନାନ୍ ଗାଟି ସତର୍କ ଗର୍ କେଡ଼ତାନ୍, ଅଡ଼ ଅନୁତାପ୍ ମାଡ଼ି ପାପାମ୍‌ତାଗାଙ୍କ୍ ମାଲ୍‌ସମିକା ଇଶ୍‌ରତେ ପାକେ ମନ୍ ମାଡ଼ିତଡ଼ ନୁ ପ୍ରବୁ ଜିସୁନାଗ୍ ବିଶ୍ୱାସ୍ ମାଡ଼ିତଡ଼ ।

୨୨ ଇଞ୍ଜେ ପବିତ୍ର ଆମ୍ବାତେ ନିର୍ଦ୍ଦଶ୍ ପାଲନ୍ ମାଡ଼ି ନାନ୍ ଯିରୁଶାଲେମ୍ ଆଡୁତାନ୍ । ନାନ୍ ପୁନନ୍ ଆଗେ ନାୟାଦ୍ ବାଡ଼ ଆଦତେ ।

୨୩ ପବିତ୍ର ଆମ୍ବା ନାକିଂଙ୍କ୍ କେସ୍ ସତର୍କ ମାଡ଼ିସ୍ ମିନ୍ଦେ ଯେ ନାନ୍‌ନେ ସାରେ ଟାଞ୍ଜୁନକିନାଗ୍ ବନ୍ଦି ଆଦତାନ୍ ନୁ ଆଗେ ମାଞ୍ଜ୍ କଷ୍ଟ ପାଏମ୍ ଆଦତାନ୍ ।

୨୪ ☆ ଇଡ଼କେ ନା ସେଙ୍ଗେ ନାନ୍ ନାୟାଦ୍ ଜିଝୁଣ୍ଡିତିଙ୍କ୍ ସୁଦୁର୍ ହେର୍କା ମାଡ଼ିତାନ୍ । ଇଶ୍‌ରତେ ଅନୁଗ୍ରହ ବିଷୟ ପ୍ରବୁ ଜିସୁ ବେନ୍ କବର୍ ସୁସମାଚାର୍ କେଡ଼ତାନଙ୍କ୍ ନାକିଂଙ୍କ୍ ହିଡ଼ତଣ୍ଡ, ଆଦ୍ ପୁରନ୍ ମାଡ଼ି ନାୟାଦ୍ ପ୍ରଚାର୍ ପାଡ଼ୟି ସାରେ ମାଡ଼ିତାନ୍; ଇସରେ ନାୟାଦ୍ ଇଚ୍ଛା ।”

୨୫ “ଇଶ୍‌ରତେ ରାଜ୍ୟ ବିଷୟ ପ୍ରଚାର୍ ମାଡ଼ାନଙ୍କ୍ ନାନ୍ ମିଡ଼ ସାରେତଡ଼ତେ ବକେଡ଼ ଆଡ଼ତାନ୍ । ଇଞ୍ଜେ ଉଡ଼ାଟ୍, ନାନ୍ ପୁଡ଼ତାନ୍ ଯେ, ମିଇ ଲୋପେଙ୍କ୍ ବେନ ନାକିଂଙ୍କ୍ ମେଣ୍ଡେ ଉଡ଼ଝିଡ଼ ।

୨୬ ଆଦିଙ୍କ୍ ନାନ୍ ନେଣ୍ଡେ ଲେକେଡ଼ ମିଇ ଗାର୍‌ରେ ପ୍ରଚାର୍ ମାଡ଼ୁତାନ୍ ଯେ, ଯଦି ମିଇ ଲୋପେଙ୍କ୍ ବେନ ଦଂସ ଆଦତନ୍, ଆଦିନ୍ ସେଙ୍ଗେ ନାନ୍ ଦାୟି ଆୟନ୍ ।

୨୭ ବାଡେଙ୍କ୍‌ଇଡ଼କେ ଇଶ୍‌ରତେ ସାରେ ଉଦେଶ୍ୟ ମିଇ ଗାର୍‌ରେ କେତାନଙ୍କ୍ ନାନ୍ ସିଗ୍ ମାଡ଼ନ୍ ।

୨୮ ଆଦିଙ୍କ୍ ମିଡ଼ ନେତା ଲେକାମ୍ ନିଜର୍ ବିଷୟତେ ନୁ ପବିତ୍ର

ଆମ୍ଭା ବେନ ବିଶ୍ୱାସୀତ୍ୱକ୍ ମିଇ ଦାୟିତ୍ୱତେ ଝିଡ଼ସ୍ତତ୍ତ୍ୱ, ଆ ସାରେତତ୍ତ୍ୱକିଂଙ୍କ୍ ଯତନ୍ ଆୟମୁର୍ । ମେଣ୍ଡାପତ୍ତ୍ୱାନତ୍ ଲେକାମ୍ ଇଶ୍ୱରତେ ମଣ୍ଡଲିତିଙ୍କ୍ ଯତନ୍ ଆୟମୁର୍ । ଆଦ୍ ମଣ୍ଡଲିତିଙ୍କ୍ ଅଣ୍ଡ ତାନ୍ ମାର୍ ଦଂସ ଆଡ଼ତାଙ୍କ୍ ନିଜର୍ ମାଡ଼ତଣ୍ ।

୨୯ ନାନ୍ ପୁଡ଼ତାନ୍, ନାନ୍ ଆଡ଼ତେ ପେରକେ ମିୟାଗ୍ ବୟଙ୍କର୍ କୁକାଲି ଖାଦତା ନୁ ବିଶ୍ୱାସୀତ୍ତ୍ୱକିଂଙ୍କ୍ ପୁଣ୍ଡକ୍ ମାଡ଼ି ଝିଡ଼ସିତା ।

୩୦ ଦିନାମ୍ ଖାଦତେ, ଆସୁଟେ ମିଇ ନିଜର୍ ମାନ୍ଦେତେ ବେସ୍‌କ୍‌ତୁଡ଼, ଶିଷ୍ୟତ୍‌ରୁସା ଗଟି କେସ୍ କାରାପ୍ ହାରଦାଗ୍ ଆଦତଡ଼ ।

୩୧ ଆସୁଟ୍ ସତର୍କ୍ ମାନୁଟ୍, ନାନ୍ ଯେ ନାରକେ ପାୟାଲ୍ ନିଜର୍ କାଣ୍ଡେଡ଼ି ରାପି ମୁଣ୍ଡ ହେଣ୍ଡକ୍ ଯାକ ଶିକ୍ଷା ହିଡ଼ତାନ୍, ଇଦ୍ ହେର୍କା ମାଡ଼ାଟ୍ ।”

୩୨ “ଇଞ୍ଜେ ନାନ୍ ମିକିଂଙ୍କ୍ ଇଶ୍ୱରତେ କାୟଦେ ପରିଷ୍କାର ନୁ ଅନୁଗ୍ରହ ବାକ୍ୟ ଗାରରେ ସମର୍ପନ୍ ମାଡ଼ତୁନ୍; ଆଦ୍ ବାକ୍ୟ ମିକିଂଙ୍କ୍ ତୁଟାଙ୍ଗ୍ ମାଡ଼ାନଙ୍କ୍ ନୁ ଇଶ୍ୱରତେ ନାରୁଡ଼କିଂଙ୍କ୍ ଦରକାର୍ ସାରେ ଆର୍ଗି ବାଦ୍ ମିକିଂଙ୍କ୍ ହିଦାନଙ୍କ୍ ପାର୍ଦତେ ।

୩୩ ନାନ୍ ବେନନ୍ ରୁପା, ସୁନା ନୁ ବେନନ୍ ଚକା ପାଏମ୍ ଆଦାନଙ୍କ୍ ଆଗେ ମାଡ଼ନ୍ ।

୩୪ ମିଡ଼ପୁଡ଼ତିଡ଼, ନାନ୍ ନା ଇଝୁରେଣ୍ଡ କାୟକିନ୍ ତଡ଼ପାଡ଼ୟି ମାଡ଼ି ନିଜର୍ ନୁ ନା ତଡ଼ପାଡ଼ୟି ମାଡ଼ାନଡ଼ାଝ୍ ସାରେ ଇଚ୍ଛା ସାଦନ୍ ମାଡ଼ତାନ୍ ।

୩୫ ‘ପାଏମ୍ ଆଦଦାନ୍ ନାଗାଙ୍କ୍ ଦାନ ମାଡ଼ାନାଗ୍ ଅଦିକ୍ ଝେଡ଼କେ ମାନ୍‌ଡେ,’ ନିଜେ ପ୍ରବୁ ଜିସୁନାଦ୍ ଇଦ୍ ବାକ୍ୟତିଙ୍କ୍ ହେର୍କା ମାଡ଼ି ଇଦ୍ ରକମ୍ କଷ୍ଟ ପାଡ଼ୟି ମାଡ଼ି ମାନାଡ଼ ଗରିବ୍ ନାରୁଡ଼କିଂଙ୍କ୍ ସାହାଯ୍ୟ ମାଡ଼ିକାଡ଼, ଇଦ୍ ବିଷୟତେ ନାନ୍ ସାରେଦାମ୍ ମିକିଂଙ୍କ୍ ଆଦର୍ଶ ତଅଡ଼ତାନ୍ ।”

୩୬ ଇଦ୍ ଗଟ୍ ତେରତେ ପେରକେ ପାଉଲ୍ ଅଡ଼ତଡ଼ମର୍ମିଣ୍ଡା ଇସ୍ ପ୍ରାର୍ତନା ମାଡ଼ତଣ୍ ।

୩୭ ସାରେତଡ଼କେୟି କେୟି ପାଉଲ୍‌ତିଙ୍କ୍ ଗାଡ଼ମ୍ ଉରଙ୍ଗି ନମସ୍କାର ମାଡ଼ି ରହଡ଼ତଡ଼ ।

୩୮ ଅଡ଼ ମେଣ୍ଡେ ଅଂକିଙ୍କ୍ ଉଡ଼ାନଙ୍କ୍ ପାର୍‌ଝଡ଼ ଇଞ୍ଜ ଅଣ୍ଡ କେଡ଼ତାଙ୍କ୍ ଅଡ଼ଗାଟି ଦୁଃକାମ୍ ଆସ୍ ମାଡ଼ତଡ଼ । ଅଡ଼ ଅଂକିଙ୍କ୍ ବିଦାୟ୍ ହିଦାନଙ୍କ୍

ଜାହାଜ୍‌ରେ ବକେତ୍ ଆଡ଼ତଡ଼ ।

୨୧

ପାଉଲ୍ ଜିରୁଶାଲମ୍ ଆଡ଼ତଣ୍ଡ

୧ ମାମ୍‌ମେ ଅଡ଼କିଂଙ୍କ ରହସିସ୍ ଆଗାଙ୍କ ମାଲ୍‌ସ୍ ଆଡ଼ତମ୍ ।
ଏରଦିଙ୍କ ଝେଇସ୍ ମାମ୍‌ମେ କୋସ୍ ଦ୍ଵୀପତାଗ୍ ହେଞ୍ଜୁଡ଼ତମ୍ ।
ମେଣ୍ଡେଅନ୍ ଦିନ୍ ରୋତସ୍ ଆଞ୍ଚ ଆଞ୍ଚ ପାତାରାତାଗ୍ ଆଡ଼ତମ୍ ।

୨ ଆଗାଙ୍କ ଫିନିସିଆତାକ୍ ଆଦାନ୍ ଜାହାଜ୍ ତାରି ଆଡ଼ତମ୍ ।

୩ ତାନ୍‌ପେକେ ସାଇପ୍ରସ୍ ତଅନ୍‌ଦମାନ୍‌ଆନ୍ ଅଣ୍ଡୟ୍ ପଡ଼ୟେତାଗ୍
ହେଞ୍ଜୁଡ଼ତମ୍ । ଆଗାଙ୍କ ଆଦିନ୍ ତିନ୍‌ପୋକ୍ ଇସ୍ ମାମ୍‌ମେ ସିରିଆତାଗ୍
ଆଡ଼ତମ୍ । ମାମ୍‌ମେ ଟାୟର୍ ଟାଞ୍ଜୁନ୍‌ତାଗ୍ ଏରଜାହାଜ୍‌ତାଗାଙ୍କ
ଡିଗ୍‌ତମ୍, ବାତେଙ୍କ ଇଡ଼କେ ଆଦ୍ ଏରଜାହାଜ୍‌ତାଗାଙ୍କ ଜିନିଷ୍ ତିପାନ୍
ମାଡ଼ତେ ।

୪ ଆଗେ ମାମ୍‌ମେ ବେସ୍‌କଡ଼ୁଡ଼ ବଶ୍ଵାସୀ ଶିଷ୍ୟ ତଡ଼ କାଇଲି ଅଣ୍ଡୟ୍
ଆର୍ ମାଡ଼ତମ୍ । ପବିତ୍ର ଆମ୍‌ତେ ନିର୍ଦ୍ଦେଶ୍ ପାଏମ୍ ଆସ୍ ଅଡ଼
ପାଉଲ୍‌ତିଙ୍କ ଯିରୁଶାଲେମ୍ ଆଦାନଙ୍କ ମନା ମାଡ଼ତଡ଼ ।

୫ ଇଡ଼କେ ଅଡ଼ ତଡ଼ ଅଣ୍ଡୟ୍ ଆର୍ ମାଡ଼ତେ ପେରକେ ମାମ୍‌ମେ
ଅଡ଼କିଂଙ୍କ ଝିଡ଼ସି ନିଜର୍ ହାର୍ ଆଡ଼ତମ୍ । ମାକିଂଙ୍କ ଝିଡ଼ସାନଙ୍କ ଅଡ଼
ସାରେତଡ଼ ନିଜର୍ ମୁଡ଼ତେ ନୁ ପିଲାଙ୍କ ପଇସ୍ ନାର୍ ବାୟିଦେ ମାନ୍‌ଆନ୍
ଗଦାଡ଼ ଆଞ୍ଚ ଯାକ ଝାଡ଼ତଡ଼ । ଆଗେ ମାମ୍‌ମେ ସାରେତମ୍ ମର୍ମିଣ୍ଡା
ଉଞ୍ଜୁସ୍ ପ୍ରାର୍ତନା ମାଡ଼ତମ୍ ।

୬ ତାନ୍‌ପେକେ ମାମ୍‌ମେ ଅଡ଼କିଂଙ୍କ ରହସିସ୍, ଏର୍ ଜାହାଜ୍‌ତାଗ୍
ଝାଡ଼ତମ୍, ଅଡ଼ ଲୋନ୍ ମାଲ୍‌ସ୍ ଆଡ଼ତଡ଼ ।

୭ ଟାୟର୍‌ତାଗାଙ୍କ ପାଲଟ୍ ଝାଟି ମାମ୍‌ମେ ଆଞ୍ଜ ଆଞ୍ଜ
ତାଲମେଇତାଗ୍ ହେଞ୍ଜୁଡ଼ମ୍, ଆଗେ ବିଶ୍ଵାସୀଡ଼ ତଡ଼ ନମସ୍କାର୍ ମାଡ଼ି
ଅଡ଼ ତଡ଼ ଅଣ୍ଡୟ୍ ଦିନ୍ ମାଡ଼ତମ୍ ।

୮ ☆ମେଣ୍ଡୁନ୍ ଦିନ୍ ମାମ୍‌ମେ ଆଦ୍ ପଡ଼ୟେ ଝିଡ଼ସି କାଇସରିଆତାଗ୍
ହେଞ୍ଜୁଡ଼ମ୍ । ମାମ୍‌ମେ ଆଗେ ପ୍ରଚାରମାଡ଼ାନ୍ ଫିଲିପ୍‌ପନ୍ ଲୋନ୍
ମାଡ଼ତମ୍, ଜିରୁଶାଲମ୍‌ତାଗ୍ ସାଡ଼ଜାନ୍ ହେଞ୍ଜିମାନ୍‌ଆନ୍ ନାରୁଡ଼
ଲୋପେଙ୍କ ଅଣ୍ଡ ଝେରଣ୍ଡ ମାଡ଼ତଣ୍ଡ ।

୯ ଅନାସ୍ତୁ ନାଲୁ ପେଣ୍ଡୁଆୟାଞ୍ଜା ମାୟାୟା ମାଡ଼ତା ଆସ୍ତୁ ଇଶ୍ବରତେ ସୁସମାଚାର ପ୍ରଚାର ମାଡ଼ମାଡ଼ତା ।

୧୦ ✠ମାମ୍ମେ ଆଗେ ନାରଗେ ଦିନା ମାଡ଼ତେ ପେରକେ, ଯିହୁଦା ଦେଶ୍ତାଗାଙ୍କ ଆଗାବ୍ ପେଦେରତଣ୍ଡ ଖେରଣ୍ଡ ବାବବାଦୀ ଆଗେ ଖାଡ଼ତଣ୍ଡ ।

୧୧ ଅଣ୍ଡ ମା ଗାରରେ ଖାସ୍ ପାଉଲ୍‌ତେ ବେଲ୍‌ଟିଙ୍କ ଆଡ଼ତଣ୍ଡ, ଆଦିନ୍ ତଡ଼୍ ଅଣ୍ଡ ନିଜର୍ କାୟାଙ୍କ ନୁ ତେକାଙ୍କ ତଅସ୍ କେଡ଼ତଣ୍ଡ, “ପବିତ୍ର ଆମ୍ବା ନାକିଂଙ୍କ କେଡୁତଣ୍ଡ ଯେ, ଇଦ୍ ବେଲ୍‌ଟିତେ ନାକିଂଙ୍କ ଯିରୁଶାଲେମ୍ ଇହୁଦୀଡ଼ ଇଦ୍ ରକମ୍ ତୃଅସ୍ ଅଂକିଙ୍କ ଅଶଇହୁଦୀଡ଼ କାୟାଦାଗ୍ ପସ୍ପିଡ଼ତଣ୍ଡ ।”

୧୨ ଇଦ୍ କେଞ୍ଜି ମାମ୍ମେ ନୁ ଆଦ୍ ପଡ଼ୟେତାଗ୍ ମାୟାନ୍ ବାଗାଡ଼ ନାରୁଡ଼ ପାଉଲ୍‌ତିଙ୍କ ଅନୁରଦ୍ ମାଡ଼ି ଯିରୁଶାଲେମ୍ ଆଦାନଙ୍କ ମନା ମାଡ଼ତଡ଼ ।

୧୩ ପାଉଲ୍ ଉତ୍ତର ହିଡ଼ତଣ୍ଡ, “ମିଡ଼ ଇଦ୍ ବାଡ଼ ମାଡ଼ଡୁଡ଼, ବାତେଙ୍କ କେୟିମିକା ନା ହୁଦୟତିଙ୍କ କେଇସ୍ତିଡୁଡ଼ିଡ଼ ? ଯିରୁଶାଲେମ୍‌ତାଗ୍ ମାତର୍ ତଅତିତଡ଼ ଆଦିନ୍ ମାଇଦିଙ୍କ ଖେରଖନ୍, ଇଡ଼କେ ପ୍ରୁ ଜିସୁନ୍ ପେଦେରତେ ସେକ୍ଷେ ତଲାନଙ୍କ ମିକା ନାନ୍ ତିଆର୍ ମିୟେନ୍ ।”

୧୪ ମାମ୍ମେ ଅଂକିଙ୍କ ବୁଜା ମାଡ଼ାନଙ୍କ ପାର୍‌ଖମ୍ ଗାଲା କଟ ଆସ୍ ମାଡ଼ତମ୍ ନୁ କେଡ଼ତମ୍, “ପ୍ରୁନାଦ୍ ଇଚ୍ଛା ସାରେ ପୁରା ଆୟି ।”

୧୫ ଆଗେ ବେସ୍‌କେ ଦିନାମ୍ ମାଞ୍ଜି ମାମ୍ମେ ମାଞ୍ଜା ଜିନିଷ୍ ପଇସ୍ ଯିରୁଶାଲେମ୍‌ତାଙ୍କ ଆଡ଼ତମ୍ ।

୧୬ କାଇସରିଆତେ ବେସ୍‌କଡୁଡ଼ ଶିଷ୍ୟଡ଼ ନୁ ସାଇପ୍ରସ୍‌ତେ ମନାସୋନ ପେଦେରତଣ୍ଡ ଖେରଣ୍ଡ ବିଶ୍ବାସୀ ମିକା ମା ତଡ଼୍ ଆଡ଼ତଣ୍ଡ । ମନାସୋନତେ ଲୋନ୍ ମାମ୍ମେ ମାୟାନାଦ୍ ବ୍ୟବସ୍ଥା ଆସ୍ ମାଡ଼ତେ ।

ଯାକୁବନ୍ ତଡ଼୍ ପାଉଲ୍ କାଇଲ୍‌ତଣ୍ଡ

୧୭ ଯିରୁଶାଲେମ୍‌ତାଗ୍ ବିଶ୍ବାସୀଡ଼ ମାକିଂଙ୍କ ସାରଦେଞ୍ଜେ ସ୍ବାଗଡ଼ ମାଡ଼ତଡ଼ ।

୧୮ ମେଣ୍ଡେଅନ୍ ଦିନ୍ ପାଉଲ୍ ମା ଯାକୁବ୍ ଉଡାନଙ୍କ ଆଡ଼ତଣ୍ଡ; ମଣ୍ଡଲିତେ ସାରେତଡ଼ ନେତାଲଡ଼ ଆଗେ ଖାସ୍‌ମାଡ଼ତଡ଼ ।

୧୯ ପାଉଲ୍ ଅଡ଼କିଂଙ୍କ ନମସ୍କାର ମାଡ଼ି ତାନ୍ ସେବା ପାଡ଼ିତତ୍, ଇଶ୍ବର ଅଣଇହୁଦୀଡ଼କିଂଙ୍କ ବାଡ଼ ମାଡ଼ିମାଡ଼ତଣ୍ଡ; ଆଦିନାଦ୍ ସାରେ ବିଷୟ କେଡ଼ତଣ୍ଡ ।

୨୦ ଅନ୍ ଗଟ୍ କେଞ୍ଜ୍ରେ ପେର୍କେ ଅଡ଼ ସାରେତଡ଼ ଇଶ୍ବରତିଙ୍କ ପ୍ରସଂଶା ମାଡ଼ତଡ଼ । ତାନ୍ ପେର୍କେ ଅଡ଼ କେଡ଼ତଡ଼, “ହଁ ଦାଦା ପାଉଲ୍, ନିମ୍ ଉଡ଼ଡ଼ିନ୍, ବେଲା ଇଞ୍ଜେ ହଜାର୍ ହଜାର୍ ଇହୁଦୀ ଦାଦାଲଡ଼ ପ୍ରବୁ ଜିସୁନାଗ୍ ବିଶ୍ବାସ୍ ମାଡ଼ତୁଡ଼ ନୁ ମୋଶାନ୍ ନିୟମ୍ ମିକା ପାଲନ୍ ମାଡ଼ତୁଡ଼ ।

୨୧ ଅଡ଼ କାବୁର୍ ପାଏମ୍ ଆଡ଼ତଡ଼ ଯେ, ନିମ୍ ଅଣଇହୁଦୀଡ଼ ଦେଶ ବାସେ ମାଡ଼ମାଦାନ୍ ଇହୁଦୀଡ଼କ୍ ମୋଶାଲ୍ ନିୟମ୍ ଓଡ଼ସାନଙ୍କ୍, ଅଡ଼ାସୁ ପିଲାକିଙ୍କ୍ ସୁନ୍ନଡ଼ ମାଡ଼ମାଟ୍ ଇଞ୍ଜ ନୁ ଇହୁଦୀଡ଼ ରୀତିନୀତି ପାଲନ୍ ମାଡ଼ମାଟ୍ ଇଞ୍ଜ ଶିକ୍ଷା ହିବୁଡ଼ିନ୍ ।

୨୨ ନିମ୍ ଇଗେ ହେସୁଡ଼ିନ୍ ଇଞ୍ଜ ଅଡ଼ ନିଜାମ୍ କେଞ୍ଜିତଡ଼ । ଆଲେକେ ବାଡ଼ ମାଡ଼ାନଙ୍କ୍ ଆଦତେ ?

୨୩ ମାମମେ ହାଲ୍ସୁଡ଼ମ୍, ନିମ୍ ଅଣ୍ଡୟ ପାଡ଼ି ମାଡ଼େ । ଇଗେ ମାଦାନ୍ ନାଲୁଜାନ୍ ନାରୁଡ଼ ଅଣ୍ଡୟ ମାନଡ଼ ମାଡ଼ତଡ଼ ।

୨୪ ଅଡ଼ ତଡ଼ ଅନ୍ । ଶୁଚିକରଣ ବିଦି ପାଲନ୍ ମାଡ଼ାନାଗ୍ ଅଡ଼ ତଡ଼ କାଇଲି ଅଡ଼ାସୁ କର୍ଜ୍ ହିମ୍ । ତାନ୍ପେର୍କେ ଅଡ଼ ନିଜର୍ ନିଜର୍ ତାଲାତିଙ୍କ୍ ଟାଙ୍ଗୁ ମାଡ଼ିତଡ଼ । ଆଗାଙ୍କ୍ ପୁନ୍ତଡ଼ ଯେ, ନି ବିଷୟରେ ପେଇସ୍ ମାଦାନ୍ ସାରେ କାବୁର୍ ସଡ଼ ଆୟୟ, ମାତର୍ ନିମ୍ ମୋଶାନ୍ ନିୟମ୍ ଲେକାମ୍ ବାଦକୁଡ଼ିନ୍ ।

୨୫ ☆ଇଡ଼କେ ବେନ୍ ଅଣଇହୁଦୀଡ଼ ବିଶ୍ବାସୀ ଆଡ଼ତଡ଼, ଅଡ଼ ଗାରରେ ଅଣ୍ଡୟ ଚିଟି ଲେକି କେଡ଼ିତମ୍ ଯେ, ମାଝାଦ୍ ନିଷ୍ପତ୍ତି ଲେକାମ୍ ଅଡ଼ ପୁଡ଼ଲାମ୍ତିଙ୍କ୍ ଇଡ଼ତେ କାଦି ତିନଡ଼, ନେତୁର୍ ଉନଡ଼, ପାପେତିଙ୍କ୍ ପଇସ୍ ହାଝକ୍ତେ ପଶୁଡ଼ ଆସୁଙ୍କ୍ ତିନଡ଼ ନୁ ଯୌନ ପାପ୍ତାଗାଙ୍କ୍ ଝେରେ ମାନଡ଼ତଡ଼ ।”

୨୬ ମେଣ୍ଡନ୍ ଦିନ୍ ପାଉଲ୍ ଅଡ଼ ନାଲ୍ସୁଡ଼ ତଡ଼ ଶୁଚିକରଣ ବିଦି ପାଲନ୍ ମାଡ଼ତଣ୍ଡ । ତାନ୍ ପେର୍କେ ଅଣ୍ଡ ମନ୍ଦିରତାଗ୍ ଆଞ୍ଜ ଶୁଚିକରଣ ପାଡ଼ି ବେସୁଟ୍ ପୁରା ଆଦତେ ନୁ ବେନ୍ ସମୟରେ ପୁଜିତଡ଼, ଆଦ ଅଂକିଙ୍କ୍ କେସିଡ଼ତଡ଼ ।

ପାଉଲ୍ ମନ୍ଦିର ଲୋପେ ଗିରଫ୍ ଆଡ଼ତଣ୍ଡ

୨୭ ଶୁଚିକରଣ ପାଡ଼ନ୍ତି ସାତ ଦିନ ତେରତେ ଖେଲେ ଏସିଆ ପ୍ରଦେଶରେ ବେସକ୍ତୁତ୍, ଇହୁଦୀତ୍, ପାଉଲ୍ତିଙ୍କ ମନ୍ଦିରତାଗ୍ ଉଡ଼ତଡ଼ । ଅଡ଼ ଆଗେ ଗୁଡ଼ିମାନ୍ଦାନ୍ ନାରୁଡ଼କିଙ୍କ ପୁସ୍ତକା ମାଡ଼ି ପାଉଲ୍ତିଙ୍କ ପଇଡ଼ତଡ଼ ।

୨୮ ଅଡ଼ କିଡ଼କି କେଡ଼ତଡ଼, “ହଁ ଇସ୍ରାଏଲୀୟ ଦାଦାଲଡ଼ି, ମାକିଙ୍କ ସାହାଯ୍ୟ ମାଡ଼ାଟ୍ ! ଇ ନାରୁଣ୍ଡ ସାରେପାକ୍ ଆଞ୍ଜ୍ ଇସ୍ରାଏଲୀୟ ନାରୁଡ଼ ବିରୁଦ୍ଧତେ, ମୋଶାନ୍ ନିୟମ୍ ନୁ ଇଦ୍ ମନ୍ଦିର ବିରୁଦ୍ଧତେ ଶିକ୍ଷା ଇଦୁତଣ୍ଡ । ଇଞ୍ଜେ ଅଣ୍ଡ ମେଣ୍ଡେ ବେସକ୍ତୁତ୍ ଅଣଇହୁଦୀଡ଼କ୍ ମନ୍ଦିର ଲୋପେ ତାସ୍ ଇଦ୍ ପବିତ୍ର ପଡ଼୍ରେଡ଼ିଙ୍କ ଶୁଚି ମାଡ଼ତଣ୍ଡ ।”

୨୯ ✧ ଅଡ଼ ନାରତାଗ୍ ଏଫିସିୟତେ ତୁଫିମ୍ତିଙ୍କ ପାଉଲ୍ ତଡ଼, ଉଡ଼ତାଙ୍କ ହାଲ୍ସତଡ଼ ଯେ, ପାଉଲ୍ ଅଂକିଙ୍କ ମନ୍ଦିରତାଗ୍ ଆଡ଼ତଣ୍ଡ ।

୩୦ ନଗରତେ ସାରେତଡ଼ କପାମ୍ ଆଡ଼ତଡ଼ । ନାରୁଡ଼ ପାଉଲ୍ତିଙ୍କ ମନ୍ଦିରତାଗାଙ୍କ ବାୟିଦେ ଲାଗି ତାଡ଼ତଡ଼ । ମନ୍ଦିରତେ ମାର୍ ସାରେ ବନ୍ଦ୍ ମାଡ଼ତଡ଼ ।

୩୧ କପାମ୍ ଆଡ଼ତେ ମାନେୟ ପାଉଲ୍ତିଙ୍କ ହାଞ୍ଜକାଙ୍କ ତିଆର୍ ଆଡ଼ତଡ଼, ଇଡ଼କେ ଟିକ୍ ଆଦେ ସମୟତେ ଯିରୁଶାଲେମ୍ତାଗ୍ ଇଂସାକାଣ୍ଡ ଗଟେମ୍ ଆଦୁଡ଼ତେ ଇଞ୍ଜ ପୁଞ୍ଜ ରୋମୀୟ ସୈନ୍ୟଡ଼, ମୁକ୍ୟାଲ୍ କବର୍ ପାଏମ୍ ଆସ୍,

୩୨ ଆଗାଙ୍କ ବେସକ୍ତୁତ୍ ସେନାପତି ନୁ ସୈନ୍ୟଡ଼କ୍ ପଇସ୍ ଆଦ୍ ପଡ଼୍ରେଡ଼ାଗ୍ ଖାଡ଼ତଣ୍ଡ । ନାରୁଡ଼ ସୈନ୍ୟଡ଼ ମୁକ୍ୟାଙ୍କ ନୁ ସୈନିକିଡ଼କ୍ ଉଡ଼ି ପାଉଲ୍ତିଙ୍କ ମେଣ୍ଡେ ରେହେଞ୍ଜକଟ୍ ଝିଡ଼ସ୍ତଡ଼ ।

୩୩ ସୈନ୍ୟଡ଼ ମୁକ୍ୟାଲ୍ ପାଉଲ୍ତିଙ୍କ ଗିରଫ୍ ମାଡ଼ି ଅଂକିଙ୍କ ରେଣ୍ଡ ଇକ୍ଲେମ୍ ତଡ଼, ତଅଡ଼ତାନଙ୍କ ଗଟ୍ ହିଡ଼ତଣ୍ଡ । ତାନ୍ ପେରକେ ଅଣ୍ଡ ପାତ୍ରାମାଡ଼ତଣ୍ଡ, “ଇଣ୍ଡ ନାରୁଡ଼ ବେନ ନୁ ଅଣ୍ଡ ବାଡ଼ ମାଡ଼ତଣ୍ଡ ?”

୩୪ ନାରୁଡ଼ ଗହଲିତାଗ୍ ବେନ ବାଡ଼ବାତା କେସ୍ କିଡ଼କ୍ତଡ଼ । ଇଦ୍ ରକମ୍ ରାମ୍ଙ୍କ ଆଡ଼ତଡ଼ ଯେ, ସୈନ୍ୟଡ଼ ମୁକ୍ୟାଲ୍ ବାଡ଼ ଗଟେମ୍ ଆଡ଼ତେ, ଆଦ୍ ପୁନ୍ଦାନଙ୍କ ପାର୍ଞଣ୍ଡ । ଆଦିଙ୍କ ପାଉଲ୍ତିଙ୍କ ଦୁର୍ଗତାଗ୍ ଲୋପେ ଆଦାନଙ୍କ ସୈନିକିଡ଼କ୍ ଆଦେଗ୍ ହିଡ଼ତଣ୍ଡ ।

୩୫ ଅଡ଼ ଅଂକିଙ୍କ ଆସ ଦୁର୍ଗତେ ପାହାଚ ଗାରରେ ହେଖୁଦାନ ଖେଲେ
ଅନ୍ ସାରେପାକ୍ ମାନ୍ଦାନ୍ ନାରୁଡ଼ ଗାଟି ବିଶୁଙ୍କଲା ଆଡ଼ତାଙ୍କ ସୈନିକିଡ଼,
ପାଉଲ୍‌ତିଙ୍କ କାଞ୍ଜୀ ଆଡ଼ତଡ଼ ।

୩୬ ନାରୁଡ଼, ସାରେତଡ଼, ଅନ୍ ପେରକେ ପେରକେ ଖାସ୍ କିଡ଼କି
କେସମାଡ଼ତଡ଼, “ଅଂକିଙ୍କ ହାଞ୍ଜକାର୍ ।”

ପାଉଲ୍ ନିଜେ ନିଜର୍ ବିଷୟ ନାରୁଡ଼କିଙ୍କ ବୁଜାମାଡ଼ତଣ୍ଡ

୩୭ ସୈନିକିଡ଼ ପାଉଲ୍‌ତିଙ୍କ ଦୁର୍ଗତାଗ୍ ଲୋପେ ଆଦାନ୍ ଖେଲେ
ଅଣ୍ ସୈନିକିଡ଼ ମୁକ୍ୟାଙ୍କ କେଡ଼ତଣ୍ଡ, “ନାନ୍ ନି ତଡ଼ ତିରୟାନଙ୍କ
ପାରଦତାନ୍ କି ?” ସୈନିଡ଼ ମୁକ୍ୟାଲ୍ ପାରାମାଡ଼ତଣ୍ଡ, “ନିମ୍ ତ ଗ୍ରୀକ୍
ଗର୍ କେଡୁତିନ୍ ।

୩୮ ଆଲେକେ ବେସକେ ଦିନାଡ଼ ମୁନ୍‌ନେ ମିଗରତାଗ୍ ରାମ୍‌କ୍ ମାଡ଼ି
ନାଲୁ ହଜାର୍ ଗୁପାଲଡ଼କ୍ ତାସ୍ ଉସ୍ ନେଲ୍‌ତାଗ୍ ହେଖୁସ୍ ମାଡ଼ତଣ୍ଡ,
ନିମ୍ ତ ଆ ନାରୁଣ୍ ଆୟ ?”

୩୯ ପାଉଲ୍ ଉତ୍ତର୍ ହିଡ଼ତଣ୍ଡ, “ସିଲିସିଆତେ ତାଷ୍ ସ୍‌ତାଗ୍ ଜନମ୍
ଆସ୍ ମାନ୍ଦାନ୍ ନାନ୍ ଝେରଣ୍ ଇହୁଦୀ, ଅଣ୍ଡୟ ବାଡ଼ୟାଦ୍ ନଗରତେ
ନାଗରିକ । ଇ ନାରୁଡ଼କିଙ୍କ ବୁଜାମାଡ଼ି କେତାନଙ୍କ ନାକିଙ୍କ ଆନୁମତି
ହିମ୍ ।

୪୦ ସେନାପତି ଅଂକିଙ୍କ ଆନୁମତି ହିଡ଼ତାଙ୍କ ପାଉଲ୍ ପାହାଚତେ
ପରର ନିଶ୍‌ମିକା ନାରୁଡ଼କିଙ୍କ କଟ ମାନ୍ଦାନଙ୍କ କାୟ୍‌ତେଇସ୍
କେଡ଼ତଣ୍ଡ । ଅଡ଼ କଟ ଆଡ଼ତେ ପେରକେ ପାଉଲ୍ ହୀବୁ ଗର୍ତେ
କେଡ଼ତଣ୍ଡ ।”

୨୨

୧ “ଦାଦାଲଡ଼, ନୁ ବାବାଲଡ଼ି, ନା ନିଜର୍ତାଗାଙ୍କ ନାନ୍ ମିକିଙ୍କ ବାଡ଼
କେଡୁତାନ୍, ଆଦ୍ କେଞ୍ଜାର୍ !”

୨ ଅଡ଼ ତଡ଼ ଅଣ୍ ହୀବୁ ଗର୍ତେ ତିରୟାନାଦ୍ କେଞ୍ଜି ଅଡ଼ କଟ
ଆଡ଼ତଡ଼ ନୁ ମେଣ୍ଡେ ପାଉଲ୍ କେତାନଙ୍କ ପସ୍‌ସ୍ତତଣ୍ଡ ।

୩ ☆ “ନାନ୍ ଝେରଣ୍ ଇହୁଦୀ, ସିଲିସିଆତେ ତାଷ୍ ସ୍‌ତାଗ୍ ନାୟାଦ୍
ଜନମ୍, ଇଡ଼କେ ନାନ୍ ଜିରୁଗାଲମ୍‌ତାଗ୍ ପେରସି ମାଡ଼ତାନ୍ ନୁ
ଗମଲୀୟେଲ୍‌ତେ ଝେରଣ୍ ପେକାଲ୍ ମାଡ଼ତାନ୍ । ମା ଆନିଦାଦିଡ଼,

ମୋଶାନ୍ ନିୟମ ନାନ୍ କାର୍ଯ୍ୟ ମାତ୍ରତାନ୍ ନୁ ମିଇ ଲେକାମ୍ ଇଶ୍ବରତେ ସେଙ୍ଗେ ନାନ୍ ଲେକେଡ୍ ନାରୁନ୍ ପ୍ରସଂଶା ମାତ୍ରତାନ୍ ।

୪ *ନାନ୍ ପ୍ରବୁନ୍ ଆର୍ ପଇସ୍ ଆଞ୍ଜିମାନ୍ ନାରୁଡ଼ିକିଂ ଅତ୍ୟାଚାର୍ ମାଡ଼ି ଅଡ଼ିକିଂ ଜିହ୍ୱଣ୍ଡେ ରେହେସ ମାତ୍ରତାନ୍ । ନାଟାଂ ମାନେୟକ୍ ସାରେତଡ଼ିକିଂ ବନ୍ଦି ମାଡ଼ି ଜଇଲ୍ତାଗ୍ ଖାଟ୍ ମାତ୍ରତାନ୍ ।

୫ ନାଞ୍ଜାଦ୍ ଇଦ୍ ଗର୍ ନିଜାମ୍, ବେଡ଼ିୟି ଯାଜକ୍ ନୁ ବେଡ଼ିୟାଦ୍ ମିଟିଙ୍ଗ୍ତେ ସାରେତଡ଼ି ଇଦିନାଦ୍ ସାକ୍ଷ୍ୟ । ଇ ନାରୁଡ଼ିକିଂ ବନ୍ଦି ମାଡ଼ି ନୁ ଇକଲେମ୍ ତଅସ୍ ଦଣ୍ଡ ଇଦାନ୍ ମାଇଦିକ୍ ଯିରୁଶାଲେମ୍ତାଗ୍ ତାତାନ୍ ସେଙ୍ଗେ ନାନ୍ ବେଡ଼ିୟି ଯାଜକ୍ତାଗାଂ ଆଦେଶ୍ ଇସ୍ ଦାମାସକ୍ସତାଗ୍ ମାନ୍ଦାନ୍ ବିଶ୍ୱାସୀ ଇହୁଦୀ ନାରୁଡ଼ି ବକେଡ୍ ଅଡ଼ିତାନ୍ ।”

ପାଉଲ୍ ତାନ୍ ମନ୍ ପରିବର୍ତ୍ତନ୍ ବିଷୟ କେଡ଼ତଣ୍ଡ
(ପ୍ରେରିତ ୯:୧-୧୯; ୨୭:୧୨-୧୮)

୬ “ନାନ୍ ଆଞ୍ଜି ବେସୁର୍ ଦାମାସକ୍ସତେ ବକେଡ୍ ହେସ୍ତସ ମାତ୍ରତାନ୍, ଆସୁଟେ ପାୟାଲ୍ ସ୍ୱର୍ଗତାଗାଂ ଅଣ୍ଡିୟ୍ ଖେଇସ୍ ହଟାଡ୍ ନା ତିଡ଼ିୟାକ୍ ନିଡ଼ିତେ ।

୭ ନାନ୍ ବୁମ୍ତାଗା କାପ୍ମୁଡ଼ି ରାୟତାନ୍ ନୁ ନା ମାଇଦିକ୍ ଇଦ୍ ଗର୍ କେଞ୍ଜିତାନ୍, ‘ଶାଉଲ୍, ଶାଉଲ୍ ! ନିମ୍ ବାତେକ୍ ନାକିଂ ଗାଟିତିପାଲ୍ ମାଡ଼ିତୁନ୍ ?’

୮ ନାନ୍ ପାତ୍ରାମାତ୍ରତାନ୍, ‘ପ୍ରବୁ, ନିମ୍ ବେନ ?’ ଅଣ୍ଡି ନାକିଂ କେଡ଼ତଣ୍ଡ, ‘ନିମ୍ ବେନକ୍ ଗାଟିତିପାଲ୍ ମାଡ଼ିତୁନ୍, ନାନ୍ ଅଣ୍ଡେ ନାଜରିତ୍ତେ ଜିସୁ ।’

୯ ନା ତଡ଼୍ ମାନ୍ଦାନ୍ ନାରୁଡ଼ି ଆଦ୍ ଖେସ୍ ଉଡ଼ିତଡ଼ି, ଇଡ଼ିକେ ନା ତଡ଼ି ଗର୍ ତିରୟାନ୍ ନାରୁନ୍ ଗର୍ କେଞ୍ଜାଂ ପାର୍ଡ଼ିଡ଼ି ।

୧୦ ନାନ୍ ପାତ୍ରା ମାତ୍ରତାନ୍, ‘ପ୍ରବୁ, ନାନ୍ ବାଡ଼ି ମାଡ଼ିତାନ୍ ?’ ପ୍ରବୁ ନାକିଂ କେଡ଼ତଣ୍ଡ, ‘ତେଦ୍ଦେ, ଦାମାସକ୍ସତାଗ୍ ଅନ୍, ଇଶ୍ବର ନିକିଂ ବେନ୍ ପାଡ଼ିୟି ଟିକ୍ ମାଡ଼ିତଣ୍ଡ, ଆଗେ ନିକିଂ ଆଦ୍ କେସିଦ୍ତଡ଼ି ।’

୧୧ ଗୌରବମୟ ଝେଇସତେ ମାଇଦିଙ୍କ ନାନ୍ କାନାଲ୍ ଆସ୍‌ମାଡ଼ତାନ । ଆଦିନ୍ ମାଇଦିଙ୍କ ନା ତଡ଼୍‌ମାନ୍‌ନାନ୍‌ନା କାୟାଦିଙ୍କ ପଇସ୍‌ ନାକିଙ୍କ ଦାମାସ୍‌କସ୍‌ତାଗ୍‌ ଆଡ଼ତଡ଼୍‌ ।”

୧୨ “ଆଦ୍‌ ନଗରତାଗ୍‌ ହନନୀୟ ପେଦେରତଣ୍ଡ୍‌ ଝେରଣ୍ଡ୍‌ ଦାମ୍‌ କ୍‌ ନାରୁଡ଼୍‌ ମାଡ଼ତଣ୍ଡ୍‌ । ଅଣ୍ଡ୍‌ ମୋଶାନ୍‌ ନିୟମ୍‌ ପାଲନ୍‌ ମାଡ଼ମାଡ଼ତଣ୍ଡ୍‌ ନୁ ଆଗେ ବାସେ ମାଡ଼ମାନ୍‌ ଇହୁଦୀଡ଼୍‌ ସାରେତଡ଼୍‌ ଅକିଙ୍କ ଗାଟି ସମ୍ମାନ ମାଡ଼ମାଡ଼ତଡ଼୍‌ ।

୧୩ ଦାଦାଲଡ଼୍‌ ନା ବକେଡ଼୍‌ ଖାସ୍‌ ନା ସପେ ନିସ୍‌ କେଡ଼ତଣ୍ଡ୍‌, ‘ଦାଦା ଶାଉଲ୍‌, ନିୟାଦ୍‌ ଉଡ଼ାନାଦ୍‌ଶକ୍ତି ମାଲ୍‌ସ୍‌ ଖାଡ଼ି ।’ ଟିକ୍‌ ଆଦେ ସମୟତେ ନାନ୍‌ ମେଣ୍ଡନ୍‌ନ୍‌ନ୍‌ ଉଡ଼ାନାଦ୍‌ଶକ୍ତି ପାଏମ୍‌ ଆସ୍‌ ଅକିଙ୍କ ଉଡ଼ାନଙ୍କ୍‌ ପାରୁଡ଼ତାନ ।

୧୪ ଅଣ୍ଡ୍‌ କେଡ଼ତଣ୍ଡ୍‌, ‘ମାନ୍‌ ଆନିଦାଦିଡ଼୍‌ ଇଶ୍‌ବର ନିକିଙ୍କ୍‌ ଅନାଦ୍‌ ଇଚ୍ଛା ପୁନ୍‌ନାଙ୍କ୍‌, ଅନ୍‌ ଦାମ୍‌ କ୍‌ ନାରୁଣ୍ଡ୍‌ ଉଡ଼ାନଙ୍କ୍‌ ନୁ ଅନାଦ୍‌ ଗର୍‌ କେଜ୍‌ଜାନ୍‌ ସେଙ୍ଗେ ହେଞ୍ଚିତଣ୍ଡ୍‌ ।

୧୫ ବାତେଙ୍କ୍‌ଇଡ଼କେ ନିମ୍‌ ବାଡ଼ ଉଡ଼ତିନ୍‌ ନୁ କେଞ୍ଜିତିନ୍‌, ଆଦ୍‌ ସାରେତଡ଼୍‌ ଗାରରେ କେତାନଙ୍କ୍‌ ନିମ୍‌ ଅନ୍‌ ସାକ୍ଷି ଆଦତିନ୍‌ ।

୧୬ ମେଣ୍ଡେ ବାତେଙ୍କ୍‌ ଗମାଡ଼୍‌ ମାଡ଼ଡ଼ିନ୍‌ ? ତେଏଦା ବାତିସ୍‌ ଗ୍ରହନ୍‌ ମାଡ଼େ ନୁ ଅକିଙ୍କ୍‌ ପ୍ରାର୍ତ୍ତନା ମାଡ଼କେ ନିୟାଦ୍‌ ପେଦେରତେ ପାପ୍‌ ସାରେ ନରସ୍‌ ଆଦତେ ।”

ଅଶଇହୁଦୀଡ଼୍‌ ଗାରେ ପ୍ରଚାର ମାଡ଼ାନଙ୍କ୍‌ ପାଉଲ୍‌ତିଙ୍କ୍‌ କାରୁକ୍‌ତଡ଼୍‌

୧୭ “ନାନ୍‌ ଯିରୁଶାଲେମ୍‌ ମାଲ୍‌ସ୍‌ ଆଞ୍ଜି ଆଗେ ମନ୍ଦିରତାଗ୍‌ ପ୍ରାର୍ତ୍ତନା ମାଡ଼ମାନ୍‌ ଝେଲେ, ନାନ୍‌ ଅଣ୍ଡ୍‌ୟ ଦର୍ଶନ୍‌ ପାଏମ୍‌ ଆଡ଼ତାନ ।

୧୮ ଆଦ୍‌ ଦର୍ଶନତାଗ୍‌ ନାନ୍‌ ପ୍ରବୁଙ୍କ୍‌ ଉଡ଼ତାନ, ମେଣ୍ଡେ ଅଣ୍ଡ୍‌ ନାକିଙ୍କ୍‌ କେଡ଼ତଣ୍ଡ୍‌, ‘ସିଡ଼୍‌ପାଟ୍‌ ଯିରୁଶାଲେମ୍‌ ଝିଡ଼ସେ, ବାତେଙ୍କ୍‌ଇଡ଼କେ ଇଗେଡ଼ ନାରୁଡ଼୍‌ ନା ବିଷୟତେ ନିୟାଦ୍‌ ସାକ୍ଷ୍ୟ ଗ୍ରହନ୍‌ ମାଡ଼ତଡ଼୍‌ ।’

୧୯ ନାନ୍‌ ଉତ୍ତର ଇଡ଼ତାନ, ‘ପ୍ରବୁ, ନାନ୍‌ ପ୍ରାର୍ତ୍ତନା ଲଅକିନାଗ୍‌ ଆଞ୍ଜି ନିକିଙ୍କ୍‌ ବିଶ୍ୱାସ୍‌ ମାଡ଼ମାନ୍‌ ନାରୁଡ଼କିଙ୍କ୍‌ ବେଲା ବନ୍ଦି ମାଡ଼ିମାଡ଼ତାନ ନୁ ରେହେସ୍‌ ମାଡ଼ତାନ, ଇଦ୍‌ ଅଡ଼୍‌ ସାୟେ ପୁଡ଼ତଡ଼୍‌ ।

୨୦ ☆ମେଣ୍ଟେ ବେସୁଟ୍ ନି ସାକ୍ଷିଙ୍କ ସ୍ଥିତାନତିଙ୍କ ହାସ୍ତକତଡ଼, ନାନ ନିଜେ ଆଗେ ମାଡ଼ତାନ; ଅଂକିଙ୍କ ଜିହ୍ଵଣ୍ଡତେ ରେହେତାନଙ୍କ ସପର୍ ମାଡ଼ିମାଡ଼ତାନ ନୁ ଅଂକିଙ୍କ ଦଂସମାଡ଼ଡ଼ାଞ୍ଜ ଚକାସିଲେଙ୍କ କେପିମାଡ଼ତାନ ।

୨୧ ପ୍ରବୁ ନାକିଙ୍କ କେଡ଼ତଣ୍ଡ, ‘ଅନ୍, ନାନ ନିକିଙ୍କ ଗାଟି ଜେକେ ଅଣଇହୁଦୀଡ଼୍ ବକେଡ଼ ରହତିତାନ ।’ ”

୨୨ ପାଉଲ୍ ଇଦ୍ ଗର୍ କେଡ଼ତାନ ଯାକ ନାରୁଡ଼୍ ମନ୍ ଇସ୍ କେଞ୍ଜି ମାଡ଼ତଡ଼, “ଇଡ଼କେ ତାନ ପେରକେ ଅଡ଼୍ ଗାଟି ଲେଙ୍ଗଦେ କିଡ଼କି କେଡ଼ତଡ଼, ଅଂକିଙ୍କ ପୁତିବି ତାଗାଙ୍କ ପେସ୍ସିମୁଟ୍ ! ଅଂକିଙ୍କ ହାସ୍ତକିତମ୍ ! ଅଣ୍ଡି ଜିଞ୍ଜେ ବାଦକାନଙ୍କ ଯୋଗ୍ୟ ଆୟଣ୍ଡି !”

୨୩ ଅଡ଼୍ କିଡ଼କ ମାଡ଼ତଡ଼, ସିଲେଙ୍କ ପାରସ୍ତ ମାଡ଼ତଡ଼୍ ନୁ ଦୁମ୍ ପରର ହେସମାଡ଼ତଡ଼୍ ।

୨୪ ପାଉଲ୍ତିଙ୍କ ଦୁର୍ଗତାଗ୍ ଲୋପେ ଆଦାନ ସେଙ୍ଗେ ରୋମୀୟ ସେନାପତି ସୈନିକିଡ଼କ୍ ଗର୍ ହିଡ଼ତଣ୍ଡି ନୁ ଇହୁଦୀଡ଼୍ ବାତେଙ୍କ ଅନ୍ ବିରୁଦ୍ଧତେ ଇଦ୍ ରକମ୍ କିଡ଼କୁଡ଼, ଆଦ୍ ପୁନ୍ଦାନଙ୍କ ଅଂକିଙ୍କ ଚାବୁକ୍ତେ ରେହେତାନଙ୍କ ଆଦେଶ୍ ହିଡ଼ତଣ୍ଡି ।

୨୫ ଇଡ଼କେ ଅଡ଼୍ ଅଂକିଙ୍କ ତଅତାନ ଖେଲେ ପାଉଲ୍ ଆଗେ ମାନ୍ଦାନ ଖେରଣ୍ଡି କର୍ମଚାରୀଙ୍କ କେଡ଼ତଣ୍ଡ, “ବାଡ଼ଆଇ କାରାପ୍ତେ ଇଞ୍ଜେକଆନା ବିଚାର୍ ଆୟିଞ୍ଜେନଣ୍ଡି ଖେରଣ୍ଡି ରୋମୀୟ ନାଗରିକ୍ତିଙ୍କ ଚାବୁକ୍ତେ ରେହେତାନାଦ୍ ବାଡ଼ ନିୟମ୍ ମିନ୍ଦେ ?”

୨୬ ଇଦ୍ କେଞ୍ଜି କର୍ମଚାରୀ ଆଞ୍ଜି ସୈନ୍ୟଡ଼୍ ମୁକ୍ୟଙ୍କ କେଡ଼ତଣ୍ଡ, “ନିମ୍ ବାଡ଼ ମାଡ଼ଡ଼ିନ୍ ? ଇଣ୍ଡି ଯେ ଖେରଣ୍ଡି ରୋମୀୟ ନାରୁଣ୍ଡି !”

୨୭ ସୈନ୍ୟଡ଼୍ ମୁକ୍ୟାଲ୍ ପାଉଲ୍ତେ ବକେଡ଼ ଆଞ୍ଜି କେଡ଼ତଣ୍ଡ, “ନିମ୍ ବାଡ଼ ଖେରଣ୍ଡି ରୋମୀୟ ନାରୁନୀ ?” ପାଉଲ୍ ଉତ୍ତର୍ ହିଡ଼ତଣ୍ଡି, “ହଁ ।”

୨୮ ସେନାପତି କେଡ଼ତଣ୍ଡ, “ନାର୍ଗେ ଡାବ୍ କ୍ ଇସ୍ ନାନ ଖେରଣ୍ଡି ରୋମୀୟ ନାରୁଣ୍ଡି ଆଡ଼ତାନ ।” ପାଉଲ୍ ଉତ୍ତର୍ ହିଡ଼ତଣ୍ଡି, “ଇଡ଼କେ ନାନ ଜନମ୍ କନ୍ସ୍ ରୋମୀୟ ।”

୨୯ ସାଙ୍ଗେ ସାଙ୍ଗେ ବେନ୍ ନାରୁଡ଼୍ ପାଉଲ୍ତିଙ୍କ ପ୍ରଶ୍ନ ମାଡ଼ାନଙ୍କ ଆଞ୍ଜି ମାଡ଼ତଡ଼, ପେରକେ ହେରଡ଼ିଡ଼୍ ନୁ ପାଉଲ୍ ଖେରଣ୍ଡି ରୋମୀୟ

ନାଗରିକ ଇଞ୍ଜ ପୁଞ୍ଜ ନୁ ଅଣ୍ଟ ଯେ ଅଂକିଙ୍କ ଇକଲେମ୍ ତଡ଼୍ ତଅତାନଙ୍କ ଆଦେଶ ହିତତଣ୍ଟ, ଇଦ୍ ପୁଞ୍ଜ, ସୈନିକିଡ଼୍ ମୁକ୍ୟାଲ୍ ଗାଟି ଖେରତଣ୍ଟ ।

ଇହୁଦୀଡ଼୍ ବାଡ଼୍‌ୟେ ମିଟିଙ୍ଗ୍‌ତାଗ୍ ପାଉଲ୍

୩୦ ଇହୁଦୀଡ଼୍ ପାଉଲ୍ ବିରୁଦ୍ଧତେ ବାଡ଼୍ ଅବିଯୋଗ୍ ମାଡ଼୍‌ତଡ଼୍, ଆଦ୍ ଲେକାମ୍ ପୁନ୍ଦାନଙ୍କ ସୈନିକିଡ଼୍ ମୁକ୍ୟାଲ୍ ମେଣ୍ଡନଦିନେ ପାଉଲ୍‌ତେ ବନ୍ଦନ୍ ସାରେ କୁସ୍‌ସ୍ତି ବେଡ଼୍‌ୟେ ମିଟିଙ୍ଗ୍ ମାଡ଼ାନ୍ ସେଙ୍ଗେ ଯାଜକିଡ଼୍ ଗର୍ ହିତତଣ୍ଟ । ତାନ୍ ପେରକେ ଅଣ୍ଟ ପାଉଲ୍‌ତିଙ୍କ ଅସ୍ ଅଡ଼୍ ମୁନ୍‌ନେ ନିଲ୍‌ପତଡ଼୍ ।

୨୩

୧ ପାଉଲ୍ ବେଡ଼୍‌ୟେ ମିଟିଙ୍ଗ୍‌ତାକ୍ ଲେକେଡ଼୍ ସତ୍‌କାମ୍ ଉଡ଼ି କେଡ଼୍‌ତଣ୍ଟ, “ଏୟ୍ ଇଗ୍ରାଏଲୀୟ୍ ଦାଦାଲଡ଼୍! ନେଣ୍ଟ ଯାକ ଇଶ୍‌ରତେ ମୁନ୍‌ନେ ନାନ୍ ବେଦ୍‌ରକମ୍ ଜିଝୁଣ୍ଟ ବାଦ୍‌କ୍‌ତାନ୍, ଆଦ୍ ବିଷୟ୍‌ତେ ନାୟାଦ୍ ମନ୍ ସାରେ ସାୟେ ମିୟେ ।”

୨ ଇଦ୍ କେଞ୍ଜି ବେଡ଼୍‌ୟାଦ୍ ଯାଜକ୍ ଆନାନୀୟ୍ ପାଉଲ୍‌ତେ ବୁକ୍‌ତାଗ୍ ତାପ୍‌ତେ ରେହେତାନ୍ ସେଙ୍ଗେ ପାଉଲ୍‌ତେ ବକେଡ଼୍ ନିସ୍ ମାନ୍ଦାନ୍ ନାରୁଡ଼୍‌କିଙ୍କ ଆଦେଶ୍ ହିତତଣ୍ଟ ।

୩ ☆ପାଉଲ୍ ଇଶ୍‌ରତିଙ୍କ କେଡ଼୍‌ତଣ୍ଟ, “ଏୟ୍ ତୁନ୍ ଅହକ୍‌ତେ ପାଣ୍ଟି ନେଙ୍ଗେ, ପ୍ରବୁ ନିଜାମ୍ ନିକିଙ୍କ ରେହେତିତନ୍ । ମୋଶାନ୍ ନିୟ୍‌ମ୍ ଲେକାମ୍ ବିତାର୍ ମାଡ଼ାନଙ୍କ ନିମ୍ ଆଗେ କୁଦ୍‌ତି, ଆଗେକ୍‌ବା ନାକିଙ୍କ ରେହେତାନ୍ ସେଙ୍ଗେ ଆଦେଶ୍ ଇସ୍ ନିମ୍ ଆଇନ୍ ବାଙ୍ଗା ମାଡ଼ୁଡ଼ିନ୍ !”

୪ ପାଉଲ୍‌ତେ ବକେଡ଼୍ ମାନ୍ଦାନ୍ ନାରୁଡ଼୍ ଅଂକିଙ୍କ କେଡ଼୍‌ତଡ଼୍, “ନିମ୍ ଇଶ୍‌ରତେ ବେଡ଼ିୟି ଯାଜକ୍‌ତିଙ୍କ ଅପ୍‌ମାନ୍ ମାଡ଼ୁଡ଼ିନ୍ !”

୫ ପାଉଲ୍ ଉତ୍ତର ହିତତଣ୍ଟ, “ହୋ ଇଗ୍ରାଏଲୀୟ୍ ଦାଦାଲଡ଼୍, ଅଣ୍ଟ ବେଡ଼ିୟି ଯାଜକ୍ ଇଞ୍ଜ ନାନ୍ ପୁନ୍‌ଖେ ମାଡ଼ତାନ୍ । ଦର୍ମଶାସ୍ତ୍ରତାଗ୍ ଲେକତାଦ୍ ମିୟେ, ‘ମିଇ ନିଜେର୍ ଜାତିଡ଼୍ ନେତାନ୍ ବିଷୟ୍‌ତେ କାରାପ୍ ଗର୍ କେଲ୍‌ମାର୍ ।’”

୬ ☆ଇହୁଦୀଡ଼୍ ମାନ୍ଦେତାଗ୍ ବେସ୍‌କ୍‌ତୁଡ଼୍ ପାରୁଶୀ ନୁ ମେଣ୍ଟେ ବେସ୍‌କ୍‌ତୁଡ଼୍ ସାଦୁକୀଡ଼୍ ମାନ୍ଦାନାଦ୍ ଉଡ଼ି ପାଉଲ୍ ବେଡ଼୍‌ୟେ

ମିଟିଙ୍ଗତିଙ୍କ କାରୁଣ୍ୟ କେତେତଣୁ, “ହଁ ଇଶ୍ରାଏଲୀୟତେ ଦାଦାଲତ୍, ନାନ ଝେରଣ୍ ପାରୁଣୀ, ପାରୁଣୀ ବଂଶତାଗ୍ ନାୟାଦ୍ ଜନମ୍ । ତଲ୍ଲତେ ନାରୁଡ୍, ମେଣ୍ଡନ୍‌ନ୍‌ମାମ୍ ପୁନରୁତାନ୍ ଆଦତଡ୍, ଇଞ୍ଜ ଆଗେ ମାଡ୍‌ତାଙ୍କ୍ ଇଗେ ନାୟାଦ୍ ବିଚାର୍ ମାଡ୍‌ତୁଡ୍ ।”

୭ ଅଡ୍ ମାୟେ ମାୟେ ଆସ୍ ଝେକ୍ ଝେକ୍ ଆଡ୍‌ତଡ୍, ନୁ ଅଣ୍ଟିକ୍ ଇଦ୍ ଗର୍ କେଡ୍‌ତେ ସାଙ୍ଗେ ସାଙ୍ଗେ ପାରୁଣୀ ନୁ ସାଦୁକୀଡ୍, ଲୋପେ ରାମ୍‌କ୍ ଆରାମ୍ ଆଡ୍‌ତେ ।

୮ ✠ ଇଡ୍‌କେ ସାଦୁକୀଡାଗ୍ ତଲ୍ଲତେନଡ୍, ମେଣ୍ଡନ୍‌ନ୍‌ମାମ୍ ପୁନରୁତାନ୍, ସ୍ୱର୍ଗ ଦୂତ ବା ଆମ୍ବା ବାଆତେ ଇଲେ; ଇଡ୍‌କେ ପାରୁଣୀଡ୍, ଇଦ୍ ମୁଣ୍ଟିଙ୍କ୍ ବିଶ୍ୱାସ୍ ମାଡ୍‌ତଡ୍ ।

୯ ଅଡ୍, ଲୋପେ ଗାଟି ଗଲ୍‌କ୍ ଆଡ୍‌ତଡ୍, ନୁ ପାରୁଣୀ ମାୟେତେ ବେସ୍‌କଡ୍‌ଡ୍, ଦର୍ମଗୁରୁ ନିଶ୍‌ମିକା ଗାଟି ପ୍ରତିବାଦ୍ ମାଡ୍‌ତି କେଡ୍‌ତଡ୍, “ମାମ୍‌ମେ ଇଣ୍ଟ ନାରୁଣ୍ଡତାଗ୍ ବାଡ୍‌ମିକା ଦଷ୍ଟ ଦର୍‌ସ୍‌ଆଙ୍କ୍ ପାରୁଝମ୍ ! ନିଜାମ୍ ଅନ୍ ତଡ୍, ସ୍ୱର୍ଗ ଦୂତ ବା ଆମ୍ବା ଗର୍ କେସ୍ ମାନ୍‌ତେ ।”

୧୦ ଯୁକ୍ତିତର୍କ ଗାଟି ବେଡ୍‌ୟାଦ୍ ପୁରୁଙ୍କ୍ ଦାରଣ୍ ମାଡ୍‌ତେ ଯେ, ନାରୁଡ୍, ପାଉଲ୍‌ତିଙ୍କ୍ କଇସ୍ ଦୁଡା ଦୁଡା ମାଡ୍‌ତଡ୍, ଇଞ୍ଜ ସୈନ୍‌ୟଡ୍, ମୁକ୍ୟାଲ୍ ଝେରତଣ୍ । ଆଦିଙ୍କ୍ ଅଣ୍ଟି ରାମ୍‌କ୍ ଆଦାନ୍ ଲୋପେଙ୍କ୍ ପାଉଲ୍‌ତିଙ୍କ୍ ରକ୍ଷା ମାଡ୍‌ତି ଅଂକିଙ୍କ୍ ଦୁର୍ଗତାଗ୍ ଲୋପେ ଆଦାନଙ୍କ୍ ସୈନ୍‌ୟଡ୍‌କିଙ୍କ୍ ଗର୍ ହିଡ୍‌ତଣ୍ ।

୧୧ ଆଦେନାଣ୍ଟ ନାରକେ ପ୍ରବୁ ପାଉଲ୍‌ତେ ବକେଡ୍ ନିଶ୍‌ମିକା କେଡ୍‌ତାନ୍, “ସାହାସ୍ ଆୟ୍‌ମ୍ ! ନିମ୍ ଇଗେ ଯିରୁଶାଲେମ୍‌ତାଗ୍ ନା ସେଙ୍ଗେ ସାକ୍ଷ୍ୟ ହିଡ୍‌ତିନ୍ । ରୋମ୍‌ତାଗ୍ ମିକା ନିମ୍ ନିଜାମ୍ ସାକ୍ଷ୍ୟ ହିଡ୍‌ତିନ୍ ।”

ପାଉଲ୍‌ତିଙ୍କ୍ ହାଞ୍ଜକାନଙ୍କ୍ ହାଲ୍‌ସ୍‌ତଡ୍,

୧୨ ମେଣ୍ଡନ୍ ଦିନ୍ ନାରକା ବେସ୍‌କଡ୍‌ଡ୍, ଇହୁଦୀଡ୍, ଅଣ୍ଟିୟାଗେ ଆସ୍ ଚିନ୍ତେ ମାଡ୍‌ତଡ୍ । ପାଉଲ୍‌ତିଙ୍କ୍ ହାଞ୍ଜକ୍‌ଝେ ଯାକ ଅଡ୍‌ତିନଡ୍‌କି ନାକଡ୍, ଇଞ୍ଜ ପାରମ୍‌ମାନ୍ ମାଡ୍‌ତଡ୍ ।

୧୩ ଚାଲିଶ୍‌ଜାନ୍ ଅଦିକ୍ ନାରୁଡ୍, ଇଦ୍ ଚିନ୍ତେ ମାଡ୍‌ତଡ୍ ।

୧୪ ଅତଃ ଆଞ୍ଜ ମୁକ୍ୟ ଯାଜକ ନୁ ଇହୁଦୀ ନେତାଲତ୍ କେତତତ୍,
“ପାଉଲଟିଙ୍କ ହାଞ୍ଜକ୍ଷେ ଯାକ ବାତ୍‌ମିକା ତିନମ୍ କି ନାକମ୍ ଇଞ୍ଜ
ମାମ୍‌ମେ ଅଣ୍ଡୟ ଶପତ୍ ଆଡ୍‌ତମ୍ ।

୧୫ ଆଦିଙ୍କ ଅଣ୍ଡ ବିଷୟତେ ମେଣ୍ଡେ ଅଦିକ୍ ତଥ୍ୟ ପୁନ୍‌ନାଙ୍କ ଇଚ୍ଛା
ମାଡ଼ି ବେଡ୍‌ମେ ମିଟିଙ୍ଗ୍ ମୁନ୍‌ନେ ନୁ ମିଇ ବକେଡ୍ ପାଉଲଟିଙ୍କ
ମେଣ୍ଡନ୍‌ୟାମ୍ ତାତାନ୍ ସେଙ୍ଗେ ରୋମୀୟ ସୈନ୍‌ୟତ୍ ମାନ୍‌ଦେତିଙ୍କ
ଦନ୍‌ୟବାଦ୍ ମାଡ୍‌ତେ । ବାତେଙ୍କିଇଡ୍‌କେ ଅଣ୍ଡ ଇଗେ ଝାଦାନ୍ ମୁନେନ୍
ହାର୍‌ବାଗ୍ ମାମ୍‌ମେ ଅଂକିଙ୍କ ହାଞ୍ଜକାନଙ୍କ ତିଆର୍ ଆସ୍ ମାନ୍‌ତମ୍ ।”

୧୬ ଇଡ୍‌କେ ପାଉଲଟେ ବାଡ୍‌ଞ୍ଜାଲ୍ ଇଦ୍ ଚାଲାକି ଗର୍ କେଞ୍ଜି,
ଦୁର୍ଗତାଗ୍ ଲୋପେ ଆଞ୍ଜ ପାଉଲଟିଙ୍କ ଇଦ୍ କେତତତ୍ ।

୧୭ ପାଉଲ୍ ରୋମୀୟ କର୍ମଚାରୀତ୍ ଲୋପେଙ୍କ ଅରତୁଙ୍କ କାର୍‌ଜି
କେତତତ୍, “ଇଣ୍ଡ ଲେୟଙ୍କ ସୈନିକିଡ୍ ମୁକ୍ୟାନାକ୍ ଆୟ୍‌ମ୍, ଅଂକିଙ୍କ
ଅନାଦ୍ ବାଡ୍ କେତାନାଦ୍ ମିନ୍‌ଦେ ।”

୧୮ କର୍ମଚାରୀ ଅଂକିଙ୍କ ସୈନିକିଡ୍ ମୁକ୍ୟାନାକ୍ ଆସ୍ କେତତତ୍,
“ବନ୍ଦି ପାଉଲ୍ ନାକିଙ୍କ କାର୍‌ଜି ଇଣ୍ଡ ଲେୟଙ୍କ ନି ବକେଡ୍ ତାତାନଙ୍କ
କେତତତ୍ । ନିକିଙ୍କ ଅଣ୍ଡ ବାଡ୍ କେତାନାଦ୍ ମିନ୍‌ଦେ ।”

୧୯ ସୈନିକିଡ୍ ମୁକ୍ୟାଲ୍ ଅନାଦ୍ କାୟ୍‌ଦିଙ୍କ ପଇସ୍ ଲୋପେ ଆଡ୍‌ତତ୍
ନୁ ପାତ୍ରାମାଡ୍‌ତତ୍, “ବାଡ୍ କେତାନାଦ୍ ମିନ୍‌ଦେ, କେଲ୍ !”

୨୦ ଲେୟଣ୍ଡ କେତତତ୍, “ଇହୁଦୀ ନେତାଲତ୍ ଚିନ୍ତେ ମାଡ୍‌ତତ୍‌ମେ,
ବେଡ୍‌ମେ ମିଟିଙ୍ଗ୍ ପାଉଲ୍ ବିଷୟତେ ଅଦିକ୍ ତଥ୍ୟ ପୁନ୍‌ନାଙ୍କ ଇଚ୍ଛା
ମାଡ୍‌ତୁତ ଇଞ୍ଜ ବଲି ଅଂକିଙ୍କ ବେଡ୍‌ମେ ମିଟିଙ୍ଗ୍‌ତାଗ୍ ଆଦାନ୍ ସେଙ୍ଗେ
ନିକିଙ୍କ ଅନୁରଦ୍ ମାଡ୍‌ତିତ୍ ।

୨୧ ଇଡ୍‌କେ ଅଡ୍‌ାଦ୍ ଗର୍ କେଞ୍ଜିମା, ବାତେଙ୍କିଇଡ୍‌କେ ଚାଲିଶ୍‌ଜାନ୍
ଅଦିକ୍ ନାରୁଡ୍ ଅଂକିଙ୍କ ହାଞ୍ଜକ୍ଷେ ଯାକ ତିନ୍‌ୟାନ୍ ଉନ୍‌ୟାନ୍ ମାଡ୍‌ତତ୍ ଇଞ୍ଜ
ପ୍ରତିଞ୍ଜା ଆସ୍ ମିଞ୍ଜି ମିନ୍‌ଦେଡ୍ । ଇଞ୍ଜେ ଅଡ୍‌ ନିୟାଦ୍ ନିଷ୍ପତ୍ତିତିଙ୍କ କେପି
ମିକା ତିଆର୍ ଆସ୍‌ମିନ୍‌ଦେଡ୍ ।”

୨୨ “ନିମ୍ ଇଦ୍ କେତତି ଇଞ୍ଜ ବେନଙ୍କ କେଲ୍‌ମା ।” ସୈନିକିଡ୍
ମୁକ୍ୟାଲ୍ ଇଦ୍ କେସ୍ ଲେୟଙ୍କ ରଅତତ୍ ।

ପାଉଲଟିଙ୍କ ଶାସନ୍ କର୍ତ୍ତାଲ୍ ଫିଲିକ୍‌ସ୍ ବକେଡ୍ ରହସିତତ୍,

୨୩ ସୈନିକିତ୍, ମୁକ୍ୟାଲ୍ ଅଦିନତେ ମାୟାନ୍ ଇରଞ୍ଜୁତ୍ କର୍ମଚାରୀତ୍ କାରିଜ୍ କେତ୍ତଣ୍ଡ, “ନେଣ୍ଡ ନାରକେତ୍ ନଅଟା ଲୋପେ କାଇସରିଆତାଗ୍ ଆଦାନ୍ ସେଙ୍ଗେ ସତ୍ତୁରିଜାନ୍ ଗୁରାକିନତ୍, ନୁ ଦୁଇଶହ ବର୍ଜ୍ଜା ପୟ୍ତେନତ୍, ତତ୍ ଦୁଇଶହ ତାକି ଆଦାନ୍ ସୈନିକିତ୍, ତିଆର୍ ମାଡାର୍ ।

୨୪ ପାଉଲ୍ ଆଦାନ୍ ସେଙ୍ଗେ ବେସକ୍ ଗୁରାକ୍ ହିମୁର୍ ନୁ ନିରାପଦତେ ଅଂକିଙ୍କ୍ ରାଜ୍ୟପାଳ ଗେଲ୍ଲାନଙ୍କ୍ ମାଡାନଙ୍କ୍ ଫେଲିକ୍ସତେ ଗାରରେ ଆୟ୍ମୁର୍ ।”

୨୫ ସୈନିକିତ୍, ମୁକ୍ୟାଲ୍ ଇଦ୍ ରକମ୍ ଅଣ୍ଡୟ୍ ଚିଟି ଲେକ୍ତଣ୍ଡ ।

୨୬ “ମାନ୍ୟବର୍ ରାଜ୍ୟପାଳ ଫେଲିକ୍ସତିଙ୍କ୍ କ୍ଳତିଅସ୍ ଲିସିଆସ୍ତେ ନମସ୍କାର୍ ।

୨୭ ଇହୁଦୀତ୍, ଇଣ୍ଡ ନାରୁଙ୍କ୍ ପଇସ୍ ଅଂକିଙ୍କ୍ ହାଞ୍ଜକାନ୍ ସେଙ୍ଗେ ତିଆର୍ ଆସ୍ ମାଡତତ୍ । ଅଣ୍ଡ ଝେରଣ୍ଡ ରୋମୀୟ ନାରୁତ୍, ଇଞ୍ଜ ପୁଡତାଙ୍କ୍ ନାନ୍ ନା ସୈନ୍ୟତ୍, ତତ୍ ଅଂକିଙ୍କ୍ ଉଦାର୍ ମାଡତାନ୍ ।

୨୮ ଅଡ୍ ବିରୁଦ୍ଧତେ ଅଣ୍ଡ ବାଡ୍ ଦଷ୍ଟ ମାଡିମାଡତଣ୍ଡ, ପୁୟାନ୍ ସେଙ୍ଗେ ନାନ୍ ଅଂକିଙ୍କ୍ ଅଡାଦ୍ ବେଡ୍ରେ ମିଟିଙ୍କ୍ତାଗ୍ ଅଡତାନ୍ ।

୨୯ ବାଡେଙ୍କ୍‌ଇଡ୍‌କେ ଅଣ୍ଡ ଡଲ୍‌ନାଦ୍ ଦଣ୍ଡ ବା ବନ୍ଦି ଆଦତନ୍ କଷ୍ଟ ମାଡାନ୍ ଲେକେମ୍ ବାଡ୍ ଦଷ୍ଟ ମାଡଣ୍ଡ ଇଞ୍ଜ ନାନ୍ ପୁଡତାନ୍ । ମୋଶାନ୍ ନିୟମ୍‌ତେ ଆସ୍ ମାୟାନ୍ ଅବିଯୋଗ୍ ସାରେ ତାମ୍ ଦର୍ମ ବିଷୟ୍‌ତେ ।

୩୦ ମେଣ୍ଡେ ଅନ୍ ବିରୁଦ୍ଧତେ ଅଣ୍ଡୟ୍ ଚକ୍ରାନ୍ତ ଆଡତେ ଇଞ୍ଜ କବର୍ ପାଏମ୍ ଆସ୍ ସାଙ୍ଗେ ସାଙ୍ଗେ ଅଂକିଙ୍କ୍ ନି ବକେଡ୍ ରହତାନଙ୍କ୍ ହାଲ୍‌ସତାନ୍ । ଅନ୍ ବିରୁଦ୍ଧତେ ମାୟାନ୍ ଅବିଯୋଗ୍ ସାରେ ନି ମୁନ୍‌ନେ କେତାନଙ୍କ୍ ନାନ୍ ଅଂକିଙ୍କ୍ ଅବିଯୋଗ୍ ମାଡ୍‌ତେନଡ୍‌କିଙ୍କ୍ କେଡତାନ୍ ।”

୩୧ ସୈନିକିତ୍, ଆଦ୍ ଆଦେଗ୍ ଲେକାମ୍ ପାଉଲ୍‌ତିଙ୍କ୍ ଆଦେନାଣ୍ଡ ନାରକେ ଅନ୍‌ତିପରିସ୍ତାଗ୍ ହେଞ୍ଜୁସିଡ୍‌ତତ୍ ।

୩୨ ମେଣ୍ଡନ୍ ଦିନ୍ ତାକି ଆଡ୍‌ତେ ସୈନିକିତ୍, ଦୁର୍ଗତାଗ୍ ମାଲ୍‌ସ୍ ଆଡତତ୍, ନୁ ଗୁରାକିନ୍ ସୈନିକିତ୍ ଅଂକିଙ୍କ୍ ଆଦାନଙ୍କ୍ କେଡତତ୍,

୩୩ ଅଡ୍ ପାଉଲ୍‌ତିଙ୍କ୍ ଆସ୍ କାଇସରିଆତାଗ୍ ହେଞ୍ଜୁସିଡ୍‌ତତ୍ । ଆଗେ ସୈନିକିତ୍, ମୁକ୍ୟାଙ୍କ୍ ଚିଟି ତତ୍ ପାଉଲ୍‌ତିଙ୍କ୍ ହିଡ୍‌ତତ୍ ।

୩୪ ରାଜ୍ୟପାଳ ଚିତିତିଙ୍କ କାର୍ଯ୍ୟ ବେନ ଦେଶ କନ୍ୟା ଖାତୁତିନ ଇଞ୍ଜ ପାତ୍ରାମାତୃତଣ୍ଡ । ପାଉଲ ସିଲିସିଆତଣ୍ଡ ଇଞ୍ଜ ପୁଞ୍ଜ,

୩୫ ଅଣ୍ଡ କେତତଣ୍ଡ, “ନି ବିରଦିତ୍ ହେଞ୍ଜୁତତେ ପେରକେ ନାନ୍ ନି ଗର୍ କେଞ୍ଜୀତାନ୍ ।” ତାନ୍ ପେରକେ ପାଉଲ୍‌ତିଙ୍କ ହେରଦତେ ରାଜ ପ୍ରାସାଦତାଗ୍ ବନ୍ଦି ମାଡି ନେହେତାନ୍ ସେଞେ ଆଦେଶ୍ ହିତତଣ୍ଡ ।

୨୪

ଇହୁଦୀତ୍ ପାଉଲ୍‌ତିଙ୍କ ଅବିଯୋଗ୍ ମାତୃତତ୍

୧ ଏୟଙ୍ଗ ଦିନା ପେରକେ ବେଡିୟି ଯାଜକ୍ ଆନାନୀୟ ବେସ୍‌କତୁତ୍, ଇହୁଦୀ ନେତା ନୁ ତର୍ଭୁଲସ୍ ପେଦେରତଣ୍ଡ ଝେରଣ୍ଡ ଓକିଲ୍ ତତ୍, ସିସେରିଆତାଗ୍ ଆତୃତଣ୍ଡ । ଅତ୍ ଫେଲିକ୍‌ସ୍‌ତେ ମୁନ୍‌ନେ ନିଶ୍‌ମିକା ପାଉଲ୍ ବିରୁଦ୍‌ତେ ତାମାଦ୍ ଅବିଯୋଗ୍ ପେଶ୍ ମାତୃତତ୍ ।

୨ ତାନ୍‌ପେକେ ପାଉଲ୍‌ତିଙ୍କ ଆଗେ ତାତୃତତ୍, ନୁ ତର୍ଭୁଲସ୍ ମଦଲ୍ ହିତତେ ତାନ୍ ଅବିଯୋଗ୍ ତଅତଣ୍ଡ, “ମହାଶୟ, ନିୟାଦ୍ ବୁଦ୍‌ତେ ଶାସନ୍ ତତ୍ ମାମ୍‌ମେ ନାରଗେ ଦିନା କନ୍ୟା ଶାନ୍ତିତତ୍ ବାସେ ମାତୃତମ୍ ନୁ ମାୟାଦ୍ ଦେଶ୍‌ତେ ଲେକେତ୍ ସେଞେ ନାରଗେ ସଂସାର୍ ମାତୃତତ୍ ।

୩ ସାରେ ପଡିୟେତାଗ୍ ନୁ ସାରେଦାମ୍ ମାମ୍‌ମେ ଇଦିଙ୍କ୍ ସ୍ବାଗତ୍ ମାତୃତମ୍, ମାମ୍‌ମେ ଫେଲିକ୍‌ସ୍ ଗାଟି ରଣୀ ।

୪ ଆଦ୍ ବାତୁଆଇ, ନାନ୍ ନିୟାଦ୍ ଅଦିକ୍ ସମୟ୍ ଆୟନ୍, ଆଦିଙ୍କ୍ ନିମ୍ ଦୟାମାଡି ମାୟାଦ୍ ସୁଦୁର୍ ଗର୍ କେଞ୍ଜାନ୍ ସେଞେ ନାନ୍ ଅନୁରଦ୍ ମାତୃତୁନ୍ ।

୫ ଇଣ୍ଡ ନାରୁଣ୍ଡ ଗାଟି ଗଲ୍‌କିନଣ୍ଡ ଇଞ୍ଜ ମାମ୍‌ମେ ପୁତୃତମ୍; ଅଣ୍ଡ ଜଗତ୍ ତାଗ୍ ସାରେପାକ୍ ଉଡି ଇହୁଦୀତ୍ ଶାନ୍ତି ନଷ୍ଟ ମାଡାନଙ୍କ୍ କେତୁତଣ୍ଡ । ଅଣ୍ଡ ନାଜରିତିୟ ମାନ୍ଦେତଣ୍ଡ ଝେରଣ୍ଡ ନେତାଲ୍ ।

୬ ଅଣ୍ଡ ମାୟାଦ୍ ମନ୍ଦିରତିଙ୍କ୍ ଅପବିତ୍ର ମାଡାନଙ୍କ୍ ଚିନ୍ତେ ମାତୃତେ ଝେଲେ ମାମ୍‌ମେ ଅଂକିଙ୍କ୍ ପୟ୍‌ତତମ୍ ।*

୭ ଇତକେ ହଜାର୍ ହଜାର୍ ସେନାପତି ଲୁସିଆ ଝାସ୍ ଗାଟି ଜବର୍‌ଦସ୍ତି ମାଡି ଇଂକିଙ୍କ୍ ମା କାୟ୍‌ଦେ କନ୍ୟା ଉଦି ଆତୃତତ୍,

* ୨୪:୭ ମାମ୍ ଅଂକିଙ୍କ୍ ମୋଶାନ୍ ନିୟମ୍ ଲେକାମ୍ ବିତାର୍ ମାଡାନଙ୍କ୍ ଆଲ୍‌ସ୍‌ତମ୍,

୮ ମାମ୍ମା ଇଶୁ ବିରୁଦ୍ଧରେ ବେନ ସାରେ ଅବିଯୋଗ ମାଡ଼ତମ୍, ଆଦ ନିମ୍ ନିଜେ ଇ ନାରୁଙ୍କ ପାତ୍ରମାଡ଼ି ପୁନ୍ୟନଙ୍କ ପାରଦତିନ୍ ।”
 ୯ ଆଗେ ମାଡ଼ତେ ଇହୁଦୀଡ଼, ଇଦ୍ ଅବିଯୋଗ୍ ସଡ଼ ଇଞ୍ଜ ଗାଟି ସାହାସ୍ ତଡ଼୍ କେଡ଼ତଡ଼୍ ।

ଫେଲିକ୍ସରେ ମୁନେନ ପାଉଲ୍ ଆମ୍ବସମର୍ତ୍ତନ୍ ମାଡ଼ତଣ୍ଡ

୧୦ ତାନପେରକେ ରାଜ୍ୟପାଳ ପାଉଲ୍‌ତିଙ୍କ ଗର୍ କେଡ଼ତାନ ସେଙ୍ଗେ ଗର୍ ହିଡ଼ତାଙ୍କ ପାଉଲ୍ କେଡ଼ତଣ୍ଡ, “ନାନ୍ ପୁଡ଼ତାନ୍ ଯେ ନାରଗେ ହେଣ୍ଡକ୍ କନ୍ସ ନିମ୍ ଇଦ୍ ଗଣ୍ଡିଡ଼୍ ବିଚାର୍ କର୍ତ୍ତାଲ୍ ଆଡ଼ତିନ୍, ଆଦିଙ୍କ ନି ମୁନେନ ଆମ୍ବସମର୍ତ୍ତନ୍ ମାଡ଼ନାଦ୍ ନାକିଙ୍କ୍ ସାୟେ ଆଦତେ ।

୧୧ ନିମ୍ ନିଜେ ମେହେକି ପୁନ୍ୟନଙ୍କ ପାରଦତି ଯେ, ବାର ଦିନ୍ ମୁନେନ୍ ନାନ୍ ଯିରୁଗାଲେମ୍‌ତାର୍ ପୁଜା ମାଡ଼ନଙ୍କ୍ ଆଞ୍ଜମାଡ଼ତାନ ।

୧୨ ମନ୍ଦିରତାର୍ ବେନନ୍ ତଡ଼୍ ଯୁକ୍ତିତର୍କ୍ ମାଡ଼ନାଦ୍ ଇହୁଦୀଡ଼୍ ଉଡ଼ଡ଼େ ମାଡ଼ତଡ଼୍ ବା ପ୍ରାର୍ଥନା ଲଅକିନାର୍ କି ସହରରେ ମେଣ୍ଡେ ବେଗେ ନାକିଙ୍କ୍ ନାରୁଡ଼କିଙ୍କ୍ କେତାନାଦ୍ ଉଡ଼ଡ଼େମାଡ଼ତଡ଼୍ ।

୧୩ ଆଦିଙ୍କ୍ ନା ବିରୁଦ୍ଧରେ ତାସ୍ ମାନ୍ୟାନ୍ ଅବିଯୋଗ୍‌ରେ ସେଙ୍ଗେ ଅଡ଼୍ ପ୍ରମାଣ୍ ହିଦାନଙ୍କ୍ ପାରଡ଼ଡ଼୍ ।

୧୪ ଆଗେକ୍‌ବା ନାନ୍ ନି ଆର୍ ଗାରରେ ସ୍ୱୀକାର୍ ମାଡ଼ତୁନ୍ ଯେ, ବେନ୍ ହିସାପ୍‌ରେ ଅଡ଼୍ ବୁସା ଇଞ୍ଜ କେଡ଼ୁତଡ଼୍, ଆଦ୍ ହିସାପ୍‌ରେ ନାନ୍ ମା ଆନିଦାଦିଡ଼୍ ଇଶ୍ବରତିଙ୍କ୍ ଉପାସନା ମାଡ଼ତୁନ୍ । ବାତେଙ୍କ୍‌ଇଡ଼କେ ନାନ୍ ଗାଲା ମୋଶାନ୍ ନିୟମ୍ ନୁ ବାବବାଦୀଡ଼୍ ବଇତାର୍ କେଡ଼ତାଦ୍ ସାରେ ବିଷୟ ବିଶ୍ୱାସ୍ ମାଡ଼ତୁନ୍ ।

୧୫ ଇଡ଼୍ ଲେକାମ୍ ଇଶ୍ବରତାର୍ ନାୟାଦ୍ ଆଗେ ମିନ୍ଦେ; ସାୟେଡ଼୍ ନାରୁଡ଼୍ ନୁ ଆଦାମ୍‌କ୍ ନାରୁଡ଼୍ ସାରେତଡ଼୍ ଡଲ୍‌ତାଗାଙ୍କ୍ ପୁନରୁତାନଡ଼ଡ଼୍ ।

୧୬ ଆଦିଙ୍କ୍ ଇଶ୍ବର ନୁ ନାରୁଡ଼ରେ ମୁନେନ ସାୟେଡ଼୍ ମନ୍‌ମାଡ଼ି ଲେକେଡ଼୍ କାମ୍ ମାଡ଼ାନ ସେଙ୍ଗେ ନାନ୍ ସାରେଦାମ୍ ଆଲ୍‌ସି ମାଡ଼ତୁନ୍ ।”

୧୭ ☆ “ନାରଗେ ହେଣ୍ଡକ୍ ଯାକ ଯିରୁଶାଲମ୍‌ତାଗାଙ୍କ ଜେକେ ମାଡ଼ତାଙ୍କ, ନା ନିଜେଡ଼ ନାରୁଡ଼, ସେଙ୍ଗେ ବେସର୍ ଡାବ୍‌କ୍ ଆଦାନଙ୍କ ନୁ ପୁଜ୍ ହିଦାନ୍ ସେଙ୍ଗେ ନାନ୍ ଆଗେ ଆଞ୍ଜ ମାଡ଼ତାନ୍ ।

୧୮ ନାନ୍ ଶୁଚିକରଣ୍ ବିଦି ମାଡ଼ି ତେରସ୍ତାନ୍ ଖେଲେ ଅଡ଼, ନାକିଂଙ୍କ ମନ୍ଦିରତାଗ୍ ଉଡ଼ତଡ଼ । ଆସୁର୍ ନା ବକେଡ଼ ନାରୁଡ଼, ହିଲ୍‌ଖେ ମାଡ଼ତଡ଼, କି ବାଡ଼ ଗଲ୍‌କ୍ ଆୟ୍‌ଖେ ମାଡ଼ତେ ।

୧୯ ଇଡ଼କେ ଏସିଆ ଦେଶ୍‌ତେ ବେସ୍‌କ୍‌ଡ଼ୁଡ଼, ଇହୁଦୀ ଆଗେ ମାଡ଼ତଡ଼; ଯଦି ନା ବିଷୟ୍‌ତେ ଅଡ଼, ବାଡ଼ କେତାନାଦ୍ ମିନ୍ଦେ, ଅଡ଼, ନିଜେ ନି ମୁନ୍‌ନେ ଖାସ୍ ଅବିଯୋଗ୍ ମାଡ଼, ପାର୍‌ଖେଡ଼ ।

୨୦ ମେଣ୍ଡେ ନାନ୍ ବେସୁର୍ ବେଡ଼ୟେ ମିଟିଙ୍ଗ୍‌ତେ ମୁନ୍‌ନେ ନିଶ୍‌ମାଡ଼ତାନ୍, ନାନ୍ ବେନ୍ ଅପରାଦ୍‌ତେ ଦକ୍ଷି ଆଡ଼ତାନ୍, ଆଦ୍ ଇଗେ ମାନ୍‌ଦାନ୍ ନାରୁଡ଼, କେଲିଡ଼ ।

୨୧ ☆ ଆଗେକ୍‌ବା ନାନ୍ ଅଣ୍ଡୟ ଗର୍ କେସ୍‌ମାଡ଼ତାନ୍; ଅଡ଼, ମୁନ୍‌ନେ ନିଶ୍‌ମାନ୍‌ଦାନ୍ ଖେଲେ ନାନ୍ ଗାଡ଼ସ୍‌ଆସ୍ କେସ୍‌ମାଡ଼ତାନ୍, ‘ଡଲ୍‌ତେନଡ଼, ମେଣ୍ଡନ୍‌ଦାମ୍ ପୁନରୁଡ଼ାନ୍ ଆଦ୍‌ତଡ଼, ଇଞ୍ଜ ବିଶ୍ୱାସ୍ ମାଡ଼ତାଙ୍କ ନେଣ୍ଡ ମିଜ ତଡ଼, ବିଚାର୍ ଆଦୁଡ଼ାନ୍ ।’ ”

୨୨ ଫେଲିକ୍‌ସ୍ ଆଦ୍ ଆର ବିଷୟ୍‌ତେ ସାୟେ ପୁଦାନଙ୍କ ଇଚ୍ଛା ବନ୍ଦ୍ ମାଡ଼ି କେଡ଼ତଣ୍ଡ, “ସେନାଲଡ଼, ମୁକ୍ୟାଲ୍ ଲିସିଆସ୍ ହେଡ଼ତେ ପେରକେ ନାନ୍ ମିୟାଦ୍ କେସ୍‌ତିଙ୍କ୍ ବିଚାର୍ ମାଡ଼ିତାନ୍ ।”

୨୩ ପାଉଲ୍‌ତିଙ୍କ୍ ବନ୍ଦି ମାଡ଼ି ନେହେତାନଙ୍କ୍ ଅଣ୍ଡ ସୈନିକିଡ଼କ୍ ଆଦେଶ୍ ହିଡ଼ତଣ୍ଡ, ଇଡ଼କେ ଅଂକିଙ୍କ୍ ନିଜର୍ ବନ୍ଦି ମାଡ଼ି ଅନ୍‌ଝାଦ୍ ସାଦନ୍ ଆଦାନ୍ ସେଙ୍ଗେ ତାନ୍ ସାଙ୍ଗଡ଼କ୍ ଆନୁମତି ହିଦାନଙ୍କ୍ ଅଣ୍ଡ ଆଦେଶ୍ ହିଡ଼ତଣ୍ଡ ।

ଫେଲିକ୍‌ସ୍ ନୁ ଦୁସିଲାନ ମୁନ୍‌ନେ ପାଉଲ୍

୨୪ ବେସ୍‌ଦିନା ପେରକେ ଫେଲିକ୍‌ସ୍ ତାନ୍ ଇହୁଦୀୟା ମୁଡ଼ତେ ଦୁସିଲାନ ତଡ଼, ଖାଡ଼ତଣ୍ଡ, ଅଣ୍ଡ ପାଉଲ୍‌ତିଙ୍କ୍ କାରଙ୍ଗି ଜିସୁ କ୍ରିଷ୍ଟନାଗ୍ ବିଶ୍ୱାସ୍ ମାଡ଼ାନ୍ ବିଷୟ୍‌ତେ ଅନ୍ ଗର୍ କେଞ୍ଜତଣ୍ଡ ।

୨୫ ଇଡକେ ବେସୁର୍ ପାଉଲ୍ ଦାର୍ମାମ୍, ନିଜେଡ଼ ବିଷୟ ନୁ ଖାଦାନ ଦିନେଡ଼ ବିଚାର ଗର୍ ମିଟିଙ୍କ ମାଡ଼ତଡ଼, ଫେଲିକ୍ସ ଖେରସ୍ମିକା କେଡ଼ତଣ୍ଡ, “ନିମ୍ ଇଞ୍ଜେ ଆଦ୍ ପାରଦ୍ତି । ସୁଯୋଗ୍ ଦରକ୍କେ, ମେଣ୍ଡନ୍‌ଦାମ୍ ନିକିଙ୍କ କାରଜ୍ଜିତାନ ।”

୨୬ ଆଦ୍ ସମୟତେ ପାଉଲ୍ ଅଂକିଙ୍କ ବେସର୍ ଡାବ୍‌କ୍ ହିଦ୍‌ତଣ୍ଡ ଇଞ୍ଜେ ଅଣ୍ଡ ଆଗେ ମାଡ଼ିମାଡ଼ତଣ୍ଡ, ଆଦିଙ୍କ ଅଣ୍ଡ ଅଣ୍ଡ ଅଣ୍ଡନ୍‌ଦାମ୍ ଅଂକିଙ୍କ କାରଜ୍ଜି ଅନ୍ ତଡ଼ ଡ୍ରିୟାନଙ୍କ ପସ୍‌ସ୍‌ତଣ୍ଡ ।

୨୭ ଇଦ୍ ରକମ୍ ରେଣ୍ଡ ହେଣ୍ଡକ୍ ଆଡ଼ତେ ପେରକେ ପୋକ୍‌ୟ ଫେଷ୍ଟସ୍ ଫେଲିକ୍ସତେ ପଡ଼ୟେତାଗ୍ ରାଜ୍ୟପାଳ ଲେକାମ୍ ନିୟୁକ୍ତ ଆଡ଼ତଣ୍ଡ । ଫେଲିକ୍ସ ଇହୁଦୀଡ଼ ପ୍ରିୟ ନାରୁଡ଼ ଆଦାନ୍ ସେଙ୍ଗେ ଆଗେ ମାଡ଼ି ପାଉଲ୍‌ତିଙ୍କ ମୁକ୍ତି ମାଡ଼ଖେ କନ୍‌ସ୍ ଜଇଲ୍‌ତାଗ୍ ଡ୍ରିଡ଼ସ୍ ଆଡ଼ତଣ୍ଡ ।

୨୫

ମହାରାଜା କାଇୟସ୍‌ରତେ ଗାର୍ରେ ପାଉଲ୍ ଆବେଦନ୍ ମାଡ଼ତଣ୍ଡ

୧ ଫେଷ୍ଟସ୍ ଇଦ୍ ପ୍ରଦେଶ୍‌ତାଗ୍ ହେଞ୍ଜୁତେ ମୁଣ୍ଡ ଦିନା ପେରକେ କାଇସରିଆ କନ୍‌ସ୍ ଯିରୁଶାଲେମ୍ ଆଡ଼ତଣ୍ଡ ।

୨ ଆଗେ ମୁକ୍ୟ ଯାଜକ୍ ନୁ ଇହୁଦୀ ନେତାଲଡ଼, ମେଣ୍ଡନ୍‌ଦାମ୍ ପାଉଲ୍ ବିରୁଦ୍‌ତେ ଅବିଯୋଗ୍ ଅନୁରଦ୍ ମାଡ଼ତଡ଼ ।

୩ ପାଉଲ୍‌ତିଙ୍କ ଯିରୁଶାଲେମ୍‌ତାଗ୍ ତାସ୍ ହେଞ୍ଜୁସାନ୍ ମାଇଦିଙ୍କ ଅନୁଗ୍ରହ ମାଡ଼ିଣ୍ଡ ଇଞ୍ଜେ ଅଡ଼ ଫେଷ୍ଟସ୍‌ତିଙ୍କ କେଡ଼ତଡ଼, ଇଡକେ ଅଡ଼ ପାଉଲ୍‌ତିଙ୍କ ଆରଦାଗ୍ ହାଞ୍ଜକାଙ୍କ୍ ତିଆର୍ ଆସ୍ ମାଡ଼ତଡ଼ ।

୪ ଫେଷ୍ଟସ୍ କେଡ଼ତଣ୍ଡ, “ପାଉଲ୍‌ତିଙ୍କ୍ ଖେରଣ୍ଡ ବନ୍ଦି ଲେକାମ୍ କାଇସରିଆତାଗ୍ ନେହେଡ଼ତଡ଼, ନୁ ସିର୍‌ପାଟ୍ ନାନ ନିଜେ ଆଗେ ମାଲ୍‌ସ୍ ଆଦ୍‌ତାନ ।

୫ ଯଦି ଅଣ୍ଡ ବାଡ଼ ଦଷ୍ଟ ମାଡ଼ତଣ୍ଡ, ଆଲେକେ ମିଇ ନେତାଲଡ଼, ନାତଡ଼ ସିସେରିଆତାଗ୍ ଆନିଡ଼, ନୁ ଅନ୍ ବିରୁଦ୍‌ତେ ଅଡ଼ାଦ୍ ଅବିଯୋଗ୍ କେଲିଡ଼ ।”

୭ ଫେଷ୍ଟସ୍ ଅଡ଼ ତଡ଼ ଆର୍ ବା ଦର୍ ଦିନ୍ ପେକେ ମାଞ୍ଜି କାଈସରିଆ ମାଲ୍‌ତଣ୍ଡ । ମେଣ୍ଡିନ୍ ଦିନ୍ ଅଣ୍ଡ ବିଚାର୍ ଲୋଡ଼ତାର୍ କୁଦି ପାଉଲ୍‌ତିଙ୍କ ତାତାନଙ୍କ ଗର୍ ହିଡ଼ତଣ୍ଡ ।

୮ ପାଉଲ୍ ଝାଡ଼ତେ ସାଙ୍ଗେ ସାଙ୍ଗେ ଯିରୁଶାଲେମ୍‌ତେ ଇହୁଦୀଡ଼, ଅନ୍ ତିଡ଼ିୟାକ୍ ରୁର୍ ନିଡ଼ତଡ଼, ନୁ ଅନ୍ ବିରୁଦ୍‌ତେ ନାଗେ ଅବିଯୋଗ୍ ମାଡ଼ାନାଦ୍ ଶକ୍ତି ମାଡ଼ତଡ଼ । ଇଡ଼କେ ଅଡ଼ ଇଝୁସାରେ ପ୍ରମାଣ୍ ମାଡ଼ାନଙ୍କ ପାଡ଼ିଡ଼ ।

୯ ଇଡ଼କେ ପାଉଲ୍ ଆମ୍‌ସମର୍ପଣ ମାଡ଼ି କେଡ଼ତଣ୍ଡ, “ଇହୁଦୀ ନିୟମ୍ କି ମନ୍ଦିର୍ କି ରୋମ୍‌ତେ ମହାରାଜା, ମୋଶାନ୍ ନିୟମ୍‌ତେ ନାନ୍ ବାଡ଼ମିକା ପାପାମ୍ ମାଡ଼ନ୍ ।”

୧୦ ଇଡ଼କେ ଫେଷ୍ଟସ୍ ଇହୁଦୀ ନାରୁଡ଼ତେ ଅନୁଗ୍ରହ ଆଦାନଙ୍କ ଇଛା ମାଡ଼ି ପାଉଲ୍‌ତିଙ୍କ ପାତ୍ରାମାଡ଼ତଣ୍ଡ, “ଯିରୁଶାଲେମ୍‌ତାର୍ ଆଦାନଙ୍କ ନୁ ଆଗେ ନା ମୁନ୍‌ନେ ଇଝୁସାରେ ଅବିଯୋଗ୍ ବିଚାର୍ ମାଡ଼ାନ୍ ସେଙ୍ଗେ ନିମ୍ ରାଜି ଆଦତି କି ?”

୧୧ ପାଉଲ୍ କେଡ଼ତଣ୍ଡ, “ନାନ୍ ମହାରାଜାନ୍ ନିଜେଡ଼ ବିଚାର୍ ଲୋଡ଼ତାର୍ ନିସ୍ ମିନ୍‌ନେ । ଇଗେ ଆ ନାୟାଦ୍ ବିଚାର୍ ଆଦାନ୍ ଦରକାର୍ । ନିମ୍ ନିଜେ ସାୟେ ପୁଡ଼ତିନ୍ ଯେ, ନାନ୍ ଇହୁଦୀଡ଼, ବିରୁଦ୍‌ତେ ବାଡ଼ ଦଷ୍ଟ ମାଡ଼ନ୍ ।

୧୨ ଯଦି ନାନ୍ ଉପବାସ୍ତିଙ୍କ ମାନେମ୍ ଆୟ୍‌ୟକଟ୍ ଡଲାନ୍‌ଦଣ୍ଡ ଆଦାନ୍ ଲେକାମ୍ ବାଡ଼ ମାଡ଼ତାନ୍, ଆଲେକେ ନାନ୍ ରାଜି ମିନ୍‌ନେ । ଇଡ଼କେ ଅଡ଼ ନା ବିରୁଦ୍‌ତେ ତାସ୍ ମାୟାନ୍ ପ୍ରତିଶଦ୍ ସଡ଼ ଆୟ୍‌ୟକଟ୍ ମାଡ଼କେ, ଆଲେକେ ବେନ ନାକିଂଙ୍କ ଅଡ଼ କାୟ୍‌ଦେ ଝିଡ଼ସିଝଣ୍ଡ । ମହାରାଜାନାର୍ ନାନ୍ ଇଦ୍ କେଡ଼ତାନ୍ ।”

୧୩ ତାନ୍‌ପେକେ ଫେଷ୍ଟସ୍ ତାମ୍ ଉପବାସ୍ ସବାଡ଼ ମୁକ୍ୟାଲଡ଼ ତଡ଼, କାୟ୍‌ଲି ଉତ୍ତର୍ ହିଡ଼ତଣ୍ଡ, “ନିମ୍ ମହାରାଜାନାର୍ କେଡ଼ତିନ୍, ଆଦିଙ୍କ ନିମ୍ ମହାରାଜାତେ ବକେଡ଼ ଆଦତି ।”

ଆଗ୍ରୀପା ନୁ ବଣ୍ଟିସ୍‌ତେ ମୁନ୍‌ନେ ପାଉଲ୍

୧୩ ବେସ୍‌କେ ଦିନା ପେର୍‌କେ ଆଗ୍ରୀପା ନୁ ବଣ୍ଟିସ୍ ଫେଷ୍ଟସ୍‌ତିଙ୍କ କାଈଲାନଙ୍କ କାଈସରିଆତାର୍ ଝାଡ଼ତଡ଼ ।

୧୪ ଆଗେ ଅଡ଼ ବେସ୍‌କେ ଦିନା ମାଡ଼ତେ ପେରକେ ଫେଷ୍ଟସ୍ ରାଜାଙ୍କ ପାଉଲ୍‌ତେ ବିଷୟ କେଡ଼ତଣ୍ଟ, “ଫେଲିକ୍‌ସ୍ ବନ୍ଦି ମାଡ଼ି ନେହେଡ଼ତେ ଖେରଣ୍ଟ ନାରୁଡ଼ ଇଗେ ମିନ୍ଦେଣ୍ଟ ।

୧୫ ନାନ୍ ବେସ୍‌ଟର୍ ଯିରୁଶାଲେମ୍‌ତାଗ୍ ଆଞ୍ଜ୍ ମାଡ଼ତାନ୍, ଇହୁଦୀ ବେଡ଼ିୟି ଯାଜକ୍ ନୁ ଦର୍ମ ନେତାଲଡ଼୍ ଅନ୍ ବିରୁଦ୍ଧତେ ବେସ୍‌ଟ୍ ଅବିଯୋଗ୍ ତାଡ଼ତଡ଼୍ ନୁ ନାକିଙ୍କ୍ ଅଂକିଙ୍କ୍ ଦକ୍ଷି ମାଡ଼ାନଙ୍କ୍ କେଡ଼ତଡ଼୍ ।

୧୬ ଇଡ଼କେ ନାନ୍ ଅଡ଼୍‌କିଙ୍କ୍ କେଡ଼ତାନ୍ ଯେ, ଖେରଣ୍ଟ ଦୋଷୀଙ୍କ୍ ବିଚାରଲୟତାଗ୍ ଅଂକିଙ୍କ୍ ଅବିଯୋଗ୍ ମାଡ଼ତେନଡ଼୍ ମୁନେନେ ସର୍ପା ମାଡ଼ାନ୍ ସେଙ୍ଗେ ସୁଯୋଗ୍ ହିଦାନ୍ ମୁନେଙ୍କ୍ ଅଂକିଙ୍କ୍ ଦକ୍ଷି ମାଡ଼ାନାଦ୍ ମାନ୍ ରୋମୀୟଡ଼ାଦ୍ ନିୟମ୍ ଆୟ୍‌ୟ ।

୧୭ ଅଡ଼୍ ଇଗେ ଖାଡ଼ତେ ପେରକେ ନାନ୍ ଲେଟ୍ ମାଡ଼କଟ୍ ମେଣ୍ଟନ୍ ଦିନ୍ ବିଚାର ଲୋଡ଼ତାଗ୍ କୁଦ୍‌ତାନ୍ ନୁ ନାରୁଙ୍କ୍ ଲୋପେ ତାତାନଙ୍କ୍ ଆଦେଶ୍ ହିଡ଼ତାନ୍ ।

୧୮ ଅନ୍ ଅବିଯୋଗନଡ଼୍ ଅନ୍ ବିରୁଦ୍ଧତେ କେତାନଙ୍କ୍ ନିଡ଼ତଡ଼୍, ଇଡ଼କେ ଅଡ଼୍ ବେଦ୍‌ରକମ୍ ଅବିଯୋଗ୍ ତାଡ଼ିତଡ଼୍ ଇଞ୍ଜ ନାନ୍ ହେର୍କା ମାଡ଼ି ମାଡ଼ତାନ୍, ଆଦ୍ ରକମ୍ ଅଡ଼୍ କେଲଡ଼୍ ।

୧୯ ଅଡ଼୍ ନିଜେର୍ ଦର୍ମ ବିଷୟତେ ନୁ ଜିସୁ ପେଦେରଡ଼ଣ୍ଟ ଡଲ୍‌ତେ ନାରୁଙ୍କ୍ ପାଉଲ୍ ଜିହ୍ମନ୍ ମିନ୍ଦେଣ୍ଟ ଇଞ୍ଜ ଦାବୀ ମାଡ଼ଡୁଣ୍ଟ, ଆଦ୍ ବିଷୟ ଆସ୍ ଯୁକ୍ତିତର୍କ ମାଡ଼ତଡ଼୍ ।

୨୦ ଇହୁସାରେ ବିଷୟ ସାୟେ ପୁନ୍ଦାନ୍ ସେଙ୍ଗେ ବାଡ଼ ମାଡ଼ାନଙ୍କ୍ ଆଦ୍‌ତେ, ବାଡ଼ମିକା ଟିକ୍ ମାଡ଼େ ପାର୍‌ଖାଙ୍କ୍ ଇଦ୍ ଅବିଯୋଗ୍ ବିଚାର ମାଡ଼ାନ୍ ସେଙ୍ଗେ ପାଉଲ୍ ଯିରୁଶାଲେମ୍ ଆଦ୍‌ତନ୍ କି ଇଞ୍ଜ ନାନ୍ ଅଂକିଙ୍କ୍ ପାରାମାଡ଼ତାନ୍ ।

୨୧ ଇଡ଼କେ ପାଉଲ୍, ନିଜେ ମହାରାଜାଲ୍ ଅନ୍ ନିଷ୍ପତି ବିଚାର ମାଡ଼ିଣ୍ଟ ଇଞ୍ଜ କେସ୍ କେପାନଡ଼୍ ତଡ଼୍ ପ୍ରାର୍ଥନାତେ ସୁରକ୍ଷା ମାନ୍ଦାନଙ୍କ୍ ହାଲ୍‌ସଡ଼ଣ୍ଟ । ଆଦିଙ୍କ୍ ମହାରାଜାନ୍ ବକେଡ଼ ରହଡ଼ତାନ୍ ଯାକ ଅଂକିଙ୍କ୍ ବନ୍ଦି ମାଡ଼ି ନେହେତାନଙ୍କ୍ ନାନ୍ ଗଟ୍ ହିଡ଼ତାନ୍ ।”

୨୨ ଆଗ୍ରୀପା ଫେଷ୍ଟସ୍‌ଡ଼ିଙ୍କ୍ କେଡ଼ତଣ୍ଟ, “ନାନ୍ ନିଜେ ଇ ନାରୁନ୍ ଗଟ୍ କେଞ୍ଜାନଙ୍କ୍ ଇଞ୍ଜା ମାଡ଼ଡୁାନ୍ ।” ଫେଷ୍ଟସ୍ ଉତ୍ତର ହିଡ଼ତଣ୍ଟ, “ନାଡ଼୍ ନିମ୍

ଅନାଦ୍ ଗର୍ କେଞ୍ଜୀତିନ୍ ।”

^{୨୩} ମେଣ୍ଡନ୍ ଦିନ୍ ଆଗ୍ରୀପା ନୁ ବଣ୍ଟି ସ୍ ସୈନ ବାହିନୀତେ ମୁକ୍ୟ ନୁ ନଗରତେ ମୁକ୍ୟ ନାରୁଡ଼୍ ଗାଟି ଖେଡ଼କେଡ଼ ଖାସ୍ ବିଚାରଲୟତାଗ୍ ହସ୍ତତଡ଼୍ । ଫେଷ୍ଟସ୍ତେ ଗର୍ତେ ପାଉଲ୍ତିଙ୍କ୍ ଲୋପେ ତାଡ଼ତଡ଼୍ ।

^{୨୪} ଫେଷ୍ଟସ୍ କେଡ଼ତଣ୍ଡ, “ରାଜାଲ୍ ଆଗ୍ରୀପା ନୁ ମାନ୍ୟାନ୍ ବେଡ଼ୟେ ନାରୁଡ଼୍, ମିଡ଼୍ ଇ ବେନ୍ ନାରୁଙ୍କ୍ ଉଡ଼ୁଡ଼ିଡ଼୍, ଅନ୍ ବିରୁଦ୍ଧତେ ଇଗେତଡ଼୍, ନୁ ଯିରୁଶାଲେମ୍ ମାନ୍ୟାନ୍ ଇହୁଦୀଡ଼୍ ନା ଗାରରେ ଅବିଯୋଗ୍ ମାଡ଼ତଡ଼୍ । ଅଡ଼୍ ଅଂକିଙ୍କ୍ ଜିଞ୍ଜୁନ୍ ମାନ୍ୟାନ୍ ଦରକାର୍ ଆୟ ଇଞ୍ଜ ଦାବୀ ମାଡ଼ି ମରପୟତଡ଼୍ ।

^{୨୫} ଇଡ଼କେ ଅଣ୍ଡ ତଲାନଦଣ୍ଡ ପାଏମ୍ ଆଦାନ୍ ଲେକାମ୍ ମାଡ଼ିମାନ୍ୟାନ୍ ବାଡ଼ ଅପରାଦ୍ ନାନ୍ ଉଡ଼ନ୍ । ଅଣ୍ଡ ନିଜେ ସମ୍ରାଟ୍ତିଙ୍କ୍ କେଡ଼ତାଙ୍କ୍, ନାନ୍ ଅଂକିଙ୍କ୍ ଆଗେ ଉପବାସ୍ତାଗ୍ ରହତାନଙ୍କ୍ ମାନ୍ ମାଡ଼ତାନ୍ ।

^{୨୬} ଇଡ଼କେ ପ୍ରବୁନ୍ ବିଷୟତେ ସାୟେ ଲେକାନ୍ ସେଙ୍ଗେ ନାୟାଗ୍ ବାଡ଼ ହିଲ୍ଲେ । ଆଦିଙ୍କ୍ ଅଂକିଙ୍କ୍ ମିଇ ମୁନ୍ନେ ନୁ ଇ ରାଜାଲ୍ ଆଗ୍ରୀପା, ମିଇ ମୁନ୍ନେ ତାଡ଼ତଣ୍ଡ, ବେଦ୍ପୁରୁଙ୍କ୍ କି ଅନ୍ ବିଷୟ ସାୟେ ମାଡ଼ି ପାତ୍ରାମାଡ଼ତେ ପେରକେ ନାନ୍ ବାଡ଼ଆୟି ଲେକ୍ ପାର୍ଦଦତାନ୍ ।

^{୨୭} ଇଡ଼କେ ଖେରଣ୍ଡ ବନ୍ଦି ବିରୁଦ୍ଧତେ ମାନ୍ୟାନ୍ ଅବିଯୋଗ୍ ତାଞ୍ଜୁ ସାୟେ ଲେକକର୍ ଅଂକିଙ୍କ୍ ମହାରାଜାନ୍ ବକେଡ଼ ରତାନାଞ୍ଜୁ ଟିକ୍ ଆୟୟ ଇଞ୍ଜ ନାନ୍ ହେର୍କା ମାଡ଼ତୁନ୍ ।”

୨୭

ଆଗ୍ରୀପାନ୍ ମୁନ୍ନେ ପାଉଲ୍ ଆମ୍ବାସମର୍ଡନ୍ ମାଡ଼ତଣ୍ଡ

^୧ ଆଗ୍ରୀପା ପାଉଲ୍ତିଙ୍କ୍ କେଡ଼ତଣ୍ଡ, “ନିକିଙ୍କ୍ ନି ବିଷୟତେ ବାଡ଼ କେତାନଙ୍କ୍ ଆଦେଶ୍ ହିଡ଼ତଡ଼୍ ପାଉଲ୍ କାୟ ହାଆସ୍ ନିଜେ ସମର୍ଡନ୍ ମାଡ଼ି କେଡ଼ତଣ୍ଡ ।”

^୨ “ରାଜା ଆଗ୍ରୀପା ! ଇହୁଦୀଡ଼୍ ନାକିଙ୍କ୍ ବେନ୍ ବିଷୟତେ ଅବିଯୋଗ୍ ମାଡ଼ତଡ଼୍, ଆଦିନ୍ ବିରୁଦ୍ଧତେ ନି ମୁନ୍ନେ ନାନ୍ ଆମ୍ବାସମର୍ଡନ୍ ମାଡ଼ାନଙ୍କ୍ ସୁଯୋଗ୍ ଦରକ୍ତାଙ୍କ୍ ଅଣ୍ଡ ନିଜେତିଙ୍କ୍ ଲେକେଡ଼ ଇଞ୍ଜ ହେର୍କା ମାଡ଼ତୁଣ୍ଡ,”

୩ ବାତେଙ୍କଇତ୍ତକେ ଇହୁଦୀଡ଼, ରୀତିନୀତି ନୁ ମତାମତ ବିଷୟ ନିମ୍ନ ସାୟେ ପୁଡ଼ତିନ୍ । ଅନୁରଦ୍ ମାଡ଼ତୁନ୍, ନିମ୍ନ ଗାଡ଼ସ୍ ଆସ୍ ନା ଗଟି କେଞ୍ଜେ ।

୪ “ପିଲେ ଦିନା କନ୍ସ୍ ନାନ୍ ବେଦ୍ପୁରୁଙ୍କ୍ ବାଦ୍‌କ୍‌ତାନ୍, ଆଦ୍ ଇହୁଦୀଡ଼, ପୁଡ଼ତଡ଼ । ମୁନେନ୍ ନିଜେଡ଼ ଦେଶ୍‌ତାଗ୍ ନୁ ତାନ୍‌ପେକେ ଯିରୁଶାଲେମ୍‌ତାଗ୍ ନାନ୍ ବେଲା ବାଦ୍‌କ୍‌ତାନ୍, ଆଦ୍ ମିକା ଇହୁଦୀଡ଼, ପୁଡ଼ତଡ଼ ।

୫ ନାନ୍ ମୁନେନ୍ ପାରୁଶୀ ପେଦେରତେ ମାନ୍ ଦର୍ମତାଦ୍ ସାରେତିଙ୍କ୍ ସୁଦୁର୍ ମାନ୍ଦେତାଗ୍ ସବ୍ୟ ଇନା ଜିଝୁନ୍ ବାଦ୍‌କ୍ ମାଡ଼ତାନ୍, ଅଡ଼ ଇଦ୍ ପୁଡ଼ତଡ଼ ନୁ ଇଚ୍ଛା ମାଡ଼କେ, ଅଡ଼ ଇଦ୍ ବିଷୟତେ ସାକ୍ଷ୍ୟ ଇଦେ ପାର୍‌ଦତଡ଼ ।

୬ ଇଶ୍ବର ମାନ୍ ଆନିଦାଦୀଡ଼କିଙ୍କ୍ ବେନ୍ ପ୍ରତିଜ୍ଞା କେସ୍‌ମାଡ଼ତଶ୍, ଆଗେ ନାୟାଦ୍ ଆଗେ ମାନ୍ଦାନ୍ ସେଙ୍ଗେ ନାନ୍ ଇଗେ ବିଚାର୍ ଆଦାନଙ୍କ୍ ନିସ୍ ମିନ୍ଦେନ୍ ।

୭ ମାନ୍ ନାରୁଡ଼ତେ ବାର ଗୋଷ୍ଠୀତଡ଼ ନାରକେ ପାୟାଲ୍ ପ୍ରବୁଙ୍କ୍ ଉପାସନା ମାଡ଼ି ଆଦ୍ ଅଣ୍ଡୟ ବିଷୟ ପାଏମ୍ ଆଦାନ ସେଙ୍ଗେ ଆଗେ ମାଡ଼ିତଡ଼ । ହୋ ରାଜା, ନାୟାଦ୍ ଆଦ୍ ଆଗେ ମାଲଦିଙ୍କ୍ ଇହୁଦୀଡ଼, ନାକିଙ୍କ୍ ଦକ୍ଷି ମାଡ଼ତୁଡ଼ ।

୮ ଇଶ୍ବର ଯେ ତଲ୍‌ତେନଡ଼କିଙ୍କ୍ ତଲ୍‌ତାଗାଙ୍କ୍ ତେଏତିତଶ୍, ଇଦ୍ ବିଶ୍ବାସ୍ ମାଡ଼ାନାଦ୍ ସମ୍ବଦ୍ ଆୟ୍‌ୟ ଇଞ୍ଜ ମିଡ଼ ବାତେଙ୍କ୍ ହାଲ୍‌ସୁଡ଼ିଡ଼?”

୯ “ନାଜରିତିୟ ଜିସୁନ୍ ପେଦେରତେ ଅନ୍‌ମାନ୍ଦେତିଙ୍କ୍ ବନ୍ଦ୍ ମାଡ଼ାନ୍ ସେଙ୍ଗେ ନାନ୍ ପାର୍‌ତେଇସର୍ ଆଲ୍‌ସି ମାଡ଼ାନାଦ୍ ଟିକ୍ ଇଞ୍ଜ ହାଲ୍‌ସିମାଡ଼ତାନ୍ ।

୧୦ ଯିରୁଶାଲେମ୍‌ତାଗ୍ ନାନ୍ ଆଲେନେ ମାଡ଼ତାନ୍ । ବେଡ଼ିୟି ଯାଜକିଡ଼ାଗାଙ୍କ୍ ଅଦିକାର୍ ଚିଟି ଆସ୍ ଇଶ୍ବରତେ ପବିତ୍ର ବକ୍ତୃତ୍ ଲୋପେଙ୍କ୍ ନାରଗେ ନାରୁଡ଼କିଙ୍କ୍ ଜେଲ୍‌ତାଗ୍ ଝାଡ଼ତାନ୍ ନୁ ଅଡ଼କିଙ୍କ୍ ତଲ୍‌ନଦଶ୍ ହିଦାନ୍ ସେଙ୍ଗେ ନାନ୍ ଆଦିଙ୍କ୍ ସପର୍ ମାଡ଼ତାନ୍ ।

୧୧ ନାର୍ଗେଦାମ୍ ପ୍ରାର୍ଥନା ଲଅକିନାଗ୍ ନାନ୍ ଅଡ଼କିଙ୍କ୍ ଦଶ୍ ହିଡ଼ତାନ୍ ନୁ ତାମ୍ ବିଶ୍ବାସ୍‌ତାଗାଙ୍କ୍ ଝେରେ ମାଡ଼ାନ୍ ସେଙ୍ଗେ ଆଲ୍‌ସି

ମାଡ଼ତାନ । ନାନ୍ ଅଡ଼ ପରର ହିସର କପାମ୍ ଆଡ଼ତାନ ଯେ, ଅଡ଼ ପରର ଅତ୍ୟାଚାର ମାଡ଼ାନ ସେଙ୍ଗେ ବିଦେଶ ଟାଣୁନକିନାଗ୍ ମିକା ଆଞ୍ଜମାଡ଼ତାନ ।”

ପାଉଲ୍ ନିଜର ବାଦଲେମ୍ ବିଷୟ କେତ୍ତଣ୍

(ପ୍ରେରିତ ୯:୧-୧୯; ୨୨:୬-୧୬)

୧୨ “ଇଦିନ୍ ମାଇଦିଙ୍କ୍ ମୁକ୍ୟ ଯାଜକିଡାଗାଙ୍କ୍ ଅଦିକାର୍ ତିଟି ନୁ ଗର୍ ଅସ୍ ନାନ୍ ଦାମାସ୍କସ୍ତାର୍ ଆଞ୍ଜମାଡ଼ତାନ ।

୧୩ ହଁ ରାଜା ଆଗ୍ରିପା, ହଟାଡ଼ ଅନ୍ଦନେ ପାୟାଲ୍ତେ ଖେଲେ ମେନ୍ ରଟିନ୍ ପରର ନାନ୍ ପଡ଼୍ ଖେସ୍ତାଗାଙ୍କ୍ ମେଣ୍ଟେ ଅଦିକ୍ ଅଣ୍ଟୟ୍ ଖେସ୍ ଉଡ଼ତାନ, ସ୍ପର୍ତ୍ତାଗାଙ୍କ୍ ଆଦ୍ ଖେସ୍ ଖାସ୍ ନାକିଂଙ୍କ୍ ନୁ ନା ତଡ଼୍ ମାନ୍ଦାନଡ଼ତେ ତିଡ଼ିପାକ୍ ନିଡ଼ତେ ।

୧୪ ମାମ୍ମେ ସାରେତମ୍ ବୁମ୍ତାର୍ ରାୟତମ୍ ନୁ ହୀବୁ ଗର୍ତେ ନା ସେଙ୍ଗେ ଅଣ୍ଟୟ୍ ଗର୍ କେଞ୍ଜତାନ, ‘ଗାଉଲ୍, ଗାଉଲ୍ ! ନିମ୍ ବାତେଙ୍କ୍ ନାକିଂଙ୍କ୍ ତାଡ଼ନା ମାଡ଼ୁନି ? ଉଡ଼ଦାନଶ୍ଚ ମାନେୟ୍ତେ କୟେଡ଼ୁଡ଼ିଙ୍କ୍ ଲାଡ଼ ରେହେତାନ କୟ୍ ଲେକାମ୍ ନିମ୍ ନିଜେ ଦେବ୍ ତିନିଟି* ।’

୧୫ ନାନ୍ ପାରାମାଡ଼ତାନ, ‘ପ୍ରବୁ, ନିମ୍ ବେନ ?’ ପ୍ରବୁ ଉତ୍ତର ହିଡ଼ତଣ୍, ‘ନାନ୍ ଜିସୁ ବେନଙ୍କ୍ ନିମ୍ ତାଡ଼ନା ମାଡ଼ୁନି ।

୧୬ ଇଡ଼କେ ତେଦି ନିଲ୍ମ । ନିକିଂଙ୍କ୍ ନା ଦାସ ଲେକାମ୍ ନେହେତାନଙ୍କ୍ ନାନ୍ ନିକିଂଙ୍କ୍ ଦର୍ଶନ୍ ହିଡ଼ତାନ । ନେଣ୍ ନା ବିଷୟ୍ତେ ବାଡ଼ ଉଡ଼ତିନ୍ ନୁ ଖାଦାନ୍ ଦିନାତେ ନାନ୍ ନିକିଂଙ୍କ୍ ବାଡ଼ ତଅଡ଼ିତାନ, ଆଦ୍ ବିଷୟ୍ ନିମ୍ ଖେରେ ନାରୁଡ଼କ୍ ସାକ୍ଷି କେଡ଼ିତିନ୍ ।

୧୭ ନାନ୍ ନିକିଂଙ୍କ୍ ବେନ୍ ଇହୁଦୀ ନୁ ଅଣଇହୁଦୀ ନାରୁଡ଼ାଗ୍ ରହଡ଼ିତାନ, ଅଡ଼ଆଗାଙ୍କ୍ ନାନ୍ ନିକିଂଙ୍କ୍ ଉଦ୍ଦାର୍ ମାଡ଼ିତାନ ।

୧୮ ନିମ୍ ଅଡ଼ାଦ୍ କଣ୍ଟାଙ୍କ୍ ପରିଷ୍କାର୍ ମାଡ଼ିମ୍ । ଅଡ଼କିଂଙ୍କ୍ ଇକାଡ଼ତାଗାଙ୍କ୍ ଖେସିନାଗ୍ ନୁ ଶୟତାନତାଗାଙ୍କ୍ ଇଶ୍ବରତେ ପାକେ ତାତାନଙ୍କ୍ ଆଦତେ, ବେଲାକି ଅଡ଼ ନାକିଂଙ୍କ୍ ବିଶ୍ବାସ୍ ମାଡ଼କେ ଅଡ଼ାଦ୍ ପାପ୍ କ୍ଷମା ଆଦତେ ନୁ ପ୍ରବୁ ହେଞ୍ଜତେ ନାରୁଡ଼ ଲୋପେ ଅଡ଼କ୍ ଅଦିକାର୍ ଦରକିଡ଼ ।”

* ୨୭:୧୪ ଏପରି ବାବରେ ପ୍ରବୁ ତାଙ୍କ ଦୋଷ ସୁଦାରିବା ପାଇଁ ଏହା କରୁଛନ୍ତି

ନିଜର ପାତ୍ରିୟ ବିଷୟରେ ପାଉଲ କେତେତେ

୧୯ “ହଁ ରାଜା ଆଗ୍ରୀପା, ନାନ୍ ସ୍ୱର୍ଗତାଗାଙ୍କ ବେନ ଦର୍ଶନ୍ ଉଡ଼୍ତାନ, ଆଦିଙ୍କ ଅପମାନ ମାଡ଼ନ୍ ।

୨୦ ☆ ନାନ୍ ମୁନେନ୍ ଦାମାସକସ୍ ଯିରୁଶାଲେମ୍‌ତାଗ୍ ନୁ ତାନପେକେ ଯିହୁଦା ପ୍ରଦେଶ୍‌ରେ ସାରେ ଏକାମ୍ ନୁ ଅଣଇହୁଦୀଡ଼୍ ଲୋପେ ପ୍ରଚାର ମାଡ଼ତାନ୍, ବେଲାକି ଅଡ଼୍ ପାପାମ୍‌ତାଗାଙ୍କ ମାଲ୍‌ସ୍ ଇଶ୍ୱର୍ ଗାର୍‌ରେ ଝାଡ଼ତଡ଼୍ ନୁ ଅଡ଼୍ ବାଡ଼ ଅନୁତାପ୍ ମାଡ଼ତଡ଼୍, ଆଦ୍ ପାତ୍ରିୟତାଗ୍ ତଅତିତଡ଼୍ ।

୨୧ ଇଦିନମାଇଦିଙ୍କ ନାନ୍ ମନ୍ଦିରତାଗ୍ ମାନ୍ଦାନ୍ ଝେଲେ ଇହୁଦୀଡ଼୍, ନାକିଂଙ୍କ ପଇସ୍ ହାଝକାନଙ୍କ୍ ଚେଷ୍ଟା ମାଡ଼ତଡ଼୍ ।

୨୨ ଇଡ଼କେ ନେଣ୍ଟ୍ ଯାକ ଇଶ୍ୱର୍ ନାକିଂଙ୍କ୍ ସାହାଯ୍ୟ ମାଡ଼ତଣ୍ଟ୍ ନୁ ଆଦିନ୍ ସେଙ୍ଗେ ନାନ୍ ନେଣ୍ଟ୍ ବେଡ଼୍‌ୟଡ଼୍, ସୁଦୁଲଡ଼୍, ସାରେତଡ଼୍, ବକେଡ଼୍ ସାମାନ୍ ସାକ୍ଷ୍ୟ ହିଦାନ୍ ସେଙ୍ଗେ ଦାୟି ଆଦାନ୍ ସେଙ୍ଗେ ନିଡ଼ତାନ୍ । ବାବବାଦୀଡ଼୍ ନୁ ମୋଶାଲ୍, ବାଡ଼ ଗଚେମ୍ ଆଦ୍‌ରେ ଇଞ୍ଜି କେସ୍‌ମାଡ଼ତଡ଼୍ ନାନ୍ ଟିକ୍ ଆଦେ ଗର୍ କେତୁତାନ୍ ।

୨୩ ☆ ମସୀହ ଦୁଃକାମ୍‌କଷ୍ଟ ମାଡ଼ିତନ୍ ନୁ ଡଲ୍‌ତଡ଼୍, ଲୋପେ ସାରେତିଙ୍କ୍ ମୁନେନ୍ ପୁନରୁତାନ୍ ଆସ୍ ଇହୁଦୀ ନୁ ଅଣଇହୁଦୀଡ଼୍, ବକେଡ଼୍ ପରିତ୍ରାଣରେ ଝେସ୍ ତଅତିତଣ୍ଟ୍ ।”

୨୪ ଇଦ୍‌ରକମ୍ ପାଉଲ୍ ନିଜେ ରାଜି ଆସ୍ କେଡ଼ତାନ୍ ଝେଲେ ଫେଷ୍ଟସ୍ କିଡ଼କି କେଡ଼ତଣ୍ଟ୍, “ପାଉଲ୍, ନିମ୍ ବାୟାନି ! ନିୟାଦ୍ ନାର୍‌ଗେ ବୁଦ୍ ନିକିଂଙ୍କ୍ ବାୟେ ମାଡ଼ତେ !”

୨୫ ପାଉଲ୍ ଉତ୍ତର ହିଡ଼ତଣ୍ଟ୍, “ନାନ୍ ବାୟେ ଆୟନ୍ ମଣିମା ! ଫେଷ୍ଟସ୍ ବାଡ଼ କେତୁତାନ୍ ଆଦ୍ ନିଜାମ୍ ନୁ ପ୍ରାମାଣ୍‌ତାଦ୍ ଗର୍ ।

୨୬ ରାଜା ଆଗ୍ରୀପା ! ନିମ୍ ଇଞ୍ଜିଆରେ ବିଷୟ ପୁଡ଼ତାଙ୍କ୍ ନାନ୍ ନି ମୁନ୍‌ନେ ଇଦ୍ ଗର୍ କେତାନଙ୍କ୍ ସାହାସ୍ ମାଡ଼ତୁନ୍ ! ନାନ୍ ନିଜାମ୍ ପୁଡ଼ତାନ୍ ଯେ, ଇଞ୍ଜିଆରେ ବିଷୟ ନିକିଂଙ୍କ୍ ତଅନ୍‌ଦ, ବାଡେଙ୍କ୍‌ଇଡ଼କେ ପୁନ୍‌ଝାଦ୍ ପଡ଼୍‌ୟେତାଗ୍ ମିଞ୍ଜି ଇଦ୍ ବିଷୟ ଗଚେମ୍ ଆୟନ୍ ।

୨୭ ରାଜା ଆଗ୍ରୀପା, ନିମ୍ନ ବାବବାଦୀତ୍ୱ ବିଶ୍ୱାସ୍ ମାଡ଼ୁଥିବ ତ ! ନାନ ପୁତ୍ରତାନ୍ ନିମ୍ନ ବିଶ୍ୱାସ୍ ମାଡ଼ୁଥିବ !”

୨୮ ଆଗ୍ରୀପା ପାଉଲ୍‌ଟିଙ୍କ ଉତ୍ତର ହିତ୍‌ତଣ୍ଡ, “ଇଦ୍ ସୁଦୁର୍ ସମୟତେ ଲୋପେ ନିମ୍ନ ବାଡ଼ ନାକିଂ କ୍ରିଷ୍ଟିୟାନ୍ ବାଦ୍‌ଲା ମାଡ଼ିତାନ୍ ଇଞ୍ଜ ହାଲ୍‌ସୁତିନ୍ ?”

୨୯ ପାଉଲ୍ ଉତ୍ତର ହିତ୍‌ତଣ୍ଡ, “ସୁଦୁର୍ ଦିନାମ୍ ଆୟି ବା ଗାଟି ଦିନାମ୍ ଆୟି, ଇଶ୍ୱରତାଗ୍ ନାନ ପ୍ରାର୍ଥନା ମାଡ଼ୁତାନ୍, ନିନ୍ ନୁ ନେଣ୍ ନା ଗଟି କେଞ୍ଜମାନ୍ଦାନ୍ ସାରେତଡ଼୍ ନା ଲେକାମ୍ ଆୟ୍‌ମୁର୍, ବେଲାବା ବନ୍ଦି ଆଦତନ୍ ଇଦ୍‌ରକମ୍ ଇକ୍‌ଲେମ୍ ତଡ଼୍ ତଅମୁର୍ ଇଞ୍ଜ ନାନ କେଲନ୍ ।”

୩୦ ତାନ୍‌ପେକେ ରାଜା, ରାଜ୍ୟପାଳ, ବଣ୍ଟି ସ୍‌ ନୁ ମେଣ୍ଡେବାଗାତଡ଼୍ ଆଦାନଙ୍କ୍ ତେଦତଡ଼୍ ।

୩୧ ଅଡ଼୍ ଆଦାନ୍ ଝେଲେ ତାମ୍‌ତାମ୍ କେଡ଼ତଡ଼୍, “ଇଣ୍ଡ ନାରୁଣ୍ଡ ଇଦ୍ ରକମ୍ ବାଡ଼ ପାଡ଼ୁୟି ମାଡ଼ୁଣ୍ଡ, ବାଡ଼ ସେଙ୍ଗେ ଅଣ୍ଡ ତଲାନଦଣ୍ଡ ପାଏମ୍ ଆଦତଣ୍ଡ ବା ବନ୍ଦି ଆଦତନ୍ ।”

୩୨ ଆଗ୍ରୀପା ଫେଷ୍ଟସ୍‌ଟିଙ୍କ୍ କେଡ଼ତଣ୍ଡ, “ଉପବାସ୍‌ତାଗ୍ ଯଦି ଇଣ୍ଡ ନାରୁଣ୍ଡ ମହାରାଜାନାଗ୍ ଆବେଦନ୍ ମାଡ଼କର୍ ମାଡ଼କେ, ମାମ୍‌ମେ ଅଂକିଙ୍କ୍ ମୁକ୍ତି ହିଦାଙ୍କ୍ ପାରଝେମ୍ ।”

୨୭

ପାଉଲ୍‌ଟିଙ୍କ୍ ରୋମ୍‌ତାଗ୍ ଆଡ଼ତଡ଼୍

୧ ମାମ୍‌ମେ ଇତାଲିଆତାକ୍ ଏର୍‌ଦାଲା ଆଦତମ୍ ଇଞ୍ଜ ମାନ୍ ମାଡ଼ତାଙ୍କ୍ ପାଉଲ୍ ନୁ ମେଣ୍ଡେ ବେସ୍‌କ୍‌ତୁଡ଼୍ ବନ୍ଦିଡ଼୍, “ମହାରାଜା ସେନାଦଲ୍,” ପେଦେର୍‌ତେ ଅଣ୍ଡୟ୍ ରୋମୀୟ ସୈନିଡ଼୍ ବାହିନୀତେ ସେନାପତି ଯୁଲିୟସ୍‌ତେ କାୟ୍‌ଦାଗ୍ ସମର୍ପିତ୍ ଆଡ଼ତଡ଼୍ ।

୨ ମାମ୍‌ମେ ରୋମ୍‌ତେ ଆସିଆ ଦେଶ୍‌ତେ ଆସ୍ଥିନ୍ ଗାର୍‌କିନାଗ୍ ଆଦାନ୍ ସେଙ୍ଗେ ତିଆର୍ ଆଡ଼ତେ ଆଦ୍ରମୁତିୟମ୍‌ତେ ଅଣ୍ଡୟ୍ ଏର୍ ଜାହାଜ୍‌ତାଗ୍ ଆଡ଼ତମ୍ । ଆରିଷ୍ଟାର୍କସ୍ ପେଦେର୍‌ତେ ଥେସଲନିକୀ ସହରତଣ୍ଡ ଝେରଣ୍ଡ ମାସିଦୋନିଆ ନାରୁଣ୍ଡ ମାଡ଼ତ୍ ମାଡ଼ତଣ୍ଡ ।

୩ ମେଣ୍ଡନ୍ ଦିନ୍ ମାମ୍‌ମେ ସିଦୋନ୍‌ତାଗ୍ ହେଞ୍ଜତମ୍ । ଯୁଲିୟସ୍ ପାଉଲ୍‌ଟିଙ୍କ୍ ସାୟେ ଉଡ଼ ମାଡ଼ତଣ୍ଡ । ପାଉଲ୍‌ତେ ସାଙ୍ଗଡ଼ାଗାଙ୍କ୍

ଅଂକିଙ୍କ ଦରକାର ଜିନିଷ ତାତାନ୍ ସେଙ୍ଗେ ଅଡ଼କିଂଙ୍କ କାଲଲାନଙ୍କ ଅଣ୍ଟି ପାଉଲ୍‌ତିଙ୍କ ଗର୍ ହିତ୍‌ତଣ୍ ।

୪ ସାଲପସ୍ କେଡ଼ତନ୍ ମାମ୍‌ମେ ଆଗାଙ୍କ ଆଦାନ୍ ଖେଲେ ଆଞ୍ଚିନାକାଙ୍କ ଗାଲ୍ ଝାଡ଼ତାଙ୍କ କୁପ୍ର ଗପ୍‌ତେ ହାଞ୍ ହାଞ୍ ଆଡ଼ତମ୍ ।

୫ ସିଲିଷୀଆ ନୁ ପଂଫୁଲିୟା ଜିଡ଼ି ଲିସିଆତେ ମାଏରାତାଗ୍ ହେଞ୍ଜୁତମ୍ ।

୬ ଆଗେ ସେନାପତି ଅଣ୍ଟୟ ଆଲେକଜାଣ୍ଡିଆତେ ଜାହାନ୍ ଇତାଲିଆତାକ୍ ଆଦାନ୍ ସେଙ୍ଗେ ତିଆର୍ ଆଦାନାଦ୍ ଉଡ଼ି ମାକିଂଙ୍କ ଆଗେ କୁସ୍ତତଣ୍ ।

୭ ମାମ୍‌ମେ ନାରଗେ ଦିନା ଯାକ ଜାମ୍ ଜାମ୍ ଆଞ୍ ଗାଟି ତିପାଲ୍‌ତେ କ୍ଳାଦର ଟାଞ୍ଜୁନ୍ ବକେଡ଼ ହେଞ୍ଜୁତମ୍ । ଆଞ୍ଚିନାକାଙ୍କ ଗାଲ୍ ଝାଡ଼ତାଙ୍କ ମାମ୍‌ମେ ମେଣ୍ଡେ ମୁନ୍‌ନେ ଆଦାନଙ୍କ ପାର୍‌ଝମ୍, ଆଦିଙ୍କ କ୍ରୀଟ ଗପ୍‌ତେ ତିନ୍ଦେପାକ୍ ହାଞ୍ ହାଞ୍ ଆଞ୍ ସାଲମୋନୀ ଗପିଙ୍କ ଜିଡ଼ତମ୍ ।

୮ ମାମ୍‌ମେ ହାଞ୍ ହାଞ୍ ଆଞ୍ ଗାଟି ତିପାଲ୍‌ତେ ଲାସିଆ ଟାଉନ୍ ବକେଡ଼ ସୁନ୍‌ଦର୍ ଗାଟ୍ ପେଦେର୍‌ତେ ପଡ଼ିନ୍ଦେତାଗ୍ ହେଞ୍ଜୁତମ୍ ।

୯ ମାମ୍‌ମେ ନାରଗେ ଦିନା ଆଗେ ମାଡ଼ତମ୍ । ଇହୁଦୀଡ଼ାଦ୍ ଉପବାସ୍ ପାଣ୍ଡୁନ୍ ତେରିମାଡ଼ତାଙ୍କ, ଆସୁଟେ ଗଦାଡ଼ତାଗ୍ ଆଦାନାଦ୍ ବିପଦ୍ ମାଡ଼ତେ । ଆଦିଙ୍କ ପାଉଲ୍ ଅଡ଼କିଂଙ୍କ ଇଦ୍ ଉପଦେଶ୍ ହିତ୍‌ତଣ୍;

୧୦ “ସାଙ୍ଗଡ଼ି, ନାନ୍ ପୁନ୍‌ଦାନଙ୍କ ପାର୍‌ଦୁତାନ୍ ଯେ, ଯଦି ମାନାଡ଼୍, ଇଗାଙ୍କ ମେଣ୍ଡେ ଏରଦାଲା ଆଦତାଡ଼୍, ଆଲେକେ ବିପଦ୍ ଆଦତେ । ଇଦିନ୍ ତଡ଼୍‌ମାଡ଼ର୍ ଏରଜାହାନ୍ ନୁ ମାଲ୍ ନଷ୍ଟ ଆଦତେ ଆଦ୍ ଆୟ୍‌ୟ, ଇଗେ ମାନ୍‌ଦାନ୍ ନାରୁଡ଼ତେ ଜିଞ୍ଜୁଣ୍ଡିଙ୍କ ମିକା ବିପଦ୍ ମିନ୍ଦେ ।”

୧୧ ଇଡ଼କେ ସେନାପତି ପାଉଲ୍‌ତେ ଗର୍‌ତିଙ୍କ ବିଶ୍ୱାସ୍ ମାଡ଼କର୍ ଏରଜାହାଜ୍‌ତେ ମୁକ୍ୟାଲ୍ ନୁ ଏରଜାହାଜ୍‌ତେ ମାଲିକ୍‌ତେ ଗର୍ କେଞ୍ଜୁତଣ୍ ।

୧୨ ଶାଲ୍‌ଦିନେ ମାନ୍‌ଦାନ୍ ସେଙ୍ଗେ ଗାଟ୍‌ତାଗ୍ ସୁବିଦା ହିଲ୍‌ଖେ ମାଡ଼ତେ, ଆଦିଙ୍କ ଜାହାଜ୍‌ତାଗ୍ ମାନ୍‌ଦାନ୍ ନାରୁଡ଼୍, ଲୋପେଙ୍କ ନାରଗେ ଗଦାଡ଼ତାଗ୍ ଆଞ୍ ଯଦି ପାର୍‌ଦତଡ଼୍, ଫାନିକ୍‌ସ୍‌ତାଗ୍ ଶାଲ୍ କାଲାମ୍ ମାନ୍‌ଦାନ୍ ସେଙ୍ଗେ ହାଲ୍‌ସ୍‌ତଡ଼୍ । ଫାନିକ୍‌ସ୍ ତିନ୍ଦେପାକେଡ଼

ପେକେଡ଼ିପାକ ନୁ ତେବେପାକେଡ଼ ପେକେଡ଼ିପାକ ତାକ ମୁନେନେ
ମାଡ଼ି ମାନ୍ଦାନ କ୍ରୀଟତେ ଅଣ୍ଡୟ ଗାଟ୍ ।

ଗଦାଡ଼ିତାଗ୍ ଗାଲ୍‌ଝାଡ଼ିଆମ୍

୧୩ ବେସୁର୍ ତିନ୍ଦେପାକ କନ୍‌ସ୍‌ ସାୟେଡ଼ ଗାଲ୍‌ ଝାଡ଼ତେ, ନାରୁଡ଼୍,
ଇଦିଙ୍କ୍ ଅଣ୍ଡୟ ସାୟେଡ଼ କାବୁର୍ ଇଞ୍ଜ ହାଲ୍‌ସ୍‌ତଡ଼୍, ନୁ ସିଲେତିଙ୍କ୍
ତେଇସ୍‌ କ୍ରୀଟତେ ହାଞ୍ଜ୍ ହାଞ୍ଜ୍ ଆଡ଼ତଡ଼୍ ।

୧୪ ଇଡ଼କେ ସିଟ୍‌ପାଟ୍ ଗପ୍‌ତାକାଙ୍କ୍ ତେବେପାକାଙ୍କ୍ ନୁ ମୁନେଡ଼
ପାକାଙ୍କ୍ ଗାଲ୍‌ ଗାଟି ଉର୍‌ଗିଙ୍କ୍ ଝାଡ଼ତେ,

୧୫ ଏରଜାହାଜ୍‌ତିଙ୍କ୍ ତାଲ୍‌ଗତେ । ଜାହାଜ୍‌ତିଙ୍କ୍ ଗାଲ୍‌ ଝାଦାନାକ୍
ମୁନେନେ ମାଡେ ପାର୍‌ଝାଙ୍କ୍ ମାମ୍‌ମେ ମେଣ୍ଡେ ଚେଷ୍ଟା ମାଡକର୍ ଗାଲ୍‌
ବେକେ ଆଦୁଡ଼ତେ ଜାହାଜ୍‌ତିଙ୍କ୍ ଆକେନେ ଆଦାନଙ୍କ୍ ଝିଡ଼୍‌ସିଡ଼ତମ୍ ।

୧୬ ଅଣ୍ଡୟ ସୁଦୁରାଦ୍ ଗପ୍‌ କାଉଦାତେ ତିନ୍ଦେପାକ୍ ଇସ୍‌ ଆଦାନ୍
ଝେଲେ ଗାଲ୍‌ତାଗାଙ୍କ୍ ସୁଦୁର୍ ରକ୍ଷା ପାଏମ୍‌ ଆଡ଼ତମ୍ । ଆଗେ ମାମେ
ବେଲାଆୟି ଜାହାଜ୍‌ତାଗ୍ ମାନ୍ଦାନ ଓଡେତିଙ୍କ୍ ନିରାପଦ୍ ମାଡାନାଦ୍
ଗିଲ୍‌ ନେହେତାନଙ୍କ୍ ପାର୍‌ଡ଼ତମ୍ ।

୧୭ ଓଡେ ଚାଲାମାଡାନଡ଼୍ ଆଦିଙ୍କ୍ ଜାହାଜ୍‌ତେ ପର୍‌ର ତେଇସ୍‌
ନଡ଼ତଡ଼୍, ଜାହାଜ୍‌ତାଗ୍ ଲେକେଡ଼ ତଃସିଡ଼ତଡ଼୍ । ଜାହାଜ୍‌ ଲିବିଆ
ଆଞ୍ଜିନାକ୍ ଉସ୍‌ଡ଼ ଲୋପେ ଆଦ୍‌ତେ ଇଞ୍ଜ ଝେର୍‌ସ୍‌ମିକା ଓଡେ
ଚାଲାମାଡାନଡ଼୍ ମଙ୍ଗ ଲେଇସିଡ଼ତଡ଼୍, ଜାହାଜ୍‌ତିଙ୍କ୍ ଗାଲ୍‌ ବେକେ
ଆଦୁଡ଼ତେ ଆକେନ୍‌ ଆଦାନଙ୍କ୍ ଝିଡ଼୍‌ସିଡ଼ତଡ଼୍ ।

୧୮ ରହମକଟ୍ ଗାଲ୍‌ ଝାଦାନ୍ ସେଙ୍ଗେ ମେଣ୍ଡନ୍ ଦିନ୍ ଅଡ଼୍,
ଜାହାଜ୍‌ତାଗାଙ୍କ୍ ଜିନିଷ୍‌ ଏର୍‌ଦାଗ୍ ଏସ୍‌ତଡ଼୍,

୧୯ ମେଣ୍ଡନ୍ ଦିନ୍ ଜାହାଜ୍‌ତେ ବେସର୍‌ ସାମାନ୍ ଗଦାଡ଼ିତାଗ୍
ଏସିଡ଼ତଡ଼୍ ।

୨୦ ଗାଟି ଗାଲ୍‌ ଝାସ୍‌ ମାନ୍ଦାନ ସେଙ୍ଗେ ନାର୍‌ଗେ ଦିନା ମାମ୍‌ମେ
ପଡ଼୍‌ ନୁ ଉକାକିଙ୍କ୍ ଉଡାନଙ୍କ୍ ପାର୍‌ଝମ୍ । ପେର୍‌କେ ମାମ୍‌ମେ ରକ୍ଷା
ପାଏମ୍‌ ଆଦାନ୍ ସାରେ ଆଗେ ମାପ୍‌ତମ୍ ।

୨୧ ସାରେତଡ଼୍ ନାର୍‌ଗେ ଜେଲ୍‌ କାର୍‌ଝିନ୍ ମାଡ଼ତେ ପେର୍‌କେ,
ପାଉଲ୍‌ ନାରୁଡ଼୍ ଲୋପେଙ୍କ୍ ନିସ୍‌ କେଡ଼ତଣ୍ଡ, “ସାଙ୍ଗଡ଼ି, ମିଡ଼୍, ନା ଗଟି
ଇସାପ୍‌ତେ କ୍ରୀଟତାଗାଙ୍କ୍ ଜାହାଜ୍‌ ଝିଡ଼୍‌ସ୍‌ଝିଡ଼୍, ମାୟାଦ୍ ଇଦ୍ ଅସୁବିଦା
ଆୟ ଆୟେଡ଼୍ ।

୨୭ ଇଡ଼କେ ଇଞ୍ଜେ ନାନୁ ମିକିଂଙ୍କ ଅନୁରଦ୍ ମାଡ଼ତୁନ୍, ମିଡ଼ ସାହାସ୍ ପୟମୁର୍ । ମିଇ ଲୋପେଙ୍କ ବେନନାଦ୍ ମିକା ଜିଞ୍ଜୁଣ୍ ଆନ, ଆସାମ୍ ଏରଜାହାଜ୍ ନଷ୍ଟ ଆଦତେ ।

୨୩ ନାନୁ ବେନ୍ ଇଶ୍ବରତିଙ୍କ ଉପାସନା ମାଡ଼ତୁନ୍, ନିନେ ନାରକେ ଅନାଦ୍ ସ୍ବର୍ଗ ଦୂତ ନା ବକେଡ଼୍ ଝାସ୍ କେଡ଼ତଣ୍,

୨୪ ‘ପାଉଲ୍ ନିମ୍ ଝେରମା । ନିମ୍ ନିଜାମ୍ ମହାରାଜାନ୍ ବକେଡ଼୍ ଆଦତିନ୍ । ନିକିଂଙ୍କ ଇଶ୍ବର ଦୟା ମାଡ଼ିତନ୍, ନି ତଡ଼୍ ମାନ୍ଦାନ୍ ସାରେତଡ଼କିଂଙ୍କ ଅଣ୍ଟ ରକ୍ଷା ମାଡ଼ିତଣ୍ ।’

୨୫ ଆଦିଙ୍କ ଦାଦାଲଡ଼ି, ସାହାସ୍ ପଇମୁର୍ ! ବାଡେଙ୍କଇଡ଼କେ ନାନୁ ଇଶ୍ବରତାଗ୍ ବିଶ୍ବାସ୍ ମାଡ଼ତୁନ୍, ନାକିଂଙ୍କ ବାଡ଼ କେଡ଼ତଣ୍ ଆଦେପୁଟୁଙ୍କ ଗଟେମ୍ ଆଦତେ ।

୨୬ ଇଡ଼କେ ମାନାଡ଼୍ ମୁନ୍ନେ ଆଞ୍ଜ୍ ଅଣ୍ଟୟ୍ ଗପିନାଗ୍ ନିତିତାଡ଼୍ ।”

୨୭ ଇଗେ ଆଦାନ୍ ତଉଦ୍ ଦିନ୍ ପେରକେ, ମାମ୍ମେ ବୁମଦ୍ୟ ସାଞ୍ଜଡେତାଗ୍ ଗାଲ୍ ତଡ଼୍ ତୂର୍ଥୀ ଆଦାନ୍ ଝେଲେ ନାଡ଼ନାକେ ଓଡେ ଚାଲାମାଡ଼ାନଡ଼୍ ହେର୍କା ମାଡ଼ତଡ଼୍ ଯେ, ମାମ୍ମେ ଆଞ୍ଜିନ୍ ବକେଡ଼୍ ହେଞ୍ଜୁଡ଼ମ୍ ।

୨୮ ଅଡ଼ କଲ୍ସି ପୁଡ଼ତଡ଼୍ ଆଗେ ଏରଦେ କୁଇଙ୍କ୍ ଚାଲିଗ୍ ମିଟର୍ । ମେଣ୍ଟେ ସୁବୁର୍ ପେରକେ ଉଡ଼ତଡ଼୍, ଏରଦେ କୁଇଙ୍କ୍ ଡିରିଗ୍ ମିଟର୍ କମ୍ ଆଡ଼ତେ ।

୨୯ ଜାହାଜ୍ ବେନ୍ ଆୟି ମେଟେତାଗ୍ ତାଲ୍ଗିଡ଼ ଇଞ୍ଜେ ଝେରସ୍ ଅଡ଼୍ ପେକେଡ଼୍ ପାକେଙ୍କ୍ ନାଲ୍ଲୁ ସିଲେ ଲଙ୍ଗର୍ ଝାଡ଼ତଡ଼୍ ନୁ ଝେଇସ୍ ଆଦାନ୍ ଯାକ ପ୍ରାର୍ଥନା ମାଡ଼ି କେପିମାଡ଼ତଡ଼୍ ।

୩୦ ତାନପେକେ ଅଡ଼୍ ଚାଲାମାଡ଼ାନଡ଼୍ ଜାହାଜ୍ତାଗାଙ୍କ୍ ଡିଗି ଆଦାନଙ୍କ୍ ଚେଷ୍ଟା ମାଡ଼ତଡ଼୍ । ଜାହାଜ୍ତେ ମୁନ୍ନେ ପାକ୍ ମେଣ୍ଟେ ବେସ୍ କ୍ ଲଙ୍ଗର୍ ଝାଟାନଙ୍କ୍ ହାଲ୍ସି ଅଡ଼୍ ଜାହାଜ୍ତେ ପରର ମାନ୍ଦାନ୍ ଓଡାକିଙ୍କ୍ ମଦଲ୍ ରାପଡ଼ତଡ଼୍ ।

୩୧ ଇଡ଼କେ ପାଉଲ୍, ସେନାପତି ନୁ ସୈନ୍ୟଡ଼୍ କେଡ଼ତଡ଼୍, “ଓଡେ ଚାଲାମାଡ଼ାନଡ଼୍ ଜାହାଜ୍ତାଗ୍ ମାନକର୍ ମାଡ଼କେ, ମିଡ଼ ରକ୍ଷା ପାଏମ୍ ଆଦାନାଦ୍ ଆଗେ ହିଲ୍ଲେ ।”

୩୨ ଆଦିଙ୍କ୍ ସୈନ୍ୟଡ଼୍ ଅଡ଼୍କିଂଙ୍କ୍ ନଡେ ଦେହେସ୍ ଏରଦାଗ୍ ଝିଡ଼ସିଡ଼ତଡ଼୍ ।

୩୩ ଓଇଦାନ୍ ମୁନେଙ୍କ ପାଉଲ୍ ସାରେତଡ଼କିଂଙ୍କ ତିନ୍ଦାନ୍ ସେଙ୍ଗେ କେଡ଼ତଣ୍ଡ । ଅଣ୍ଡ ଅନୁରଦତଡ଼, “ଇ ଚଉଦ ଦିନ୍ ଆଦୁଡ଼ତେ, ମିଡ଼ ବାଆଡେ ତିନ୍ଡିଡ଼ ।

୩୪ ଅନୁରଦ ମାଡ଼ତୁନ୍, ଇଞ୍ଜେ ବାଡ଼ ସୁଦୁର୍ ତିନ୍ଦୁର୍; ଜିଝୁନ୍ ମାନ୍ଦାନ୍ ସେଙ୍ଗେ ଇଦ୍ ନିହାତି ଦରକାର । ଖେରମାଟ୍ । ମିୟାଦ୍ ପରିତ୍ରାଣ ତାଲ୍ତାଗାଙ୍କ ଅଣ୍ଡୟ୍ କେଲ୍ ଗାଲା ନଷ୍ଟ ଆୟ୍ୟ ।”

୩୫ ଇଦ୍ କେସ୍ ପାଉଲ୍ ଇଶ୍ବରତିଙ୍କ୍ ଦନ୍ୟବାଦ୍ ଇସ୍ ରୁଟି ଉହ୍ସ୍ ତିଡ଼ତଣ୍ଡ ।

୩୬ ଆଗାଙ୍କ୍ ସାରେତଡ଼୍ ସାର୍ଦେ ହାସ୍ ରୁଟି ତିଡ଼ତଡ଼ ।

୩୭ ଆସୁଟେ ଜାହାଜ୍ତାଗ୍ ୨୭୭ ଜାନ୍ ନାରୁଡ଼୍ ମାଡ଼ତଡ଼ ।

୩୮ ସାରେତଡ଼୍ ତିଡ଼ତେ ପେରକେ ଜାହାଜ୍ତିଙ୍କ୍ ହାଲ୍କା ମାଡ଼ାନ୍ ସେଙ୍ଗେ ଆଗେ ମାନ୍ଦାନ୍ ସାରେ ଗହମ୍ତିଙ୍କ୍ ଗଦାଡ଼ତାଗ୍ ହେସିଡ଼ତଡ଼୍ ।

ଜାହାଜ୍ ଉରୁଙ୍ଗ୍ତେ

୩୯ ମେଣ୍ଡୁନ୍ ଦିନ୍ ନାରକା ଅଡ଼୍ ବେନ୍ ଦେଶ୍ତେ ଆଞ୍ଚିନାଗ୍ ଝାସ୍ ହେଡ଼ତଡ଼୍ ଆଦ୍ ଅଣ୍ଡୟ୍ ସୁଦୁର୍ ସାଡ଼ିଡ଼େତେ ଉସ୍ ନେଲ୍ । ଆଗେ ଜାହାଜ୍ତିଙ୍କ୍ ନିଲ୍ସାନ୍ତିଙ୍କ୍ ଚେଷ୍ଟା ମାଡ଼ତଡ଼୍ ।

୪୦ ଆଦିଙ୍କ୍ ଲଙ୍ଗର୍ତେ ସାରେ ନଡ଼େ କୟ୍ସ୍ ଗଦାଡ଼୍ ଏରଦାଗ୍ ଝିଡ଼ସିଡ଼ତଡ଼୍ । ମେଣ୍ଡେ ପର୍ଦା*ତେ ନଡ଼େକିଙ୍କ୍ ଲେଇସ୍ ମୁନ୍ନେ ତଅସ୍ ମାନ୍ଦାନ୍ ମଙ୍ଗତିଙ୍କ୍ ତେହେତଡ଼୍ । ଆଦିଙ୍କ୍ ଜାହାଜ୍ ଗାଲ୍ଦେ ତୁର୍ସା ଆଞ୍ଚିନାକ୍ ଆଡ଼ତେ ।

୪୧ ଇଡ଼କେ ଉସ୍ତାଗ୍ ତାଲ୍ଗି ଜାହାଜ୍ତେ ମୁନେଡ଼ ପାକ୍ ମଦଲ୍ ମୁଡ଼ୁଡ଼େ ନୁ ଏର ଝାସ୍ ଗାଟି ଜରୁତେ ତାଲ୍ଗି ଜାହାଜ୍ତେ ପେକେଡ଼୍ ପାକ୍ ଲଙ୍ଗର୍ ଦୁଡ଼ା ଦୁଡ଼ା ଆଡ଼ତେ ।

୪୨ ବନ୍ଦିଡ଼୍ ଆଞ୍ଚିନାକ୍ ଇନ୍ତେ ଆଞ୍ଜ୍ ମିରିତଡ଼୍ ଇଞ୍ଜ୍ ହାଲ୍ସି ଅଡ଼କିଂଙ୍କ୍ ଆଞ୍ଜ୍କାନ୍ ସେଙ୍ଗେ ସୈନିକିଡ଼୍ ବିଚାର ମାଡ଼ତଡ଼୍ ।

୪୩ ଇଡ଼କେ ସେନାପତି ପାଉଲ୍ତେ ଜିଝୁଣ୍ଡ୍ ଗେନ୍ଥାନଙ୍କ୍ ହାଲ୍ସି ମାଡ଼ତଣ୍ଡ୍; ଆଦିଙ୍କ୍ ଅଣ୍ଡ୍ ସୈନିକିଡ଼୍ ଆଗାଙ୍କ୍ ମନା ମାଡ଼ତଣ୍ଡ୍ ।

* ୨୭:୪୦ ଷ୍ଟିଆରିଙ୍କ୍ ଜାହାଜ୍ତିଙ୍କ୍ ତାଲା ମାଡ଼ାନାଦ୍, ବା ହେଣ୍ଡେଲ୍

ଇନ୍ଦ୍ର ଆଦି ପାରତେନତ୍, ସାରେତତ୍ ଇନ୍ଦ୍ର ଆଞ୍ଜି ବୃନ୍ ଆଞ୍ଜିନାକ୍
ଆଦାନଙ୍କ କେତତ୍ତ୍,

୪୪ ମେଣ୍ଡେ ମାତେତ୍ ପାଟା ବା ଜାହାଜ୍ତାଗ୍ ଉରୁଙ୍ଗ୍ତେ ଦୁଡାଙ୍କ
ପଇସ୍ ବୃନ୍ ଆଞ୍ଜିନାକ୍ ଆଦାନଙ୍କ ମେଣ୍ଡେ ବାଗାତଡ଼କିଙ୍କ କେତତ୍ତ୍ ।
ଇଦ୍ ରକମ୍ ମାମ୍ମେ ସାରେତମ୍ ଗେନ୍ତାନଙ୍କ ଗପିନାଗ୍ ଆଞ୍ଜି ଏଞ୍ଜୁତମ୍
।

୨୮

ମାଲଟା ଗପ୍ତାଗ୍ ପାଉଲ୍

୧ ବାଡ୍ ଅସୁବିଦା ଆୟ୍ଯକଟ୍ ଗେନ୍ତାନଙ୍କ ଆଞ୍ଜିନାଗ୍ ଏଞ୍ଜୁସ୍
ଉଡ଼ତମ୍ ଯେ, ମାମ୍ମେ ମାଲଟା ଗପ୍ତାଗ୍ ଏଞ୍ଜୁତମ୍ ।

୨ ଆଗେତ୍ ଗ୍ରାକ୍ ଗଟ୍ ପୁନ୍ତେ ମୁନେତ୍ ନାରୁଡ଼୍ ମାକିଙ୍କ ଲେକେତ୍
ଉଡ଼ତତ୍ । ଆସୁଟେ ଖାସ୍ତାମ୍ ଖାସ୍ ଶାଲ୍ କାଲାମ୍ ଆସ୍ତା ମାଡ଼ତେ
। ଆଦିଙ୍କ ଅଡ଼୍ କିସ୍ ନିଡ଼ସ୍ପି ମାକିଙ୍କ କାରୁଙ୍ଗୁତତ୍ ।

୩ ପାଉଲ୍ ମପେନ୍ ଝେରକି ତେଇସ୍ କିସ୍ତାଗ୍ ଖାଟାନଙ୍କ ଆଦାନ
ଝେଲେ ଆଗାକନ୍ସ୍ ଅଣ୍ଡୁୟ୍ ତାଡାମ୍ ପେୟ୍ତେ ନୁ କାମ୍ବିତାଗାଙ୍କ
ରକ୍ଷା ପାଏମ୍ ଆଦାନ ସେଙ୍ଗେ ଅନ୍ କାୟ୍ଦେ ପରର ତାର୍ତ୍ତ ଆଗେ
କାସି ଉଡ଼ତି ମାଡ଼ତେ ।

୪ ଆଗେତ୍ ମୁନେତ୍ ନାରୁଡ଼୍ ପାଉଲ୍ତେ କାୟ୍ଦାଗ୍ ଉଙ୍ଗାମାନ୍ଦାନ୍
ତାଡାତିଙ୍କ ଉଡ଼ି ତାମ୍ତାମ୍ କେତତ୍ତ୍, “ଇଣ୍ଡ ନିଜାମ୍ ଝେରଣ୍ଡ
ମାନେୟ୍ ହାଞ୍ଜକାନଣ୍ଡ, ବେଲାଆୟ୍ ଅଣ୍ଡ ଗଦାଡ଼ତାଗ୍ ସିନା
ଗେନ୍ତାନଙ୍କ ପାଏମ୍ ଆଡ଼ତଣ୍ଡ ଇଡ଼କେ ବାଗ୍ଝାନ୍ତାଗାଙ୍କ ଅଣ୍ଡ ଜିଞ୍ଜେ
ବାଦ୍‌କାନଙ୍କ ପାର୍ଝଣ୍ଡ ।”

୫ ଇଡ଼କେ ପାଉଲ୍ ନିଜେ ପୁଣ୍ଡ ଆୟ୍ଯକଟ୍, ତାଡାମ୍ ତିଙ୍କ କିସ୍ତାଗ୍
କାୟ୍ସିଡ଼ତଣ୍ଡ ।

୬ ପାଉଲ୍ତେ ମେନ୍ଦୁଲ୍ ତୟ୍ଡ କି ଅଣ୍ଡ ତଲି ନେଲ୍ ରାୟ୍ଡତଣ୍ଡ ଇଞ୍ଜ
ଆଲ୍‌ସି, ଅଡ଼ ସୁଦୁର୍ ସମୟ୍ କେପ୍ତତ୍ । ଇଡ଼କେ ନାର୍ଗେ ସମୟ୍
କେପି ଉଡ଼ତତ୍ ଯେ, ପାଉଲ୍‌ତିଙ୍କ ବାଡ଼ମିକା ଆୟ୍ଯ, ଅଡ଼ ଗଟ୍‌ତିଙ୍କ
ବାଦ୍‌ଲା ମାଡ଼ି କେତତ୍ତ୍, “ଇଣ୍ଡ ଝେରଣ୍ଡ ବାଗ୍ଝାନ୍ ଲେକେତ୍ ନାରୁଣ୍ଡ
!”

୭ ଆଗାଙ୍କ ସୁଦୁର୍ ଜେକେ ଆଦ୍ ଗପ୍ତେ ପେଦେର୍ ବେଡ଼ିୟି
ରାଜ୍‌କର୍ମଚାରୀ ପଲ୍ଲିୟ୍‌ସ୍ତେ ଖାୟେ ମାଡ଼ତେ । ଅଣ୍ଡ ମାକିଙ୍କ ସ୍ବାଗତ୍

ମାତୃତଣ୍ଡୁ ନୁ ମାମ୍ମେ ମୁଣ୍ଡ ଦିନା ଯାକ କୁଟ୍‌ମାମ୍ ଲେକାମ୍ ତାମ୍
ଲୋନ୍ ମାତୃତମ୍ ।

୮ ପକ୍ଷିୟସ୍ତେ ବାବାଙ୍କ ହେଡ୍‌କ୍ ନୁ ଡଙ୍ଗେନପ୍ ଆସ୍ ମାତୃତାଙ୍କ
ଅଣ୍ଡ କାଟୁଲ୍‌ତାଗ୍ ପାଟି ମାତୃତଣ୍ଡୁ । ପାଉଲ୍ ଅନ୍ ରୁମ୍‌ତାଗ୍ ଆତୃତଣ୍ଡୁ,
ଅନ୍ ସେଙ୍ଗେ ପ୍ରାର୍ଥନା ମାଡି ଅନ୍ ପରର କାୟ୍ ଖାଟି ଅଂକିଙ୍କ୍ ସାୟେ
ମାତୃତଣ୍ଡୁ ।

୯ ଇଦିନ୍ ପେରକେ ଆଦ୍ ଗପ୍‌ତେ ରୋଗୀଡ୍, ସାରେତଡ୍,
ପାଉଲ୍‌ତେ ବକେଡ୍ ଖାସ୍ ସୁସ୍ଥ ଆତୃତଡ୍ ।

୧୦ ଅଡ୍ ମାକିଂଙ୍କ୍ ନାରଗେ ଉପହାର୍ ହିଡ୍‌ତଡ୍ ନୁ ମାମ୍ମେ ଆଗାଙ୍କ୍
ଜାହାଜ୍‌ତାଗ୍ କୁଦି ଆଦାନ୍ ଖେଲେ ମାକିଂଙ୍କ୍ ଦରକାର୍ ଜିନିଷ୍ ସାରେ
ଅଡ୍‌ତାସ୍ ଜାହାଜ୍‌ତାଗ୍ ଖାଟିଡ୍‌ତଡ୍ ।

ମାଲ୍‌ଟାତାଗାଙ୍କ୍ ରୋମ୍ ଦେଶ୍ ଆତୃତଡ୍

୧୧ ଆଲେକ୍‌ଜାଣ୍ଡ୍ରିଆ ତାଗାଙ୍କ୍ ଖାସ୍‌ମାୟାନ୍ “କାଝୁଲେ ଦେୟାକ୍,”
ପେଦେରଡେ ଅଣ୍ଡୟ୍ ଜାହାଜ୍ ମାଲ୍‌ଟା ଗପ୍‌ତାଗ୍ ଗାଲ୍ କାଲାମ୍
ଜିଡ୍‌ନା ମାତୃତେ । ଗପ୍‌ତାଗ୍ ମୁଣ୍ଡ ନେଲ୍‌ଞ୍ଜ୍ ମାତୃତେ ପେରକେ
ମାମ୍ମେ ଆଦ୍ ଜାହାଜ୍‌ତାଗ୍ କୁଦି ଆତୃତମ୍ ।

୧୨ ମୁନେନ୍ ସିରାକ୍ୟୁସ୍ ଟାଝୁନ୍‌ତାଗ୍ ଏଝୁସ୍ ଆଗେ ମୁଣ୍ଡ ଦିନା
ମାତୃତମ୍ ।

୧୩ ଆଗାଙ୍କ୍ ମେଣ୍ଡେ ଆଞ୍ଜ୍ ମାମ୍ମେ ରିଜିୟମ୍ ଟାଝୁନ୍‌ତାଗ୍ ଏଝୁତମ୍
। ମେଣ୍ଡନ୍ ଦିନ୍ ତିନ୍ଦେପାକ୍ କନ୍‌ସ୍ ଗାଲ୍ ଖାତଡେ ନୁ ମେଣ୍ଡେ ରେଣ୍ଡ୍
ଦିନା ପେରକେ ପୁତିଓଲି ଟାଝୁନ୍‌ତାଗ୍ ଏଝୁତମ୍ ।

୧୪ ଆଗେ ବେସ୍‌କ୍‌ତୁଡ୍ କ୍ରିଷ୍ଟ ବିଶ୍ୱାସୀଡ୍ ତଡ୍ କାଇଲ୍‌ତମ୍ । ତାମ୍
ତଡ୍ ଅଣ୍ଡୟ୍ ଆଟ୍ ମାୟାନ୍ ସେଙ୍ଗେ ଅଡ୍ ମାକିଂଙ୍କ୍ ଅନୁରଦ୍ ମାତୃତଡ୍,
। ପେରକେ ରୋମ୍ ଟାଝୁନ୍‌ତାଗ୍ ଆଞ୍ଜ୍ ଏଝୁତମ୍ ।

୧୫ ମାଝାଦ୍ କବର୍ ପାଏମ୍ ଆସ୍ ରୋମ୍‌ତେ ବିଶ୍ୱାସୀ ଦାଦାଲଡ୍
ନୁ ଏଲାସ୍ମି ମାକିଂଙ୍କ୍ କାଇଲାନ୍ ସେଙ୍ଗେ “ଆପୀୟ୍ ହାଟ୍ ନୁ ମୁଣ୍ଡ
ଦୁକାନ୍,” ପେଦେରଡେ ଟାଝୁନ୍‌ତାଗ୍ ଖାତଡ୍‌ତଡ୍ । ଅଡ୍‌କିଂଙ୍କ୍ ଉଡି
ପାଉଲ୍ ଇଶ୍ୱରତିଙ୍କ୍ ଦନ୍‌ଏଦାଦ୍ ହିଡ୍‌ତଣ୍ଡୁ ନୁ ଗାଟି ଖେଡ୍‌କ୍‌ତଣ୍ଡୁ ।

ରୋମ୍ ନଗରୀତାଗ୍ ପାଉଲ୍

୧୭ ମାମ୍ମାମେ ରୋମ୍‌ତାର୍ ଏଝୁତେ ପେରକେ, ପାଉଲ୍‌ତିଙ୍କ ଆନୁମତି ଦରକ୍‌ତେ ଯେ, ଅଂକିଙ୍କ କେପାନ୍ ସେଙ୍ଗେ ମାୟାନ୍ ସୈନିକ୍ ତତ୍‌ଅଣ୍ ନିଜେତ୍ ଇଚ୍ଛାତେ ବେଗେଆୟି ମାୟାନଙ୍କ ପାର୍‌ଦତ୍ତ୍ ।

୧୮ ମୁଣ୍ଡ ଦିନା ପେରକେ ପାଉଲ୍ ଆଗେତ୍ ଇହୁଦୀ ନେତାଲ୍‌ତ୍‌କ୍ ଅଣ୍ଡୟ୍ ସବାତାର୍ କାର୍‌ଜ୍‌ତ୍ତ୍ । ଅତ୍‌ଅଣ୍ଡୟାଗେ ଗୁଡ୍‌ତାଙ୍କ ପାଉଲ୍ ଅତ୍‌କିଙ୍କ କେତ୍‌ତତ୍ତ୍; “ଇଶ୍ରାଏଲ୍‌ତେ ଦାଦାଲ୍‌ତ୍, ମାନ୍ ନାରୁଡ୍ ବିରୁଦ୍‌ତେ କି ମାନ୍ ଆନିଦାଦିତ୍ ନିୟମ୍ ବିରୁଦ୍‌ତେ ନାନ୍ ବାତ୍ ମାତ୍‌କର୍ ମାତ୍‌କେ ମିକା, ଯିରୁଶାଲେମ୍‌ତାର୍ ବନ୍ଦି ଆସ୍ ରୋମାୟ ନାରୁଡ୍ କାୟ୍‌ଦାର୍ ସର୍ପା ଆଡ୍‌ତାନ୍ ।

୧୯ ନାକିଙ୍କ ପାରାମାଡ୍‌ତି ତଲାନ୍‌ଦଣ୍ଡ ପାଏମ୍ ଆଦାନ୍ ଲେକାମ୍ ନାନ୍ ବାତ୍ ଅପରାଦି ମାଡନ୍ ଇଞ୍ଜ ପୁଞ୍ଜ ରୋମାୟ ନାରୁଡ୍ ନାକିଙ୍କ ମୁକ୍ତି ହିଦାଙ୍କ ହାଲ୍‌ସି ମାଡ୍‌ତତ୍ ।

୨୦ ଇଡ୍‌କେ ଇହୁଦୀଡ୍ ଉପବାସ୍ ଇଦିନ୍ ବିରୁଦ୍ ମାଡ୍‌ତାଙ୍କ, ନା ନିଜେତ୍ ଦେଶ୍‌ତେ ବିରୁଦ୍‌ତେ ନାୟାଦ୍ ବାଡ୍‌ମିକା ଅବିଯୋଗ୍ ଇଲ୍‌ଝାଙ୍କ, ନାନ୍ ମହାରାଜାଙ୍କ ଆବେଦନ୍ ମାଡ୍‌ତନ୍‌କ୍ କେଡ୍‌ତାନ୍ ।

୨୧ ଆଦିନ୍ ସେଙ୍ଗେ ନାନ୍ ଇଦ୍ ବିଷୟ୍‌ତିଙ୍କ୍ ତିରୟାନଙ୍କ୍ ମିକିଙ୍କ୍ କାର୍‌ଜ୍‌ ଅନୁରଦ୍ ମାଡ୍‌ତନ୍ । ବେନନ୍ ପର ଇସ୍ରାଏଲ୍ ନାରୁଡ୍ ଆଗେ ମାଡ୍‌ମିୟେଡ୍, ଅନ୍ ସେଙ୍ଗେ ନେଣ୍ଡ ନାନ୍ ଇକ୍‌ଲେମ୍ ତଃହସ୍ ମିୟେନ୍ ।”

୨୨ ଅତ୍‌ଅଂକିଙ୍କ କେଡ୍‌ତତ୍, “ମାମ୍ମାମେ ଯିହୁଦା ଦେଶ୍ କନ୍‌ସ୍ ନି ବିଷୟ୍‌ତେ ବାତ୍ ଚିଟି ଦର୍କ୍, କି ନିୟାଦ୍ କାରୁର୍ ଅସ୍ ନି ବିଷୟ୍‌ତେ ବାତ୍ ଅବିଯୋଗ୍ ମାଡ୍ କେଡ୍‌ତାନ୍ ସେଙ୍ଗେ ମା ଦାଦାଲ୍‌ତ୍ ତାମୁଣ୍ ଲୋପେ ବେନ ଇଗେ ଝାଡ୍‌ଣ୍ ।

୨୩ ଆଦ୍ ବାଡ୍‌ଆୟି ମାମ୍ମାମେ ନିୟାଦ୍ ଗଟ୍ କେଞ୍ଜିତମ୍, ବାଡେଙ୍କ୍‌ଇଡ୍‌କେ ସାରେତାର୍ ନାରୁଡ୍ ନି ମାୟେ ବିରୁଦ୍‌ତେ ଗଟ୍ କେଡ୍‌ତତ୍ ।”

୨୪ ଅତ୍‌ଅଣ୍ଡୟ୍ ଦିନ୍ ଟିକ୍ ମାଡ୍‌ତତ୍ ନୁ ଅତ୍‌ଆଗାଙ୍କ୍ ନାର୍‌ଗେ ଆଦ୍ ନାଣ୍ ପାଉଲ୍ ମାୟାନ୍ ପଡ୍‌ୟେତାର୍ ଝାଡ୍‌ତତ୍ । ନାର୍ କନ୍‌ସ୍ ନାର୍‌କେଡ୍ ଯାକ ପାଉଲ୍ ଅତ୍‌କିଙ୍କ୍ ଇଶ୍‌ବରତେ ରାଜ୍ୟ ବିଷୟ୍

କେତେଦାନୁ ନୁ ମୋଶାନ୍ ନିୟମ୍ ନୁ ବାବବାଦୀତ୍ ଲେକାତାଗାଙ୍କ ବାକ୍ୟ
କେସ୍ ଜିସୁନାଗ୍ ଅଡ଼କିଂଙ୍କ ବିଶ୍ୱାସ୍ ମାଡ଼ାନଙ୍କ ତେଷ୍ଟା ମାଡ଼ତଣ୍ଡ ।

୨୪ ଅଡ଼ ଲୋପେଙ୍କ ବେସ୍ କହୁଡ଼ ବିଶ୍ୱାସ୍ ମାଡ଼ତଣ୍ଡ, ଇଡ଼କେ
ମେଣ୍ଡେ ବାଗାତଡ଼ ବିଶ୍ୱାସ୍ ମାଡ଼ତଣ୍ଡ ।

୨୫ ଇଡ଼ ବିଷୟତେ ଅଡ଼ ଗାଟି ରାମ୍ କ ଆଦତଡ଼ । ଅଡ଼ ଆଦାନ
ମୁନେନ୍ ପାଉଲ୍ ଅଣ୍ଡୟ ଗଟ୍ କେଡ଼ତଣ୍ଡ, “ପବିତ୍ର ଆମ୍ ନିଝଡ଼,
ଆନିଦାଦୀତ୍ ବାବବାଦୀ ଯିଶାୟନ୍ ପାୟୁରତାଲା ନିଜାତେ ଗଟ୍
କେସ୍ ମାଡ଼ତଣ୍ଡ !

୨୬ ଅଣ୍ଡ କେସ୍ ମାଡ଼ତଣ୍ଡ, ‘ଇଡ଼ ନାରୁଡ଼କିଂଙ୍କ ଆଞ୍ଜ କେଲମ୍, ମିଡ଼
କେଞ୍ଜିଡ଼ିଡ଼, ଗାଟି କେଞ୍ଜିଡ଼ିଡ଼ ଇଡ଼କେ ବୁଜେମ୍ ଆୟୁଡ଼ିଡ଼ । ମିଡ଼ କଣ୍ଡା
ନାଆକି ମାନଡ଼ିଡ଼, ଇଡ଼କେ ଉଡ଼ାନଙ୍କ ପାରୁଡ଼ିଡ଼ ।

୨୭ ବାତେଙ୍କ ଇଡ଼କେ ଇ ନାରୁଡ଼ତେ ହୁଦୟ ଜାମ୍ ବୁଜେମ୍ ଆଦତଡ଼,
ମେଣ୍ଡେ ଅଡ଼ ତାମ୍ ଖା କଣ୍ଡା ନୁ କେଝକ୍ ବନ୍ଦ୍ ମାଡ଼ତଣ୍ଡ, ଆଦ୍
ଆୟୁୟକଟ୍ ମାଡ଼କେ, ଅଡ଼ କଣ୍ଡା ତେରସ୍ ଉଡ଼ାନଙ୍କ ପାରୁଡ଼ିଡ଼,
। ଅଡ଼ାଦ୍ ତାଲ୍ ତାଗ୍ ବୁଜେମ୍ ଆଦଦାନ ଶକ୍ତି ମାନନେଡ଼; ଅଡ଼
ଇଶ୍ୱରତେ ପାକେ ମାଲ୍ ସ୍ ଆନେଡ଼ ନୁ ନାନ୍ ଅଡ଼କିଂଙ୍କ ସାୟେ ମାଡ଼େନ୍
।”

୨୮ ମାଡ଼େଙ୍କ ପାଉଲ୍ କେଡ଼ତଣ୍ଡ, “ମିଡ଼ ପୁଞ୍ଜମାନୁଟ୍, ମୁକ୍ତି ସେଙ୍ଗେ
ଇଶ୍ୱରତେ ସାୟେଡ଼ କାରୁର ଅଶଇହୁଦୀଡ଼ ବକେଡ଼ ରଅତଡ଼ । ଅଡ଼
ଆଦ୍ କେଞ୍ଜିଡ଼ିଡ଼ ।”

୨୯ ପାଉଲ୍ ଇଝୁସାରେ ଗଟି କେଡ଼ତେ ପେରକେ, ଇହୁଦୀଡ଼,
ତାମ୍ ତାମ୍ ରାମ୍ କ ଆସ୍ ବେନନଣ୍ଡ ଲୋନ୍ ମାଲ୍ ସ୍ ଆଡ଼ତଡ଼ ।

୩୦ ପାଉଲ୍ ଅଣ୍ଡୟ ଲୋନ୍ ବାଡ଼ା ଅସ୍ ରେଣ୍ଡ ହେଣ୍ଡକ୍ ଯାକ
ମାଡ଼ତଣ୍ଡ ନୁ ଅଂକିଙ୍କ ଉଡ଼ାନଙ୍କ ଖାଦାନଡ଼ ସାରେତଡ଼କିଂଙ୍କ ଅଣ୍ଡ ସ୍ୱାଗଡ଼
ମାଡ଼ମାଡ଼ତଣ୍ଡ ।

୩୧ ଆରାମ୍ ତେ ନୁ ସାହାସ୍ ତଡ଼ ଅଣ୍ଡ ଇଶ୍ୱରତେ ରାଜ୍ୟ ବିଷୟ
ପ୍ରଚାର ମାଡ଼ି ପ୍ରବୁ ଜିସୁ କ୍ରଷ୍ଟନ୍ ବିଷୟ ଶିକ୍ଷା ହିସମାଡ଼ତଣ୍ଡ ।

ପୁନାବ୍ ଆର୍ବ୍
The New Testament in the Koya language of India:
ପୁନାବ୍ ଆର୍ବ୍ (Bible)

copyright © 2020 The Word for the World International and Koya Translation Samithi, Malkangiri, Odisha

Language: (Koya)

Contributor: The Word for the World South Asia

ପୁନାବ୍ ଆର୍ବ୍
ପୁନାବ୍ ନିୟମ୍ , 2020

The New Testament in Koya Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-07

PDF generated using Haiola and XeLaTeX on 6 May 2025 from source files dated 7 May 2025

72ff5787-bb80-584b-a1a0-0acd8a2fefae